


# Kote New Testament



Portions of the Holy Bible in the Kote Language of  
Mozambique

**Kote New Testament**  
**Portions of the Holy Bible in the Kote Language of Mozambique**  
**Porções da Bíblia Sagrada no Kote Língua Moçambique**

copyright © 2005-2008 Wycliffe Bible Translators, Inc.

Language: Kote

Translation by: Wycliffe Bible Translators

O utilizador pode copiar e distribuir a obra.

You may copy and distribute the work.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

    You include the above copyright and source information.

    You do not sell this work for a profit.

    You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-06-30

---

PDF generated using Haiola and XeLaTeX on 25 Nov 2022 from source files dated 9 Oct 2020

7eacf624-a9f0-59bc-b7bf-b6190a381fc4

## Contents

|                                |     |
|--------------------------------|-----|
| Matewuzhu . . . . .            | 1   |
| Maaruku . . . . .              | 50  |
| Luuka . . . . .                | 80  |
| Yaahaya . . . . .              | 138 |
| Khaazi za Maswihaapa . . . . . | 179 |
| 1 Timootiyu . . . . .          | 198 |

## Matewuzhu

*Ntathaari wa mazina a ojama wa Yinsa*

<sup>1</sup> Eti warakha ya peewu na mazina aya a amarehemu a phantte ya Yinsa Al-Masiihu, peewu ya Daawuuda na Eburahiima.

<sup>2</sup> Eburahiima khunvokola Esiyaakha;

Esiyaakha khunvokola Yaakhumpa;

Yaakhumpa khunvokola Yuuda na attwiize;

<sup>3</sup> Yuuda khunvokola Pereezi na Zeera,

mamaawe aari Tamaara;

Pereezi khunvokola Hezorooni,

Hezorooni khunvokola Arawu;

<sup>4</sup> Arawu khunvokola Aminataapi;

Aminataapi khunvokola Nashooni;

Nashooni khunvokola Salimooni;

<sup>5</sup> Salimooni khunvokola Bowaazi,

mamaawe aari Rahaape;

Bowaazi khunvokola Obeedi,

mamaawe aari Ruuti;

Obeedi khunvokola Yeese;

<sup>6</sup> na Yeese khunvokola mfwalume Daawuuda.

Daawuuda khunvokola Seleyimaana,

mamaawe aari muukha wa Uriiya;

<sup>7</sup> Seleyimaana khunvokola Ropowaawu;

Ropowaawu khunvokola Apiiya;

Apiiya khunvokola Aasa;

<sup>8</sup> Aasa khunvokola Zhuzaafwa;

Zhuzaafwa khunvokola Joraawu;

Joraawu khunvokola Uziiya;

<sup>9</sup> Uziiya khunvokola Jotaawu;

Jotaawu khunvokola Akaaze;

Akaaze khunvokola Ezakiya;

<sup>10</sup> Ezakiya khunvokola Manaase;

Manaase khunvokola Amooni;

Amooni khunvokola Joziiya;

<sup>11</sup> Joziiya khunvokola Jekoniiya na attwiize,

wakathi eekareliweeyo Babilooniya.

<sup>12</sup> Paata ya weettaniwa Babilooniya:

Jekoniiya khunvokola Sheyalitiyeeli; Sheyalitiyeeli khunvokola Zoroba-beeli; <sup>13</sup> Zorobabeeli khunvokola Apiwuute;

Apiwuute khunvokola Eliyakhimu;

Eliyakhimu khunvokola Azoori;

<sup>14</sup> Azoori khunvokola Satookhi;

Satookhi khunvokola Akiini; Akiini khunvokola Eliwuuti;

<sup>15</sup> Eliwuuti khunvokola Eliyazaari;

Eliyazaari khunvokola Maata;

Maata khunvokola Yaakhumpa;

<sup>16</sup> na Yaakhumpa khunvokola Yuusufu,

manna wa Mariyamu,  
otule anvokoliyeeyo Yinsa,  
othuuto aniiithiwaaye Al-Masiihu.

<sup>17</sup> Khwa ethiipo waaviriye ojama khumi na nne waaza va Eburahiima mpakha Daawuuda, na khumi na nne waaza va Daawuuda mpakha va okholiwa olawaniwa Babilooniya, na khumi na nne waaza Babilooniya mpakha va ovokoliwa wa Yinsa.

*Ovokoliwa wa Yinsa Al-Masiihu*

<sup>18</sup> Ovokoliwa wa Yinsa Al-Masiihu pi toono. Mariyamu ari wooposiwa ti Yuusufu ahinarapalelane, khwiimitta khwa Rooho Ttakatthiifu. <sup>19</sup> Ila Yuusufu, mposi awe, khwiya ntthu wa shariya na woohitakhi ontwayifusha, ye khulakela sirini okayiri onrala. <sup>20</sup> Ila, paata ya wupuwela vitthu epile, khumpuwelela nlayikha la Mbwana nkatti wa olotta, khumuza yoori: “Yuusufu, mwaana wa Daawuuda, ohoove ompokhera Mariyamu wiiya muukhaawo, maana ye eemittha khwa Rooho Ttakatthiifu. <sup>21</sup> Ye onteela ompattha mwaana, weeyo ontthaje nzina la Yinsa, maana ye onteela owoosuru atthu awe khwa twampi zaya.”

<sup>22</sup> Zooshi epo enteela orettikhana yoori ziretteye zooshi epile Mbwana alupiyeeyo khwa napiyu yoori: <sup>23</sup> “Mwaari onteela wiimittha ampatthe mwaana, anttelaaaye wiitthiwa Emanuweele, enlupaaye yoori ‘Nluku ori vamote na fweeyo’.”

<sup>24</sup> Paata ya olankha, Yuusufu khuretta etile nlayikha la Mbwana laamuzyeeyo khumpokhera Mariyamu muukhaawe. <sup>25</sup> Ye khaarapale-laniye mpakha ompattha mwaana. Khuntthaja nzina la Yinsa.

## 2

*Othotola wa ajuwi a matthottowa*

<sup>1</sup> Paata ya Yinsa ovokoliwa Belemu ya Yudeya yenzi ya mfwalume Herooti, ajuwi alankhiye malawa-juwa khuta Yeruzaleemu. <sup>2</sup> Khuuzela yoori: “Mwaana ntteetthe otu avokoliweeyo, mfwalume wa mayaahuuti ori vayi? Fweeyo noona ntthottowa lawe malawa-juwa nateela omwaa-putu.”

<sup>3</sup> Wakathi mfwalume Herooti asiiliyeovo epo zaya, khwiya woovelavela, na atthu ooshi a Yeruzaleemu. <sup>4</sup> Aphano khuwaakusanya mahaakhimu a tiini ooshi na anamanozela a kano, khuwoozela vayi aari weettelaawo ovokoliwaho Al-Masiihu. <sup>5</sup> Yo khunjipu yoori: “Belemu ya Yudeya, maana napiyu aatikha toono:

<sup>6</sup> ‘Weeyo Belemu,  
ya nti wa Yudeya,  
weeyo hatha vattithiiru khahi owoohafwiifweya  
khwa sitati khuulu za Yuuda,  
maana khwa weeyo onteela opuwa mfwalume  
anttelaaaye oweettettisa atthu aka a Ezirayilu.’ ”

<sup>7</sup> Herooti khuwaakhuwela ajuwi sirini khuwoozela wakathi laa-puviyeeyo ntthottowa nttho. <sup>8</sup> Aphano khuwaaruma Belemu awoozaka yoori: “Mwilawe mweekese ojuwa saaneene monkoni wa mwaana

oto, na amana mwinsikana, mwite mwikuuze yoori na miiyo kilawe kamwaaputu.”

<sup>9</sup> Paata ya onsiila mfwalume yo khusala alawa, ntarikhi khoona ntthottowa ntintthile ooniyeeyo malawa-juwa, khulokoza khulawa khweemela puuro etile aariivo mwaana. <sup>10</sup> Noorutela woona ntthottowa ntthile, khwiya oofurahi venkivene. <sup>11</sup> Khuvira nnyupa mphule khunsikana mwaana na Mariyamu mamaawe, khukokhora khumwaa-putu. Nawiisha, khufukula maphuta aya khumwinkha tthuvo: Thahapu, ovupa, na mafuttha oonukhela. <sup>12</sup> Khuuziwa muulottha yoori ahirutele wa Herooti, khurutela owaya khwa tarikhi kiina.

### *Ottihirela Misuri*

<sup>13</sup> Paata ya ajuwi olawa, nlayikha la Mbwana khumpuwelela Yuusufu muulottha khumuza yoori: “Olankhe, onthuule mwaana oto na mamaawe, ottihirele Misuri. Weekhale ottuukho mpakha miiyo kiwuuze, maana Herooti onteela omweekesa mwaana oto yoori amuule.”

<sup>14</sup> Aphano ye khulankha, khunthuula mwaana na mamaawe osikhu, khweetta Misuri. <sup>15</sup> Ottuukho eekhaliyeeyo mpakha Herooti ofwa. Khwa ethhiipo khuretteya etile Mbwana alupiyeeyo khwa napiyu yoori: “Kankhuwela mwanaka aari nti wa Misuri.” <sup>16</sup> Herooti ooniyeeyo yoori attettekhiwa ti ajuwi, khwiya wookatipukha, khurma wuuliwa aana ooshi a nyaakha miwiri zeettaka vathi, Belemu na miti zawaat-tamanana nkhamma wakathi otthuupo ooziweeyo pi ajuwi. <sup>17</sup> Aphano khurettikhana epile zaalupiweeyo ti napiyu Yeremiyya: <sup>18</sup> “Khusileya huula nti wa Rama ya olila na ojikhupanyisa nwulweene; aari Rakeele awaalilelaka aana awe akaththalaka ozurwiwa, mwaasa wa ooshi ofwa.”

### *Orutela Ezirayiilu*

<sup>19</sup> Paata ya Herooti ofwa, nlayikha la Mbwana khumpuwelela Yuusufu muulottha Misuri, <sup>20</sup> khumuza yoori: “Olankhe, onthuule mwaana na mamaawe, olawe Ezirayiilu, maana apale aari otakhaaye omuula afwa.” <sup>21</sup> Ye khulankha, khunthuula mwaana na mamaawe, khweetta nti wa Ezirayiilu <sup>22</sup> Ila noosiila yoori Arikileewu mwaana wa Herooti ti asalaniyeeyo ofwalume wa papaawe, khwiya wa woova weettawo. Nawuuziwa muulottha, khweetta nti wa Kalileya. <sup>23</sup> Khusala eekhala sitati eniitthiwaaye Nazareti, yoori erettikhane epile zaalupiweeyo pi manapiyu araka: “Ye onteela wiithiwa Nnazare.”

## 3

### *Yaahaya Namoosa Ontthenkeza Tarikhi*

<sup>1</sup> Siikhu zaya epile khupuwa Yaahaya Namoosa, alaleyaka n'yaara ya Yudeya. <sup>2</sup> Ye aari okhuwa araka: “Mwithupwiye, Ofwalume wa pinkuuni ori kharipu.” <sup>3</sup> Maana otu ti otule alupiweeyo ti napiyu Ezaaya yoori: “Huula enkhuwa n'yaara eraka: ‘Mwitthenkeze tarikhi ya Mbwana na mookolele miphiiitelo zawe.’”

<sup>4</sup> Kuwo za Yaahaya zaattalaniwe ovazi wa nkamiiya, na aari ovalaka nzako wa shapala n'yuunu. Etthu yoojiwa yawe aari mapalaka na asali ya ntthuttu. <sup>5</sup> Atthu a nti wa Yeruzaleemu na a Yudeya na miti zooshi za nkerekhere ya Yorotaani aari onteela ye. <sup>6</sup> Yo aari otukhuru twampi zaya, nawoosiwa ti Yaahaya mmuttho Yorotaani.

<sup>7</sup> Wakathi ye awooniyeeyo mafwarizeewu na masatukhi enkeene ataaka aphale aari woosaavo, khuwooza yoori: “Ojama wa evili! Ti paani awuuziyeeni otthira katapu entaaye? <sup>8</sup> Mwithoonyeze khwa khaazi zenu yoori weekhwhee mwathupwiya twampi zenu! <sup>9</sup> Khahiyu olupa yoori: ‘Eburahiima ti marehemu papeetthu,’ ila miiyo kiniwuzani yoori, khwa liwe ntthi Nluku onwahi owaattala aana a Eburahiima. <sup>10</sup> Nshokha lanoliwa latthiwa nshini wa mitathaari za miitthi. Wakhula muutthi ohiniimaaye mishumo zooshapweya ontta oshijiwa weeseleliwe va moottho.

<sup>11</sup> “Miiyo kiniwoosani na maati khwa othoonyeza othupwiya wa twampi zenu. Ila paata ya miiyo onta ntthu ariinaaye owahi zayita miiyo, hatha akinsuhu shitaha yawe wala akina makhaamu oothuula jampali zawe. Ye onttela owoosani na Rooho Ttakatthiifu na moottho. <sup>12</sup> Ye ontana fosholo mmakhono mwawe onteela ophakula tiriku na maveya. Tiriku atthe va sakafu vawe, maveya akhoze va moottho ohinzimaaye.”

### *Woosiwa wa Yinsa*

<sup>13</sup> Aphano Yinsa khulankha Kalileya khuta o Muuttho Yorotaani oteela woosiwa ti Yaahaya. <sup>14</sup> Yaahaya khusala atakha okatthala araka: “Miiyo ti kinhhajiyi woosiwa ti weeyo, onikiteela toovi miiyo?” <sup>15</sup> Ila Yinsa khunjipu yoori: “Olikhe ethiipo, yoori erettikhane shariya yooshi.” Yaahaya khukhupalela. <sup>16</sup> Yinsa nawoosiwa, khuvuuwa, nasaapiru pinku khufukuwa, khoona Rooho Ttakatthiifu yiishukhaka nkhamma jiwa khummorela. <sup>17</sup> Huula ya olankha pinkuuni khuri: “Otu mwanaka wompheta, na wookituvela channu!”

## 4

### *Ozayiniwa wa Yinsa*

<sup>1</sup> Aphano Yinsa khuthuuliwa ti Rooho Ttakatthiifu khweettaniwa n’yaara, yoori alawe azayiniwe ti sheethwani. <sup>2</sup> Paata ya ofuka siikhu arupayiini nthana na osikhu, khunkhola jala <sup>3</sup> Aphano Sheethwani khumwaattama khumuza yoori: “Nkhama weeyo o Mwaana wa Nyizinkhu, orume mawe apo athatuwe eeye phaawu.”

<sup>4</sup> Ila Yinsa khunjipu araka: “Yaatikhiwa yoori: ‘Khahiyu phaawu paasi enimwinkhaaye ntthu ohaayi, ila ntthakhuzi looshi linlankhaaye nkhangyo wa Nluku.’” <sup>5</sup> Elottelanaka, sheethwani khumweettana sitati ttakatthiifu, khunweza phantte yawiishela olepa ya Nyuupa Yoosifwawamo, <sup>6</sup> khumuza yoori: “Nkhama o mwaana wa Nluku, ojeeselele vathi aphale. Maana yaatikhiwa yoori: ‘Ye onta oruma malayikha awe awiinanele, atthaapo antta wuukholelala na makhono aya yoori ohikwakwanttuwe va liwe.’”

<sup>7</sup> Yinsa khunjipu yoori: “Theenya yaatikhiwa yoori: ‘Ohimweeze Mbwana, Nluku awo.’”

<sup>8</sup> Sheethwani khunthuula khumweettana va mwaako mmote woolepa venkivena khunthoonyeza ofwalume wooshi wa olumwenku na si-ifwa yaya. <sup>9</sup> Khumuza yoori: “Amana okikokhorela khukaaputu kintta owinkha zooshi.” <sup>10</sup> Yinsa khumuza yoori: “Oleevo, Epiliisi! Maana yaatikhiwa yoori: ‘Omwaaputu Mbwana, Nluku awo, na onrumeyele othuuto paasi.’” <sup>11</sup> Aphano sheethwani khumwaattuwa, khuta malayikha oteela onrumeyela.

*Yinsa onaaza khaazi yawe Kalileya*

<sup>12</sup> Wakathi Yinsa asiiliyevo yoori Yaahaya afukiwa, khurutela Kalileya. <sup>13</sup> Khulaawo Nazareeti khulawa khwiikhala Kafwaranaawu, yaari nshini wa pahari, nti wa Zebulooni na Nafitaali, <sup>14</sup> yoori erettikhane etile yaalupiweeyo ti napiyu Ezaaya yoori:

<sup>15</sup> “Nti wa Zebulooni, na nti wa Nafitaali,  
tarikhi ya pahari, kaapu ya Yorotaani,  
Kalileya ya amalapo!

<sup>16</sup> Atthu aari wiikhalaaye n'yiiza oona nuuru khuluyeene;  
khwa apale aari wiikhalaaye miti za mwiivuli wa ofwa, amwasikhe-  
liwa ti nuuru.”

<sup>17</sup> Waaza attaapho Yinsa khwaaza olaleya hapari zawe alupaka yoori:  
“Mwithupwiye, maana ofwalume wa pinkuuni ori kharipu.”

*Yinsa oniwaakhuwela anakhiyoni a mwanzo*

<sup>18</sup> Eettaka weettetta nshini wa Pahari ya Kalileya Yinsa khuwoona attwi awiri: Simawu, anithiwaaye Pheeturu, na ttwiye Antere. Yo aari weeselela matthavi aya mpahari, maana yo aari anamajiya. <sup>19</sup> Yinsa khuwoza yoori: “Mwikilotte, miiyo kintta wuurettani o namajiya a atthu.” <sup>20</sup> Nasaapiru yo khulikha matthavi aya khusala anlotta.

<sup>21</sup> Eettaka olawa ethhiipile khuwoona attwi akina awiri: Tiyaaku, mwaana wa Zepeteewu, na Yaahaya, ttwiye. Yo aari mmwaatiya na papaaaya Zepeteewu, attalelaka matthavi aya, Yinsa khuwaakhuwela.

<sup>22</sup> Nasaapiru yo khunlikha papaaaya na mwaatiya, khunlotta.

*Yinsa ontafusiri Kalileya yooshi na owaavonisa anamarati enkeene*

<sup>23</sup> Yinsa eettettiye Kalileya yooshi asomisaka mmasinakooka, atafusiraka hapari zooshapweya za ofwalume na avonisaka marati ooshi vakatti wa atthu <sup>24</sup> Hapari monkoni wa ye khumwazeyela Siiriya yooshi, atthu khusala awaatiisa ooshi apale aarina marati, aari olwaaziwaaye na ohoochiwa ti masheethwani, anajilejile, anasupiyaani, ye noowaavonisa. <sup>25</sup> Atthu enkeene khusala anlottelela olankha Kalileya, Tekapooli, Yeruzaleemu, Yudeya na a nti wa phantte kiina ya Yorotaani.

## 5

*Tafusiiri ya vamwaako*

<sup>1</sup> Awooniyevo atthu apale waatta, Yinsa khuwela va mwaako na khwiikhala. Anakhiyoni awe khususela aphale aariivo, <sup>2</sup> Ye khusala awaasomisa, araka:

<sup>3</sup> “Ooparikhiiyiwa pi apale eeyiye asikhini nroho,  
maana ofwalume wa pinkuuni pi waaya.

<sup>4</sup> Ooparikhiiyiwa pi apale anlilaaye,  
maana anteela ozurwiwa.

<sup>5</sup> Ooparikhiiyiwa pi apale oojipushuwisa,  
maana yo anteela orithi olumwenku.

<sup>6</sup> Ooparikhiiyiwa pi apale ariina jala na nnyottha la shariya,  
maana anteela orupala.

<sup>7</sup> Ooparikhiiyiwa pi apale ariina tthakaraka,  
maana na-yo anteela wooneeliwa tthakaraka.

8 Ooparikhiiyiwa pi apale ariina rooho yoopakusiwa,  
maana yo anteela omoona Nluku.

9 Ooparikhiiyiwa pi apale oo levelela,  
maana anteela wiitthiwa aana a Nluku.

10 Ooparikhiiyiwa pi apale anlupatthiwaaye mwaasa wa haakhi, maana  
Ofwalume wa pinkuuni pi waaya.

11 Ooparikhiiyiwa ti mweeyo amana mwittukhaniwaka na  
olupatthiwa, na wakhula zootakhala empuwaaye khwa mweeyo  
mwaasa wa miiyo. 12 Mwifurahi na mwitthape, maana tthuvo yenu  
pinkuuni khuluyeeene, maana khwa nanna etthiipo awaalupatthiye  
manapiyu aviriyeeyo khapula ya mweeyo.

### *Mwiinyu wa voolumwenku na nuuru ya olumwenku*

13 "Mweeyo mwa mwiinyu wa olumwenku. Ila amana olikha onyu-  
unya waya, onrutiseleya toovi? Khuniyyana hatha fwayita, woohiiyi  
wiitthiwa khusala oluwattheliwa pi atthu. 14 Mweeyo mwa nuuru  
ya olumwenku. Sitati yoojekiya va mwaako khinvitheya. 15 Khina  
ankhozaaye khantteya khuttha nyuku. Entthiwa vahali wawooneyavo  
yoori ewaamwasikhele atthu apale aniiyaaye nnyupa 16 Nakatalikha  
nuuru yenu mweeyo yaare vakatthi wa atthu, yoori oone khaazi zenu  
ansifu Papeenu ariye pinkuuni.

### *Yinsa onrumeyela kano za Munsa*

17 "Mwihuupuwele yoori kateela wiishisa kano za Munsa ama ma-  
somi a manapiyu, akaateeliye wiishisa, ila omarisela. 18 Kiniwuuzani  
khweele yoori: Erivo etthiipi pinku na vathi khina nanna entakhaaye  
waashikha nenkawu alama yiisheliye ya kano ama ntottonka, mpakha  
zooshi erettikhane. 19 Wooshi otule anttelaaaye okhijilela oruma, hatha  
nkhama weetta opushuwa, na khuwaanozela akinoko oretta etthiipo,  
onteela wiitthiwa yoori woopephaya muufwalume wa pinkuuni; ila  
wakhula otule anshututelaaye na khusomisa oruma waya opu, onteela  
wiitthiwa yoori nwulweene muufwalume wa pinkuuni. 20 Maana miiyo  
kiniwuuzani yoori shariya yenu amana ehiziti ya mafwarizeewu na  
ya anamanozela a kano, hatha vattithiiru khamwinteela weettamo  
muufwalume wa pinkuuni.

### *Wiiphiriwa na osiilana*

21 "Mweeyo mwasiila vitthu ooziveeyo amarehemu apapazenu yoori:  
'Mwihuule; wakhula anuulaaye oneekesela ophukiwa.' 22 Ila miiyo  
kiniwuuzani yoori wakhula aninkatipkhelaaye ttwiye oneekesela  
ophukiwa naye, na wakhula aninttukhanaaye ttwiye ona ya olawaniwa  
wa afwalume ophukiwa. Na otule animuuzaaye ttwiye yoori: 'nlolo!'  
oninsuhi weetta vamootho wa motthooni. 23 Nakatalikha, amana  
weettelaka winkha zaakha va alitaari khufikhiri yoori ttwiyo ona ethu  
varoho na-weyo, 24 olikhe zaakha yawo va alitaari attaapho, olawe wasi-  
ilane na ttwiyo, nawiisha ote operekhe saana zaakha yawo. 25 Amana  
ntthu atakha wuulawana onyuupa wa anamaphuka, osiilanane saana  
ntthu aya oto ntarikhi mweettaka olawa, maana noohijuwi saana  
weeyo onttelelaka winkheleliwa wa namaphuka, namaphuka awinkhelele  
wa namweekesela kalapooso na ye aeweeselele nkalapooso. 26 Miiyo  
kiniwuuzani khweele yoori khunlaamo ohiripheeni nzurukhu otthuupo  
onttelaaaye wuuziwa.

### *Oraruwa*

<sup>27</sup> “Mweeyo mwasiila elupiwaka yoori: ‘Ohiraruwe.’ <sup>28</sup> Ila miiyo kiniwuuzani khweele yoori wakhula animweekesaaye muukha na ontakha varoho vawe, anrarusha. <sup>29</sup> Nkhama liisho lawo la phantte ya nkhone nlume lintta wuukosisa, olazemo weesele oje. Afwataali wuupwetheya phantte yawo moote ya mwiili awo zayita mwiili awo wooshi weeseleliwa mothooni. <sup>30</sup> Nkhama nkhone awo nlume ontta wuukosisa, oshije weesele. Afwataali wuupwetheya phantte yawo moote ya mwiili awo woohiiyi mwiili awo wooshi weeseleliwa mothooni.

### *Waasha*

<sup>31</sup> “Yaatikhwa theenya yoori: ‘Otule animwaashaaye muukhawea ona ya omwinkha talakha.’ <sup>32</sup> Ila miiyo kiniwuuzani yoori wooshi otule animwaashaaye muukhaawee, ehiriwaka etta oraruwa, oniiyana paathuli ya onruma oraruwa, na otule aninralaaye muukha aya otule wa waashiwa ontta onrarusha.

### *Olapha*

<sup>33</sup> “Mweeyo mwasiila ethu ooziweeyo amarehemu apapazenu yoori: ‘Mwihilaphe woovonyeyavo, ila mweettettise olapha mwirettiyeeyo omaasho wa Mbwana.’ <sup>34</sup> Ila miiyo kiniwuuzani yoori: mwihilaphe hatha vattitthiiru wala khwa vitthu za pinkuuni maana khukulu ya Nluku; <sup>35</sup> wala khwa vitthu za vathi maana phi anvumulisaavo moolu awe, wala khwa Yeruzaleemu maana sitati ya Mfwalume nwulu. <sup>36</sup> Wala ohilaphele khwa eeshwa yawo maana weeyo khunwahi olakaza wala oriipisa hatha nyuuli yawo moote. <sup>37</sup> Entosheleza olupa yoori ‘ayo’ amana yiiya ‘ayo’, na ‘wala’ amana yiiya ‘wala’; noozitisa apha enlankha wa Sheethwani.

### *Ojiriphia*

<sup>38</sup> “Mweeyo mwasiila etile elupiwe yoori: ‘Liisho khwa liisho na liino khwa liino.’ <sup>39</sup> Ila miiyo kiniwuuzani yoori: mwihikhanyarele ojiriphia khwa atthu apale anuurettelaanini zootakhala. Amana ntthu oop-wakula nlaku limote onzukulisele ntthi likina. <sup>40</sup> Amana ntthu atakha wuulawana wa anamaphuka na wuuvula kameza yawo, omwinkhe theenya ajapi yawo. <sup>41</sup> Amana ntthu ookhanyarela othuula lipwattha khwa kiyasi ya phiima alufu moote, othuule phiima alufu piiri.

### *Owaapheta maatuwi*

<sup>42</sup> “Amana ntthu oovekela ethu, omwinkhe; ohinnoze enyokonyoko otule anuuvekelaaye omwiipaasha. <sup>43</sup> Mweeyo mwasiila olupiwa yoori: ‘Omphete namwaattamanani awo, omwiine atuwi awo.’ <sup>44</sup> Ila miiyo kiniwuuzani yoori, mwiwaaphete maatuwi enu na mwiwaalompele apale anuulupatthanini, <sup>45</sup> yoori mweeyo mwiretteye wiiya aana a Papeenu ariiyie pinkuuni. Maana ye oniwaatthamushela njuwa apale anrettaaye zooshapweya na apale anrettaaye zootakhala. Na oniwenkha vuula anashariya na apale ohitakhi shariya. <sup>46</sup> Amana mwiwaaphetaka apale anuuphetaanini paasi, tthuvo-ni mwiineekeselaaye wiiyana? Anamariphisa lumpuru nayo khanretta ethiipo? <sup>47</sup> Na amana mwiwaachelisaka maswaahipu paasi, mwinrettani yooziti? Hatha na amalapo anretta ethiipo. <sup>48</sup> Nakataalikha mwiye atthu khaamili, nkhamma ethiipo eyiyeyo khaamili Papeenu wa pinkuuni.

**6***Owaawuni anamathowiwa*

<sup>1</sup> "Mwiyyane phoole na oretta khaazi zenu za shariya vahali aniiyavo atthu akina yoori mwisifwiwe piyo. Amana mwiretta toowo, khamwiniyana hatha tthuvo ya Papeenu wa pinkuuni.

<sup>2</sup> "Nakataalikha, amana mwinkha zimola mwihithuule nlope khusala mwilaleya, nkhamma anrettaazo manaafikhi mmasinakooka na mmalinya, atakhaka yoori asifwiwe pi akina aya. Miiyo kiniwuza khweele yoori yo apokhera tthuvo yaya. <sup>3</sup> Ila amana weeyo winkha zimola, nkhone awo nkha ohijuwe ethu orettiyeewo nkhone nlume awo, <sup>4</sup> yoori zimola yawo yiye siiri. Toowo, Papaawo otule anoonaaye epile enretti-waaye sirini, ontta wuutthuva.

*Nanna ya olompa*

<sup>5</sup> "Na amana mwilompaka, mwihiyi nkhamma manaafikhi. Yo owaatuvela weemela khusala alompa nsinakooka, mmatarikhi, atakhaka yoori ooniwe pi akinoko aya. Miiyo kiniwuza khweele yoori yo apokhera tthuvo yaya. <sup>6</sup> Ila amana weeyo olompaka, weette okatthi wawo ofuke nlako awo, onvekele Papaawo ahinooneyaaye. Aphano, othuuto ontta wuutthuva. <sup>7</sup> Na amana olompaka, khahiyoo orutela mattakhuzi mamoteru ooheleyi swaafu zawaatta, nkhamma anrettaazo amalapo. Yo anaakhipwela yoori mwaasa wa waattisa ottakhula Nluku ti aniwaasiilaavo. <sup>8</sup> Mwihiyi nkhamma atthaapo, maana khpula mweeyo mwihinaveke Papeenu onretta ajuwe ethu mwinihithajyaaye. <sup>9</sup> Nakataalikha, mweeyo amana mwilompaka mwisala mwiri toono:

'Papeetthu oriyye pinkuuni,  
 littithimisiwe nzina lawo loottakatthifu,  
<sup>10</sup> wiishushe ofwalume awo,  
 mattakhelo awo arrettikhane  
 vathi apha nkhamma ethiipo enrettikhanaazo otulu!  
<sup>11</sup> Oninkhe wakhula siikhu ethu-yoojiwa ninihithajyaaye.  
<sup>12</sup> Oniswaamihi koosa zeetthu nkhamma ethiipi na-fweyo nininswaami-haaye wakhula otule annikosaaye,  
<sup>13</sup> na ohinilikhelele nizayiniwaka,  
 ila nuusuru khwa ntakhali,  
 [maana ofwalume, owahi,  
 na siifwa zooshi pi zawo, mileele. Amiina.]'

<sup>14</sup> Maana amana mwiwaaswaamihi anaatamu koosa zaya, Papeenu wa pinkuuni naye ontta wuuswaamihini, <sup>15</sup> ila amana mwihiswaamihanaka, Papeenu wa pinkuuni naye khanuuswaamihini koosa zenu.

*Ofuka*

<sup>16</sup> "Amana ofuka, ohithoonyeze wuuso wa huzuni nkhamma anrettaazo manaafikhi, yo antta ozukulisa wuuso aya yoori akina aya apatthe ojuwa yoori afuka. Miiyo kiniwuza khweele yoori nooretta toowo apokhera tthuvo yaya. <sup>17</sup> Ila weeyo amana ofuka, osala woosa wuuso awo, na khushamula nyuuli zawo, <sup>18</sup> yoori akinoko ahijuwe yoori wafuka, ila Papeenu, anoonaaye vitthu za siiri, ye ontta ojuwa yoori wafuka na othuuto ontta wuutthuva.

### *Maali pinkuuni*

<sup>19</sup> “Ohikusanye maali vathi apha, oriivo oshuwa, na kuuthu enwahaaye ohariwu, na ariivo manantarawu oophenya khwiya. <sup>20</sup> Ila okusanye maali pinkuuni, ottuukho oshuwa na kuuthu ehnwahaawo ohariwu wala nantarawu ahimphenyelaawo khwiya. <sup>21</sup> Maana attaapho eniiyaavo maali zawo, rooho yawo nayo eniiya attaapho.

<sup>22</sup> “Maasho khantteya ya mwiili. Amana maasho awo eeya ooshwapweya, mwiili awo oniiyana nuuru; <sup>23</sup> ila amana maasho awo eeya oohishapweyi, mwiili awo wooshi oniiya n’yiiza. Nakataalikha, amana nuuru oriinaaye ezukuluwa yiya yiiza, yiiza yaya eto eniiya khuluy-eene!

<sup>24</sup> “Khaavo ntthu anwahaaye owaarumeyela a mbwana awiri, mwaasa yoori ontta omwiiphiirisa mmote, antuvelite otu nkina; ama oniiya wa waamineya khwa otu mmote, antarawu otu nkina. Khinwaheya onrumeyela Nluku na nzurukhu.

### *Tafwawuthi za ohaayi*

<sup>25</sup> “Tiito, kiniuuuzanini yoori: Mwihiyi woovelavelela ohaayi enu, khwa ethu-yoojiwa ama yoonywiwa; wala mwiili enu monkoni wa ethu ya owala. Ohaayi enu waziti ethu-yoojiwa. Na mwiili enu waziti kuwo. <sup>26</sup> Mwiwoone anyannyi otulu: Khanzala, khanuurula wala khana sakafu; ila Papeenu wa pinkuuni oniwaajisa. Nakataalikha mweeyo mwinaaye fwayita zayita anyannyi. <sup>27</sup> Paani wa mweeyo anwahaaye weekezela mansha awe hatha nkama eetta oshukulikhela?

<sup>28</sup> Khi mwinvelavelani kuwo? Moone nanna enwulaazo miitthi za ntthuttu na maluwa aya: yo khazinkhola khaazi, wala khazinsona. <sup>29</sup> Ila wekhweele miiyo kiniuuuzani yoori, Seleyimaana na oshapweya wawe khawaleeni kuwo zooshapweya nkama maluwa apa. <sup>30</sup> Moone, Nluku onwalisa nyaani za ntthuttu leelo ziniyaavo meesho khulukuziwa, onuwalisani mweeyo channu atthu oopushuwa amini! <sup>31</sup> Nakataalikha mwihihukulikhe, mwiraka: ‘Ninja niini?’ Ama ‘ninnuya niini?’ Ama ‘ninwala niini?’ <sup>32</sup> Maana amalapo pi anshukulikhelaaye vitthu nkama epo; ila Papeenu ariiyi pinkuuni onjuwa yoori enuuhitjhajiyan epo zaya. <sup>33</sup> Apho, mweekese khapula Ofwalume wa Nluku na shariya yaya, zooshi epo mwintta winkhiwa. <sup>34</sup> Nakataalikha mwihihukulikhele siikhu ya meesho, maana meesho entana tafwawuthi zaya. Wakhula siikhu eniiyana otakhala waya.

## 7

### *Omphuka Nzaawo*

<sup>1</sup> “Mwihiphuke nzeenu yoori mwihiphukiwe. <sup>2</sup> Maana khwa khipima ethiito omphukanaaye, na-weyo omphukiwa khwa khipima ethiito; mphimo otthuupo onrumeyelaaye owaaphimelanaka azaawo, na-yo anuuphimelana otthuupo.

<sup>3</sup> “Mwaasa aya niini woonaka etutu eriiye mmaasho wa ttwiyo, ila khuhooni lipikhi liriyye mmaasho mwawo? <sup>4</sup> Nanna-ni onimuuyaaye ttwiyo yoori: ‘Kintakha kuulaze etutu eriiye mmaasho mwawo,’ khupe weeyo orina lipikhi mmaasho mwawo? <sup>5</sup> Naafikhi! Olazemo khapula lipikhi liriyye mmaasho mwawo, aphano ontta woona saaneene khowahil olazamo etutu eriiye mmaasho wa ttwiyo.

<sup>6</sup> “Mwihiwenkhe vitthu ttakatthiifu anapwa, antta wuuzukuluwelani na oolumeni, wala mwiheeselele kuluwe mawe ootafikhana mwirettaru toowo entta oluwatthela.

### *Nthiti khwa lompa*

<sup>7</sup> “Mwiveke, mwintta winkhiwa; mweekese, mwintta opattha; mwipiye nlako, mwintta ofukuleliwa. <sup>8</sup> Maana wakhula anvekaaye oninkhiwa, aneekesaaye ompattha, ampiyaaye nlako ontta ofukuleliwa.

<sup>9</sup> “Paapa-ni mmote wa mweeyo, anraaye mwanawae anvekeliye phaawu khumwinkha liwe? <sup>10</sup> Ama anvekeliye swi khumwinkha nyookha? <sup>11</sup> Mweeyo mwa atthu ootakhala rooho, mwinjuwa owenkha vitthu zooshapweya aaneenu. Papeenu ariye pinkuuni, atepa owenkha vitthu zooshapweya apale aninvekelaaye. <sup>12</sup> Wakhula etile enuutuve-laanini oretteliwa, na-mweyo mwiwaarettele ethiipo azeenu, maana kano na manapiyu anlupa ethiipo.

### *Milako Zoophunyeya na Milako Zootaphuwa*

<sup>13</sup> “Mwivire nlako woophunyeya, maana nlako nwulweene na tarikhi yoomwazeya eninlokoza ntthu motthooni, enkeene anvira nlako otthu-upo. <sup>14</sup> Tarikhi na nlako oninkhaaye ohaayi wa mileele nttithiiru, na atthu vattitthiiru ti anttelaaye oviravo.

### *Muutthi na mishumo zaya*

<sup>15</sup> “Phoole na manapiyu oojipanka, yo anuuteelani mweeyo awaliye shapala ya pwittipwithi, ila nkatti ari miiji zooluma. <sup>16</sup> Khwa mishumo zaya mwinteela owaajuwa. Khunshumeya wuuva mmi-iwa, wala mmuyu khinshumiwamo ekhuuwa. <sup>17</sup> Khwa ethiipo wakhula muutthi wooshapweya oniima mishumo zooshapweya, na muutthi wootakhala oniima mishumo zootakhala. <sup>18</sup> Khinretteya muutthi wooshapweya wiima mishumo zootakhala, wala muutthi wootakhala wiima mishumo zooshapweya. <sup>19</sup> Wakhula muutthi ohini-imaae mishumo zooshapweya ontta oshijiwa khweeseliwa va moottho. <sup>20</sup> Khwa ethiipo mwinteela owaajuwa khwa mishumo zaya!

<sup>21</sup> “Khahiy ooshi apale anikiuttaaye yoori: ‘Mbiana, Mbiana,’ anttelaaye weettamo muufwalume wa pinkuuni, ila otule anrettaaye matakhel a Paapa ariye pinkuuni. <sup>22</sup> Amana efiya siikhu yaya eto enkeene, anlawa akuuze yoori: ‘Mbiana, Mbiana! Fweeyo nahupiri khwa nzina lawo, neekara masheethwani khwa nzina lawo, na khwa nzina lawo nareta minjuza.’ <sup>23</sup> Aphano miiyo kilupe saaneene yoori: ‘Akuujuweenini. Mwikisuse, anamarettaloo zootakhala.’

### *Njuwi na nlolo*

<sup>24</sup> “Wakhula otule ansilaaye ntakhuzi laka na khushututela on-lattisaniwa ntthu wa akhili ajekiye nyuupa yawe khuthipa khuttha vanchina la mawe; <sup>25</sup> khunya vuula, khwiitaaza nyuuttho khuvuma pheevu khusakhinya nyuupa etile, khuhikwi, maana nchina laya laari va mawe. <sup>26</sup> Wakhula otule ansilaaye ntakhuzi laka khuhishututeli on-lattisaniwa ntthu woololo ajekiye nyuupa yawe va nshaka; <sup>27</sup> khunya vuula, khwiitaaza nyuuttho, khuvuma pheevu khupiyya nyuupa etile, khupwaluwa, khupwecheya”.

<sup>28</sup> Wakathi Yinsa eeshiyeevo ottakhula, khuntti epile khwiya zootikini-siwa khwa masomi awe, <sup>29</sup> maana aari osomisa nkhamma ntthu ari-naaye ofwalume, woohiiyi nkhamma anamanozela a kano.

**8***Ovonisiwa wa namaaharaja*

<sup>1</sup> Wakathi eeshukhiyeovo va mwaako, khuntti khuluyeene yeetta onlotta. <sup>2</sup> Nasaapiru khuta namaaharaja mmote khumwaattama, khumwaaputu akokhoriye khulupa yoori: “Mbwana, onwahi okitwa-haresha!”

<sup>3</sup> Yinsa khookola nkono awe, khunsapa khuri: “Katakha, ti otwa-haresheye!” Nasaapiru ye khwiya wootwaharesheya khwa maaharaja.

<sup>4</sup> Aphano Yinsa khumuza yoori: “Vitthu epi ohinthatele hatha ntthu. Ila olawe, wajithoonyeze wa namalokozela a tiini na olaze zaakha etile Munsa alupiyeyo yoori yiiye oshaahiti.”

*Najanka wa Rooma onthonyeza amini yawe*

<sup>5</sup> Wakathi Yinsa afiyeovo sitati ya Kafwaranaawu, eetta oteeliwa ti ntunkhulu wa anajanka, anvekelaka yoori amwaawuni. <sup>6</sup> Khumuza yoori: “Mbwana, karumeya aka ori ontii, onaaye supiyaani, onta ohoocheya venkivene.”

<sup>7</sup> Yinsa khumuza yoori: “Miiyo kinlawa kanvonise.”

<sup>8</sup> Ntunkhulu wa anajanka otule khunjipu yoori: “Mbwana, miiyo akinsuhi wuupokherela vaje vaka. Ila olupe ntakhuzi limote paasi, karumeya aka onta ovona. <sup>9</sup> Maana na-miyo ki ntthu kiriye vathi wa ofwalume na ki nlokozi wa anajanka. Kinimuza mmote yoori: ‘Olawe,’ khulawa; khumuza nkina yoori: ‘Ote,’ ye khuta. Kinimuza karumeya aka yoori: ‘Orette khata,’ ye khuretta.”

<sup>10</sup> Yinsa noosiila epo zaya, khushanka, khuwooga apale aari onlot-taaye yoori: “Kiniuwuzani khweele: Akinsikaneeni Ezirayiilu ntthu ariina amini nkhamma eti. <sup>11</sup> Miiyo kiniuwuzani, atthu enkeene a khipula na malawa-juwa, anttela wiikhala va meeza na Eburahiima, Esiyaakha, Yaakhumpa muufwalume wa pinkuuni. <sup>12</sup> Ila apale aari weettelaaye orithi ofwalume wa Nluku anttela weeseleliwa oje, n’yiiza nhali ontte-laaye wiiyamo olila na oluma meeno.”

<sup>13</sup> Yinsa khumuza ntunkhulu wa anajanka otule yoori: “Olawe owawo, entta orettikhana nkhamma ethiipo okhupaliyeozo.” Wakathi otthuupule karumeya awe khwiya woovona.

*Owahi wa Yinsa monkoni wa masheethwani na marati*

<sup>14</sup> Yinsa khweetta owawe Pheeturu ottuukho khumoonaa nkhwewe Pheeturu arapaleeliye ari nlwele hooma. <sup>15</sup> Yinsa khunsapa nkono awe, hooma etile khumwiisha. Khulankha khusala anrumeyela.

<sup>16</sup> Paata ya otupweela njuwa, khutiiseliwa anamasheethwani awaatta, ye khusala eekara masheethwani khwa ntakhuzi lawe khuwaavonisa alwele ooshi. <sup>17</sup> Khwa ethiipo khurettikhana epile zaalupiweeyo ti napiyu Ezaaya yoori:

“Ye athuula marati etthu  
na apwechera moolwele etthu.”

*Onlotta Yinsa, ethuyoolipa!*

<sup>18</sup> Yinsa noowoona atthu awaatta anzukuleeliye, khuwaaruma anakhiyonii awe olkhela kaapu ya ntthatta. <sup>19</sup> Aphano namanozela wa kano mmote khumwaattama khumuza yoori: “Mwaalimum, kintta wuulotta wakhula vahali oneettaavo.”

<sup>20</sup> Yinsa khunjipu araka: “Ananthala anaaye maphotto aya anyannyi anaaye vijaaro zaya, ila Mwaana wa Pinaatamu khana vahali woovumulisavo eeshwa yawe.”

<sup>21</sup> Nakhiyoni awe mmote khuri: “Mbwana, waaze okilikha kilawe kanzikhe paapa.”

<sup>22</sup> Yinsa khujipu araka: “Okilotte, owaalikhe ananfwa awaazikhe ananfwa aya eenyewe.”

*Yinsa onnyamaza pheevoo yawaatta.*

<sup>23</sup> Yinsa apakhiriyevo mmwaatiya anakhiyoni awe khunlotta.

<sup>24</sup> Nasaapiru, pheevoo yawoopisa khusala evuma mpahari, mwaatiya khusala ozamisiwa ti mawipi, Yinsa ettaka olala. <sup>25</sup> Anakhiyoni awe khunsusela khusala anlansa, ankhuwelaka araka: “Mbwana, onuusuru nasaleela ofwa!”

<sup>26</sup> Ye khuwoozela yoori: “Mwinoovani? Atthu oopushuwa amini!” Ye khulankha khushowera pheevoo etile na pahari, zooshi khunyamala.

<sup>27</sup> Ooshi khusala ashankiye na khulupa yoori: “Otu aya paani hatha anrumaaye pheevoo na pahari khunshututela?”

*Yinsa oniwaavonisa atthu awiri aashinttiweeyo ti masheethwani*

<sup>28</sup> Wakathi afiyeveo phantte kiina, ya Jerazeenu, khunteela ana-masheethwani awiri, alankhiyeeyo ovilalo. Yo aari oowali, khina aari oviraaye tarikhi ya etile. <sup>29</sup> Aphano, yo khusala anyakula araka: “Onnitakhelani fweeyo, Mwaana wa Nluku? Wata okhuno oteela onoopopisa, ohinafiye wakathi aya?”

<sup>30</sup> Kharipu ya aphale vaya laarivo liphanko la kuluwe. <sup>31</sup> Aphano masheethwani apale khunvekela Yinsa yoori: “Nkhama onniikara, onikarile nliphanko la kuluwe.”

<sup>32</sup> Yinsa khulupa yoori: “Apho mwilawe!” Masheethwani apale khulawa khweetta nkuluwe, liphanko looshi khwiishukela va ntthatta khuttuluwa khufwa. <sup>33</sup> Atthu apale aari oshukaaye kuluwe epile khuthira khulawa mmuti, khulupa zooshi mpakha epile zaarettikhaniyeeyo khwa anamasheethwani apale awiri. <sup>34</sup> Atthu ooshi a mmuti mphule khusala alawa okutthanana Yinsa, nonsikana, khunvekela amuuzaka yoori aleemo mmuti mwaya.

## 9

*Yinsa oninvonisa nasupiyaani*

<sup>1</sup> Yinsa noopakhira mmwaatiya, khulokha ntthatta khweetta sitati ya owawe. <sup>2</sup> Khutiisiwa nasupiyaani attattikheliwe va nrepa. Wakathi oniyeevo amini ya atthu apale antiisiyeeyo, khumuuzza nasupiyaani otule yoori: “Ominyale, mwanaka! Twampi zawo zaswaamihowi.”

<sup>3</sup> Noolupa toowo anamanozela a kano khwaaza waapa araka: “Ntthu otu ontta okufuru!”

<sup>4</sup> Yinsa noojuwa ethu aari wuupuwelaaye yo, khuwooza yoori: “Mwaasa wa niini mweeyo muupuwelaka nroho mwenu vitthu zootakhala? <sup>5</sup> Apho yookhwaea ti tiivi? Olupa yoori: ‘Waswaamihowi twampi zawo,’ ama olupa yoori: ‘Olankhe weettette?’ <sup>6</sup> Mwijuwe yoori Mwaana wa Pinaatamu onaaye ruhusa ya oswaamihii twampi vathi apha” khumuuzza nasupiyaani otule yoori: “Olankhe, othuule nrepa lawo olawe owawo.” <sup>7</sup> Khulankha khusala alawa owawe. <sup>8</sup> Paata

ya atthu woona vitthu epile khuwaapattha woova, khunsifu Nluku, awenkhiyeeyo anaatamu ofwalume nkhamma opo.

*Okhuweliwa wa Matewuzhu*

<sup>9</sup> Elottelanaka Yinsa khulaawo okhule waya, khumoona mwinyi mmote aniitthiwaaye Matewuzhu eekhaliye ariphisaka lumpuru, kumuza yoori: “Okilotte!” Ye khulankha khunlotta.

<sup>10</sup> Yinsa eekhaliyeovo va meeza owawe Matewuzhu, anamariphisa lumpuru enkeene na anatwampi aatiyi khwiikhala attaapho vamote na anakhiyoni awe. <sup>11</sup> Mafwarizeewu nawoona toole khuwoozela anakhiyoni awe araka: “Mwaasa wa niini mwaaliimu enu ajaka na anamariphisa lumpuru na anatwampi?”

<sup>12</sup> Yinsa noosiila, khulupa yoori: “Akumi khaninhithajiya tothoro, ila alwele. <sup>13</sup> Mwilawe mwanozeliwe maana a ntakhuzi linlupaaye yoori: ‘Kintakha tthakaraka, khahiyo twaha.’ Maana miyo akawaateeliye anashariya, kawaateeliye anatwampi.

*Yinsa ontta wuuzeliwa monkoni wa ofuka*

<sup>14</sup> Aphano khuta anakhiyoni a Yaahaya omuuzela yoori: “Fweeyo na mafwarizeewu ninfuka, khi anakhiyoni awo ahisala afuka mwaasa wa niini?”

<sup>15</sup> Yinsa khujipu yoori: “Enretteya toovi ofuka anamalaleyiwa harusi, namaposa ari attaapho? Zinlawu zafiye siikhu anttelaaye othuuliwa mposi, na siikhu zaya etthiipo anlawa afuke.”

<sup>16</sup> “Khina antthaaye yaapa ya tarapu pheeya kuwo ya raku, maana entta ofutthela kuwo etile evaruwe. <sup>17</sup> Wala khinthuliwa viinyu pheeya khutthiwa ntompwiyo ya shapala ya raku, nooretta toowo entta ophutuwa, viinyu yiittikhe, ttompwiyo yaya eharipweye. Ila viinyu pheeya entthiwa ntompwiyo pheeya, na toowo zoopiiri zintta opweheya.”

*Owahi wa Yinsa monkoni wa olwele na ofwa*

<sup>18</sup> Ettaka ottakhula etthiipile, khutavo ntunkhulu wa tiini, khunkokhorela na khumuza yoori: “Mwanaka wankha afwa nasaapi ethiiti; nlawe wanttheele nkhone ontoa osisimuwa.” <sup>19</sup> Yinsa khulankha khusala anlotta na anakhiyoni awe.

<sup>20</sup> Attaaphale, aarivo muukha mmote aarina nyaakha khumi na miwiri emwiittikhaka taamu, khuta onyoko wa Yinsa khusapa ajapi yawe. <sup>21</sup> Maana ye eettiye ojilakelela yoori: “Kisaparu ajapi yawe paasi, kintta ovona.”

<sup>22</sup> Azukuluwiyeovo Yinsa khumoona khumuza yoori: “Ofurahi, mwanaka wankha; amini yawo yoovonisa. Wakathi otthuupule muukha otule khwiya woovona”.

<sup>23</sup> Afiyeevo owawe ntunkhulu wa tiini khuwaasiila atthu eepaka liipo la miifwa na enkeene ari ootapanyeya, <sup>24</sup> Yinsa khuwoza yoori: “Mwisaruwe! Otu khafweeni, ontoa olala.” Ooshi khusala antheya. <sup>25</sup> Paata ya atthu apale osusa, ye khuvira khunkholela nkhone, khulansha. <sup>26</sup> Hapari epile khumwazeyela nti opule wooshi.

*Ovonisiwa wa ananhooni awiri na mmote woohittakhuli*

<sup>27</sup> Noolaavo aphale vaya, ananhooni awiri khusala anlotta akhuwaka araka: “Mwaana wa Daawuuda, noonele huruma!”

<sup>28</sup> Yinsa noofiya owawe, ananhooni apale khumwaattama, ye khuwozela yoori: "Mweeyo mwinkhupali yoori miiyo kinaaye owahi wa oretta epo zaya?" Yo khujipu yoori: "Ayo, Mbwana!" <sup>29</sup> Yinsa khuwaasapa maasho aya araka: "Erettikhane khwa matakhele amini yenu!" <sup>30</sup> Maasho aya khwiya oovona. Aphano Yinsa khuwooza na kuvu yoori: "Phoole ahiiyeye anttelaaye ojuwa epi." <sup>31</sup> Yo khulawa, khumwaza hapari zawe epile nti opule wooshi.

<sup>32</sup> Paata ya olaavo aphale, namasheethwani ahaari ottakhulaaye khutiiseliwa Yinsa. <sup>33</sup> Noomwiikara sheethwani otule, ye khwaaza ottakhula. Khuntti etile khwiya yooshanka na khuri: "Khinarettikhane vitthu nkhamma epi Ezirayiilu.

<sup>34</sup> Ila mafwarizeewu aari olupa yoori: "Oniikara masheethwani khwa owahi wa mfwalume wa masheethwani."

### *Anakhaazi vattithiiru*

<sup>35</sup> Yinsa aari weettetta sitati zooshi na mmwanttiwa. Ye aari osomisa mmasinakooka, na olaleya hapari monkoni wa ofwalume wa Nluku, na ovonisa wakhula nanna ya marati na moolwele mawulweene a atthu. <sup>36</sup> Paata ya woona khuntti zawaatta, khoonela huruma, maana zaari zoovelavela na zawsansiwa, nkhamma pwittipwitthi zoohiina nshuki. <sup>37</sup> Aphano khuwooza anakhiyoni awe yoori: "Wuurula nwulweene, ila anakhaazi vattithiiru. <sup>38</sup> Apho, mwinvekele Mweenyewe wuurula awaaperekhe anakhaazi a wuurula."

## 10

### *Yinsa oniwaaruma anakhiyoni awe khumi na awiri*

<sup>1</sup> Khuwaakhuwela anakhiyoni awe apale khumi na awiri, khuwenkha owahi wa wiikara masheethwani, na ovonisa moolwele na marati ooshi.

<sup>2</sup> Apa mazina a anakhiyoni khumi na awiri: Wamwanzo, Simawu, anjuwaniaaye nzina la Pheeturu, na ttwiye Antere; Tiyaaku, mwaana wa Zepeteeuw, na Yaahaya ttwiye; <sup>3</sup> Filiipe na Paturumeewu; Tome na Matewuzhu, namariphisa lumpuru; Tiyaaku mwaana wa Alufeyeu, na Tadeewu; <sup>4</sup> Simawu Zelooti, na Yuuda Eshikariyoote, othuuto anzinkuliyeeyo.

<sup>5</sup> Yinsa khuwaaruma apale khumi na awiri na khuwooza yoori: "Mwiheette wa amalapo, wala mwiheette hatha sitati moote ya a Samariyya. <sup>6</sup> Ila khapula mweettele pwittipwitthi zawaashikha za Ezirayiilu. <sup>7</sup> Wakhula vahali mwineettaavo, mwitafusiri hapari epi mwiraka: 'Ofwalume wa pinkuuni ori kharipu!' <sup>8</sup> Mwiwaavonisaka anamarati, mwiwaasisimulaka ananfwa, mwiwaatwahareshaka anamaharaja, mwiikare masheethwani. Mweeyo mwapokhera mahala na mwina yawinkha mahala. <sup>9</sup> Mwihithuule hatha thahapu, wala feeta, wala khoopiri mmwizako mwenu; <sup>10</sup> Mwihithuule hatha kuwo kiina, wala jampali, wala pakhora, maana nakhaazi eninsuhi wiiyana ethu yoojiwa yawe.

<sup>11</sup> Na wakhula sitati ama mmwanttiwa, mwimweekese ntthu woojishitahi, mwiikhale owawe othuuto mpakha malawelo enu. <sup>12</sup> Amana mwivira nnyupa, mwichelise. <sup>13</sup> Nkhama atthu a nyuupa etile eeya osuhi, heeri yenu mweeyo yiye vamote na-yo; amana ahisuhi, heeri yenu ti yyuruteleni. <sup>14</sup> Amana ntthu ahuupokherelini na khuhitakhi osiila mattakhuzi enu, mwitatthe lifufu la mmoolu mwenu mwileemo

nnyupa mwaya mphule ama nsitati mwaya mphule. <sup>15</sup> Miiyo kiniwuzani khweele yoori, siiku ya ophukiwa enttela wiiyavo tthakaraka khwa Sotooma na Komoora zayita sitati ya eto.

### *Olupatthiwa na ohoowa*

<sup>16</sup> "Miiyo kinuurumani mweeyo nkhamma pwittipwithi vakatthi wa miji; nakataalikha mwiye alavilavi nkhamma nyookha na ooziina zootakhala nkhamma jiwa. <sup>17</sup> Mwiiyane phoole, maana atthu anlawa oottheni nnyupa woophukaniwamo na wuujaphani mmasinakooka mwaya. <sup>18</sup> Mwaasa wa miiyo, mwinlawa mwalawaniwe vakatthi wa misatora na afwalume, yoori wiiye oshaahiti anttelaaye orumeyela, yo na amalapo monkoni wa hapari zaka. <sup>19</sup> Ila amana oofukelani, mwhishanke ethu yoolupa, ama yooretta. Wakathi aya opo, Nluku ontela owinkhani mattakhuzi olupa, <sup>20</sup> maana khahiyo mweeyo mwintelaaye ottakhula, ila Rooho ya Papeenu ti enttelaaye ottakhula khwa mweeyo.

<sup>21</sup> "Ttwi mmote onlawa anleve ttwiye yoori ooliwe, na paapa onleva mwanawe; aana anlawa awaazukuluwele apapa zaya na awoole. <sup>22</sup> Atthu ooshi anttela owiinani mwaasa wa miiyo, ila otule anttelaaye ovilela mpakha mwiisho ontta wuusurukha. <sup>23</sup> Amana mwifiya nsitati khulupatthiwa, mwitthirele sitati kiina. Weekhweele miiyo kiniwuzani yoori khamwintela wiisha ozukulela Eziraiilu yooshi Mwaana wa Pinaatamu ahiteeni.

<sup>24</sup> "Nakhiyon khaninziti mwaaliimu awe, wala karumeya khaninziti mbwana awe. <sup>25</sup> Nakhiyon ona yoofurahi amana anfiyela mwaaliimu awe, na karumeya amana anfiyela mbwana awe. Moone, amana mweenyewe nyuupa attukhaniwa khutthajiw Belezibuuli, khi ajamaaze khatepeeni!

<sup>26</sup> "Nakataalikha mwihiwoove apo aya. Khayiivo yoottiyeeliwa ehinteelaaye othoonyeziwa wala yoovithiwa ehinteelaaye ojuwiwa. <sup>27</sup> Eti kiniuuzaani n'yiiza mwilupe nthana. Na etile mwisiiliyeeyo sirini mwaamuuze vatulu wa nyuupa. <sup>28</sup> Mwihiwoove otule anuulaaye mwiili, ahina owahi wa wuula nafusi. Khapula mwimoove otule anwahaaye otapanya mwiili na nafusi khweeselela motthooni. <sup>29</sup> Anyannyi awiri anuuzanyiwa nzurukhu mmote, ila khina mmote ankwelaaye vathi Papeenu ahitakheeni. <sup>30</sup> Hatha nyuuli za mmwishwa mwenu zooshi pi za waalakiwa. <sup>31</sup> Nakataalikha mwihiwove! Mweeyo mwinaaye fwayita zayita anyannyi.

<sup>32</sup> "Wakhula otule antukhurwaaye yoori ti waka vakatthi wa atthu, na miiyo kintukhuru khwa ye, vakatthi wa Paapa ariye pinkuuni. <sup>33</sup> Ila otule anikikathalaaye vakatthi wa atthu, na miiyo kinttela onkatthala vakatthi wa Paapa ariye pinkuuni.

<sup>34</sup> "Mwihaakanyere yoori miiyo katiisa heeri voolumwenku; akitiseeni heeri, katiisa phanka. <sup>35</sup> Miiyo kata yoori oomane mwaana na papaaawe, mwaana wankha na mamaawe, namaraliwa na nkhwewe.

<sup>36</sup> Maatuwi khaamili a ntthu anlankha vakatthi wa ajamaaze. <sup>37</sup> Otule animphetaaye mamaawe ama papaaawe zayita miiyo khansuhi wiiya namalottela aka; otule animphetaaye mwanawe zayita miiyo, khansuhi wiiya namalottela aka. <sup>38</sup> Otule ahinvikelaaye nsalapa awe akilotta, khansuhi wiiya namalottela aka. <sup>39</sup> Otule aneekesaaye ohaayi awe ontta omwaashikha, na otule onimwaashikhaaye ohaayi awe mwaasa wa miiyo ontta opattha.

*Tthuvo*

<sup>40</sup> "Wakhula otule anuupwekherelaanini akipwekherela miiyo, na otule anikipwekherelaaye ampwekherela otule akirumiyeeyo. <sup>41</sup> Otule animpwekherelaaye napiyu mwaasa wa ye wiiya napiyu, ompwekhera tthuvo ya napiyu; otule animpwekherelaaye nashariya mwaasa wa ye wiiya nashariya, ompwekhera tthuvo ya nashariya. <sup>42</sup> Na wakhula otule animwinkhaaye nsimaana hatha nkhamma koopho ya maati oozizima, mwaasa wa ye wiiya nakhiyoni aka, kiniwuza khweele yoori oto aya onlawa apwekhere tthuvo yawe."

**11***Yinsa na Yaahaya namoosa*

<sup>1</sup> Paata ya wiisha owaanozela anakhiyoni awe khumi na awiri, Yinsa khusala alawa osomisa na ofafusiri sitati za Kalileya.

<sup>2</sup> Yaahaya, paata ya osiila ari nkalapooso vitthu aari orettaazo Al-Masiihu, khuwaaruma anakhiyoni awe olawa omuuzela yoori: <sup>3</sup> "Ti weeyo otule aari weettelaaye ota, ama nimweekesele nkina?"

<sup>4</sup> Yinsa khuwaajipu araka: "Mwiruti mwamuuze Yaahaya epi mwintiilaaye na mwinoonaaye: <sup>5</sup> Ananhooni anoona, anamarakala aneettetta, anamaharaja antta otwahareshiwa, ananhisili ansiila, ananfwa ansisimuwa, na hapari zooshapweya antafusireliwa asikhini. <sup>6</sup> Ooparikhiiyiwa pi apale ahinikoonanaaye hatha ethtu ya owaakwak-wanttula."

<sup>7</sup> Aphano noolaavo anakhiyoni apale a Yaahaya, Yinsa khusala oozela khuntti etile monkoni wa Yaahaya yoori: "Mweetteliye woona-ni n'yaara? Ttekethe yiinisiwaka ti pheevo? <sup>8</sup> Ama, mweetteliye omoona ntthu awaliye kuwo zooshapweya? Moone, apale anwaalaaye kuwo zooshapweya aniikhala mmanyupa wa afwalume! <sup>9</sup> Nka khuuzeni, mweetteliye woona niini? Napiyu? Wekhweele, miiyo kiniwuuzani yoori anziti napiyu. <sup>10</sup> Otu ti otule yaatikhiweeyo monkoni wa ye yoori: 'Moone, kinlawa kamperekhe karumeya aka omaasho wawo; yoori atthenkeze tarikhi yawo.'

<sup>11</sup> Kiniwuuzani khweele yoori: Khwa aana ooshi avokoliweeyo ti aakha, khapuweenivo hatha mmote wonziti Yaahaya Namoosa. Ila woopushuwa muufwalume wa pinkuuni nwulweene zayita ye. <sup>12</sup> Waaza siikh za Yaahaya Namoosa mpakha leelo, Ofwalume wa pinkuuni ontta woojopholiwa, apo aya anjopholaaye anthuula. <sup>13</sup> Maana Manapiyu ooshi na Kano za Munsa za ahupiri mpakha yenzi ya Yaahaya. <sup>14</sup> Na amana mwitakha okhupalela, ye ti Aliyaasi otule aari weettelaaye ota. <sup>15</sup> Otule ariina mashilo ti asiile!

<sup>16</sup> "Khapila eti kilattanisane niini? Enlattanana asimaana eekhaliye va parasa eettaka osheza na onyakula na ashirikha aya:

<sup>17</sup> 'Fweeyo noovumiselani kuruneetha,  
ila mweeyo khuhiiini;  
khwiipa liipo la huzuni,  
ila mweeyo khuhilili.'

<sup>18</sup> Khuta Yaahaya woofuka na ahinnywaaye viinyu, mweeyo mwinri: 'Ye onaaye masheethwani!' <sup>19</sup> Ata Mwaana wa Pinaatamu anjaaye na

annywaaye, mwinri: ‘Otu nsokho na nnywachi, nshirikha wa anamariphisalumpuru na anatwampi.’ Ila ojuwa onthoonyezaya khwa khaazi onikholeliwaaye.”

### *Phoole khwa sitati zihinthupwiyaaye*

<sup>20</sup> Aphano Yinsa khwaaza omaruwela sitati epile aviriyeemo khuretamino minjuza zawe zawaatta, maana atthu aari wiikhalaamo khathupwiyiye. <sup>21</sup> “Phoole weeyo, Korazini! Phoole, weeyo Betezayiita! Maana eriwaka Tiiru na Sitooni zeettiye orettiawo minjuza epi mwiretteliweeyo mweeyo, apale aniikhalaaye ottuukho nka athupwiye raku, khuwala saakhu na khujivaaza fuutha! <sup>22</sup> Ila miiyo kiniwuuzani yoori siikhu ya ophukiwa enteela wiiyavo tthakaraka khwa Tiiru na Sitooni zayita mweeyo. <sup>23</sup> Khi weeyo Kafwaranaawu, ontela oweziwa mpakha pinkuuni? Wala, weeyo ontela weeseleliwa motthooni! Eriwaka minjuza zirettiweeyo vakatthi vawo zeettiye orettiwa Sotooma, zaari weettela opharelela mpakha leelo. <sup>24</sup> Ila miiyo kiniwuuzza yoori siikhu ya ophukiwa enteela wiiyavo tthakaraka khwa Sotooma zayita weeyo.”

### *Ovumula wa apale ooshokhera*

<sup>25</sup> Wakathi otthuupule Yinsa khulupa yoori: “Miiyo kinuusifu Paapa, Mbwana wa pinkuuni na vathi, maana weeyo wawaavithela vitthu epi ajuwi na asomi, na khuwaathoonyeza apa attiitthi. <sup>26</sup> Khweele, Paapa, ti nanna waatakhiyeeko. <sup>27</sup> Vitthu zooshi kenkhiwa ti Paapa. Khina aninjuwaaye Mwaana woohiiyi Paapa, na khina aninjuwaawe Paapa woohiiyi Mwaana na otule mwaana anintakhelaaye yoori anthoonyeze. <sup>28</sup> Mwikiteele miiyo mooshi mweeyo mwiiyiye ooshokhera na oolemeliwa, miiyo kintta wuuvumulisani. <sup>29</sup> Mwithuule thentte yaka na mwikeezele, maana miiyo kiwoonyamala na woojipushuwisa nroho, mweeyo mwintta opatha ovumula wa nafusi zenu. <sup>30</sup> Maana thentte yaka ti yookhwuya na mapwattha aka pi ooveya.”

## 12

<sup>1</sup> Wakathi otthuupule Yinsa khusala avira mmashapa wa tiriku, siikhu ya saapatu. Anakhiyonu awe khuwaakhola jala, yo khwaaza okathula misasi za tiriku arafunaka phunjye zaya. <sup>2</sup> Mafwarizeewu nawoona epile zaya, khumuuzu Yinsa yoori: “Owoone anakhiyonu awo anretta ethu ekhattaziweeyo orettiwa saapatu.”

<sup>3</sup> Ye khujipu araka: “Mweeyo khamwisomeeni ethu arettiyeeyo Daawuuda wakathi ye na ashirikha awe aakholiweeyo jala? <sup>4</sup> Ye eettiye Nnyupa ya Nluku, khurafuna phaawu na ashirikha awe enkhiweeyo Nluku, ethu yahaari otakhisiwaaye orettiwa, ila aariina ruhusa yooretta aari mahaakhimu a tiini paasi. <sup>5</sup> Ama mweeyo khamwisomeeni nkano za Munsa yoori saapatu, anamalokozela a tiini aavonyiye kano Nnyupa Woosifwiwamo, siikhu yaya eto, ila khushiina hatha paathuli? <sup>6</sup> Miiyo kiniwuuzza yoori apha ata otu azitiyeeyo Nyuupa Yoosifwiwamo. <sup>7</sup> Ila eriwaka mweeyo mwaari ojuwa maana a mattakhuzi anraaye: ‘Kintakha huruma akintakha twaha,’ khamwaari onhukhumu ntthu ahina paathuli. <sup>8</sup> Maana Mwaana wa Pinaatamu Mbwana wa saapatu.”

<sup>9</sup> Khulaavo aphale vaya khweetta nsinakooka yaaya atthaapale. <sup>10</sup> Ntumphule aarimo mwinyi mmote woorakala nkhono. Aphano atthu

akina aari otakhaaye onlokoveza Yinsa yoori: "Ti ya halaali monkoni wa kano ovonisa saapatu?"

<sup>11</sup> Ye khuwaajipu yoori: "Paani wa mweeyo, amana eeyana pwittipwitthi yawe ekwela valiphotto saapatu, ahinlawaaye okhola alazavo?

<sup>12</sup> Ntthu ona fwayita khuluyeene zayita pwittipwitthi! Nakhataalikha ewaapho ruhusa yooretta ethu yooshapweya saapatu."

<sup>13</sup> Aphano khumuza mwinyi otule yoori: "Wookole nkhono awo." Ye khookola, khuvonisiwa, khwiya sawasawa na opu nkina. <sup>14</sup> Ila mafwarizeewu apale khusaruwa khusala awaza shawuri za omuula Yinsa.

### *Karumeya woothawuliwa ti Nluku*

<sup>15</sup> Yinsa noojiwa shawuri zaya epile, khulaawo okhule waya. Atthu enkeene khusala anlotta, ye khuwaavonisa alwele ooshi aariivo vakatthi wa atthu aya apale, <sup>16</sup> na khuwoza yoori ahilupe hatha ethu monkoni wa ye. <sup>17</sup> Eto yaarettikhaniye yoori eretteye etile yaalupiweeyo ti napiyu Ezaaya yoori:

<sup>18</sup> "Otu ari apha karumeya aka, kinthawuliyeeyo,  
mphetani aka, anfurahisaaye rooho yaka,  
kanttheela nafusi yaka,  
ye onteela olaleya ophukiwa wa atthu ooshi.

<sup>19</sup> Khanteela okeetsana wala onyakula,  
khina anttelaaye osiila huula yawe mmatarikhi.

<sup>20</sup> Khanteela ovuja ttekethe yoomanyeya,  
wala khanteela ozimisa mweeke wootthuwela,  
mpakha athuule oshintta khwa shariya.

<sup>21</sup> Amalapo ooshi anttela wiiyana nroromelo khwa nzina lawe."

### *Owni wa Yinsa khwa wiikara masheethwani*

<sup>22</sup> Paata ya toowo, khutiiseliwa namasheethwani woohooni na khaari ottakhula, Yinsa khunvonisa, khwaaza woona na ottakhula. <sup>23</sup> Atthu ooshi khwiya ooshanka channu khusala oozelana yoori: "Khahi mwaana wa Daawuuda otu?"

<sup>24</sup> Mafwarizeewu akina noosiila toowo khuri: "Otu oniikara masheethwani paasi khwa owahi wa Belezibuuli, mfwalume wa masheethwani."

<sup>25</sup> Aphano Yinsa noojiwa etthu aari wuupuwelaaye yo, khuwoza yoori: "Wakhula ofwalume wa waawanyeya khusala wuumana otthuuporu oniiya wootapanyeya, na wakhula sitati ama nyuupa yawaawanyeya ethiitoru khiniiyavo. <sup>26</sup> Nkhama Epiliisi onimwiikara Epiliisi, eetta ojaawanya otthweru. Toowo ofwalume awe onteela wiliyavo toovi? <sup>27</sup> Nkhama miiyo kiniikara masheethwani khwa owahi wa Belezibuuli, khi aaneenu aniikara toovi? Tiito aaneenu atthaapo ti anttelaaye wuuphukani mweeyo. <sup>28</sup> Ila nkhama kiniikara masheethwani khwa Rooho ya Nluku, eto enthoonyeza yoori Ofwalume wa Nluku woofiyelani.

<sup>29</sup> "Ama ntthu onvira toovi nnyupa wa nwali khuthuulamo maali zawe ahaazeeni khabula onfuka? Toowo phi oniwahaavo wiiya vitthu za nnyupa mwawé.

<sup>30</sup> "Otule ahi vamote na miiyo ontta okuumanana, na otule ahinkusanyaaye khwa miiyo ontta omwaza. <sup>31</sup> Etthiipo miiyo kiniwuuzani

yoori: Twampi na kufuru zooshi za anaatamu zinswamahiwa, ila okufurwela Rooho Ttakathiifu khunswamahiwa.<sup>32</sup> Wakhula otule anlupaaye ntakhuzi la omuumanana Mwaana wa Pinaatamu onswamahiwa, ila otule anttakhulaaye wawuumananavo Rooho Ttakathiifu khanswamahiwa, waaza nasaapi eti mpakha okhu ninttaawo.

<sup>33</sup> “Muutthi wooshapweya oniima mishumo zooshapweya, muutthi wootakhala oniima mishumo zootakhala, maana wakhula muutthi onjuwiwa khwa mishumo zaya.<sup>34</sup> Ojama wa nyookha, enretteya mweeyo ootakhala rooho, ottakhula vitthu zooshapweya? Maana milomo enttakhula etile eniyyaaye varoho.<sup>35</sup> Ntthu wooshapweya rooho, mmujuju mwawe ensarulamo vitthu zooshapweya, wootakhala rooho mmujuju mwawe ensarulamo vitthu zootakhala.<sup>36</sup> Ila miiyo kiniwuuzani yoori, siikhu ya ophukiwa, atthu anlawa arettiwe hisapu mwaasa wa mattakhuzi ooshi ohiina fwayita aari olupakaaye.<sup>37</sup> Maana khwa mattakhuzi enu mwinteela wonkokha na khwa atthaapo mwinteela ohukhumwiwa.”

### *Alama ya Yuunusa*

<sup>38</sup> Aphano mafwarizeewu akina na anamanozela a kano khulupa yoori: “Mwaaliimu, nintakha woona alama ya minjuza yoorettiwa ti weeyo.”

<sup>39</sup> Ye khujipu araka: “Khapila yootakhala na yooraruwa enveka alama ya minjuza, ila khinteela winkhiwa hatha moote ya ohiyi alama ya napiyu Yuunusa.<sup>40</sup> Maana nkhama ethiipo Yuunusa ekhaliyeyeo siikhu ttatthu nthana na osikhu mmatthupo wa swi, khwa ethiipo Mwaana wa Pinaatamu onttela wiikhala siikhu ttatthu nkhpuri.<sup>41</sup> Atthu a Neniive anlawa alankhe siikhu ya ophukiwa, ookwiseleni paathuli mweeyo, maana yo athupwiya twampi zaya paata ya osila tafusiiри ya Yuunusa, na aphano ori apha otule eeyiyeyo nwulweene zaita Yuunusa.<sup>42</sup> N'hano wa Kusini onlawa alankhe siikhu ya ophukiwa ookwiseleni paathuli mweeyo, maana ye alankha peetiwene oteela osila ojuwa wa Seleyimaana, ila nasaapi otu ariiye apha anziti Seleyimaana.

<sup>43</sup> “Amana sheethwani anlawa ntthu, onvira nhali woohiimo maati eekesaka vahali woovumulavo, ila amana ahipatthivo.<sup>44</sup> Aphano onri: ‘Kinrutela nyuupa ethiitile kilankhiyeeyo.’ Noofiya khusikana nyuupa eheettiweenimo, ori wooseeliwamo wawaattaleliwamo saana.<sup>45</sup> Ontta oruti khulawa khuwaatana masheethwani sapa ootepa otakhala, khweettamo khusala eekhala ntumpho, ntthu otule khweetta wootepa khuziti khiima etile aariyeyo raku. Na enttela orettikhana ethiipo khwa khapila eti.”

### *Maama wa Yinsa na attwiize*

<sup>46</sup> Yinsa nalelo eettaka ottakhula na khuntti etile, mamaawee na attwiize aarettiye ari vaje, antakhaka yoori anttakhulane.<sup>47</sup> Ntthu mmote khumuuzo yoori: “Mamaawo na attwiizo ari vaje antakha ottakhulana weeyo.”<sup>48</sup> Ye khujipu yoori: “Maama ti paani? Wala attwiizaku ti paani”?<sup>49</sup> Khookolela nkhono awe phantte ya anakhiyoni awe khulupa araka: “Maama na attwiizaku pi apa ariiye apha.<sup>50</sup> Maana otule anrettaaye matakhelo a Paapa ariiye pinkuuni, oto ti twiyyaku, nlupwaaka na ti maama.”

## 13

### *Nlikaniso wa namazala*

<sup>1</sup> Siikhu ethiitile Yinsa khulankha owawe khulawa nshini wa ntthatta.  
<sup>2</sup> Khuzukuleliwa pi atthu awaatta, aphano ye khupakhira mmwaatiya khwiikhala. Atthu apale khweemela vapatari. <sup>3</sup> Ye khusala awaasomisa khwa milikaniso, araka: "Namalima aalawiiye ozala. <sup>4</sup> Amwazaka peewu yawe, phantte kiina khukwela nshini wa tarikhi, anyannyi khuta khuja. <sup>5</sup> Kiina khukwela vahali aariivo mawe, vahali laarivo nttophe vattithiiru; nasaapiru khoottha, ila wiiya nttophe ntthile khaleechiye. <sup>6</sup> Aphano noopoowa njuwa khulukula na khuuma; maana khazaarinna mitathaari. <sup>7</sup> Peewu kinoko khukwela vanyiwa, khuwula vamote na nyi-iwa, khurapeliwa pi nyiwa. <sup>8</sup> Kiina khukwela vanshaka wooshapweya, khwiima mishumo zooshapweya, miiya, mikina siithiini na talaathiini wakhula mmote! <sup>9</sup> Otule ariina mashiilo ti asiile."

<sup>10</sup> Anakhiyoni awe khunsusela khumuuzela yoori: "Mwaasa aya niini atthu apa owaattakhulelaka khwa milikaniso?"

<sup>11</sup> Ye khuaajipu: "Mweeyo mwenkhiwa ojuwa siiri za Ofwalume wa pinkuuni, ila yo wala. <sup>12</sup> Maana, otule ariina, onttela winkhiwa, oniiyana zawaatta. Ila otule ahina,hatha etile ariinaaye onta onyakanyiwa. <sup>13</sup> Tiito miiyo kiniwoozaaye khwa milikaniso: maana yo ana maasho ila khanoona,

ana mashiilo ila khansiila, na wala khiniweeleya.

<sup>14</sup> Khwa yo wamariseleya ohupiri wa Ezaaya onlupaaye yoori:

'Hatha nkhamma mwasiila  
 khiniweeleyani;  
 hatha nkhamma moona  
 khamwinjuwa.

<sup>15</sup> Maana rooho za atthu apa pi zookhijili,  
 attiyela mashiilo aya  
 na khuphunya maasho aya,  
 eriwaka khayaari ethiito,  
 aari owahi woona na maasho aya,  
 na osiila na mashiilo aya na oweenleya va rooho vaya  
 khurutela mmakhono mwaka,  
 keetta owaavonisa.'

<sup>16</sup> Ila ooparikhiiyiwa maasho enu mweeyo, maana anoona; na maashiilo enu, maana ansiila. <sup>17</sup> Miiyo kiniwuuzani khweele yoori: manapiyu enkeene na anashariya aatakhkiye woona epi mwinoonaazo, ila khuhooni, na osiila epi mwinsiilaazo ila khuhisiili.

<sup>18</sup> "Nakataalikha mwisiile na mwijuwe maana a nlikaniso wa namazala: <sup>19</sup> Amana ntthu asiila ntthakhuzi la Ofwalume khuhimweeleyi, Ntakhali ti antaaye khulazavo etile yaazaliweeyo nroho mwawe. Eto peewu etile yaakweliyeeyo nshini wa tarikhi. <sup>20</sup> Etile yaakweliyeeyo vahali aariivo mawe pi apale ansiilaaye ntthakhuzi nasaapiru khupokherela na furaha. <sup>21</sup> Ila mwaasa wa ohiina mitathaari eenywero, anlipalipa khwa wakathi vattithiiru. Amana epuwelela miswipa ama lupattha mwaasa wa ntthakhuzi la Ofwalume anlikha nasaapiru amini yaya. <sup>22</sup> Etile yaakweliyeeyo va nyiwa, pi apale ansiilaaye ntthakhuzi, ila mwaasa wa tafwawuthi za ohaayi, na

ottettekha wa maali entta owaakhupa, ahifiyelelaka wiima mishumo.  
<sup>23</sup> Ila etile yaakweliyeyo vahali wooshapweyavo pi apale ansiilaaye ntakhuzi khuweeleya, khwiima mishumo miiya, khwiima siithiini, talaathiini khwa muutthi mmote.”

### *Nlikaniso la ntakhatakha*

<sup>24</sup> Yinsa khuwooza nlikaniso nkina araka: “Ofwalume wa pinkuuni ori nkhama ntthu mmote azaliyeyo peewu yooshapweya mmashapa mwawe. <sup>25</sup> Osikhu mmote, atthu ooshi eettaka olala, khuta atuvi vakatthi wa tiriku khuzalavo ntakhatakha, khulawa. <sup>26</sup> Wakathi tiriku ewuliyeovo khupuwa misaasi zaya, naye ntakhatakha khupuwa misaasi zaya.

<sup>27</sup> “Akarumeya a mweenyewe nshapa khulawa wa mweenyewe kumuza yoori: ‘Mbwana, mweeyo mwaazaliye peewu yooshapweya mmashapa mwenu. Khi aphano ntakhatakha lapuwa vayi?’ <sup>28</sup> Ye khujipu yoori: ‘Atuvi ti arettiye epo zaya.’ Akarumeya apale khumuuzela yoori: ‘Mbwana mwintakha fweeyo nalazemo?’ <sup>29</sup> Ye khujipu yoori: ‘Wala, maana, amana mwikhulakamo ntakhatakha nttho, mwintta okhula vamote na tiriku. <sup>30</sup> Mwilikhe ziwulele vamote mpakha wakathi wa wuurula. Kintta owooza anamuurula yoori: ‘Mwikusanye khapula ntakhatakha mwifuke mashittha likhoziwe; mwikusanye tiriku mwithe va sakafu vaka.’”

### *Nlikaniso wa phunje ya Samuli na Fwaramento*

<sup>31</sup> Na khuwooza nlikaniso nkina araka: “Ofwalume wa pinkuuni ori nkhama phunje ya samuli, ntthu anthulaaye khuzala mmashapa mwawe. <sup>32</sup> Eto ttiithiiru zayita peewu zooshi, amana owula onziti miitthi zooshi za mmashapa, anta anyannyi ojeka vijaaro n'virapi mwaya.” <sup>33</sup> Khuwooza nlikaniso nkina araka: “Ofwalume wa pinkuuni ori nkhama fwaramento muukha anthuulaaye khuphakanya na ofu wa tiriku wa waatta, wooshi khujakuwa. <sup>34</sup> Yinsa aari wuuza khuntti etile, khwa nlikaniso. Weekhwhee, khina ethtu moote aari owooozaaye woohiiyi khwa nlikaniso. <sup>35</sup> Eto yaari orettikhana yoori eretteye etile yaalupiweeyo ti napiyu yoori:

“Kinteela ofunula milomo zaka khwa nlikaniso,  
 na olaleya vitthu zoovitheya waaza wumpiwa wa olumwenku.”

### *Otaphuleliwa wa nlikaniso wa ntakhatakha*

<sup>36</sup> Aphano ye khuwaalikha atthu apale khulawa owawe. Anakhioni awe khumwaattama khunvekela yoori: “Oneeleze nlikaniso wa ntakhatakha.” <sup>37</sup> Ye khujipu yoori: “Otule aazaliyeyo peewu wooshapweya ti Mwaana wa Pinaatamu. <sup>38</sup> Nshapa olumwenku, peewu yooshapweya aana a Muufwalume. Ntakhatakha aana a sheethwani. <sup>39</sup> Atuvi aazaliyeyemo ti sheethwani. Wuurula, mwiisho wa wakathi, akarumeya a wuurula malayikha. <sup>40</sup> Nkhama ethiipo ntakhatakha linuuruliwazo khukhoziwa va moottho, enttela wiiya ethiipo mwiisho wa olumwenku. <sup>41</sup> Mwaana wa Pinaatamu ontela oruma malayikha awe, alazemo muufwalume mwawe zooshi epile zookwakwanttula, na apale anrettaaye vitthu zootakhala. <sup>42</sup> Aweeselele va njocho la moottho, attaapho ontela wiiyavo olila na oluma meeno. <sup>43</sup> Aphano anashariya anttela waara nkhama njuwa muufwalume wa Papaaya. Ariina mashiilo, ti asiile.”

*Nlikaniso wa maali zoovithiwa na liwe la fwayita*

<sup>44</sup> Ofwalume wa pinkuuni ori nkhamma njuju loovithiwa mmashapa. Ntthu mmote, khulawa khusikana, na ye khuvitha opheya. Mwaasa woofurahi khulawa khuuzanyisa vitthu zawe zooshi aarinaazo khuuzanya nshapa ntthile. <sup>45</sup> Theenya Ofwalume wa pinkuuni ori nkhamma nakusiyanti aneekesaaye mawe ootafikhana. <sup>46</sup> Noosikana liwe la fwayita khuluyeene, khuuzanyisa vitthu zooshi aariinaazo khuuzanya.”

*Nlikaniso wa ntthavi*

<sup>47</sup> “Ofwalume wa pinkuuni ori nkhamma ntthavi laweesiwa mpahari khuula wakhula jaati ya swi. <sup>48</sup> Amana liitaala, anamajiya anfuthela vathi. Aphano yo khukusanya swi epile zooshapweya khuttha mmakapaja, ila epile zoohishapweyi khweesela. <sup>49</sup> Enttela orettikhana ethiipo mwiisho wa olumwenku. Malayikha anteela owaaphakula ootakhala rooho na anashariya, <sup>50</sup> aweeselele va njocho la moottho apale ootakhala rooho, attaapho onttela wiiyavo olila na oluma meeno.”

*Njuju li pheeya na la raku*

<sup>51</sup> Aphano Yinsa khuwoozela yoori: “Zaweeleyani vitthu zooshi kilupiyeeyo?” Yo khujipu yoori: “Aaa!” <sup>52</sup> Ye khuwoza yoori: “Tiito wakhula namanozela a kano anozeliweeyo monkoni wa Ofwalume wa pinkuuni onlattanana mweenyewe nyuupa anlazaavo va njuju vawe vitthu pheeya na vitthu zaraku.”

*Yinsa onkatthaliwa nti wa Nazareeti*

<sup>53</sup> Paata ya Yinsa wiisha olupa milikaniso epile, khulaawo okhule waya. <sup>54</sup> Khufiya sitati yawe, ohali aari wiikhalaawo. Ye khwaaza owaasomisa atthu nsinakooka. Atthu ooshi khwiya ooshankisiwa, khusala oozela yoori: “Ojuwa opu apattha vayi na owahi wa oretta minjuza? <sup>55</sup> Khahi mwaana wa kalapinteero? Nzina la mamaawe khahi Mariyamu? Attwiize khayi Tiyaaku, Yuusufu, Simawu na Yuuda? <sup>56</sup> Alupuwe ooshi khaniikhala nttumphu? Khi vitthu epi apattha vayi?” <sup>57</sup> Atthu ooshi khuhinkhupali. Ila ye khulupa yoori: “Napiyu ti wooshitahiwa phantte zooshi, ila mmuti mwawe na owawe khanshitahiwa.” <sup>58</sup> Yinsa khaarettiye minjuza zawaatta mmuti mphule, maana yo khaarina amini.

## 14

*Ofwa wa Yaahaya Namoosa*

<sup>1</sup> Wakathiaya opule Herooti\* Antiipa, nsatoro wa Kalileya, khusila olupiwa monkoni wa Yinsa. <sup>2</sup> Ye khuwooza akarumeya awe yoori: “Oto ti Yaahaya Namoosa; eetta osisimuwa muufwa! Tiito ariinaaye owahi wa oretta minjuza.”

<sup>3</sup> Maana aarettiye Herooti antthiiye Yaahaya nkalapooso, mwaasa wa Herotiyya, muukha wa Filiipe, ttwiye, <sup>4</sup> mwaasa wa Yaahaya omuuza yoori: “Khahi halaali weeyo onrala ye.” <sup>5</sup> Herooti aari otakha omuula, ila khusala awoova atthu, maana yo aari ojuwa yoori Yaahaya napiyu.

<sup>6</sup> Va njampo la oretta mwaakha Herooti, mwaana wa Herotiyya khwiina vakatthi wa atthu ooshi, khuntuvelisa Herooti, <sup>7</sup> ye khumwaahiti khwa olapha omwinkha wakhula etile aari weettelaaye onvekela. <sup>8</sup> Khwa shawuri za winkhiwa ti mamaawe, mwaana otule

\* **14:1** Herooti Antiipa, aari mwaana wa Herooti Nwulu.

khulupa yoori: "Mwikitii sele mparathu eeshwa ya Yaahaya Namoosa."<sup>9</sup> Mfwalume khwiya wooshukulikha, ila mwaasa wa olapha na mwaasa wa anamalaleyiwa, ye khuruma yoori enkhiwe etile mwaana otule avekiyeyo.<sup>10</sup> Khuruma olawa oshijiwa eeshwa ya Yaahaya Namoosa nkalapooso.<sup>11</sup> Eeshwa yawe khuthuuliwa mparathu khulawa khwinkhiwa mwaana otule, ye khuthuula khulawa khumwinkha mamaawe<sup>12</sup> Anakhiyoni a Yaahaya khuta, khuthuula mwiili awe khulawa khuzikha. Nawiisha khulawa onthatelela Yinsa.

### *Waattisiwa wa phaawu na swi*

<sup>13</sup> Noosiila vitthu zaarettikhaniyeelo, Yinsa khupakhira mmwaatiya khulaawo okhule waya, khweetta ohali yaariiwo yaara otthwe. Ila atthu noojuwa, khulankha nsitati mphule khusala anlottelela mwentto. <sup>14</sup> Yinsa noopakuwa khuwoona atthu awaatta, khuwoonela huruma, khuwaavonisa alwele aariivo.<sup>15</sup> Njuwa-looveva, anakhiyoni awe khunsusela khumuuzu yoori: "Mphu n'yaara na ontta oripa. Owaamwaze atthu apa eette mmamuti mpho oozanye ethu yoojiwa."<sup>16</sup> Yinsa khuwaajipu araka: "Khinihithajya yo olawa. Mweeyo ena mwiwenkhe ethu yoojiwa."<sup>17</sup> Yo khulupa yoori: "Fweeyo ninaaye phaawu thaanu na swi piiri."<sup>18</sup> Aphano ye khulupa yoori: "Mwikitii sele."<sup>19</sup> Khuruma yoori atthu apale eekhale va nyaani, khuthuula phaawu epile thaanu na swi epile piiri, khweekesa otulu, khuparikhya. Khumeya phaawu epile. Khuwenkha anakhiyoni awe, yo khusala awenkha atthu.<sup>20</sup> Ooshi khuja khurupala, anakhiyoni khulokotthela khelenke khumi na piiri nyeenye zoosala.<sup>21</sup> Atthu aajiyeyo aari alume alufu thaanu, ohiwaatthiimo aakha na asimaana.

### *Yinsa oneettetta vatulu a maati*

<sup>22</sup> Nasaapiru Yinsa khuwaaruma anakhiyoni awe yoori apakhire mmwaatiya alokoze eette phantte kiina, ye aasaliye awaaleezaka atthu apale.<sup>23</sup> Paata ya owaaleeza atthu, khuwela va mwaako olawa olompa. Khuripa ye ari attaaphale otthwe,<sup>24</sup> ila wakathi aya opule mwaatiya waari peetiwene na vathi, weettaka opiiwa ti mawipi venkivene maana pheevo eetta wiinyula.<sup>25</sup> Lifwajiri, Yinsa khusala eetta attaaphale aarivo anakhiyoni awe eettettaka vatulu a maati.<sup>26</sup> Noomoona eettaka weettetta vatulu a maati yo khwiya oosuthuwa khulupa yoori: "Opu nshitapehe!" Yo khusala anyakula na woova.<sup>27</sup> Ila Yinsa khuwooza yoori: "Mwiminyale! Ti miiyo. Mwihoove!"

<sup>28</sup> Khujipu Pheeturu yoori: "Nkhama ti weeyo khweele Mbwana, okirume kite attaapho oriivo, keettettaka vatulu a maati."<sup>29</sup> Yinsa khunjipu, araka: "Ote." Aphano Pheeturu khulaamo mmwaatiya, khusala eettetta vatulu a maati eettaka phantte etile aariiwo Yinsa.<sup>30</sup> Paata ya woona kхиima pheevo etile yaari ovumaazo, khoova khusala azama vattiithi-vattiithi, ettaka onyakula araka: "Mbwana, okusuру!"<sup>31</sup> Nasaapiru Yinsa khookola nkhone awe khunkholelala. Khu-muuza yoori: "Ntthu woopushuwa amini, ohaaminaka mwaasa aya niini?"<sup>32</sup> Paata ya owela mmwaatiya, pheevo etile khwiisha.<sup>33</sup> Apale aari mmwaatiya khumwaaputu alupaka yoori: "Khweele weeyo o Mwaana wa Nluku."

### *Yinsa oniwaavonisa atthu nti wa Jenezare*

<sup>34</sup> Paata ya olokha pahari, khufiya Jenezare. <sup>35</sup> Wakathi atthu a mmuti mphule anjuwiyeovo yoori ti Yinsa, khumwazela hapari mmuti mphule wooshimo, atthu akina khusala awaatana alwele. <sup>36</sup> Anvekelaka yoori nenkawu asape nshaka la ajapi yawe; ooshi asapiyeeyo aavoniye.

## 15

### *Yinsa khwa zowera za mayaahuuti*

<sup>1</sup> Aphano khulankha Yeruzaleemu, Mafwarizeewu akina na ana manozela a kano khuta omuuzelaa Yinsa yoori: <sup>2</sup> “Mwaasa aya niini anakhiyoni awo akhijilelaka zowera za attunkhulu a tiini, oja ahinaweeni?” <sup>3</sup> Yinsa khuwaajipu araka: “Mwaasa aya niini mweeyo mwikhijilelaka kano za Nluku, mwaasa wa zowera zenu? <sup>4</sup> Maana Nluku alupa yoori: ‘Onshitahi papaa wo na mamaawo’ na ‘antakhaaye onlaani papaa we na mamaawe ona ya ohukhumwelawa ofwa.’ <sup>5</sup> Ila mweeyo mwinkhupalela yoori amana ntthu amuuza papaa we ama mamaawe yoori: ‘Wakhula ethu kiniwinkhaanini miiyo zaakha ya omwinkha Nluku; <sup>6</sup> ye khankhanyareliwa theenya onshitahi papaa we khwa nanha nkhamma eto.’ Khwa ethiipo, mwaasa wa zowera zenu, mweeyo mwimpeepheyisa nt takhuzi la Nluku. <sup>7</sup> Manaafikhi! Ezaaya ahupiri saaneene monkoni wa mweeyo araka:

<sup>8</sup> ‘Atthu apa anikaaputu na milomo,  
ila rooho zaya ziri peetiwene khwa miiyo.

<sup>9</sup> Mweeyo mwinikaaputu mahala,  
mwisomisaka zowera za anaatamu.’ ”

### *Yinsa onttakhula monkoni wa Otwahareshiwa*

<sup>10</sup> Yinsa khuwaakhuwela atthu apale khuwooza yoori: “Mwisi ile na eweeleyeni. <sup>11</sup> Khahiyo etile entthiwaaye nkhanyo enin haramushaaaye ntthu; ila etile enlankhaaye nkhanyo ti eninharamushaaaye.” <sup>12</sup> Aphano anakhiyoni awe khulawa khumwaattama khumuuzela yoori: “Wajuwa yoori mafwarizeewu noosila hapari epile eephiriwa?” <sup>13</sup> Yinsa khuwaajipu yoori: “Miitthi zooshi zihizaliweeni ti Paapa wa pinkuuni zinttela okhuliwa na mitathaari zaya. <sup>14</sup> Mwiwaalikhe, maana yo khanoona na aniweettetisa ananhooni. Amana ntthu woohooni amweettetisa nahooni nzaawe ooshi antta ok-wela nliphotto.” <sup>15</sup> Aphano Pheeturu khunvekela Yinsa yoori: “Onuuze maana a nlikaniso opo.” <sup>16</sup> Yinsa khuwaajipu yoori: “Kiri na mweeyo nalelo khiniweeleyani? <sup>17</sup> Yoori zooshi zintthiwaaye nkhanyo zineetta mwijjohojo na khunyiwa? <sup>18</sup> Ila vitthu zinlankhaaye nkhanyo zinlankha va rooho na piitthiipo eninharamushaaaye pinaatamu. <sup>19</sup> Maana nroho ti zinlankhaamo shawuri zootakhala nkhamma epi: wuula, oraruwa, oshawi akhapa, wiiya, olokova na ohankawaani. <sup>20</sup> Epo pi eninharamushaaaye ntthu. Ila oja ohinaweeni khinharamusha ntthu.”

### *Muukha wa Kanaani onthonyeza amini yawe*

<sup>21</sup> Paata ya Yinsa olaavo aphale vaya, khusala alawa nti wa Tiiro na Sitooni. <sup>22</sup> Muukha wa Kanaani aari wiikhalaaye nti otthuupule, khuta okutthanana Yinsa eettaka okhuwa yoori: “Mbwana, Mwaana wa Daawuuda, koonele huruma! Mwanaka etta wiiyana masheethwani na ontta ohoowa channu.” <sup>23</sup> Ila Ye khuhinjipu hatha nt takhuzi, anakhiyoni awe khulupa yoori: “Omuuze alawe, ontta onyakula nyuma wetthu.”

<sup>24</sup> Yinsa khujipu yoori: "Miiyo kaperekhiwa paasi khwa pwittipwitthi epile zawaashikha za Ezirayiilu." <sup>25</sup> Muukha otule khuta khukokkhora na khuri: "Mbwana, okaawuni!" <sup>26</sup> Aphano Yinsa ajipwaka khuri: "Khahiyoooshapweya othuula phaawu ya aana khuwenkha aana aanapwa." <sup>27</sup> Muukha otule khujipu yoori: "Khweele Mbwana, ila na aana aanapwa anja tathela zinkwaaye vameeza wa mweenyewe." <sup>28</sup> Aphano Yinsa khumuuzu yoori: "Oo muukha, amini yawo khulyeene! Ti erettikhane etile ontakhaaye." Na wakathi otthuupule mwanawwe khwiya woovona.

*Yinsa onrutela pahari ya Kalileya na oniwaavonisa alwele.*

<sup>29</sup> Yinsa khulaawo okhule waya khulawa mpakha nshini wa pahari ya Kalileya. Khuwela va mwaako khwiikhala attaapho. <sup>30</sup> Khusala ata atthu awaatta, awaatanaka anamarakala, ananhooni, anamakhu-muwa, ananhittakhuli na akinoko aya, khuwaalikha nshini wa Yinsa, ye khuwaavonisa. <sup>31</sup> Atthu khwiya ooshanka wakathi awooniyeovo ananhittakhuli eettaka ottakhula, anamarakala ari oovona, anamakhumuwa eettaka weetteta na ananhooni eettaka woona. Yo khunsifu Nluku wa Ezirayiilu.

*Yinsa onjisa khuntti kiina*

<sup>32</sup> Yinsa khuwaakhuwela anakhiyonи awe na khuwooza yoori: "Ki-naaye tthakaraka na atthu apa; zavira siikhu ttatthu ari vamote na miiyo na khana hatha etthu-yoojiwa. Akintakha owaalikha olawa na jala zaya, maana kinoona yoori antta ozileya ntarikhi." <sup>33</sup> Anakhiyonи awe khujipu yoori: "Ninttela opattha vayi phaawu zoofiyela, atthu apa waatta na mphu n'yaara?" <sup>34</sup> Ye khuwoozela yoori: "Mwina phaawu kavi?" Yo khujipu yoori: "Sapa, na mattaatta vattithiiru." <sup>35</sup> Yinsa khuruma yoori atthu apale eekhale. <sup>36</sup> Khuthuula phaawu epile sapa na swi khushukhurwela khumeya khuwenkha anakhiyonи awe, khusala awaawanyeza atthu. <sup>37</sup> Ooshi khuja khurupala. Anakhiyonи apale khukusanya khelenke sapa za pattaasu zasaliyeeyo. <sup>38</sup> Atthu aajiyeeeyo aari alufu nne, ohiwaalaki aakha na asimaana. <sup>39</sup> Paata ya oleezanana atthu apale, Yinsa khupakhira mmwaatiya khulokhela nti wa Makata.

## 16

*Mafwarizeewu na Masatukhi anveka alama moote ya pinkuuni*

<sup>1</sup> Mafwarizeewu na masatukhi khumwaattama. Yinsa khusala amweeza anvekelaka alama moote yoolankha pinkuuni. <sup>2</sup> Ye khuwaajipu araka: "Amana njuwa liveva, mweeyo mwinraka, 'Onttela wiiya wakathi wooshapweya, maana pinku ti yookhuttuwa.' <sup>3</sup> Na leelo supu, 'Enttela opuwa pheevo, maana pinku ti yookhuttuwa na eetaalawo mawiku.' Mweeyo mwinjuwa otaphulela nanna ya pinku, ila khamwinjuwa otaphulela alama za wakathi! <sup>4</sup> Khapila yootakhala na yooraruwa anveka alama ya minjuza, ila hatha alama khanlawwa winkhiwa yoohiiyi alama ya Yuunusa." Aphano Yinsa khuwaalikha khulaavo aphale vaya.

*Fwaramento ya Mafwarizeewu na Masatukhi*

<sup>5</sup> Paata ya olokhela phantte kiina ya pahari, anakhiyonи khusophela yoori asahawu othuula phaawu. <sup>6</sup> Yinsa khuwooza yoori: "Mwiye wa woona na mwiiyane phoole na fwaramento za mafwarizeewu na za

masatukhi.”<sup>7</sup> Anakhiyoni apale khwaaza onyakulisana atthaaporu, araka “mwaasa aya ohithuuli phaawu.”<sup>8</sup> Asiiliyeovo onyakulisana opule, Yinsa khuwooza yoori: “Atthu oopushuwa amini, mwaasa aya niini mwinnyakulisana mweeyena-ru? Mwaasa woohiina phaawu?<sup>9</sup> Nalelo khina weeleyeni? Khamwimfikhirela phaawu epile thaanu miiyo kawaawanyezieeyo atthu alufu thaanu? Khelenke kavi mweetaaziyeeyo?<sup>10</sup> Wala khwa phaawu sapa aarafuniyeeyo atthu alufu nne, na zaari khelenke kavi mwilokottheliyeeyo?<sup>11</sup> Nanna-ni ehini-weeleyaanini yoori akaari owuuzani monkoni wa phaawu? Mwiyyane phoole na fwaramento ya mafwarizeewu na za masatukhi.”<sup>12</sup> Aphano khuweeleya yoori khaari owooza wiiyana phoole na fwaramento ya phaawu, ila khwa masomi a Mafwarizeewu na masatukhi.

### *Otukhuru wa Pheeturu*

<sup>13</sup> Yinsa afiyeevo nti wa Sezareeya ya Filiipe, khuwoozela anakhiyoni awe yoori: “Atthu aninlupeza niini Mwaana wa Pinaatamu?”<sup>14</sup> Yo khujipu yoori: “Akina anri o Yaahaya namoosa; akina, anri o Aliyaasi, akina anri o Jeremiiya ama mmote wa manapiyu.”<sup>15</sup> Khurutela owoozela theenya yoori: “Khi mweeyo mwinri ki paani?”<sup>16</sup> Simawu Pheeturu khujipu yoori: “Weeyo o Al-Masiihu, Mwaana wa Nluku haayi.”<sup>17</sup> Yinsa khujipu yoori: “Wooshapweyiwa ti weeyo, Simawu mwaana wa Yoona! Maana vitthu zaya epi khuthoonyeziweeni ti pinaatamu, ila khwa Paapa ariiye pinkuuni.<sup>18</sup> Miiyo kiniwuza yoori weeyo o Pheeturu, khwa liwe ntintthi kinjekana ojama wa Nluku na milako za motthooni khazinlawwa oshintta.<sup>19</sup> Miiyo kiniwinkha efukulo ya Ofwalume wa Pinkuuni; etile onfukaaye vathi apha na pinkuuni entta ofukiwa, na etile weeyo onfukulaaye vathi apha na pinkuuni entta ofukuliwa.”<sup>20</sup> Aphano khuwooza anakhiyoni awe yoori ahiwooze akinoko yoori ye aari Al-Masiihu.

### *Yinsa onlupa ofwa wawe na osisimuwa wawe*

<sup>21</sup> Waaza wakathi otthuupule, Yinsa khwaaza oweeleza anakhiyoni awe araka: Yaari ohithajiya olawa Yeruzaleemu ahoochaniwe vitthu zawaatta mmakhono wa attunkhulu a tiini, mahaakhimu a tiini na anamanozela a kano, ooliwe, siikhu ya ttaathu asisimuwe nkhapuri.<sup>22</sup> Aphano Pheeturu, khunkhuwelela othetekele khusala amuuza yoori: “Wala Mbwanaaka aka! Khinteela wuurettikhanel!”<sup>23</sup> Yinsa khuzukuluwa khumuuzu Pheeturu yoori: “Weette nyuma waka Sheethwani! Weeyo ori nkhamma liwe liriiye ntarikhi mwaka yoori likikwakwattule, maana onuupuwela nkhamma pinaatamu woohiiyi nkhamma anuupuwelaazo Nluku.”

### *Anakhiyoni a Al-Masiihu ana yoothuula nsalapa aya*

<sup>24</sup> Aphano Yinsa khuwooza anakhiyoni awe yoori: “Nkhamma ntthu ontakha okilotta, ajikatthale mweenyewe, athuule nsalapa awe akilotte.<sup>25</sup> Maana otule antakhaaye wuusuru ohaayi awe ontta ompwetheya, ila otule onimpwetheyaaye ohaayi awe mwaasa wa miiyo ontta wuusurukha.<sup>26</sup> Ena fwayita-ni ntthu opattha fwayita olumwenku wooshi na khumwaashikha ohaayi awe? Ama niini pinaatamu antakhaaye opatilana ohaayi awe?<sup>27</sup> Apho Mwaana wa Pinaatamu onlawa ate nnuru wa Papaawe na malayikha awe, amwinkhe phakari wakhula ntthu khwa etile arettiyeeyo.<sup>28</sup> Miiyo kiniwuuzani khweele yoori, awaapho

apha atthu akina ahinttelaaye ofwa ahimooneni khapula Mwaana wa Pinaatamu ataka nkhamma mfwalume.”

## 17

### *Ozukulisiwa wa Yinsa*

<sup>1</sup> Ziviriyeovo siikhu sitha, Yinsa khunthuula Pheeturu, Tiyaaku na Yaahaya ttwiye Tiyaaku, khuwaalawana othetekele va mwaako woolepa. <sup>2</sup> Attaaphale Yinsa khuzukulisiwa vakatthi vaya. Wuuso awe khwaara nkhamma njuwa kuwo zawe khwiya zoolakala nkhamma nuuru. <sup>3</sup> Wakathi otthuupule khupuwelela omaasho waya Munsa na Aliyaasi apiyaka mwaasa na Yinsa. <sup>4</sup> Aphano Pheeturu khumuuzza Yinsa yoori: “Mbwana, ti yooshapweya wiiya attaapha. Amana otakha, kintta ojeka heema ttatthu; moote yawo, moote ya Munsa, kiina ya Aliyaasi.” <sup>5</sup> Pheeturu eettaka ottakhula nalelo, khupuwa liwiku lawaara khuwaafinika, ntumpho khupuwamu huula yaari oraaye: “Otu mwanaka wompheta na wookitvela channu. Mwinsileze!” <sup>6</sup> Asiiliyeovo mattakhuzi apale anakhiyoni awe khukokhora khufisa ajihi zaya vathi na khuwaapattha woova. <sup>7</sup> Ila Yinsa khuwaattama, khuwaasapa na khuwooza yoori: “Mwilankhe, mwihoove!” <sup>8</sup> Afunuliyeovo maasho khuhimooni hatha ntthu, khusala amoona Yinsa paasi.

<sup>9</sup> Eettaka wiishukha vamwaako aphale, Yinsa khuwooza yoori: “Mwihiimuze hatha ntthu epile mooniyeyo, mpakha Mwaana wa Pinaatamu asisimuwe muufwa.” <sup>10</sup> Anakhiyoni apale khumuuzela yoori: “Aphano mwaasa aya niini anamanozela a kano anlupaaye yoori enhithajiya Aliyaasi ota khapula?” <sup>11</sup> Yinsa khujipu yoori: “Wekhwhee Aliyaasi onta arutisele vitthu zooshi. <sup>12</sup> Ila miyo kiniwuuzani yoori Aliyaasi ata, yo khuhinjuwi, ila khunrettela zooshi epile atkhaziyeeyo. Khwa nanna ethiipo Mwaana wa Pinaatamu onttela ohoochiwa pi atthaapo.” <sup>13</sup> Aphano anakhiyoni apale khuweeleya yoori Yinsa aari olupa monkoni wa Yaahaya namoosa.

### *Ovonisiwa wa Nsimaana aariina Masheethwani*

<sup>14</sup> Wakathi afiyeevo aphale yaariivo khuntti etile ya atthu, mwinyi mmote khulawa aphale aariivo Yinsa khunkokhorela, <sup>15</sup> khumuuzza yoori: “Mbwana, omoonele huruma mwanaka! Eetta wiiyana jile-jile entta onhoocha. Swaafu zinki onkwela vamoottho ama mmaati. <sup>16</sup> Miyo kawaatiseliye anakhiyoni awo, ila khuhiwahi onvonisa.” <sup>17</sup> Yinsa khuwaajipu yoori: “Oo khapila yootakhala na yoohiina amini! Mpakha lini kinttelaaye wiiya vamote na mweeyo? Mpakha lini kuuvile-lakan? Mwikitisele mwanenu apha!” <sup>18</sup> Aphano Yinsa khuruma yoori masheethwani ansaruwe, wakathi otthuupule mwaana otule khwiya woovona. <sup>19</sup> Paata ya toole, anakhiyoni awe khunsusela Yinsa othetekele, khumuuzela yoori: “Mwaasa aya niini naahaakhitireliyeeyo wiikara?” <sup>20</sup> Ye khuwaajipu yoori: “Maana mweeyo amini mwiriina tti-itthiiru. Miyo kiniwuuzani khweeleya yoori eriwaka mweettiye wiiyana amini nkhamma phunje ya samuli, mweetta owahi wuuza mwaako opu yoori: ‘Oleovo apha weette aphale’ weetta olawa, na khina ethu moote ya haari weettelaaye owaheya khwa mweeyo.” <sup>21</sup> Ila vitthu epo zinta nkattih wa lompa na ofuka paasi.

<sup>22</sup> Siikhu moote Yinsa na anakhiyoni awe aakusanyeyiye Kalileya, ye khuwooza yoori: “Mwaana wa Pinaatamu onlawa enkheleliwe

mmakhono wa atthu. <sup>23</sup> Yo anttela omuula, siikhu ya ttaatthu asisimuwe." Anakhiyoni awe khuwaapattha huzuni.

### *Yinsa onripha lumpuru*

<sup>24</sup> Wakathi Yinsa na anakhiyoni awe afiyeyo Kafwaranaawu, ana-mariphisa lumpuru khulawa omuuzela Pheeturu yoori: "Mwaaliimu enu khanripha lumpuru la Nnyupa Woosifwiwamo?" <sup>25</sup> Pheeturu khuwaajipu yoori: "Onripha!" Nawiisha Pheeturu khuvira nnyupa, ahinattakhule hatha ethu, Yinsa khuri: "Simawu, onoona toovi? Paani anriphaaye lumpuru na tthuvo ya mfwalume wa olumwenku opu? Atthu a mmuti ntturnphu ama aletto?" <sup>26</sup> Pheeturu khujipu yoori: "Aniiya aletto," Yinsa khumuuzla yoori: "Eto enthoonyeza yoori aana a mmuti ana yoohiriphi. <sup>27</sup> Ila yoori nihiweephirise, olawe mpahari wamweese nanjoolo awo. Swi ethiito ya mwanzo ontelaaye olowa, ofunule milomo zaya, onta osikanamo nzurukhu mmote. Aphano olawe wariphe lumpuru laka na lawo."

## 18

### *Nttunkhulu muufwalume wa pinkuuni*

<sup>1</sup> Wakathi otthuupule anakhiyoni khuta aphale aariivo Yinsa khumuuzela yoori: "Nwulweene zayita akina aya, ti paani muufwalume wa pinkuuni?" <sup>2</sup> Ye khunkhuela nsimaana khunttha vakathi vaya, <sup>3</sup> khuwooza yoori: "Miiyo kiniwuuzani khweele yoori, mweeyo noohithupwiyi na khuhijiretti wiiya nkama nsimaana otu, khamwintela weettamo muufwalume wa pinkuuni. <sup>4</sup> Wekhweele anjipushuwisaaye nkama nsimaana otu, oto ti nwulweene aya muufwalume wa pinkuuni.

<sup>5</sup> "Animpwekherelaaye nsimaana nkama otu khwa nzina laka, onikipwekherela miiyo. <sup>6</sup> Wakhula otule aninkosisaaye mmote wa asimaana apa akikhupaliyeeyo, afwataali ofukeleliwa liwe loovalaza mmwisiko khutupweeziwa nkhilintti ya pahari.

<sup>7</sup> Phoole olumwenku, mwaasa wa vitthu za okosisa. Maana khinivonyela ohirettikhani vitthu zaya epo, ila atakhaliwa ntthu otule anttelaaye wiiyana paathuli. <sup>8</sup> Nakataalikha nkama nkono awo ama muulu awo onuukosisa, oshije weesele! Maana afwataali weeyo weetta muuhaayi wa mileele ori woorakala ama woovujeya ehiyee niyyana makhono mawiri na moolu mawiri weeyo aya khweeseleliwa va moottho wa mileele. <sup>9</sup> Nkama liisho lawo limote linuukosisa, olazemo weeselele peetiwene! Maana afwataali weeyo weetta muufwalume wa pinkuuni na liisho limote ehiyee niyyana weeseleliwa motthooni na maasho mawiri.

### *Nlikaniso wa Pwittipwitthiya Waashikha*

<sup>10</sup> "Phoole, mwihintarawu hatha mmote wa asimaana apa! Miiyo kiniwuuzani khweele yoori malayikha aya anoona wuuuso wa Paapa wa pinkuuni wakhula wakathi. <sup>11</sup> Wekhweele Mwaana wa Pinaatamu ateela wuusuru etile yaashikhiyeeyo. <sup>12</sup> Niini onuupuwelaaye weeyo? Amana ntthu eeyana pwittipwitthi zawe miiya khumwaashikhavo moote, khanlikha epile tiisiya wa tiisiini omwaako alawa weekesa etile yaashikhiyeeyo? <sup>13</sup> Miiyo kiniwuuzani khweele yoori, amana asikana oniiya woofurahi mwaasa wa pwittipwitthi yawe etile, zayita epile

tiisiya wa tiisiini zoohaashikhi. <sup>14</sup> Etthiipo theenya Paapeenu ariiye pinkuuni khanintakhela hatha nsimaana mmote waashikha.

*Nanna yaweeettettisa koosa ya ttwiyyethu*

<sup>15</sup> “Amana ttwiyo ookosa, olawe wanthroonyeze etile avonyiyeyo, ila orette epo zaya weeyo na ye paasi. Amana ye asiila shawuri zowo, wamwaawuni ttwiyo. <sup>16</sup> Ila amana ahuusiili, onthuule ntthu mmote ama awiri, ‘yoori khwa oshaahiti wa atthu awiri ama attatthu yoori ntakhuzi lihakikheye.’\* <sup>17</sup> Amana ye akatthala wuusiila, walupe vakatthi wa ojama wa Nluku. Amana ye akatthala osileza theenya ojama wa Nluku, ontthannte nkhamma kaafiri ama namariphisa lumpuru. <sup>18</sup> Kiniuuuzani khweele yoori, zooshi epile mweeyo mwinfukaaye vathi apha, ziniiya zoofukiwa pinkuuni, na zooshi mwinfukulaaye vathi apha ziniiya zoofukuliwa pinkuuni. <sup>19</sup> kiniuuuzani theenya yoori awiri a mweeyo amana mwikhupalelana vathi apha khwa wakhula ethu etile mwintakhaaye oveka, eniiya yoorettiwa ti Paapa ariiye pinkuuni. <sup>20</sup> Maana vahali ankusanyeyaavo atthu awiri ama attatthu khwa nzina laka, na miiyo kiniiya attaapho.”

*Swaafu kavi nininswamihaaye ttwiyyetthu*

<sup>21</sup> Aphano Pheeturu khumwaattama Yinsa khumuuzela yoori: “Mb-wana, amana ttwiyyaku akikosa kinswamihi swafu kavi? Swaafu sapa?”

<sup>22</sup> Yinsa khunjipu araka: “Miiyo kiniuuza yoori, khahiyo swaafu sapa, ila swaafu saapiini orutela swaafu sapa.

<sup>23</sup> “Khwa toowo, Ofwalume wa pinkuuni ori nkhamma mfwalume aari otakhaaye waattalela vitthu zawe na karumeya awe. <sup>24</sup> Wakathi aaziyeovo waattalela, khutiiseliwa mwinyi aari omwiilaaye milikhi za nzurukhu wa feeta. <sup>25</sup> Mwaasa wa ohiina nanna yonripha mbwana awe otule aari omwiilaaye, khuruma yoori; ye na muukhaawe, aanaawe na vitthu zawe zooshi, zuuzanyisiwe ariphe teeni. <sup>26</sup> Karumeya khukokhora omaasho wa mbwana awe khunvekela yoori: ‘Okivilele, kintta wuuripha.’ <sup>27</sup> Mbwana awe khunhurumiya, khufuja teeni etile na khunlikha olawa. <sup>28</sup> Ila karumeya otule noosaruwa khukuthanana nshirikhaawe wa vakhaazi aari omwiilaaye nzurukhu miiya paasi. Ye khunzola nshirikhaawe mmwisiko khusala anvinya araka: ‘Okiriphe!’ <sup>29</sup> Aphano nshirikhaawe otule khukokhora khusala anvekela yoori: ‘Okivilele, kintta wuuripha.’ <sup>30</sup> Ila ye khuhikhupaleli, khurumisa olawa otthiiwa nkalapooso mpakha ariphe teeni yawe. <sup>31</sup> Wakathi ooniyeovo akarumeya apale akinoko vitthu epile zaaret-tikhaniyeoyo, khukatipukha channu na khulawa khumuuzza zooshi mbwana aya. <sup>32</sup> Mbwana khunkhuvela karumeya otule khumuuzza yoori: ‘Karumeya woohifwayi, weeyo wakivekela miiyo khuuswaamihi teeni yawo. <sup>33</sup> Weeyo khawaarina ya omoonela huruma nshirikhaawo nkhamma miiyo kiwooneliyeozo?’ <sup>34</sup> Mbwana awe khwiiphiriwa khuntaa nkalapooso yoori ahukhumwiwe mpakha ariphe teeni yawe. <sup>35</sup> Paapa wa pinkuuni ontela oretta ethiipo, amana mweeyo mwihin-swaamihi ttwiyyenu na rooho yenu yooshi.”

## 19

### *Monkoni wa Waashana*

\* **18:16** veja Deuteronomio 19:15.

<sup>1</sup> Yinsa eeshiyeevo olupa mattakhuzi apale, khulaawo Kalileya khweetta Yudeya kaapu kiina ya Yorotaani. <sup>2</sup> Khuntti khuluyeyene khusala enlotta, atthaapale ye khuwaavonisa alwele.

<sup>3</sup> Mafwarizeewu akina khuta aphale aariivo Yinsa yoori amweeze khumuuzela yoori: "Halaali nlume omwaasha muukhawe khwa wakhula kiiswa?" <sup>4</sup>Yinsa khuwaajipu araka: "Mweeyo khamwisomeeni yoori omwanzo, Nluku amumpa nlume na muukha, <sup>5</sup> na khulupa yoori: 'Tiito, nlume onlikha papaawe na mamaawe khujikusanya na muukhaawe, oowiiri khuretteya wiya mwiili mmote'?" <sup>6</sup> Khwa ethiipo khaniiya awiri ila aniiya mwiili mmote. Aphano, etile Nluku akusanyiyeyo ahiiyeye antakhaaye ophakula."

<sup>7</sup> Mafwarizeewu apale khumuuzela theenya yoori: "Aphano mwaasa aya niini Munsa enkhaka ruhusa ya nlume omwinkha talakha muukha awe na khumwaasha?"

<sup>8</sup> Yinsa khuwaajipu yoori: "Munsa aruma yoori mweeyo mwimwaashe muukha enu mwaasa wa wuuma wa rooho zenu. Ila khazaari toowo omwanzweene. <sup>9</sup> Miyo kiniuuuzani yoori: wakhula otule animwaashaaye muukha awe, woohiyyi mwaasa wa oraruwa, khunrala muukha nkina ontta oraruwa."

<sup>10</sup> Anakhiyon i Yinsa khuri: "Nkhama pi ethiipo muukha na nlume, awfataali ohiloli." <sup>11</sup> Yinsa khujipu yoori: "Khiriweeni atthu ooshi eetta wiiyana matakheelo ookhupalela mattakhuzi aya apa, ila otule enkhiweeyo paasi. <sup>12</sup> Alume akinoko afwa nkuwo, maana avokoliwa ethiipo; akinoko arettisiwa pi atthu azaaya; akina eetta ojirettisa mwaasa wa Ofwalume wa pinkuuni. Otule anwahaaye okhupalela vitthu epi, ti akhupalele."

### *Yinsa na Asimaana*

<sup>13</sup> Paata ya vitthu epile, atthu akina khusala awaathuula asimaana nontanelaa Yinsa yoori awaattheele makhono na awaalompele. Ila anakhiyon i awe khusala awaamaruwela. <sup>14</sup> Aphano Yinsa khuri: "Mwiwaalikhe akiteele miyo asimaana wala mwihiwaa khattaze; maana Ofwalume wa pinkuuni pi wa apale eeyiye nkhamma atthaapo." <sup>15</sup> Paata ya owaattheela makhono khulaavo aphale vaya khulawa.

### *Shapu woothaajiri*

<sup>16</sup> Ntthu nkina khumwaattama Yinsa khumuuzela yoori: "Mwaaliimu, kirette niini yooshapweya yoori kipatthe ohaayi wa mileele?"

<sup>17</sup> Yinsa khunjipu yoori: "Mwaasa aya niini weeyo okuuzelaka etthu yiyyiye yooshapweya? Owaapho ntthu mmote paasi eeyiyeeyo wooshapweya. Nkhama weeyo ontakha weetta muuhaayi wa mileele, oshututele mirumo." <sup>18</sup> Ntthu otule khumuuzela Yinsa yoori: "Piivi?" Yinsa khunjipu araka: "Ohuule, ohiraruwe, ohiiye, ohilaze os-haahiti woovonyeya, <sup>19</sup> onshitahi papaawo na mamaawo, na omphete namwaattamanana awo nkhamma ethiipo onjiphetaazo omweenyewe."

<sup>20</sup> Shapu otule khunjipu yoori: "Miyo kinshututelaka mirumo zooshi. Khi niini enikisaleelaaye nalelo?" <sup>21</sup> Yinsa khunjipu yoori: "Nkhama weeyo ontakha wiya khaamili, olawe woozanyise zooshi oriinaaye, nzurukhu aya owenkhe asikhini, orettaru toowo ontta wiiyana njuju pinkuuni. Nawiisha, ote okilotte." <sup>22</sup> Noosiila mattakhuzi apale shapu otule khwiyya woohuzunikha, maana aarina maali zawaatta.

### *Ajali ya Maali*

<sup>23</sup> Aphano Yinsa khuwooza anakhiyoni awe araka: “Kiniuuuzani khweele yoori, ti yoolipa thaajiri weetta muufwalume wa pinkuuni.

<sup>24</sup> Ila ti yookhweya enkamiyya ovira valiphotto wa sikano zayita thajiri weetta muufwalume wa Nluku.” <sup>25</sup> Anakhiyoni a Yinsa asiiliyeevo mat-takhuzi apale, khwiyya ooshanka na khumuuzela yoori: “Khwa nanna nkhamma eto paani anttelaaye wuusurukha?” <sup>26</sup> Yinsa khuweekesa na khuwaajipu yoori: “Khwa pinaatamu khinwaheya, ila wa Nluku vitthu zooshi zinwaheya.”

<sup>27</sup> Aphano Pheeturu khujipu yoori: “Fweeyo nalikha zooshi yoori nuulotte. Ninttela wiyya niini fweeyo?” <sup>28</sup> Yinsa khuwooza araka: “Mi-yyo kiniuuuzani khweele yoori, amana ofiya wakathi Nluku anttelaaye waattala zooshi opheeya na Mwaana wa Pinaatamu eekhala va khukulu ya siifwa zawe, mweeyo mwinikilottaaye mwinttela wiikhalela khukulu khumi na piiri yoori mwiphuke mahimo khumi na mawiri a Eziraiiilu. <sup>29</sup> Ooshi apale alikiyyeeyo vaje vaya, attwi zaya, alupu aya, apapazaya, aanaaya ama mashapa aya, mwaasa wa miiyo, anlawa apwekhhere swaafu miiya na orithi ohaayi wa mileele. <sup>30</sup> Khwa ethiipo, apale amwanzo anttela wiishela, na apale awiishela anttela wiyya amwanzo.

## 20

### *Nlikaniso wa anakhaazi a nshapa la wuuva*

<sup>1</sup> “Maana Ofwalume wa pinkuuni ori nkhamma mweenyewe nshapa alankhiyeeyo supuyene olawa oweekesa atthu yoori akhole khaazi mmashapa mwawe. <sup>2</sup> Ye khusilanana yoori awaariphe nzurukhu mmote wa feeta wakhula siikhu, khuwaaruma olawa omashapa wawe.

<sup>3</sup> Wakathi opule wa sattaatthu, ye khulankha khusala alawa khuwoona atthu akina ari ohiina khaazi eekhaliye vaparasa. <sup>4</sup> Aphano khuwooza yoori: ‘Mwilawe mweeyo theenya mwakhole khaazi mmashapa mwaka la wuuva, miiyo kintta wuurihani etile enttelaaye wiyya ya shariya.’ <sup>5</sup> Apale khulawa, khulankha theenya wakathi opule wa atuhuri na wakathi opule wa saakhentta, khuretta nanna nkhamma ethiipile. <sup>6</sup> Etthiipo wakathi wa sakumi na monsi, ye khurutelawo khuwaasikana theenya akina ahaariina khaazi na khuwoozela yoori: ‘Mwaasa aya niini mweeyo mwiyaka apha mwihihkolaka khaazi siikhu yooshi?’ <sup>7</sup> Khunjipu yoori: ‘Maana khina mmote aninkhiyeeyo khaazi’. Aphano khuwooza apale aya yoori: ‘Ettani na mweeyo mwakhole khaazi mmashapa mwaka.’

<sup>8</sup> Weettelaka oripa, mweenyewe nshapa khumuuzza waziri awe yoori: ‘Owaakhuwele anakhaazi na owaariphe phakari yaya, owaazaka apale awiishela mpakha apale a mwanzo.’ <sup>9</sup> Khuta anakhaazi apale aattakhulaniweeyo wakathi wa saakhumi na monsi na wakhula ntthu khupwekhhera nzurukhu mmote wa feeta. <sup>10</sup> Wakathi atiiyeevo apale aattakhulaniweeyo mwanzo, aari weekesela opwekhhera wawaatta, ila wakhula mmote aari opwekhhera nzurukhu moote. <sup>11</sup> Apwekheriyeevo khwaaza omwaapa mweenyewe nshapa, <sup>12</sup> amuuzaka yoori: ‘Mamwinyi apa wawaattakhulana yoori akhole khaazi ya wakathi mmote, weeyo mbwana onnilikanisana fweeyo nivileliyeeyo olemela wa khaazi na haari ya nthana wooshi.’ <sup>13</sup> Ila ye khujipu yoori: ‘Swaahipu, akinwiimana shariya. Khawaakhupaleliye okhola khaazi ya opwekhhera nzurukhu moote? <sup>14</sup> Opwekhhere etile yiyyiye yawo

olawe. Miiyo kintakha omwinkha otule kaattakhulaniyeyo wawiishela nkhamma ethiipo kiwinkhiyeeyo.<sup>15</sup> Akina ruhusa ya orettela etile kintakhaaye nzurukhu aka? Ama weeyo ona nrima mwaasa wa miiyo wiiya nkemaani?”<sup>16</sup> Aphano Yinsa khumarisa araka: Apale amwanzo anttela wiishela na apale awiishela anttela wiiya amwanzo.”

*Yinsa onrutela olupa theenya ofwa na osisimuwa wawe*

<sup>17</sup> Awelelaka Yeruzaleemu, Yinsa khuwaakkhuwela othetekele anakhiyoni awe apale khumi na awiri, khuwooza yoori:<sup>18</sup> “Mwisile! Ninwelela Yeruzaleemu, Mwaana wa Pinaatamu ontela winkleliwa mmakhono wa mahaakhimu a tiini na anamanozela a kano, yo anhukhumwele wuuliiwa,<sup>19</sup> enkheleliwe mmakhono wa amalapo anveyise, anjaphe na akhomeliwe. Ila siikhu ya ttaatthu asisimuwe.”

*Oveka wa mamaawe Tiyaaku na Yaahaya*

<sup>20</sup> Aphano maama wa aana a Zepeteewu khumwaattama Yinsa na khukokhora khusala anvekela. <sup>21</sup> Yinsa khumuuzela yoori: “Weeyo ontakhani?” Maama otule khujipu yoori: “Kintakha yoori muufwalume mwawo aanaaka apa awiri mmote eekhale nkono nlume nkina nkono nkha.” <sup>22</sup> Yinsa khunjipu yoori: “Mweeyo khamwinjuwa etthu mwinvekaaye. Mwinwahi onywela koopho ethiiti kinttelaaye onywela?” Yo khujipu, “ninwahi.” <sup>23</sup> Aphano Yinsa khuri: “Weekhwelle mweeyo mwinteeela onywela koopho yaka, ila wiikhala nkono nlume aka ama nkono nkha khahiiyo miiyo kinlupaaye. Maana puuro eto ti yawe otule aattaleliweeyo ti Paapa.” <sup>24</sup> Wakathi apale akina khumi asiiliyeevo mattakhuzi apale, khwiyya ookasirikha khwa attwi apale awiri. <sup>25</sup> Aphano Yinsa khuwaakkhuwela khulupa yoori: “Mwijuwe yoori anamalokozela a khapila anshintta, na attunkhulu aya anthoonyeza ofwalume khwa yo.” <sup>26</sup> Mweeyo mwihiyi toowo, ila otule antakhaaye wiyya wa fwayita awaarumeyele azaawe;<sup>27</sup> na otule antakhaaye wiyya wa mwanzo eeye mwiithwaana enu mweeyo. <sup>28</sup> Nkhama ethiipo, Mwaana wa Pinaatamu khateleeni orumeyeliwa, ila orumeya na winkha ohaayi awe khwa owaakaphula atthu awaatta.”

*Ovonisiwa wa ananhooni awiri a Yeriko*

<sup>29</sup> Yo alankhaka Yeriko, atthu awaatta khusala awaalotta. <sup>30</sup> Atthu awiri oofoonni eekhaliye nshini wa tarikhi, wakathi asiiliyeevo yoori Yinsa onta ovira, khwaaza onyakula araka: “Mbwna, Mwaana wa Daawuuda, noonele huruma!” <sup>31</sup> Atthu apale awaatta khusala awaakkhattaza, awataakhelaka yoori anyamale, ila khusala atepa onyakula araka: “Mbwna, Mwaana wa Daawuuda, noonele huruma!” <sup>32</sup> Yinsa khweemela khuwaakkhuwela khuwoozela yoori: “Mweeyo mwintakha yoori miiyo kuuretteleni niini?” <sup>33</sup> Yo khujipu yoori: “Mbwna, nintakha noone.” <sup>34</sup> Yinsa khuwoonela huruma na khuwaasapa maasho aya, nasaapiru khwaaza woona khusala anlotta.

## 21

*Ovira wa Yinsa Yeruzaleemu*

<sup>1</sup> Ari kharipu ya Yeruzaleemu, khufiya Betifwaaje, va mwaako Oluveera, Yinsa khuwaaruma anakhiyoni awe awiri khuwooza yoori: <sup>2</sup> “Mwilawe nti opo mwinoonaaye omaasho wenu okho, mwinlawwa mwansikane mwaana wa puuru weekha afukiwe vamote na

weelume. Mwinfukule mwikitisele.<sup>3</sup> Amana apuwa ntthu awuuzelani, mwimuuze yoori Mbwana onta owaatakha, onta wuulikhani nasaapiru mwiwaathuule.<sup>4</sup> Vitthu epo zarettikhana yoori emarisele etile alupiyeyo napiyu yoori:<sup>5</sup> “Muuze sitati ya Siyooni yoori: ‘Omoone, mfwalume awo onta wuuteela, woojipushuwisa, aweliye va mwaana wa puuru, nyama yoopakhira.’”

<sup>6</sup> Anakhiyon i khuretta etile aarumiweeyo ti Yinsa. <sup>7</sup> Khuntiisa puuru yekha na mwaana aya ntitthiiru, aphano khutthiiwavo kuwo zawe, ye khuwelavo. <sup>8</sup> Atthu apale awaatta aari onlottaaye khusala attattikha ajapi zaya ntarikhi, akina khusala ashija virapi za miitthi na ottattikha ntarikhi. <sup>9</sup> Apale aalokoziyeeyo na apale aari onlottaaye eetta onyakula araka: “Ozaana khwa mwaana wa Daawuuda! Wooparikhiiya ti otule antaaye khwa nzina la Mbwana! Ozaana wa pinkuuni. <sup>10</sup> Wakathi Yinsa aviriyeovo Yeruzaleemu, sitati yooshi khutapanyeaya, atthu khusala oozeliwa yoori: “Paani otu aya?” <sup>11</sup> Yo khusala ajipu yoori: “Otu ti Yinsa, napiyu wa Nazareeti ya Kalileya.”

### *Otwahareshiwa wa Nyuupa Yoosifwiwamo*

<sup>12</sup> Yinsa khuvira Nnyupa Woosifwiwamo, khuwiikaramo ooshi apale aari wuuzanyisaye na apale aari wuuzanyaaye. Khukurumula meeza a anamapatilisa nzurukhu na khateera za apale aari wuuzanyisaaye jiwa.’ <sup>13</sup> Khuwooza araka: “Yaatikhiwa yoori; ‘Nyuupa yaka enttelia wiithiwa nyuupa yoosifwiwamo, ila mweeyo mwaretta wiiya puuro ya anamwiya.

### *Yinsa ontta ovonisa Nnyupa Woosifwiwamo*

<sup>14</sup> Ananhooni na anamarakala khumwaattama Yinsa Nnyupa Woosifwiwamo, ye khuwaavonisa. <sup>15</sup> Mahaakhimu a tiini na anamanozela a kano ooniyeovo vitthu zootikinisa Yinsa aari orettaazo na aasimana aari okhuwaaye araka: “Ozaana mwaana wa Daawuuda!” khushanka khusala oozela yoori: <sup>16</sup> “Onsilia epi anlupaazo apa?” Yinsa khuwaajipu yoori: “Aaa; mweeyo khamwina some yoori: ‘Khwa nlimi la asimaana na apale anamwaaye antthenkeza siifwa khaamili?’” <sup>17</sup> Yinsa khuwaalikha, khulaamo nsitati mphule khulawa Betaaniya ottuukho aalaliyyewo.

### *Nfikeera woohiina mishumo*

<sup>18</sup> Mmeesho mwaya supuyeene, arutelaka ositati, khunkhola jala. <sup>19</sup> Khoona nfikeera nshini wa tarikhi, khwaattama ila khuhisikanani hatha mishumo, khusikanamo mathaparu paasi, aphano khuri: “Weeyo khunteela wiima theenya mishumo!” Nfikeera opule khuuma nasaapiru. <sup>20</sup> Anakhiyon i awe ooniyeovo epile zaarettikhaniyeeyo, khwiya ooshanka na ootikinisiwa alupaka yoori: “Wooma toovi nasaapiru nfikeera opu?” <sup>21</sup> Yinsa khuwaajipu yoori: “Kiniwuuzani khweele yoori, amana mwiiyana amini na woohiina nshikili, mwinttela oretta woohiyyi epi zirettikhaniyeeyo khwa nfikeera opu paasi, ila hatha wuuba mwaako opu yoori okhuleye ojeeselele mpahari, zintta orettikhana. <sup>22</sup> Amana mwiiyana amini mwintpwekhera zooshi mwinttelaaye oveka khwa lompa.

### *Ofwalume wa Yinsa ontikinisa*

<sup>23</sup> Paata ya Yinsa ofiya Nnyupa woosifwiwamo, eettaka osomisa, mahaakhimu a tiini na attunkhulu a tiini khumwaattama khumuuzela yoori: "Vitthu epi onrettana ofwalume-ni? Wala ti paani awinkhiyeeyo ofwalume aya opu?" <sup>24</sup> Yinsa khuwaajipu yoori: "Miiyo kintta owuuzelani theenya; amana mwikijipu, kintta owuuzani ofwalume kinrettanaaye vitthu epi. <sup>25</sup> Woosa wa Yaahaya waari wa yayi? Wa pinkuuni ama wa anaatamu?" Yo khusala akheetisana atthaapo-ru araka: "Amana niri waari wa pinkuuni, ye onta onuuzela yoori 'khi mwaasa aya niini mwihikhupalelaka?' <sup>26</sup> Ila amana nilupa yoori pi wa anaatamu, niniwoova atthu, maana ankhupalela yoori Yaahayanapiyu." <sup>27</sup> Yo khunjipu Yinsa yoori: "Khanijuweeni." Ye khuwooza theenya yoori: "Hatha vattithiiru akiniuuuzani owahi kinrettanaaye vitthu epi."

### *Nlikaniso wa aana awiri*

<sup>28</sup> Mwinoona toovi? Aarivo mwinyi mmote aariina aana awe awiri. Khumweettela otule wa mwanzo khumuuzo yoori: 'Mwanaka, etta wakhole khaazi leelo omashapa.' <sup>29</sup> Khujipu yoori: 'Akeepu!' Ila khuupuwela khulawa okhola khaazi etile ooziweeyo. <sup>30</sup> Paapa otule khumwettela mwanawewe otule nkina khumuuzo nkhamma ethiipo amuziyeeyo otule nkina. Mwaana otule khujipu yoori: 'Kintta olawa mbwana aka!' Ila khuhilawi. <sup>31</sup> Khwa aana apale awiri ti tuuvi arettiyeeyo matakhele a papaawe?' Khujipu yoori: "Otule wa mwanzo." Yinsa khuwooza yoori: "Kiniuuuzani khweele yoori, anamariphisa lumpuru na amalempe antta weetta muufwalume wa Nluku mweeyo mwihineettemu. <sup>32</sup> Maana Yaahaya ata yoori oothonyezeni tarikhi ya shariya, mweeyo khuhinkhupaleli, ila anamariphisa lumpuru na amalempe ankhupalela. Mweeyo moona vitthu epile khuhithupwiyi na wala khuhinkhupaleli.

### *Nlikaniso wa anamalima ootakhala rooho*

<sup>33</sup> "Mwisiile nlikaniso nkina: Aarivo thaajiri mmote wa mmuti nttumphule aalimiyeeyo nshapa lawe la wuva. Khujekelela looshi, khwaattala kulaathayini ya onluwatthelamo wuva na khujeka korofwa ya namweekesela. Khuwaalkhela anamalima apale akina, khulaamo mmuti mphule, khusala alawa safwari yawe. <sup>34</sup> Ofiyeevo wakathi wa wuurla, khuwaaperekha akarumeya awe khwa anamalima apale, yoori apwekhherele mishumo zawe. <sup>35</sup> Anamalima khuwaakhola akarumeya a mweenyewe nshapa apale; mmote khunvulalisa, nkina khumuula, wattaatthu khunvonya na mawe. <sup>36</sup> Aphano khuwaaperekha akarumeya awe akina awaatta, anamalima apale khuwaatthantta nkhamma ethiipo awaathanttiyeeko apale akina. <sup>37</sup> Omwiisho khumperekha mwanawewe alupaka yoori: 'Mwanaka otu antta onshitahi.' <sup>38</sup> Ila anamalima amoniyeovo mwaana otule, khulupa yoori: 'Otu namarithi. Mwite, nimuule nthuule eritho yawe.' <sup>39</sup> Attaaphale yo khunkhola khumweeselela othetekeli wa nshapa khumuula. <sup>40</sup> Amana ata mweenyewe nshapa, onttela owaarettela niini anamalima apale?" <sup>41</sup> Yo khujipu yoori: "Wekhwhee onta owoola anamalima apale ootakhala rooho na awenkhe anamalima akina nshapa laya. Apa nka amwinkhaka phantte ya mishumo wakathi wa wuurla."

<sup>42</sup>Yinsa khuwoozela yoori: "Khamwinasome zawaatikhiwa Ttakaththifu yoori: 'Liwe anamajeka akatthaliyeeyo, nttho tthi liyiyeyo liwe linkhomaazaaye; eto enta wa Mbwana, na ethu yooshapweya khwa fweeyo.' <sup>43</sup>Paata ya toowo kiniwuuzani yoori Ofwalume wa Nluku mwinttela onykanyiwa enkhiwe apale animaaye mishumo za Ofwalume. <sup>44</sup>Otule anttelaaaye okwela liwe laya ntthi ontta othapateya, na otule linnnttelaaye onkhwela onta othatuwa lifufu. <sup>45</sup>Mahaakhimu a tiini na mafwarizeewu, asiiliyeovo milikaniso za Yinsa, khuweeleya yoori aari ottakhula monkoni wa yo. <sup>46</sup>Khusala eekesa nanna ya onkhola ila khusala awooova atthu, maana aari onjali nkhamma napiyu.

## 22

### *Nlikaniso la Njampo la harusi*

<sup>1</sup> Yinsa khurutela owooza milikaniso araka: <sup>2</sup>"Ofwalume wa Pinkuuni onlattanana mfwalume mmote atthekeziyeeyo njampo la harusi ya mwanawewe. <sup>3</sup>Aphano khuwaaruma akarumeya awe olawa owaakhuwela anamalaleyiwa yoori ate onjampo; ila yo khuhitakhi ota. <sup>4</sup>Khuwaaruma theenya akarumeya akina araka: 'Mwawooze anamalaleyiwa yoori: Njampo lalikana; mompe zaka na aana aya ooneneva kashija na zooshi zalikana. Mwite onjampo la harusi.' <sup>5</sup>Ila yo khuhijali khusala alawa, mmote omashapa wawe, mmote nzanshara mwawe, <sup>6</sup>apale asaliyeeyo khuwaakhola akarumeya khuwaahukhumu na khuwoola. <sup>7</sup>Ila mfwalume khwiya wawiiphiriwa, khuwaaruma anajanka awe olawa owaatapanya anamahusuti apale na khulukuza sitati yaya etile. <sup>8</sup>Aphano khuwoza akarumeya awe yoori: 'Njampo lalikana, ila anamalaleyiwa khaari osuhi. <sup>9</sup>Mwilawe mmizukulowo za tarikhi mwawaalaleye ooshi apale mwinttelaaye owaasikana.' <sup>10</sup>Aphano akarumeya apale khulawa mmatarikhi na khuwaakusanya atthu ooshi apale awasikaniyeeyo, atthu ooshapweya rooho na atthu ootakhala rooho, nsana waari ojiwaavo njampo khwiya wawiitaala pi anamalaleyiwa.

<sup>11</sup> "Wakathi mfwalume aviriyeovo yoori awoone anamalaleyiwa apale, khumoona mwinyi mmote ahaawaliyeeyo kuwo za njampo. <sup>12</sup>Khumuuzela yoori: 'Swaahipu, wavira toovi ohiwaleeni kuwo za njampo?' Mwinyi otule khwiya woonyamala. <sup>13</sup>Aphano mfwalume otule khuwaaruma akarumeyaawe yoori: 'Mwinfuke moolu awe na makhono awe mwimweeselele vaje, n'yiiza; ntumpo oniiyamo olila na oluma meeno'. <sup>14</sup>Maana awaatta pi ookhueliwa, ila vattithiiru pi oothawuliwa".

### *Monkoni wa lumpuru*

<sup>15</sup> Mafwarizeewu khulaavo aphale vaya, khusala awaza shawuri zonvithaaleta khwa mmattakhuzi awe. <sup>16</sup>Khuwaaruma anakhiyon'i aya na atthu akina a khuntti ya Herooti khusala amuuza Yinsa yoori: "Mwaaliimu, fweeyo najuwa yoori weeyo onlupa khweele na onsomisa na khweele tarikhi ya Nluku, khunjilikha othoweelisiwa ti ntthu, wala khuniwaaphuka atthu khwa nanna ariizo. <sup>17</sup>Nkanuuze, ona shawuri ni? Ti ya shariya onripha lumpuru Seezari ama wala?" <sup>18</sup>Yinsa khujuwa thwapiya zaya zootakhala khuwaajipu yoori: "Manaafikhi, mwaasa aya niini mwikeezaka?" <sup>19</sup>Mwikithoonyeze nzurukhu onriphiwaaye lumpuru." Khutiiseliwa nzurukhu mmote wa feeta. <sup>20</sup>Ye khuwoozela

yoori: "Ratarato eti na nzina ntthi laatikheweeyo apha tthi laani?"<sup>21</sup> Khujipu yoori: "Seezari". Aphano khuwooza yoori: "Mwimwinkhe Seezari etile yiyyiye ya Seezari na mwimwinkhe Nluku etile yiyyiye ya Nluku."<sup>22</sup> Asiiliyeevo mattakhuzi apale, khwiya ootikinisiwa na khulikha wuuzela khusala alawa.

### *Masatukhi na Osisimuwa*

<sup>23</sup> Siikhu ethiitile, khunteela masatukhi akina anlupaaye yoori khawi-ivo osisimuwa, khusala amuuzela yoori:<sup>24</sup> "Mwaaliimu, Munsa alupa yoori: 'Amana ntthu afwa, muukha awe ahinvokoleleeni mwaana, ttwi-iyе ona ya onrala namafweliwa ti mannawe yoori amwinkhe aana ttwi-iyе otule afwiyyeeyo."<sup>25</sup> Fweeyo naari attwi sapa. Wamwanzo khuloola na khufwa. Muukha awe khanvokoleliey mwaana, khuraliwa ti ttwiyye.<sup>26</sup> Khurettikhana nkhamma zanrettikhaneliyeeyo otule wa mwanzo na wa ttaatthu mpakha otule wa saapa.<sup>27</sup> Omwiisho waya paata ya ooshi ofwa, na muukha khufwa.<sup>28</sup> Aphano, wakathi woosisimuwa, khwa alume apale sapa ti tuuvi anttelaaye wiiya mannawe? Maana ooshi anraliye."<sup>29</sup> Yinsa khuwaajipu yoori: "Mweeyo mwathowelela, maana khamwinjuwa Zawaatikhwa Ttakathifiu wala owahi wa Nluku."<sup>30</sup> Maana wakathi woosisimuwa atthu khanloola wala khanlooziwa; anttela wiiya nkhamma malayikha pinkuuni.<sup>31</sup> Khwa osisimuwa wa ananfwa, mweeyo khamwisomeeni etile Nluku alupiyeeyo yoori:<sup>32</sup> 'Miiyo ki Nluku wa Eburahiima wa Esiyaakha na wa Yaakhumpa?' Ye khahiyo Nluku wa ananfwa, ila wa atthu awoona."<sup>33</sup> Asiiliyeevo mattakhuzi apale, atthu khwiya ooshanka khwa osomisa wawe.

### *Oruma nwulu*

<sup>34</sup> Paata ya mafwarizeewu ojuwa khuwaanyamaza masatukhi, khukusanyeya.<sup>35</sup> Mmote wa yo, namanozela kano khweeza omuuzela yoori:<sup>36</sup> "Mwaaliimu, nrumo nwulu pi puuvi?"<sup>37</sup> Yinsa khunjipu yoori: "Omphete Mbwana Nluku awo khwa rooho yawo yooshi, khwa nafusi yawo yooshi na akhili zawo zooshi.<sup>38</sup> Opu pi wiyyeeyo oruma wa mwanzo na wootepla owula.<sup>39</sup> Waphiri onlattanana otthuupu: omphete nzaawo nkhamma ethiipo onjiphetaazo omweenyewe.<sup>40</sup> Kano zooshi za Munsa na masomi ooshi amanapiyu anrumeyela mirumo ethiipi miwiri."

### *Al-Masiihu Mbwana wa Daawuuda*

<sup>41</sup> Mafwarizeewu apale nalelo ari okusanyeya, Yinsa khuwoozela yoori:<sup>42</sup> "Mwinuupuwelani monkoni wa Al-Masiihu? Mwaana waani?" Yo khujipu yoori: "Mwaana wa Daawuuda."<sup>43</sup> Yinsa khuwoozela theenya yoori: "Aphano, khi toovi Daawuuda khwa Rooho Ttakathifiu omwiitha yoori Mbwana, alupaka yoori:<sup>44</sup> 'Mbwanamaamuza Mbwana aka yoori: "Wiikhale nkhone nlume aka mpakha maatuwi awo kia-waathe vathi wa moolu awo?"'<sup>45</sup> Nkhama Daawuuda onimwiitha yoori Mbwana, enrettikhana toovi eeyaka mwanawe?"<sup>46</sup> Khuhiivo mmote awahiyeeyo onjipu, na waaza siikhu ethiitile khina nkina awahiyeeyo omuuzela theenya.

## 23

*Yinsa onkhattaza onaafikhi wa Mafwarizeewu na wa anamanozela a kano*

<sup>1</sup> Aphano Yinsa khuwooza atthu apale na anakhiyoni awe yoori:<sup>2</sup> "Anamanozela a kano na mafwarizeewu eekhalela khukulu ya Munsa.

<sup>3</sup> Mwiwaashututele na mwithokorele zooshi epile aniuuzaanini. Ila mwihiweezele vitthu anrettaazo. Maana khanrumeyela epile anlupaazo. <sup>4</sup> Yo anfuka maphuta oolemela na ottikha mmafuzi wa atthu, ila yo khantakha hatha oshashula na yaala. <sup>5</sup> Zooshi anrettaazo antakha yoori ooniwe pi anaatamu. Yo anjifukela hirizi mmwishwa mwaya, na olepisa mashaka a ajapi zaya. <sup>6</sup> Owaatuvela puuro zooshapweya za vanjampo na wiikhala wiilokozi nsinakooka, <sup>7</sup> owaatuvela oche-lisiwa vamwanttiwa na wiitthiwa Mwaaliimu. <sup>8</sup> Mweeyo khamwinlawwa wiitthiwa Mwaaliimu, maana Mwaaliimu enu mmote paasi, mweeyo mooshi mwa attwi. <sup>9</sup> Ahiiyevo vathi apha mwinttelaaye omwinkha khalamu ya ‘opaapa’, maana Papeenu ori mmote paasi, otule ari pinkuuni. <sup>10</sup> Wala ahiiyevo anttelaaye omwinkha khalamu ya namanozela maana namanozela ori mmote paasi, Al-Masiihu. <sup>11</sup> Ila otule eyiye nwulu vakatthi venu eeye karumeya. <sup>12</sup> Otule anjiwulisaaye onta opushuwisiwa; otule anjipushuwisaaye onta owulisiwa.

<sup>13</sup> Olaanikha pi weenu mweeyo anamanozela a kano na mafwarizeewu, manaaifikhi, maana mwiniwfukela atthu Ofwalume wa pinkuuni, ila na mweeyo khuheettimu na khamwintakha owaalikha weettamo apale antakhaaye! <sup>14</sup> Olaanikha pi wenu mweeyo anamanozela a kano na mafwarizeewu, manaaifikhi, maana mwimpala maali za anamfweliwa pi amannazaya na ojitapwatelana oretta lompa zoolepa; khwa ethiipo mwinteeela ohukhumwiwa saaneene. <sup>15</sup> Olaanikha pi wenu mweeyo anamanozela a kano na mafwarizeewu, manaaifikhi, maana mweeyo mwinlokha pahari na mwineettetta nti wooshi mweekesaka owaathuula atthu mwiwaatthe ntiini mwenu. Na amana mwimpattha ntthu aya oto onretteya swaafu piiri wiliya mwaana wa motthooni zayita mweeyo.

<sup>16</sup> Olaanikha pi wenu mweeyo, anamalokozela oofoon! Maana mwinlupa yoori: ‘Amana ntthu alapha khwa omwimpari, eto khina maana. Ila amana ntthu alapha khwa thahapu ya omwimpari oto ona sharuthi ya oretta etile alaphiyeyo.’ <sup>17</sup> Alolo oofoon! Eriina fwayita ti tiivi, thahapu ama mwimpari opule onttakatthisaaye thahapu? <sup>18</sup> Mweeyo mwinlupa theenya yoori: ‘Amana ntthu alapha khwa nzina la alitaari, olapha waya opo khuna maana, ila ntthu amana alapha khwa zaakha etile eriye vatulu vaya, oto ona yoorumeyela olapha wawe.’ <sup>19</sup> Atthu oofoon, eriina fwayita ti tiivi, zaakha ama alitaari anttakatthisaaye zaakha? <sup>20</sup> Nakataalikha otule anlaphaaye khwa alitaari onlapha khwa alitaari na yooshi etile eriivo. <sup>21</sup> Amana ntthu alapha khwa mwimpari, onlapha khwa mwimpari na khwa otule aniikhalaaye ntumpho. <sup>22</sup> Na otule anlaphaaye khwa pinku onlapha khwa khukulu ya Nluku na khwa otule ekhaleliyeyo.

<sup>23</sup> Olaanikha pi wenu mweeyo anamanozela a kano na mafwarizeewu, manaaifikhi, maana mweeyo mwinimwinkha Nluku lifunku la khuumi mpakha vitthu za nwoorotha na mwinimwinkha nyaani zootuva na samuli, ila mwinkhijilelora wa fwayita wa kano, wiiyiye: Shariya, huruma na waamineya, nakataalikha mwaarina ya oretta epo zaya woohiweraweri epile kiina. <sup>24</sup> Anamalokozela oofoon! Mwinshuja kuuku, ila khumiza enkamiyya.

<sup>25</sup> Olaanikha pi wenu mweeyo, anamanozela a kano na mafwarizeewu, manaaifikhi, maana mweeyo mwinoosa pilawuri

na parathu oje waya, ila nkatthi mwenu weetaalamo wiiya na omaashokopho. <sup>26</sup> Mafwarizeewu ohooni, moose khapula pilawuri nkatthi mwaya, aphano phantte etile ya oje entta wiiya yooshapweya.

<sup>27</sup> Olaanikha pi wenu mweeyo, anamanozela a kano na mafwarizeewu, manaafikhi, maana mweeyo mwiri nkhamma vilalo yoovaaziwa khinampo, oje waya enumpuwaaye nkhamma yooshapweya, ila nkatthi mwaya eetaaliyemo makhonkolo alupa ofwa na wakhula nanna ya vitthu zoovutta. <sup>28</sup> Oje wenu mwiniupuwa nkhamma anashariya, ila nkatthi mwenu mweetaala onaafikhi na vitthu zootakhala.

<sup>29</sup> Olaanikha pi wenu mweeyo, anamanozela a kano na mafwarizeewu, manaafikhi, maana mwinqeka khapuri zooshapweya za manapiyu, khuretta wiiya vilalo za akemaani. <sup>30</sup> Mwinlupa yoori: ‘Eriwaka neettiye wiiyavo wakathi wa amarehemu apapazeththu, khanaari wiiyana phantte khwa yo ya owoola manapiyu?’ <sup>31</sup> Etthiipo, mweeyo mwinqilawela oshaahiti yoori mwa aana a apale awooliyeyo manapiyu. <sup>32</sup> Mwilikhe wiitaaza mphimo wa twampi za amarehemu apapazenu. <sup>33</sup> Nyookha! Ojama wa evili! Mwinttela owerawera toovi hukhumu ya motthooni? <sup>34</sup> Tiito miiyo kooperekhezani manapiyu, ajuwi na anamanozela a kano. Akina mwiwoole, mwiwaakhomele, mwiwaajaphe nsinakooka mwenu na mwiwaalupatthe sitati khwa sitati. <sup>35</sup> Khwa ethhiipo eniittiikhelani taamu yooshi ya anashariya yiittikheliyeoyo vathi, waaza taamu ya nashariya Apeele, mpakha taamu ya Zakariiya mwaana wa Barakiya, mwimuuliyeoyo vakatthi wa omwimpari na alitaari. <sup>36</sup> Miiyo kiniwuuzani khweele yoori, zooshi epo ziniwateela atthu aleelo.

### *Ojiliza monkoni wa Yeruzaleemu*

<sup>37</sup> Yeruzaleemu, Yeruzaleemu, weeyo oniuuula manapiyu na owaavonya apale aperekhiweeyo! Swaafu kavi miiyo kitakhaka owaakusanya aana awo nkhamma mwanakhu aniwaakusanyaazo aana awe mmapaphelo, ila mweeyo khuhitakhi. <sup>38</sup> Moone, yoori nyuupa yenu enttela wiiya yoothamiwa. <sup>39</sup> Maana miiyo kiniwuuzani yoori, mweeyo khamwinteela okoona theenya, mpakha mwilupe yoori: ‘Wooparikhiiyiwa ti otule antaaye khwa nzina la Mbwana.’”

## 24

### *Opwechiwa wa Nyuupa Woosifwiwamo*

<sup>1</sup> Yinsa khusaruwa Nnyupa Woosifwiwamo, khusala alawa, anakhiyon ni awe khumwaattama yoori anthoonyeze manyupa apale ooshapweya. <sup>2</sup> Yinsa khuwooza yoori: “Mweeyo mwinoona ooshi apa? Weekhwheelee miiyo kiniwuuzani yoori khalinsalavo apha liwe vatulu wa liwe lihinttelaaye opwechiwa.”

### *Alama za mwiisho wa wakathi*

<sup>3</sup> Wakathi Yinsa eekhaliyeovo va mwaako Oluveera, anakhiyoni khulawa khwiitthaalana othetekela na khunvekela yoori: “Nkanuuze, zinttela orettikhana lini vitthu zaya epo, wala amana otaaka, alama-ni enttelaaye wiiyavo na alama-ni ya mwiisho wa olumwenku?” <sup>4</sup> Ye khuwaajipu yoori: “Phoole, ti ahiiyeye hatha ntthu anttelaaye wuttettekhani! <sup>5</sup> Maana atthu awaatta anlawa ate khwa nzina laka,

alupaka yoori: 'Miiyo ki Al-Masiihu' na owaattettekha atthu awaatta.  
<sup>6</sup> Amana mwisiila hapari za viittha ama nzuuzu la viittha, mwihoove.  
<sup>7</sup> Khapila enttela wuumanana khapila kiina, ofwalume na ofwalume nkina, enttela opuwa esikinyaatthi na jala phantte zawaatta. <sup>8</sup> Zooshi epo yaazo ya vitthu za olwaaza.

<sup>9</sup> Aphano yo anteela owinkhelelani yoori mwilupatthiwe na muuliwe, mwinlawa mweeniwe ti khapila zooshi mwaasa wa nzina laka. <sup>10</sup> Wakathi aya opo, atthu awaatta anteela wanswi amini anttela wiiya anamazinkula, na wiinana mmote na nzaawe. <sup>11</sup> Anlawa apuwe manapiyu awaatta oojipanka na awaattettekhe atthu awaatta. <sup>12</sup> Vitthu zootakhala zinttela weekezeleya, na pheta ya atthu awaatta enttela ovukuwa. <sup>13</sup> Ila otule anttelaaye ovilela mpakha mwiisho onta wuusurukha. <sup>14</sup> Enttela olaleyiwa hapari epi za Ofwalume wa Nluku olumwenku wooshi, nkama oshaahiti khwa khapila zooshi aphano osala ota mwiisho.

### *Ohoowa nwuulweene*

<sup>15</sup> "Mwinteele woona okufuru wa woopisa wa pala onttelaaye opuwa Puuro Ttakatthiifu, etile alupiyeeyo napiyu Daniyeele - osome na eweeleye. <sup>16</sup> Aphano apale anttelaaye wiiya Yudeya athirele omwaako. <sup>17</sup> Otule anttelaaye wiiya vatulu wa nyuppa ahishukhe yoori alazemo ethtu nnyuppa mwawe, <sup>18</sup> na otule anttelaaye wiiya omashapa ahirutele onti weettela ajapi yawe. <sup>19</sup> Siikhu etile ti ya woopisa khwa apale awiimittha na anaamwisaaye. <sup>20</sup> Mwilompe yoori miswipa epo ehiretikhane mwiita ama jumwa-monsi. <sup>21</sup> Maana wakathi aya opo onlawa wapuwe ohoowa nwulweene, thanku mwanzo wa olumwenku, na khunteela opuwa nkina nkama othhuupo. <sup>22</sup> Eriwaka wakathi aya opo wa ohoowa khawaavukuliwe, khina aari weettelaaye wuusurukha, ila mwaasa wa apale oothawuliwa, siikhu zaya epo enttela wiiya zoovukuliwa. <sup>23</sup> Aphano amana ntthu awuuzani yoori: 'Otu ari apha Al-Masiihu!' ama: 'Otule ari okhule!' mwiinhkhupale. <sup>24</sup> Maana anlawa apuwe a al-Masiihu oojipanka na manapiyu oojipanka anttelaaye oretta alama khulukhulu na vitthu zootkinisa yoori awaahate hatha apale oothawuliwa. <sup>25</sup> Miiyo kawuuzani khapula zihinarettikhane epo zaya. <sup>26</sup> Nakataalikha, amana muuziwa yoori: 'Ori n'yaara,' mwihilawe, ama oriwa: 'Ori nnyupa,' mwiikhupali. <sup>27</sup> Maana, nkama ethiipo taari enlankhaaye malawa-juwa, na ojithoonyeza okhu lintupweelaawo njuwa, ethiipo onttela wiiya ota wa Mwaana wa Pinaatamu. <sup>28</sup> Vahali aniiyaavo muufwi, akhwaazi ankusanyeya attaapho.

### *Ota wa mwaana wa Pinaatamu*

<sup>29</sup> Paata ya mashakha a siikhu epo, njuwa linnntela ozima na mweezi onttela olilha waara, matthottowa anttela okwa otulu na owahi wa pinkuuni onttela osakhinyeya. <sup>30</sup> Aphano epuwe pinkuuni alama za Mwaana wa Pinaatamu; khapila zooshi za vatuniya enttela ojikhupanyisa na enttela omoona Mwaana wa Pinaatamu ataaka mmawiku a pinkuuni khwa owahi na siifwa yawaatta. <sup>31</sup> Ye onttela operekha malayikha awe na ovuma nwulweene wa malope, yo anttela owaakusanya ananthawuliwa aya ooshi khwa phantte nne zinlankhaawo pheevoo, phantte khwa phantte kiina ya pinku.

*Nlikaniso wa nfikeera. Ohirimiziwa monkoni wa ojeekesela*

<sup>32</sup> Mwijinozele osomisa wa nfikeera: Amana virapi zaya zootthe-laka mathapa mwinjuwa yoori onsaleela ofiya mwiita. <sup>33</sup> Etthiipo na mweeyo, amana moona vitthu epo zooshi, mwijuwe yoori wakathi wafiya, ensaleela waaza. <sup>34</sup> Weekhweele kiniuuuzani yoori, khanteela ovira atthu apa aleelo zihirettikhaneene vitthu zaya epo. <sup>35</sup> Pinku na vathi zooshi zinteeela ovira, ila mattakhuzi aka khanvirar.

### *Siihku na wakathi khijuweyeeni*

<sup>36</sup> Ila monkoni wa siihku na wakathi khina anjuwaaye, wala malayikha a pinkuuni, wala Mwaana, ila Paapa paasi. <sup>37</sup> Nkhama etthiipo zaarettikhaniyeeyo wakathi wa Nuuhi, enttela wiiya etthiipo etelo ya Mwaana wa Pinaatamu. <sup>38</sup> Nkhama etthiipo siihku ziviriyeezo za nnyeri, atthu aari oja na aari onywa, aari oralana na aari oloozana, mpakha ofiya siihku Nuuhi eettiyeemo mmwaarakka. <sup>39</sup> Yo kaajuwiyeyevo hatha ethu mpakha wakathi otiiyeevo nnyeri na khuwaathuula ooshi. Enttela wiiya etthiipo ota wa Mwaana wa Pinaatamu. <sup>40</sup> Aphano awiri anttela wiiya omashapa; mmote athuuliwe, alikhwiwe mmote. <sup>41</sup> Aakha awiri achilaka tiriku; mmote athuuliwe, mmote alikhwiwe. <sup>42</sup> Mwaasa wa ethiito, mwijekesele, maana khamwinjuwa siihku anttelaaye ota Mbwana enu. <sup>43</sup> Ila eweeleyeni vitthu zaya epo; maana, mweenyewe nyuupa eriwaka eetta ojuwa wakathi antaavo anamwiiya, eetta ojeekesela na khaari olkhelela opwechiwa nyuupa yawe. <sup>44</sup> Tiiito, mweeyo theenya mwiiye woojikanisa, maana wakathi antaavo Mwaana wa Pinaatamu pi opule mwhinaakhipwelaaye.

### *Karumeya wawaamineya na karumeya woohaaminey*

<sup>45</sup> ‘Ti tuuvi karumeya wawaamineya na waakhili, otule Mbwana awe amwinkhiyeeyo osala vaje vawe yoori asala awenkha atthu ethuyoojiwa wakathi khaamili? <sup>46</sup> Wooparikhiiyiwa karumeya otule mbwana awe ataaka anttelaaye onskana arettaka etthiipo. <sup>47</sup> Weekhweele kiniuuuzani yoori onttela olkheliwa weettettisa maali zooshi za mbwana awe. <sup>48</sup> Ila karumeya otule amana eeya wootakhala rooho, ajilupezaka mweenyewe yoori: ‘Mbwanaka onta orupaza,’ <sup>49</sup> na khusala awaapiya ashirikhaawe na oja na onywa na ananhapaliwa, <sup>50</sup> onttela ota mbwana wa karumeya otule khwa siihku ahaari waakhipwelaaye na wakathi ahinjuwaaye. <sup>51</sup> Ye onta onhukhumu saaneene antthe puuro ya manaafikhi, ottuukho onttelaaye wiiyawo olila na oluma meeno.

## 25

### *Nlikaniso wa aamwari khumi*

<sup>1</sup> ‘Siihku yaya eto, Ofwalume wa pinkuuni onttela wiiya nkhamma aamwari khumi athuuliye makhompe aya, khulawa okutthanana mposi. <sup>2</sup> Athaanu khwa apale khumi aari alolo, athaanu aari akhili. <sup>3</sup> Apale oololo khuthuula makhompe aya, khuhinthuuli patarooya, <sup>4</sup> ila apale a akhili olkhwa othuula makhompe-ru khunthuula theenya patarooya nttopwiyo. <sup>5</sup> Mposi khurupaza ofiya, na ooshi khuwaakhola osikizi khulala. <sup>6</sup> Ila osikhu layili, khusiileya nkhuwo waari oraaye: ‘Mposi afiya! Mwisaruwe mwampwekhherele.’ <sup>7</sup> Aamwari apale ooshi khulankha khusala atthenkeza makhompe aya. <sup>8</sup> Apale oololo khusala awooza apale awiiyana akhili yoori: ‘Mwinimeele patarooya enu vattithiiru, maana makhompe eetthu antta osizila.’ <sup>9</sup> Yo khujipu yoori: ‘Wala,

khanfiyela onrumeyela mweeyo na fweeyo. Mwilawe mwamuuzanye patarooya.<sup>10</sup> Wakathi alawiyeeyo omuuzanya patarooya, mposi khu-fiya, aamwari apale ajitthekiyeyo khuvira vamote na mposi olawa oja njampo la harusi na nlako khufukiwa.<sup>11</sup> Wakathi vattithiiru, khusala ata aamwari apale oololo khusala akhuwa araka: ‘Mbwana, mbwana, mwinifukulele nlako!’<sup>12</sup> Ila ye khuwaajipu yoori: ‘Weekhweele kiniwuzani yoori akinuujuwani.’<sup>13</sup> Tiito kiniwuuzanini yoori mwijeesele, maana mweeyo khamwinjuwa siikhu wala wakathi aya.

### *Nlikaniso wa nzurukhu*

<sup>14</sup> “Theenya Ofwalume wa pinkuuni ontela wiiya nkama mwinysi mmote atakhaka oretta safvari, khuwaakhuwela akarumeya awe khuwaalikhela maali zawe.<sup>15</sup> Mmote khumwinkha milikhi thaanu za nzurukhu wa feeta, nkina khumwinkha milikhi piiri, nkina theenya khumwinkha milikhi moote, wakhula ntthu amwinkhiye khwa makhaamu awe. Elottelanaka khulankha khusala alawa safvari yawe.<sup>16</sup> Otule enkhiweeyo milikhi thaanu za nzurukhu wa feeta, khulankha nasaapiru olawa oretta zanshara khupattha milikhi thaanu kiina.<sup>17</sup> Otule aariina mizurukhu milikhi piiri khupattha milikhi piiri teenya.<sup>18</sup> Ila otule enkhiweeyo nzurukhu milikhi moote khulankha khulawa khuthipa liphotto vathi khutthaavo khuvitha nzurukhu wa mbwana awe.<sup>19</sup> Paata ya ovira wakathi mwinkeene, mbwana wa akarumeya apale khuruti khuretta thamani na apale aya.<sup>20</sup> Otule aapwekheriyeeyo nzurukhu milikhi thaanu wa feeta, khutiisa theenya nzurukhu milikhi thaanu wa feeta, woona kapattha theenya fwayita ya milikhi thaanu.”<sup>21</sup> Mbwana khunjipu yoori: ‘Kemaani, karumeya wooshapweya na wawaamineya! Weeyo waamineya khwa ttiithiiru, apho kintta owinkha yawaatta. Ote ofurahi vamote na mbwana awo.<sup>22</sup> Khuta theenya otule apwekheriyeeyo nzurukhu milikhi piiri wa feeta khuri: ‘Mbwana aka waakinkhiye nzurukhu milikhi piiri wa feeta, kapattha theenya milikhi piiri.’<sup>23</sup> Mbwana awe khunjipu yoori: ‘Kemaani, karumeya wooshapweya na wawaamineya, weeyo waamineya khwa ttiithiiru, miiyo kiniwinkha zawaatta. Ote ofurahi na Mbwana awo.’<sup>24</sup> Mwiisho khuta otule apwekheriyeeyo nzurukhu milikhi moote khuri: ‘Miiyo kaajuwiye yoori mbwana o ntthu woozivala, onuurulaaye na epile ohikheyeeni na okusanya epile ohizaleeni.<sup>25</sup> Tiito keetta woova, khulawa khuvitha nzurukhu awo milikhi moote wa feeta khuthipela vathi. Woone, apha opu nzurukhu awo.’<sup>26</sup> Mbwana khunjipu yoori: ‘Karumeya wootakhala na wooviliwa! Weeyo waajuwiye yoori kinuurula na epile kihikheyeeni na kinkusanya epile kihizaleeni.<sup>27</sup> Aphano weeyo waarinna ya olawana nzurukhu aka opanko yoori amana kiruti kinkhiwe nzurukhu aka wa wiiyana fwayita.<sup>28</sup> Mwinnyakanye nzurukhu opo milikhi moote wa feeta, mwimwinkhe otule ariina milikhi khumi.<sup>29</sup> Maana otule ariina, ontela winkhiwa theenya na oniiyana zawaatta. Ila otule ahina, hatha etile ariina ontta onyakanyiwa.<sup>30</sup> Karumeya woohiina fwayita, mwimweeselele othetekel e n'yiiza ntumpho oriimo olila na oluma meeno.’

### *Ophukiwa wa khapila*

<sup>31</sup> Amana Mwaana wa Pinaatamu ata nsifwa mwawe na malayikha ooshi, ontela wiikhala vakhukulu vawe ya nuuru ya pinkuuni.

<sup>32</sup> Khapila zooshi zinttela okusanyiwa aphale ariivo, avalule khapila khwa khapila kiina nkhama nshuki avalulaka pwittipwitthi zawe vakatthi wa puuzi. <sup>33</sup> Atthe pwittipwitthi nkhono nlume na puuzi nkhono nkha. <sup>34</sup> Aphano Mfwalume ontela owoozza apale anttelaaaye wiiya nkhono nlume yoori: ‘Mwite mweeyo ooparikhijiwa ti Paapa! Mwipwekhherele Ofwalume nkhama eritho mwitthenkezelieweeyo thanku wumpiwa wa olumwenku.’ <sup>35</sup> Maana miyio yaakikholiye jala, mweeyo khukinkha etthu-yoojiwa; lakikholiye nnyottha, mweeyo khukimeela maati oonywa; kaari nletto mweeyo khukinkha puuro ya omaka. <sup>36</sup> Kathaaleliwe, mweeyo khukinkha kuwo; keetta olwaaziwa, mweeyo khukiinanelu; kaari nkalapooso, mweeyo khukithotola.’ <sup>37</sup> Aphano makhaamili anteela onjipu yoori: ‘Mbwana, lini naawoniyeovo na jala khuwinkha etthu-yoojiwa, ama lookholiye nnyottha khuumeela maati?’ <sup>38</sup> Wakathi-ni nawooniyeevo ori nletto khuwinkha puuro ya omaka? Ama othaaleliwe, khuwinkha kuwo? <sup>39</sup> Wakathi-ni nawooniyeevo ori nlwele ama nkalapooso khuta khuuthotola?’ <sup>40</sup> Mfwalume khujipu yoori: ‘Kiniuwuzani khweele yoori, etile mweeyo mwiwaaretteliyeeyo mmote wa attwiizaku apa attiitthi, mwakirettela miyio.’

<sup>41</sup> Aphano ye ontela owoozza apale a nkhono nkha awe yoori: ‘Anamalaanikha mwikaattuwe! Mweette omootho wa mileele, waattaleleliweeyo Sheethwani na masheethwani awe.’ <sup>42</sup> Maana miyio yaakikholiye jala, mweeyo khuhikinkhi hatha etthu-yoojiwa, laakikholiye nnyottha mweeyo khuhikinkhi hatha etthu yoonywa. <sup>43</sup> Kaari nletto mweeyo khikhinkhi hatha puuro yoomakavo, kathaaleliwe mweeyo khuhikinkhi kuwo, keetta olwaaziwa na ofukeliwa nkalapooso, mweeyo wala okithotola.’ <sup>44</sup> Yo anjipu yoori: ‘Mbwana, nawoona lini yuukholiye jala wala luukholiye nnyottha ama ori nletto ama ohina kuwo ama olwaaziwaka na ofukeliwe, fweeyo kuhiwaawuni?’ <sup>45</sup> Ye ajipu yoori: ‘Kiniuwuzani khweele yoori, etile mwihiinretteleeni mmote wa apale attiitthi, khamwikirettelleeni na miyio.’ <sup>46</sup> Apa aneetta ohukhmu khwa mileele, ila makhaamili anttelaa wiiyana ohaayi wa mileele.”

## 26

### *Shawuri za otakha wuuliwa Yinsa*

<sup>1</sup> Paata ya olupa vitthu epile, Yinsa khuwooza anakhiyoni awe yoori: <sup>2</sup> “Nkhama mwinjuwaazo, ensaleela siikhu piiri ofiya siikhu ya njampo la Paashikowa, na Mwaana wa Pinaatamu ontela winkheleliwa yoori akhomeliwe.” <sup>3</sup> Aphano mahaakhimu a tiini na attunkhulu a tiini khukusanyeya onyuupa wa haakhimu nwulu aari wiithiwaaye Kayifwa; <sup>4</sup> khuwaza shawuri yoori ankhole Yinsa sirini na amuule. <sup>5</sup> Ila khusala alupa yoori: “Nihirette wakathi wa njampo yoori atthu ahipuwise nzuzu.”

### *Yinsa onvaaziwa mafuttha oonukhela nti wa Betaaniya*

<sup>6</sup> Yinsa eettiye Betaaniya, owawe Simawu otule raku aariinaaye makuttula. <sup>7</sup> Aphano muukha mmote khuta aphale aariivo Yinsa athuuliye suupha ya mafuttha oonukhela awaatta nzurukhu, khwitthela eeshwa ya Yinsa wakathi ansikaniyeovo eekhaliye vameeza. <sup>8</sup> Anakhiyoni ooniyeovo vitthu epile khushanka na khuri: “Mwaasa aya niini oharipwaka mafuttha apa?” <sup>9</sup> Mafuttha apa ahoozanyisiwe,

nzurukhu aya enkhiwa asikhini!”<sup>10</sup> Ila Yinsa ajuwiyeovo etthu aari olupaaye, khuri: “Mwinimwantipwelani muukha otu? Ye aretta etthu yooshapweya khwa miiyo.<sup>11</sup> Maana asikhini aniiya vamote na mweeyo wakhula siikhu, ila miiyo wala.<sup>12</sup> Mafuttha apa eet-theliyeoyo mwiili aka, ye aretta khwa ontthenkeza ozikhwiwa waka.<sup>13</sup> Kiniuuuzani khweele yoori: Wakhula vahali entafusiriwaavo hapari zooshapweya khwa olumwenku wooshi, epi arettiyeoyo muukha otu, zeettaka olupiwa noofikhiriwa ye.”

#### *Yuuda oninzinkula Yinsa*

<sup>14</sup> Aphano mmote wa apale khumi na awiri, aariwitthiwaaye Yuuda Eshikariyooete, khulawa okutthanana mahaakhimu a tiini.<sup>15</sup> Khuwoozela yoori: “Mwinikiripha kavi amana miiyo kiwinkhelelani?” Yo khusilana onripha nzurukhu talaathiini wa feeta.<sup>16</sup> Waaza wakathi otthuupule Yuuda khusala eekesaka nanna ya omwinkhelela Yinsa mmakhono wa maatuwi awe.

#### *AnakhiyonI antthenkeza njampo la paashikowa*

<sup>17</sup> Siikhu ya mwanzo ya Njampo la Phaawu Yoohiina Fwaramento, anakhiyonI khumwaattama Yinsa khumuuzela yoori: “Ontakha yoori nitthenkeze vayi etthu-yoojiwa ya Paashikowa?”<sup>18</sup> Yinsa khujipu yoori: “Mwilawe nsitati mwakutthanane mwinyi mmote mwimuuze yoori: ‘Mwaaliimu alupa yoori: Wakathi aka onsaleela ofiya. Kinttela onja Paashikowa na anakhiyonI aka vaje vawo.’”<sup>19</sup> AnakhiyonI khuretta ethiipile ooziweezo ti Yinsa na khuntthekeza Paashikowa.

<sup>20</sup> Weettelaka oripa, Yinsa khulawa khwiikhala vameeza na anakhiyonI awe apale khumi na awiri.<sup>21</sup> Ettaka oja, khulupa yoori: “Kiniuuuzani khweele, mmote wa mweeyo onlawa akizinkule.”<sup>22</sup> Yo khwiinya oohuzunikh channu na khwaaza wuuzelana yoori: “Weekhweele khahiyo miiyo Mbwana?”<sup>23</sup> Yinsa khujipu yoori: “Nlupa anttelaaaye okizinkula kinjana sahani moote.<sup>24</sup> Mwaana wa Pinaatamu onlawa afwe, nkhamma ethiipo yaatikhiweeyo monkoni wa ye. Ila wootakhaliwa ti otule anttelaaaye onzinkula Mwaana wa Pinaatamu! Afwataali ahivokoliweeni.”<sup>25</sup> Aphano Yuuda, namazinkula, khuri: “Talili ti miiyo Mwaaliimu? Yinsa khujipwela araka: “Ayo, ti weeyo.”

#### *Njampo la Mbwana*

<sup>26</sup> Ettaka oja, Yinsa khuthuula phaawu, khuparikhiya, khumeya na khuwenkha anakhiyonI awe araka: “Mwithuule na mwirafune; opu mwiili aka”.<sup>27</sup> Elottelanaka khuthuula jiikira, khushukhurwela na khuwenkha araka: “Mwinywe mooshi mweeyo.<sup>28</sup> Eti taamu yaka ya wahati yiithiweeyo khwa zwaamu ya atttu awaatta yoori eswaamihe-liwe twampi.<sup>29</sup> Miiyo kiniuuuzani yoori, waaza nasaapi mpakha okho ninttaawo, akinlawa onywa nshumo wa nrayi wa wuuva mpakha siikhu kinttelaaye onywa theenya nshumo wa nrayi wa wuuva na mweeyo muufwalume wa Paapa.<sup>30</sup> Paata ya yo wiipa liipo limote, khusala alawa omwaako Oluveera.

#### *Yinsa onlupa yoori Pheeturu onteela onkhana*

<sup>31</sup> Aphano Yinsa khulupa yoori: “Osikhu opu, mooshi mweeyo mwin-teela okithira. Maana yaatikhiwa yoori: ‘Kininvulalisa nshuki, pwittip-witthi za liphanko lawe zimwazeye.’<sup>32</sup> Ila paata ya osisimuwa waka, kinttela olokoza Kaliley.”<sup>33</sup> Pheeturu khujipu yoori: “Hatha nkhamma

ooshi eetta wuutthira, miiyo akintelela wuutthira.”<sup>34</sup> Yinsa khumuaza araka: “Weekhweele kiniwuua yoori osikhu otthuupu, likukhuwi lihi-neekhe, weeyo onlawa wakikhane swaafu ttatthu.”<sup>35</sup> Pheeturu khusipu theenya yoori: “Hatha nkhamma ofwa vamote na weeyo, akintelela wuukhana!” Anakhiyoni ooshi khulupa ethiipo.

### *Yinsa nwoorotha wa Yetemaani*

<sup>36</sup> Aphano Yinsa khulawa na anakhiyoni awe puuro eniitthiwaaye Yetemaani khuwooza yoori: “Mwiikhale apha, miiyo kinttela olompa aphale.”<sup>37</sup> Khunthuula Pheeturu na aana awiri a Zepeteewu, Yinsa khwaaza ohuzunikha na othunkuwikha.<sup>38</sup> Yinsa khuwooza yoori: “Nafusi yaka ti ya ohuzunikha venkivene, woosaleela ofwa. Apho mwisale apha na njeekesele fooshi.”<sup>39</sup> Khususa vattithiiru, khukokhora khufisa ajih i yawe vathi, khusala alompa araka: “Paapa, nkhamma enwaheya, okaattuwaniye jiikaza eti ya ohoowa; ila ehirettikhane nkhamma kintakhaazo, ila nkhamma ontakhaazo.”<sup>40</sup> Paata ya toole, khurutela aphale aariivo anakhiyoni awe khuwaasikana eettaka olala. Yinsa khumuuzela Pheeturu yoori: “Mweeyo khamwiwaheeni nenkawu ojeekesela fooshi wakathi mmote paasi?”<sup>41</sup> Mwijeekesele na mwilompe yoori mwihikwele muuzayiniwa. Rooho ti yookhomaala ila mwiili pi woottettheya.”<sup>42</sup> Khurutela olawa olompa theenya khuri: “Paapa, nkhamma khinwahuya okattuwananisa jiikaza eti khapula kihinyweeni, ti arettikhane matakhele awo.”<sup>43</sup> Wakathi arutiyeovo theenya khuwaasikana eettaka olala, maana maasho aya eetta owaalemela.<sup>44</sup> Aphano khuwaalikha theenya, khulawa olompa swaafu ya ttaatthu, alupaka mattakhuzi atthaapale.<sup>45</sup> Nawiisha khurutela attaphale aariivo anakhiyoni awe na khuwoozela yoori: “Mweeyo nalelo mwintta olala na wiitthuwaa? Wafiya wakathi! Moone yoori Mwaana wa Pinaatamu onttela winkheleliwa mmakhono wa anatwampi.”<sup>46</sup> Mwilankhe, nilawe; oto antaaye apho namazinkula!

### *Okholiwa wa Yinsa*

<sup>47</sup> Eettaka ottakhula ethiipile, khuta Yuuda, mmote wa apale khumi na awiri, vamote na khuntti khuluyeene athuuliye phanka na puutta, zaaperekhiweeyo ti mahaakhimu a tiini na attunkhulu a tiini.<sup>48</sup> Namazinkula aawenkhiye alama apale aasiilananiyeeyo araka: “Otule kinttelaaye ompatikha ti othuuto, mwinkhole.”<sup>49</sup> Wakathi Yuuda aari omwaattamaavo Yinsa khuri: “Salaama, Mwaaliimu!” Na khumpatikha.<sup>50</sup> Yinsa khumuaza yoori: “Swaahipu, etile oteeliyeeyo oreitta, waakuve oreitta”. Attaaphale khususeliwa, khukholiwa Yinsa khufukiwa.<sup>51</sup> Mmote wa apale aarina Yinsa khookola nkhone khuthuula phanka khushija nshiilo la karumeya wa haakhimu nwulu wa tiini.<sup>52</sup> Aphano Yinsa khuwooza anakhiyoni awe yoori: “Mwipwehe phanka! Maana wooshi otule anlipanaaye phanka, ofwa khwa phanka ethiito.”<sup>53</sup> Mweeyo mwinoona yoori miiyo akinwahi onvekela Paapa khukiperekheza nasaapi khuntti khumi na piiri za malayikha?<sup>54</sup> Nkhamma ethiipo enlupaaye Zawaatikhiwa Ttakatthiifu yoori vitthu zaarina ya orettikhana nkhamma ethiipi?”

<sup>55</sup> Wakathi otthuupule Yinsa khuwoozela atthu apale yoori: “Mwateela okikhola na phanka na puutta, nkhamma nlokozi wa anazompere? Siikhu zooshi miiyo kaari osomisa Nnyupa Woosifwiwamo, khi mweeyo

ohikholi! <sup>56</sup> Ila zooshi epi zarettikhana yoori emarisele zawaatikhwa za manapiyu. Aphano anakhiyoni ooshi khumwanswi na khuntthira.

### *Yinsa vakatthi wa mashawuriya*

<sup>57</sup> Apale ankholiyeeyo Yinsa khunthuula khunlawana wa Kayifwa, haakhimu nwulu wa tiini ottuukho aakusanyeyiyeeyo anamanozela a kano na attunkhulu a tiini. <sup>58</sup> Pheeturu eetta owaalotta peetiwene mpakha vaje wa haakhimu nwulu wa tiini, khuvira khwiikhala na anamweekesela yoori oone zooshi nanna zaari weettelaaye wiishela. <sup>59</sup> Mahaakhimu a tiini na mashawuriya ooshi aari weekesa oshaahiti woovonyeya khwa Yinsa yoori anhukhumwele ofwa. <sup>60</sup> Ila khuhinsikanani, aapuwiye-ru atthu awaatta oolaza oshaahiti woovonyeya. Omwiisho khujithoonyeza atthu awiri, <sup>61</sup> khulupa yoori: “Mwinyi otu alupa yoori: ‘Miyo kinwahi opwecha Mwimpali Nluku na khu-jeka khwa siikhu ttatthu.’” <sup>62</sup> Aphano haakhimu nwulu wa tiini khulankha khumuaza Yinsa yoori: “Khunjipu epo onlupeziwaaye?” <sup>63</sup> Ila Yinsa nalelo khwiiya woonyamala. Haakhimu nwulu wa tiini khumuaza yoori: “Kinuuvekela yoori weeyo olaphe khwa Nluku woohaayi, nkhamma weeyo o Al-Masiihu, mwaana wa Nluku, onuuze.” <sup>64</sup> Yinsa khujipu yoori: “Weeyo walupa. Ila miiyo kiniwuuzani mooshi mwueeyo yoori: enttela ofiya siikhu mwinttelaaye omoona Mwaana wa Pinaatamu eekhaliye nkhone nlume wa nwahi zooshi, ataaka khwa mawiku a pinkuuni. <sup>65</sup> Aphano wakathi haakhimu nwulu wa tiini avaruliyeeyo kuwo zawe na khulupa yoori: “Akufuru! Mwaasa wa niini nihithajiyaka oshaahiti nkina theenya? Mweeyo mwasiila nasaapi okufuru wawe! <sup>66</sup> Mwinuupuwela toovi?” Khujipu yoori: “Oninsuhi ofwa!” <sup>67</sup> Akina khusala antthemela omaasho na ompiya, akina khusala ampwakula araka: <sup>68</sup> “Onlupe, Oo Al-Masiihu, ti paani oopiyeeyo?

### *Pheeturu oninkatthala Yinsa*

<sup>69</sup> Pheeturu eettiye wiikhala vaje. Njaazi mmote khumwaattama khumuaza yoori: “Na-weyo waari na Yinsa nkalileya.” <sup>70</sup> Ila ye khukhana vakatthi wa atthu ooshi araka: “Akinjuwa etthu ontakhu-laaye.” <sup>71</sup> Paata ya toole khuthoonya phantte ya omilako, njaazi nkina khumoona khuwooza apale aari attaphale yoori: “Mwinyi otu aari na Yinsa wa Nazareti.” <sup>72</sup> Ye khukhana theenya khwa olapha araka: “Akininjuwa mwinyi aya otu!” <sup>73</sup> Elottelanaka, apale aari attaphale khumwaattama Pheeturu khumuaza yoori: “Weekhwhee weeyo o wawe! Ottakhula wawo onthoonyeza.” <sup>74</sup> Attaaphale ye khwaaza ojilaani na olapha araka: “Akininjuwa!” Nasaapiru likukhuwi khwi-ikha. <sup>75</sup> Aphano Pheeturu khufikhiri ntakhuzi ooziweeyo ti Yinsa yoori: “Likukhuwi lihineekhe onteela okikhana swaafu ttatthu.” Noolaavo aphale vaya khulila wakatapuvo.

## 27

### *Ojiheya wa Yuuda*

<sup>1</sup> Supuyeene, attunkhulu a mahaakhimu na anamalokozela a tiini khujilakelela onhukhumwela Yinsa ofwa. <sup>2</sup> Khunfuka khunthuula khunlawana wa nsatoro Pilaatu.

<sup>3</sup> Wakathi Yuuda, otule anzinkuliyeyo, ooniyeovo yoori Yinsa ontela ohukhumwiwa, khuthupwiya na khulawa owaarutisela attunkhulu a

mahaakhimu na anamalokozela a tiini nzurukhu opule talaathiini wa feeta aathuuliyeeyo.<sup>4</sup> Khuri: "Kakosa, khwa ozinkula taamu yoohikosi." Yo khujipu yoori: "Fweeyo ennijali niini? Epo ti weeyo onjuwaaye."<sup>5</sup> Aphano Yuuda khweeselela nzurukhu omwimpari. Khusaruwa nawisha khulawa khujiheya.<sup>6</sup> Mahaakhimu a tiini khukusanya nzurukhu opule, khuri: "Khahi halaali othuula khuttha mmwfukho wa zaakha, maana hisapu ya taamu."<sup>7</sup> Aphano khusilana orumeyela nzurukhu aya opule khwa wuuzanyela nshapa la namuupa yoori lirettiwe vilalo la ozikhawamo aletto.<sup>8</sup> Tiito nshapa laya nttho liniitthiwaaye Nshapa la Taamu mpakha siikhu epi za leelo.<sup>9</sup> Aphano khurettikhana epile zaalupiweeyo ti napiyu Jeremiiya yoori: "Athuula nzurukhu talaathiini wa feeta, hisapu yoothiiwa pi atthu a Ezirayiilu,<sup>10</sup> khuuzanyela nshapa la namuupa, nkhamma ethiipo Mbwana aakirumiyeeko."

### *Yinsa wa Pilaatu*

<sup>11</sup> Yinsa khutthiwa omaasho wa nsatoro ye khumuuzela yoori: "Weeyo onfwalume wa mayahuuti?" Yinsa khujipu yoori: "Pi ethiipo olupiyeeko."<sup>12</sup> Ila eettaka olokoveziwa ethiipile pi attunkhulu a mahaakhimu na anamalokozela a tiini, ye khuhijipu.<sup>13</sup> Aphano Pilaatu khumuuzela yoori: "Weeyo khunsila vitthu epo onlokoveziwaaye pi atthu apo?"<sup>14</sup> Ila Yinsa khuhijipu hatha nttakhuzi, khwa ethiito nsatoro khwiiya wooshanka.

### *Yinsa onhukhumweliwa ofwa*

<sup>15</sup> Amana efiya siikhu ya njampo nsatoro aazowereliye onfukulela ntthu woothawuliwa pi atthu.<sup>16</sup> Yo wakathi aya otthuupule aarina napherezu woojuwanikha aari wiitthiwaaye Baraapa.<sup>17</sup> Pilaatu khwooza atthu apale athukumaniyeeyo attaphale yoori: "Tituuvi khwa apa awiri mwintakhaaye yoori kinfukulele: Baraapa ama Yinsa aniitthiwaaye Al-Masihu?"<sup>18</sup> Maana aajuwiye yoori anlawaniye okhule mwaasa nrima.<sup>19</sup> Pilaatu eekhaliye onyuupa woophukiwamo, muukha awe khumperekha hapari araka: "Ohijiphakanyane apo, maana leelo muulottha kahoowa venkivene monkoni wa ye."<sup>20</sup> Ila mahaakhimu a tiini na anamalokozela a tiini khuwaakhitiri atthu apale yoori aveke Ofukuliwa Baraapa na ooliwe Yinsa.<sup>21</sup> Aphano Nsatoro khuuzela yoori: "Khwa atthu apa awiri mwintakhelaaye yoori miyo kinfukulele ti tuuvi?" Yo khujipu yoori "Baraapa!"<sup>22</sup> Pilaatu khuuzela yoori: "Khi kinrettele niini Yinsa, aniitthiwaaye Al-Masihu?" Ooshi khujipu yoori: "Akhomeliwe!"<sup>23</sup> Pilaatu khuuzela yoori: "Niini arettiyeeyo yootakhala?" Ila atthu apale khusala avira atepaka onyakula araka: "Akhomeliwe!"<sup>24</sup> Wakathi Pilaatu asopheliyeovo yoori khaari opattha hatha swamiima, ila olika toowo khusala oona weekezeleya nzuzu, khurumisa otiseliwa maati, khunawa omaasho wa atthu apale na khulupa yoori: "Akina paathuli khwa taamu ya ntthu otu; eto zwaamu yenu."<sup>25</sup> Atthu ooshi apale khujipu yoori: "Taamu yawe ti eniittikhele fweeyo na aana etthu!"<sup>26</sup> Aphano Pilaatu khunfukulela Baraapa, khuruma ojaphiwa Yinsa na khumwinkhelela olawa okhomeliwa.

### *Anajanka aninveyisa Yinsa*

<sup>27</sup> Elottelanaka, anajanka a nsatoro khunthuula Yinsa khunlawana nyuupa khuulu ya nsatoro khukusanyeya anajanka ooshi khunzukulela.<sup>28</sup> Khunvula kuwo zawe khunwalisa ajapi yookhuttuwa;

<sup>29</sup> khuvaasha khaara ya miiwa, khunwalisa mmewishwa mwawee na khunttheela puutta nkhono awe nlume, khunkokhorela khusala anveyisa, araka: “Ojuusuru, mfwalume wa mayaahuuti!” <sup>30</sup> Khusala antthemela na khunnyakanya puutta etile, khumpiyana veeshwa. <sup>31</sup> Paata ya onveyisa, khunvula ajapi etile khunwalisa ajapi yawe. elottelanaka khusala alawa onkhomela.

### *Okhomeliwa wa Yinsa*

<sup>32</sup> Alawaka, khukutthanana nsireene aari wiitthiwaaye Simawu, khukhanyareliwa othuula nsalapa wa Yinsa.

<sup>33</sup> Yo khufiya puuro eniithiwaaye Kolokoota, eriina maana a puuro ya likurakuza la eeshwa, <sup>34</sup> khumwinkha onywa viinyu yoophakanyaniwa wamwe; ila ye wakathi ootiyeevo, khukathala onywawa. <sup>35</sup> Paata ya onkhomela, khwawanyana kuwo zawe khwa weekesa nasipu. <sup>36</sup> Khiikhala attaphale khusala amweekesela. <sup>37</sup> Vatulu wa eeswa yawe khutthiwavo lipawu laatikhiweeyo khwa olkoveziwa wawe yoori: “OTU TI YINSA, MFWALUME WA MAYAAHUUTI.” <sup>38</sup> Na aakhomelaniwe anamwiyya awiri, mmote nkhono nlume nkina nkhono nkha. <sup>39</sup> Apale aari oviraaye eetta ontukhana na wiinisa viishwa zaya, <sup>40</sup> araka: “Oo weeyo waari weettelaaye opwecha Nyuupa Yoosifwiwamo na khujeka khwa siikhu ttatthu, ojuusuru! Wiishukhe vansalapa apho nkhamma omwaana wa Nluku!” <sup>41</sup> Khwa nanna ethiipo mahaakhimu a tiini, anamanozela a kano na attunkhulu a tiini eetta onveyisa, <sup>42</sup> araka: “Wawosuru akina, ila khunwahi ojuusuru! Mfwalume wa Ezirayilu! Eeshukhe nasaapi vansalapa apho, nintta onkhupali. <sup>43</sup> Ye amwaamini Nluku. Nluku ti amuusuru nasaapi ethiiti, nkhamma ona huruma na ye, maana alupa yoori: ‘Ki mwaana wa Nluku!’” <sup>44</sup> Theenya anamwiyya apale aakhomelaniweeyo khusala anttukhana.

### *Ofwa wa Yinsa*

<sup>45</sup> Yaapuwiye yiiza nti wooshi, payina ya saasiitha mpakha saakhentta. <sup>46</sup> Paata ya ofiya saakhentta, Yinsa khukhuwa woonyakulavo, araka: “Eloohi, Eloohi, lama sabatani?” Eriina maana a “Nluku aka! Nluku aka! Mwaasa wa niini okanswaka?” <sup>47</sup> Akina aarivo noosiila epile, khulupa yoori: “Ye oninkhuwela Aliyaasi.” <sup>48</sup> Woohirupazi, mmote wa yo khutthirela shiponja, khunaanisa na viinyu yoonyuunya, khuttha pontha wa ttekette na khumwinkha Yinsa yoori anywe. <sup>49</sup> Akina khusala alupa yoori: “Mwinlikhe, nimoone nkhamma Aliyaasi onteela omusurusu.” <sup>50</sup> Aphano Yinsa khukhuwa woonyakulavo saaneene khufwa.

<sup>51</sup> Wakathi otthuupule phazira ya omwimpali khwaawanyeya vakatthi, waaza vatulu mpakha vathi. Nti khusakhinyeya na mawe khupwecheya. <sup>52</sup> Khapuri epile khufunuwa na mwiili wa attakatthifu awaatta afwiyeeyo khusisimuwa. <sup>53</sup> Noolaamo nkhapuri mphule, paata ya Yinsa osisimuwa, atthu apale akina asisimuwyeyo khweetta sitati Ttakatthiifu na khooniwa pi atthu awaatta. <sup>54</sup> Nttunkhulu wa anajanka na apale aari omweekeselaaye Yinsa, nawoona esikinyaatthi na zooshi zaarettikhaniyeeyo, khwiyya awoova channu khulupa yoori: “Khweele-khweele, ntthu otu aari mwaana wa Nluku!”

<sup>55</sup> Aakha awaatta aari attaphale khusala oona ari peetiwene. Apale amperekhiyeeyo Yinsa waaza Kalileya yoori anrumeyele. <sup>56</sup> Vakatthi

vaya aarivo Mariyamu Mataleena, Mariyamu mamaawe Yaakhumpa na Yuusufu na Maama wa aana a Zepeteewu.

### *Ozikhiwa wa Yinsa*

<sup>57</sup> Njuwa leettelaka oveva, khuta mwinyi mmote wa thajiri wa Arimateeya anitthiwaaye Yuusufu aari namalottela wa Yinsa. <sup>58</sup> Khulawa wa Pilaatu, khuveka mwiili wa Yinsa. Pilaatu khuruma winkhiwa. <sup>59</sup> Yuusufu khuthuula mwiili wa Yinsa khuputaputela va joora, <sup>60</sup> khunttha nkhapuri pheeya, aarumiyeeyo othipiwa vamawe. Vanlako wa khapuri yaya khutthaavo liwe liwululene, khulankha khusala alawa. <sup>61</sup> Mariyamu Mataleena na Mariyamu nkina, eekhaliye attaphale omaasho wa khapuri.

### *Namweekesela wa Khapuri*

<sup>62</sup> Mmeesho mwaya, siikhu ya saapatu, mahaakhimu a tiini na amafwarizeewu khulawa wa Pilaatu. <sup>63</sup> Yo khumuza yoori: “Mbwana, ninfikhiri yoori wakathi aariye haayi, namattettekha otule aalupiye yoori siikhu ya ttaatthu onttu osisimuwa.” <sup>64</sup> Apho orume yoori khapuri etile yeekeseliye saaneene mpakha siikhu ya ttaatthu, yoori ehiret-khane ota anamalottela awe khupwecha khapuri na awooze atthu yoori: ‘Asisimuwa muufwa,’ linttela wiiya nzuuzu lootepa zayita la mwanzo.” <sup>65</sup> Pilaatu khulupa yoori: “Apho mwawaathuule anajanka. Mwilawe mweekesela khapuri khwa nanna mwinoonaaye yoori mwin-wahi.” <sup>66</sup> Yo khulawa khusoromezavo liwe ntthile lafuukaniweeyo khapuri na khuwalikha attaphale anajanka eekeselaka.

## 28

### *Osisimuwa wa Yinsa*

<sup>1</sup> Paata ya ovira lifwajiri, yeettelaka waaziwa siikhu ya mwanzo ya sumana, Mariyamu Mataleena na Mariyamu nkina khulawa woona ovilalo. <sup>2</sup> Aphano khupuwa esikinyaatthi khuluyeene, maana nlayikha la Mbwana leetta wiishukha pinkuuni khuta mpakha vakhapuri khusussa liwe ntthile laafukaniweeyo khwiikhalela. <sup>3</sup> Ozerima wawe waari nkhamtaa taari na kuwo zawe zaari zoolakala nkhamma maphovu. <sup>4</sup> Anamweekesela khusala athukumela mwaasa wa woova khumpuwa nkhamma afwiyye. <sup>5</sup> Nlayikha ntthile khuwooza aakha apale yoori: “Mwihoove, kajuwa yoori mweeyo mwinimweekesa Yinsa otule aakhomedliweeyo. <sup>6</sup> Ye khaamo mphu, asisimuwa, nkhamma ethiipo aalupiyeego. Mwite moonevo apha aattattikheliweevu. <sup>7</sup> Mwilawe mwawooze anakhiyoni awe yoori Yinsa asisimuwa muufwa na alokoza kalileya. Mwinttela omoona ottuukho. Mattakhuzi aya pi atthaapa kiuuziy-eenini.” <sup>8</sup> Aakha apale khusaruwa nvilalo mphule na waakuva eettaka woova na arina furaha, na khusala athira olawa owooza anakhiyoni awe. <sup>9</sup> Nasaapiru, Yinsa khuwaapuwelela na khuwooza yoori: “Salaama!” Yo khumwaattama na khupatikha moolu awe khumwaapu. <sup>10</sup> Aphano Yinsa khuwooza yoori: “Mwihoove, mwilawe mwawooze attwiizaku apale eette Kalileya; anttela okoona ottuukhu.”

### *Hapari za anamweekesela*

<sup>11</sup> Aakha apale nalelo ari ntarikhi, anajanka akina aari weekeselaaye vilalo etile khurutela ositati khuwooza mahaakhimu a tiini

zooshi zaarettikhaniyeeyo.<sup>12</sup> Wakathi attunkhulu a mahaakhimu aaku-sanyeyiyeovo na anamalokozela a tiini, khuwaza shawuri. Khuwenkha anajanka nzurukhu wawaatta,<sup>13</sup> awoozaka yoori: “Alupe yoori: ‘Aattiye anakhiyoni awe osikhu khumwiya fweeyo neettaka olala.’<sup>14</sup> Yoori amana zifiya omashiilo wa nsatoro, fweeyo nintta omweeleza na nintta owaakisani khwa wakhula nlattu.”<sup>15</sup> Etthiipile, anajanka khupwekhera nzurukhu opule na khuretta ethhiipo anozeliweeyo. Mattakhuzi aya apo khumwazeyela vakatthi wa mayaahuuti mpakha leelo eti.

*Khaazi khuluyeene*

<sup>16</sup> Maswihaapa apale khumi na mmote khulawa Kalileya, omwaako okhule Yinsa awooziyeewo. <sup>17</sup> Wakathi amoniyeovo khumwaaputu; akina khumwakanyera. <sup>18</sup> Aphano Yinsa khuwaattama khuwooza yoori: “Kenkhiwa miiyo ofwalume, pinkuuni na vathi. <sup>19</sup> Nakataalikha, mwilawe mwawaarette anakhiyoni khwa khapila zooshi, mwiwoosaka khwa nzina la Paapa, la Mwaana, na Rooho Ttakatthiifu, <sup>20</sup> mwiwaasomisaka oshututela zooshi epile kirumiyeeko. Na miiyo kinttela wiya vamote na mweeyo mpakha mwiisho wa wakathi.

## Maaruku

### *Yaahaya Namoosa ontthenkeza Tarikhi*

<sup>1</sup> Omwanzo wa hapari zooshapweya za Yinsa Al-Masiihu, Mwaana wa Nluku. <sup>2</sup> Yaatikhiwa khwa ohupiri wa napiyu Ezaaya yoori: “Moone, kinlawa kamperekhe omaasho wawo karumeya aka, yoori atthenkeze tarikhi yawo; <sup>3</sup> huula enkuwa enyakulaka n’yaara yoori: ‘Mwittenkeze tarikhi ya Mbwana na mookolele miphiiitelo zawe. <sup>4</sup> Aapuwiye Yaahaya namoosa n’yaara, khusala atafusiri monkoni wa woosiwa na othupwiya khwa nswammaha wa twampi. <sup>5</sup> Athu ooshi a nti wa Yudeya na apale a Yeruzaleemu aari ovira ataaka na otukhuru twampi zaya na yo aari wiiya a woosiwa khwa ye mmuttho Yorotaani. <sup>6</sup> Kuwo aari owalaazo Yaahaya zaari za shapala za enkamiya. Ye aarina nzako awe wa shapala na aari ojaka mapalaka na asali ya ntthuttu.

### *Yaahaya onlawela oshaahiti wa Yinsa*

<sup>7</sup> Atafusiraka aari ori: “Paata ya miiyo onta otule ariina oowahi zayita miiyo, oto akinsuhi ofukula mikhoi za jampali zawe. <sup>8</sup> Miiyo kiniwoosani na maati, ila ye onttela owoosani na Rooho Ttakatthiifu.

### *Woosiwa na ozayiniwa wa Yinsa*

<sup>9</sup> Wakathi otthuupule, khuta Yinsa wa Nazareeti ya Kalileya khoosiwa ti Yaahaya mmuttho wa Yorotaani. <sup>10</sup> Nasaapiro, eettaka ovuuwa mmaati, khoona pinku efukuwiye na Rooho Ttakatthiifu yeettaka omwishukhela nkhamma jiwa. <sup>11</sup> Aphano khuta huula pinkuuni elupaka yoori: “Weeyo o mwanaka wa wuuphetu, na wookituvela channu.” <sup>12</sup> Nasaapiro, Rooho Ttakatthiifu khunthuula khunlawana n’yaara. <sup>13</sup> Nttumpho eekhalieemo siikhu arupayiini, eettaka ozayiniwa ti Epiliisi. Ye aari vakatthi wa nyama za ntthuttu, ila malayikha aari ovira anrumeyelaka Yinsa.

### *Yinsa onrutela Kalileya*

<sup>14</sup> Paata ya Yaahaya ofukeliwa, Yinsa khulankha khusala alawa Kalileya, alaleyaka hapari zooshapweya za Nluku, <sup>15</sup> alupaka yoori: “Wakathi wafiya, na ofwalume wa Nluku ori kharipu; mwitupwiye na mwikhupali hapari zooshapweya.”

### *Othawuliwa wa Maaswihaapa*

<sup>16</sup> Eettaka olawa alottaka shiini ya ntthatta la Kalileya, khuwoona attwi awiri Simawu na Antere, eeselelaka matthavi aya mpahari, mwaasa yoori aari anamajiya. <sup>17</sup> Yinsa khuwooza yoori: “Mwikilotte, kintta wuurettani wiiya anamajiya a atthu.” <sup>18</sup> Aphano nasaapiro khulikha matthavi aya khusala anlotta. <sup>19</sup> Eettaka olawa ethiipile, khumoona Yaakhumpa, mwaana wa Zepeteewu na ttwiye Yaahaya ari mmwaatiya alazelaka matthavi aya. <sup>20</sup> Khuwaakhuwela, nasaapiro khunlikha paapaya mmwaatiya vamote na anakhaazi awe khusala anlotta Yinsa.

### *Yinsa onimwiikara sheethwani*

<sup>21</sup> Paata ya toole, khulawa Kafwaranaawu. Noofiya saapatu khulawa osomisa nsinakooka. <sup>22</sup> Khusala awaatuvela masomi awe, maana aari owaasomisa nkhamma ntthu wawiiyana ofwalume na woohiiyi nkhamma

anamanozela a kano.<sup>23</sup> Aphano khuta nsinakooka mphule nlume aash-inttiweeyo ti sheethwani. Ye khusala akhuwa araka:<sup>24</sup> “Onnitakhelani fweeyo, Yinsa wa Nazareeti? Wata yoori onitapany? Kajuwa yoori weeyo o Ttakatthiifu wa Nluku!”<sup>25</sup> Ila Yinsa khunmaruwela araka: “Onyamale, oleemo mmwiili wa mwinyi otu!”<sup>26</sup> Aphano sheethwani khuntatha ntthu otule woohusutivo khusaruwa mmwiili mwawe eet-taka onyakula.<sup>27</sup> Athu ooshi khwiyya ooshanka mpakha khufiyelela wuuzelana atthaaporu yoori: “Niini epi zaya? Masomi mapheya antanaaye ofwalume! Mpakha onruma masheethwani yo khunshututela!”<sup>28</sup> Hapari epile monkoni wa ye khumwazeyela nasaapiru nti wooshi wa Kalileya.

*Owahi wa Yinsa vakatthi wa masheethwani na marati*

<sup>29</sup> Wakathi aliiyeemo nsinakooka, khulawa na Yaakhumpa na Yaahaya owawe Simawu na Antere.<sup>30</sup> Nkhewewe Simawu eettiye orapalela voolili, yaari onlwaza hooma, nasaapiru khuuziwa Yinsa.<sup>31</sup> Aphano ye khumwaattama, khunkhola nkhono khunlansa, nasaapiru hooma khumwiisha, khwaaza owaarumeyela.<sup>32</sup> Weettelaka oripa, paata ya otupweela njuwa, athtu khuwaathuula alwele ooshi na anamasheetwani khumweettisela Yinsa.<sup>33</sup> Atthu ooshi a nsitati mphule khukusanyeya vanlako wa nyuupa ethiitile,<sup>34</sup> ye khuwaavonisa awaatta aari ohoochiwaaye pi marati a wakhula nanna. Theenya khwiikara masheethwani awaatta. Ye khaari olkha masheethwani apale ottakhula, maana yo aari onjuwa paani Yinsa.

*Yinsa onlompa puuro yawiiththaaleyavo*

<sup>35</sup> Supuyeene, nalelo ohinache saana, Yinsa khulankha khusaruwa khulawa puuro yawiiththaaleyavo ohali aari olompaawo.<sup>36</sup> Simawu na ashirikhaawe khulawa omweekesa.<sup>37</sup> Nonsikana, khumuza yoori: “Atthu ooshi antta oweekesa weeyo!”<sup>38</sup> Yinsa khuwaajipu yoori: “Nlaweni ohali okinoko, miti naattamananiyeeyo, yoori kilawe kalal-eye, maana tithiito miiyo kiteeliyeeyo.”<sup>39</sup> Aphano ye khweetetteta Kalileya yooshi eettaka ofafusiri nsinakooka na wiikara masheethwani.<sup>40</sup> Namaharaja mmote khumwaattama na khunkokhorela khunvekela yoori: “Amana otakha onwahi okitwaharesha!”<sup>41</sup> Yinsa ari wawiitaala huruma, khookola nkhono awe khunsapa na khulupa yoori: “Kintakha. Wiye wootwahareshiwa!”<sup>42</sup> Nasaapiru maaharaja apale khwiyya omwiisha na ye khwiyya wootwahareshiwa.<sup>43</sup> Elottelanaka Yinsa khuwaaleeza na awaaleezaka woomaruwavo,<sup>44</sup> aphano Yinsa khumuza yoori: “Ohimuuze hatha ntthu, ila olawe, wanvekele haakhimu yoori awoone nkama wavona, arette twaha etile Munsa arumiyeeyo yoori wiiye oshaahiti.<sup>45</sup> Ila mwinyi otule khusala alawa na khwaaza olaleya vitthu epile na omwaza hapari. Mwaasa wa vitthu epile, Yinsa khuhisala awahi theenya weetta nsitati, ila khwiikhala othetekele puuro yawiiththaaleyavo. Khusala ata atthu wakhula phantte oteela okutthanana Yinsa.

## 2

*Ovonisiwa wa namarakala nti wa Kafwaranaawu*

<sup>1</sup> Paata ya siikhu vattithiiru, wakathi Yinsa aaruteliyeeyo theenya Kafwaranaawu, atthu khusiila elupiwaka yoori ye aari owawe.

<sup>2</sup> Aphano atthu awaatta khweetta ottuukhule, khwa nanna ya haariivo puuro hatha vamilako, na khusala awaatafusirela ntakhuzi la Nluku.  
<sup>3</sup> Khutavo atthu akina antiisiyeeyo ntthu aarinia supiyaani, athuuliwe pi alumbe wane. <sup>4</sup> Khuhisala awahi onfiisa aphale aariivo Yinsa mwaasa wa atthu waatta. Elottelanaka khulawa khutamula phantte ya liphala la nyuupa, khuphenyisavo nrepa opule arapaleliyeovo nasupiyaani.  
<sup>5</sup> Ooniyeovo amini etile aarinia, Yinsa khumuza nasupiyaani otule yoori: “Mwanaka, twampi zaho zaswaamihwa.” <sup>6</sup> Eekhaliye attaphale anamanozela a kano akina na khwaaza wuupuwela:  
<sup>7</sup> “Mwinyi otu ontakhula toowo mwaasa wa niini? Ontta okufuru! Anwahaaye oswaamihhi twampi ti paani, woohiiyi Nluku paasi?” <sup>8</sup> Yinsa nasaapiru khumweeleya nroho mwawe yoori zaari ethiipo epile yo aari wuupuwelaaye na khuwooza yoori: “Mwaasa aya niini mweeyo muupuwelaka vitthu epo nroho mwenu? <sup>9</sup> Etthu yookhwuya omuuza nasupiyaani titiivi, omuuza yoori: ‘Twampi zaho zaswaamihwa’ ama ‘Olankhe othuule nrepa lawo weettette?’ <sup>10</sup> Ila yoori mwijuwe yoori Mwaana wa Pinaatamu onaaye owahi wa oswaamihhi twampi” khumuza nasupiyaani <sup>11</sup> “Miiyo kiniuuza: Olankhe, othuule nrepa lawo olawe owawo.” <sup>12</sup> Wakathi otthuupule mwinyi otule khulankha ooniwaka pi atthu ooshi, khuthuula nrepa lawe khusaruwa. Yo khwiya ooshanka na khuntitthimisa Nluku, alupaka yoori: “Khaninoone vitthu nkhamma epi!”

### *Okhuweliliwa wa Matewuzhu Leevi*

<sup>13</sup> Yinsa khulawa theenya kharipu ya ntthatta. Atthu awaatta khumwaattama na khwaaza owaasomisa. <sup>14</sup> Eettaka ovira ethiipile, khumoona Matewuzhu mwaana wa Alufeyu eekhaliye ariphisaka lumpuru, khumuza yoori: “Okilotte.” Ye khulankha khunlotta.

<sup>15</sup> Wakathi wa ethu yoojiwa, Yinsa eekhaliye va meeza owawe Leevi. Vamote na anakhiyon i awe, na aarivo anamariphisa lumpuru awaatta na “anatwampi” maana atthu aari onlottaaye aari enkeene. <sup>16</sup> Anamanozela a kano apale amafwarizeewu amooniyeovo ajaka na “anatwampi” na anamariphisa lumpuru, khuwoozela anakhiyon i Yinsa yoori: “Mwaasa aya niini ye ajaka na anamariphisa lumpuru na anatwampi?” <sup>17</sup> Asiliyeovo vitthu epile, Yinsa khuwooza yoori: “Akumi khaninhithajya tothoro, ila apale anlwaziwaaye. Miiyo akateeliye owaakhuwela anashariya, ila anatwampi.”

### *Yinsa onuuzeliwa monkoni wa ofuka*

<sup>18</sup> Aphano anakhiyon i Yaahaya na mafwarizeewu eetta ofuka. Atthu akina khunteela Yinsa khusala amuuzela yoori: “Mwaasa aya niini anakhiyon i Yaahaya na amafwarizeewu ofuka, khi awo ahifukaka?”

<sup>19</sup> Yinsa khujipu yoori: “Enretteya toovi ofuka anamalaleywa harus, namaposa ari attapho? Khinwaheya, ari vamote na yo.” <sup>20</sup> Ila onteela ofiya siikhu mposi anteelaaye olaziwavo, siikhu zaya epo, anlawaa afuke. <sup>21</sup> Khina antthaaye yaapa pheeya kuwo yoovutta, maana yaapa etile pheeya enttela ofutthela kuwo yoovutta etepe othaala. <sup>22</sup> Khina antthaaye viinyu ntompwiyo ya shapala ya raku, amana aretta, viinyu entta ophutula ttompwiyo, waaza viinyu mpakha ttompwiyo zintta ohripweya. Ila mwitthe viinyu pheeya ntompwiyo ya shapala pheeya.

### *Mbwana wa saapatu*

<sup>23</sup> Saapatu moote, Yinsa eetta ovira nshini wa nshapa la tiriku. Eettaka olawa, anakhiyoni awe khwaaza ovulula phunje zaya. <sup>24</sup> Mafwarizeewu khumuuzela Yinsa yoori: “Oniwoona, mwaasa aya niini yo arettaka ethu enkhattaziwaaye orettiwa saapatu?” <sup>25</sup> Ye khuwaajipu yoori: “Mweeyo khamwinasome etile arettiyeeyo Daawuuda wakathi ye na ashirikha awe aakholiweeyo ti jala? <sup>26</sup> Wakathi wa haakhimu nwulu wa tiini Apiyataari, Daawuuda aaviriye Nnyupa wa Nluku khurafuna phaawu enkhiweeyo Nluku na khuwenkha ashirikhaawe, aariina ruhusa ya orafuna paasi aari anamalokozela a tiini.” <sup>27</sup> Aphano khuwooza yoori: “Saapatu yatiisiwa mwaasa wa anaatamu, ama anaatamu mwaasa wa saapatu. <sup>28</sup> Etthiipo, Mwaana wa Pinaatamu ti Mbwana hatha na Saapatu.”

### 3

#### *Mwinyi woorakala nkhono*

<sup>1</sup> Yinsa khurutela theenya nsinakooka, ntumphule aarimo mwinyi waarakaliyeeyo nkhono awe. <sup>2</sup> Atthu akina aari weekesa nanna ya onlokoveza Yinsa, yoori amoone nkhamma aari weettela ovonisa siikhu ya saapatu. <sup>3</sup> Yinsa khumuuzza mwinyi otule woorakala nkhono yoori: “Olankhe ote vakatthi apha.” <sup>4</sup> Aphano Yinsa khuuzela yoori: “Niini entakheliwaaye orettiwa saapatu, oretta yooshapweya ama yootakhala, wuusuru ama wuula?” Ila atthu apale nalelo khwiya oonyamala. <sup>5</sup> Yinsa khusala aweekesa ari wookatipukha na khuhituveliwi mwaasa wa wuuma rooho zaya na khumuuzza mwinyi otule yoori: “Wookole nkhono awo.” Ye khookola nkhono awe na khwiya woovonisawa. <sup>6</sup> Aphano mafwarizeewu apale khulankha na khwaaza owaza shawuri vamote na khuntti ya Herooti eekesaka nanna ya omuula Yinsa.

#### *Yinsa oneekesiwa pi atthu awaatta*

<sup>7</sup> Yinsa na anakhiyoni awe, khulawa mpakha ontthatta la Kalileya na nyumani wawe yaari ota khuntti khuluyeene ya nti wa Kalileya. <sup>8</sup> Wakathi asiiliyeovo vitthu zooshi aari orettaazo, atthu awaatta aari olankhaaye Yudeya, Yeruzaleemu, Itumeeya, akina akaapu wa muutto Yorotaani na apale a Tiiro na Sitooni khuta okuthanana ye. <sup>9</sup> Mwaasa wa khuntti khuluyeene etile, Yinsa khuwoza anakhiyoni awe yoori antthekezele mwaatiya yoori awerawere ophunyiwa. <sup>10</sup> Maana ye awaavonisiye atthu awaatta, khwa nanna ya apale aari olwaaziwaaye aari ofiyelalaaye osukhumana yoori apatthe onsapa. <sup>11</sup> Theenya masheethwani, amana amoona eetta onkokhorela omaasho wawe na onyakula araka: “Weeyo o Mwaana wa Nluku.” <sup>12</sup> Ila ye aari Owenkha oruma wookhomaala yoori ahinlupe paani yaya.

#### *Othawuliwa wa maaswihaapa khumi na awiri*

<sup>13</sup> Yinsa khuwela vakulu na khuwaakhuwela apale aari owaatakhaaye, apo aya khuta aphale aariivo. <sup>14</sup> Khuwaathawula khumi na awiri na khuwenkha nzina la maaswihaapa yoori eeye vamote na-ye na yoori ye awaarume olaleya, <sup>15</sup> na eeyane owahi wa wiikara masheethwani. <sup>16</sup> Apa pi apale khumi na awiri awathawuliyeeyo aari witthiwaaye yoori: Simawu, otule amwinkhiyeeyo nzina la Pheeturu; <sup>17</sup> Tiyaaku, mwaana wa Zepeteewu, na Yaahaya ttwiye, atthaapo aatthajiweeyo nzina la Buneerije, liriina maana a “Aana a

Ottitthima”; <sup>18</sup> Antere, Filipe, Barutulumeewu, Matewuzhu, Tome, Tiyaaku, mwaana wa Alufeyu, Tadeewu, Simawu Zelooti; <sup>19</sup> na Yuuda Eshikariyooote, otule ankholisiyeeyo Yinsa.

### *Okufuru wa anamanozela a kano*

<sup>20</sup> Aphano, ye khulawa owawe, khukusanyeya opheya khuntti khuluy-eene, khwa nanna ye na anakhiyon i awe aari woojelaavo oja. <sup>21</sup> Wakathi ajamaaze asiiliyeovo vitthu epile, khulankha khusala alawa onthuulawo, maana aari olupa yoori: “Ye eetta ovevereyea.” <sup>22</sup> Anamanozela a kano aalankhiyeeyo Yeruzaleemu aari olupa yoori: “Ye ti wooshinttiwa ti Epiliisi! Mfwalume wa masheethwani ti othuuto aniweekaranaaye masheethwani.” <sup>23</sup> Aphano Yinsa khuwaakhuwela khusala awaanozela nkattti wa milikaniso yoori: “Nanna-ni Epiliisi antakhaaye omwiikara Epiliisi? <sup>24</sup> Amana ofwalume mmote ojaawanya, khunwahi ojishintta otthuuporu. <sup>25</sup> Ama nyuppa amana ejaaawanya, theenya khinwahi wiikhala ethiitoru. <sup>26</sup> Na Sheethwani nkhamma ontta ojuumanana, na amana aawanyeya, khanlawa owahi wiiyavo na wafiya mwiisho wawe. <sup>27</sup> Weekhwhee khina anwahaaye ovira nnyuppa wa ntthu wookhomaala na khuthuula maali zawe aheetteeni onfuka khapula. Toowo ti anwahaaye omwiiyela nnyuppa mwawe.

<sup>28</sup> “Miiyo kiniwuuzani khweele yoori: Twampi zooshi na okufuru wooshi wa anaatamu onlawa waswaamihive, <sup>29</sup> ila otule ankufur-welaaye Rooho Ttakathiifu, khana nswammaha mileele, maana ona twampi ya mileele.” <sup>30</sup> Yinsa aalupiye mattakhuzi apa mwaasa wa yo aari olupa yoori: “Ona sheethwani.” <sup>31</sup> Elottelanaka, mamaawe na attwiize Yinsa khuta. Khwiilya vaje na khuruma okhuweliwa Yinsa. <sup>32</sup> Aarivo atthu awaatta eekhaliyeeyo aphale aariivo, na khuuziwa yoori: “Mamaawo na attwiizo ari vaje apho antta oweekesa.” <sup>33</sup> Yinsa khuuzela yoori: “Maama ti tuuvi, wala ttwiyyaku ti tuuvi?” <sup>34</sup> Aphano khuweekesa apale eekhaliyeeyo aphale aariivo na khuwooza yoori: “Apha owaapho maama na attwiizaku! <sup>35</sup> Otule anrettaaye matakhele a Nluku, ti eeyiye ttwiyyaku, nlupwaaka na maama.”

## 4

### *Nlikaniso wa Namazala*

<sup>1</sup> Yinsa khurutela osomisa kharipu ya ntthatta. Khutavo atthu awaatta aphale aariivo, khusala ahithajiya weetta nkalawa na eekhale nttumpho. Kalawa yaari mpahari, atthu ooshi khwiikhala nshini wa pahari. <sup>2</sup> Ye aari owaasomisa vitthu zawaatta nkattti wa nlikaniso, asomisaka khuri: <sup>3</sup> “Mwisiile! Namalima khulawa ozala. <sup>4</sup> Wakathi aari ozalaavo peewu, phantte kiina khukwela nshini wa tarikhi anyanyi khuta khuja. <sup>5</sup> Kiina khukwela vahali aariivo mawe, vahali laarivo nttophe vattitthiiru; nasaapiru khoottha, maana nttophe ntthile khaleechiye. <sup>6</sup> Aphano noopuwa njuwa khulukuza; maana khazaarinna mitathaari, khuuma. <sup>7</sup> Peewu kinoko khukwela vanyiwa, khuwula vamote na nyiwa, khurapeliwa pi nyiwa, khwa nanna zahawahiyeyo wiima mishumo. <sup>8</sup> Kiina khukwela vanshaka wooshapweya, khoottha, khuwula na khwiima mishumo zooshwapweya, talaathiini, siithiini na mpakha miya wakhula mmote. <sup>9</sup> Yinsa khwiishela alupaka yoori: “Otule ariina mashiilo, ti asile!”

### *Otaphuleliwa wa nlikaniso*

<sup>10</sup> Wakathi ye aari otthwe, anakhiyoni apale khumi na awiri na akinoko aari kharipu ya attaphale khumuuzela monkoni wa nlikaniso. <sup>11</sup> Ye khuwooza yoori: “Mweeyo mwenkhiwa ojuwa kano za ofwalume wa Nluku, ila apale ari oje, zooshi anuuuzaniwa nlikaniso, <sup>12</sup> yoori ‘hatha nkama oona ahijuwe, hatha nkama asiila ehiweeleye yoori ahizukulise rooho zaya aswaamiihiwa!’” <sup>13</sup> Aphano Yinsa khuwoozela yoori: “Mweeyo khuniweeleyani nlikaniso opu, nanna-ni onteela oweleyani epi mikina? <sup>14</sup> Namazala onzala ntakhuzi. <sup>15</sup> Atthu akina ari nkama peewu eriiye nshini wa tarikhi, nhali lizaliweemo ntakhuzi. Paata ya osiila, Epiliisi onta, khulazavo ntakhuzi ntthile nroho mwawe. <sup>16</sup> Akina, ari nkama peewu ezaliweeyo vahali wawiiyavo mawe, an-silaaye ntakhuzi NASAAPIRU khupwekherela na furaha. <sup>17</sup> Ila paata ya wakathi vattitthiiru, atthu aya apo anlawa akathale hapari maana kharetteeni wiiya nchina laya, amana ziwaapattha tafwawuthi ama lupattha mwaasa wa mattakhuzi apale antta wanswi. <sup>18</sup> Theenya akina anlattanana na peewu ezaliweeyo vakatti wa mwiiwa. Apo ansiila hapari, <sup>19</sup> ila, amana ziwaapuwelelaka tafwawuthi za olumwenku opu, tuvela za maali na otakha nkina, vitthu zaya epo enshawa ntakhuzi na epo zaya khaziniimisa mishumo. <sup>20</sup> Awaapho theenya atthu akina, anlikananaaye peewu ezaliweeyo nti wooshapweya. Apo aya ansiila ntakhuzi khukhupalela na khuttheerisa talaathiini, siithiini na mpakha miiya khwa etile aazaliyeeyo.”

### *Nlikaniso wa likhompe*

<sup>21</sup> Ye khuwooza yoori: “Paani anckozaaye khantteya yawe khutta n’yuuku ama nlivuku? Olikha toowo khampweha vahali wa-wooneyavo? <sup>22</sup> Maana khayiivo hatha ethu moote ya siiri, ehinttelaaye wiiya payana na khayiivo moote yoovithiwa ehinttelaaye oviththuliwa. <sup>23</sup> Nkhama ntthu onaaye mashilo oosila, asile!” <sup>24</sup> Aphano, khuwooza yoori: “Phoole na epile mwinsilaaye. Na mphimo otthuupo mwinttelaaye owaaphimela azeenu, mwinttela ophimeliwa otthuupo, na theenya mwinkeene mwinlawwa mwekezelawi. <sup>25</sup> Otule ariina, onlawa eekezelawi; ila otule ahina hatha etile vattitthiiru ariinaaye ontta onyakanyiwa.”

### *Nlikaniso wa Peewu*

<sup>26</sup> Ye khurutela olupa yoori: “Ofwalume wa Nluku ori nkama ntthu anzalaaye peewu yawe vathi. <sup>27</sup> Hatha nkama eetta olankha, ama hatha nkama eetta olala, yo zinoottha na zinwula, ye woothiwi nanna erettikhaniyeeyo. <sup>28</sup> Otthuupo oniima mishumo zaya: yamwanzo nyaani, elottelanaka ntathi, mwiisho, phunje zawiitaala va ntathi. <sup>29</sup> Amana peewu ekhomaala, ntthu onttela othuula eesu, maana wafiya wakathi wa wuurrula.”

### *Nlikaniso wa phunje ya samuli*

<sup>30</sup> Yinsa khurutela olupa theenya yoori: “Ofwalume wa Nluku onlatanana niini? Nlikaniso-ni ninttelaaye orumeyela yoori nitchoonyeze? <sup>31</sup> Ori nkama phunje ya samuli, etile yiyyiye phunje yootepa opushuwa vathi apha. <sup>32</sup> Ila, paata ya ozala, zintta owula channu, zayita mathapa ooshi.” <sup>33</sup> Khwa milikaniso zooshi zoolattana, Yinsa aari owooga monkoni wa ntakhuzi, nanna aari owahaaye oweeleya. <sup>34</sup> Khaari

owooza hatha etthu ahirumeyeleeni nlikaniso, ila amana eeya na anakhiyoni awe paasi, eetta owoozaka zooshi.

### *Yinsa onnyamaza pheevo*

<sup>35</sup> Siikhu etile, weettelaka oripa, Yinsa khuwooza anakhiyoni awe yoori: "Nlaweni kaapu kiina." <sup>36</sup> Paata ya osusa khuntti etile, yo khupakhira nkalawa mphule aariimo Yinsa. Na kalawa kiina zeetta owaaperekha. <sup>37</sup> Khwaaza ovuma pheevo yookhomaala, na maw-ipi khusala apiya kalawa yaya khwa nanna aari wiitaalaamo maati. <sup>38</sup> Yinsa aarettiye eettaka olala sheezi aphiteeziye nsaawu. Aphano anakhiyoni awe khunlansa na khumuuzo yoori: "Mwaaliimu, khinujali fweeyo nifwaka?" <sup>39</sup> Yinsa khulankha khunyamaza pheevo na khuuzu pahari yoori: "Otthe nreke! Onyamale!" Pheevo khunyamala na zooshi khwiya zawiitthaala. <sup>40</sup> Aphano khuwoozela anakhiyoni awe yoori: "Mwaasa aya niini moovaka toowo? Nalelo khamwina amini?" <sup>41</sup> Anakhiyoni apale ari awoova channu, khusala oozana yoori: "Tipaani otu aya, anshututeliwaaye ti pheevo na pahari?"

## 5

### *Ovonisiwa wa namasheethwani*

<sup>1</sup> Yo khulokha pahari, khufiya Jerazeenu. <sup>2</sup> Wakathi Yinsa apakhuwiyevo nkalawa, mwinyi mmote aariina sheethwani khusaruwa nvilalo khuta attaaphale. <sup>3</sup> Mwinyi aya oto aari wiikhala nvilalo, khina mmote aari owahaaye onkhola, hatha ari ntthentte. <sup>4</sup> Maana swaafu za-waatta aari wiiya ntthentte moolu awe na makhono awe, ila ye eetta opwechaka tthentte yaya na ovuja zuuma zaari otthiwaaye mmoolu mwawe. Khaarivo ntthu wookhomaala aari owahaaye onshintta. <sup>5</sup> Osikhu na nthana ye aari weettetaka nvilalo na nnyaako na ojishija na mawe. <sup>6</sup> Wakathi amooniyeevo Yinsa ari peetiwene, khutthira khulawa khukokhora omaasho wawe. <sup>7</sup> Khukhuwa na huula yawe yooshi araka: "Onikitakhelani miyo, Yinsa mwaana wa Nluku Nwulu? Kinuvrekela khwa Nluku yoori ohikoopopise!" <sup>8</sup> Maana Yinsa aamuuziye yoori: "Oleemo mmwiili wa mwinyi otu, sheethwani." <sup>9</sup> Aphano Yinsa khumuuzela yoori: "Nzina lawo enriwa paani?" Khujipu yoori: "Nzina laka enriwa khuntti, maana niri awaatta." <sup>10</sup> Khusala anvekela wonkhanyarelavo yoori ahiwaarume olaamo mmuti mwaya mphule. <sup>11</sup> Liphanko liwululene la kuluwe laari oshukisiwaaye kharipu ya mwaako. <sup>12</sup> Masheethwani apale khusala anvekela Yinsa yoori: "Onirume yoori neette nkuluwe mphule." <sup>13</sup> Yinsa khwinkha ruhusa masheethwani apale, khusaruwa khweetta nkuluwe. Liphanko laarina thamani ya alufu piiri za kuluwe, khwaaza otthira zilankhaka omwaako ziishukhelaka mpahari, zooshi khuzama khufwa. <sup>14</sup> Apale aari oshukaaye kuluwe zaya epile, khutthira khulawa olupa vitthu epile zaarettikhaniyeeyo waaza nsitati mpakha mmashapa, atthu khulankha olawa woona epile zaarettikhaniyeeyo. <sup>15</sup> Wakathi amwaattamiyeyo Yinsa, khumoona mwinyi otule aamwitaliyeyo masheethwani awaatta, eekhaliye awaliye saana na athiiyemu akhili zawe, atthu apale khwiya awoova. <sup>16</sup> Apale aari attaaphale, khuwooza atthu zooshi epile zaarettikhaneliyeyo mwinyi otule aariina masheethwani, na theenya khulupa monkoni wa kuluwe. <sup>17</sup> Aphano atthu apale khusala anvekela Yinsa yoori aleemo mmuti mwaya mphule. <sup>18</sup> Wakathi Yinsa aari

owelaaye nkalawa, mwinyi otule aariina masheethwani khunvekela Yinsa yoori anlikhe alawe na ye.<sup>19</sup> Yinsa khuhinkhupaleli, ila khumuza yoori: "Olawe owawo wawuuze ajamaazo zooshi epile Mbwana ooreteliyeeyo na tthakaraka awooneliyeeyo."<sup>20</sup> Aphano, mwinyi otule khulawa na khwaaza olupa nti wa Tekapoliishi etile Yinsa anretteliyeeyo. Atthu ooshi khwiya ooshanka.

*Owahi wa Yinsa monkoni wa marati na ofwa*

<sup>21</sup> Yinsa khupakhira theenya nkalawa alokhelaka kaapu kiina, khuntti khuluyeene khuta khwiitaala aphale aariivo Yinsa nshini wa ntima. <sup>22</sup> Aphano khuta attaaphale namalokozela mmote wa nsinakooka aari wiithiwaaye Yaayiru, amooniyeevo Yinsa, khukokhora nshini wa moolu awe. <sup>23</sup> Khunvekela wookhanyarelavo yoori: "Mwanaka wankha onsaleela ofwa! Safwatatali ote, wanttheele makhono yoori eeye woovona na eeye haayi. <sup>24</sup> Yinsa khusala alawa vamote na-ye, khuntti khuluyeene khusala enlotta na omphunya.

<sup>25</sup> Attaaphale, aarivo muukha aariina nyaakha khumi na miwiri eet-taka ohoowa mwaasa wa omwiittikha taamu. <sup>26</sup> Ye ahoowiye channu khwa oweekesa anamavonisa na khuharipu nzurukhu awe wooshi aariina, oligha ovona khusala eetta wootepa. <sup>27</sup> Asiiliyeeyo ovuwa wa Yinsa, khuta nyuma wawe vahali wawaattiwavo na khusapa ajapi yawe. <sup>28</sup> Maana aari wuupuwela yoori: "Miiyo kisaparu paasi ajapi yawe, kintta ovona." <sup>29</sup> Nasaapiru yeetta oligha wiittikha taamu etile na muukha otule khoona yoori mmwiili mwawe aari wootaphuliwa ohoowa opule. <sup>30</sup> Wakathi otthuupule, Yinsa khoona yoori wansaruwa owahi, khuzukuluwa khweekesa khuntti etile khuuzela yoori: "Paani asapiyeeyo ajapi yaka?" <sup>31</sup> Anakhiyoni awe khujipu yoori: "Woonaka khuntti khuluyeene eti ekusanyeyiyeeyo, khusala wuuzela yoori: 'Paani akisapiyeeyo?'" <sup>32</sup> Ila Yinsa nalelo khusala eekesaka vakatthi wa khuntti etile yoori amoone otule aarettiyeeyo ethu yaya etile. <sup>33</sup> Aphano muukha otule, ajuwiyeeyo ethu yaarettikhaniyeeyo, khumwaattama khukokhora nshini wa moolu awe eettaka othukumela mwaasa wa woova, khulupa haakhi yooshi. <sup>34</sup> Yinsa khumuza yoori: "Mwanaka, amini yawo yoovonisa. Olawe na heeri, na wiiye wootaphuliwa ohoowa wawo."

<sup>35</sup> Nalelo Yinsa eettaka ottakhula, khutavo atthu a owawe Yaayiru, namalokozela wa nsinakooka khumuza yoori: "Mwanawo afwa. Khinbihajiya onwuti theenya Mwaaliimu!" <sup>36</sup> Yinsa khumuza namalokozela wa nsinakooka mphule yoori: "Ohoove; okhupali paasi." <sup>37</sup> Na khuhinlikhi hatha ntthu onlotta, woohiiyi Pheeturu, Tiyaaku na Yaahaya ttwiyye Tiyaaku. <sup>38</sup> Wakathi afiyeeyo owawe namalokozela wa nsinakooka, Yinsa khoona tafwawuthi na atthu eettaka olila na ojiliza na huula ya onyakula. <sup>39</sup> Yinsa khuvira nnyupa na khuuzela yoori: "Tafwawuthi yaya eti ti-ya niini na mwinjilzelani? Mwaana khafweeni, ontta olala." <sup>40</sup> Ila ooshi khwaaza ontheya Yinsa. Ye khurumisa yoori aleemo ooshi, khunthuula papaaawe na mamaawe mwaana na anakhiyoni awe apale aariina na khulawa aphale aariivo mwaana. <sup>41</sup> Khunkhola nkhone awe khuri: "Talitha cumi!" liriina maana a "Mwanankha, miiyo kinuuruma yoori olankhe!" <sup>42</sup> Nasaapiru mwanankha otule, aariina hirimu ya nyaakha khumi na miwiri, khulankha na khwaaza weettetta. Ooshi aariivo khwiya ooshanka. <sup>43</sup> Ila Yinsa khuwooza woosileyavo

yoori: Ahiiyeko hatha ntthu anttelaaye ojuwa, na khuruma winkhiwa etthu-yoojiwa.

## 6

### *Napiyu mmote wootarawiwa*

<sup>1</sup> Yinsa khulaawo okhule waya, khweetta sitati ya owawe, anakhiyon'i awe khusala amperekha. <sup>2</sup> Noofiya saapatu, khwaaza osomisa nsinakooka, awaatta aari onsiilaaye khwiyya ooshanka, alupaka yoori: "Zininlankha vayi vitthu zaya epi?" 'Ojuwani opu enkhiweeyo? Na onretta toovi minjuza? <sup>3</sup> Khahiy'o kalapinteero otu, mwaana wa Mariyamu, ttwiyye Tiyaaku, Yuusufu, Yuuda na Simawu! Alupuwe khari nttumphu!" Khwiyya awiiphiriwa ti Yinsa. <sup>4</sup> Yinsa khuwooza yoori: "Mmuti mwawe, vakathi wa ajamaaze na vaje vawe pi attaapho napiyu ahinshitahiwaavo." <sup>5</sup> Ye khawahiye oretta minjuza Nazareeti, woohiyyi owaavonisa alwele akina khwa owaattheela makhono. <sup>6</sup> Khwiyya wooshanka mwaasa wa othowawo amini okhule waya. Yinsa khuvira asomisaka miti zaattameliyeeyo ottuukhule.

### *Yinsa oniwaaruma anakhiyoni awe khumi na awiri*

<sup>7</sup> Khuwaakkhuwela anakhiyoni awe apale khumi na awiri, khuwaaruma awiri khwa awiri na khuwenkha owahi wa wiikara masheethwani. <sup>8</sup> Khuwaaruma yoori: "Mwihithuule hatha ethtu, yohiiyi pakhora, khamwaarina ya othuula etthu-yoojiwa wala kaapiyaka wa safwari na nzurukhu. <sup>9</sup> Mwiwale jampali, ila mwihithuule nkhumi wa phiiri. <sup>10</sup> Amana mwifiya nyuupa moote, mwiyye attaapho mpakha siikhu mwinttelaaye olaavo. <sup>11</sup> Na miti mikinoko amana zihuupwekhereleni na khuhuusiilini, mwitatthe lifufu la mmoolu mwenu mwilaakamo, nkhama oshaahiti vakathi vaya." <sup>12</sup> Yo khulawa na khulaleya atthu yoori athupwiye. <sup>13</sup> Yo aari wiikara masheethwani awaatta na owaavaaza mafuttha mmwishwa mwaya na owaavonisa alwele awaatta.

### *Ofwa wa Yaahaya Namoosa*

<sup>14</sup> Mfwalume Herooti khusiila elupiwaka hapari epile, maana nzina la Yinsa laajuwiwe saaneene. Atthu akina khwaaza olupa yoori: "Yaahaya Namoosa eetta osisimuwa muufwa! Tiito zinrettikhanaaye minjuza zootikinisa khwa ye." <sup>15</sup> Akina aari olupa yoori: "Ye ti Aliyaasi." Akinoko khusala olupa araka: "Ye napiyu, nkhama manapiyu apale a raku." <sup>16</sup> Ila Herooti wakathi asiiliyeevo vitthu epile, khuri: "Yaahaya, mwinyi kinshijiyeyo, asisimuwa muufwa!" <sup>17</sup> Maana Herooti aarumiye yoori akholiwe Yaahaya, afuke-liwe nkalapooso, mwaasa wa Herootiyya, muukha wa Filiipe ttwiyye, othuuto anraliyeyeo. <sup>18</sup> Mwaasa wa Yaahaya aari omuuza Herooti yoori: "Khahi halaali weeyo onrala muukha wa ttwiyo." <sup>19</sup> Herootiyya aarina katapu khwa Yaahaya, khusala atakha omuula, ila khuhisala awahi oretta, <sup>20</sup> mwaasa Herooti aari omoova Yaahaya na aari omwi-inanelia, maana aari ojuwa yoori ye mwinyi wa shariya na ttakathif. Amana ansiilaka, eetta oshanka; khwa ethhiipo waari ontuvela onsiila. <sup>21</sup> Omwiisho Herootiyya khupattha kiphenyo siikhu ya oretta mwaakha Herooti. Khuretta njampo Herooti na anamalokozela awe awulu, attunkhulu a anajanka na ooshi apale eeyiye afwalume a nti

wa Kalileya.<sup>22</sup> Wakathi mwaana wa Herotiiya aviriyeeyo khwiina, khuntuvela Herooti na apale awaakharipushiyeyo. Mfwalume khumuza mwanankha otule yoori: "Okivekele wakhula etile ontakhaaye kintta owinkha".<sup>23</sup> Khumwaahiti khwa olapha yoori: "Wakhula onikivekelaaye, kintta owinkha, mpakha phantte ya ofwalume aka."<sup>24</sup> Mwaana otule khusaruwa khumuza mamaawe yoori: "Kiveke niini?" Mamaawe khunjipu yoori: "Oveke eeshwa ya Yaahaya Namoosa."<sup>25</sup> Nasaapiru mwanankha otule khwaakuva khulawa wa mfwalume khuveka yoori: "Kintakha mwikinkhe nasaapi eeshwa ya Yaahaya Namoosa mparathu."<sup>26</sup> Mfwalume khwiya woohuzunika channu, ila mwaasa wa olapha opule aalaphiyeeyo na wa apale awaakharipushiyeyo, khuhiwahi okatthala etile avekeliweeyo ti mwanankha otule.<sup>27</sup> Nasaapiru khunruma najanka khumuza ontisela eeshwa ya Yaahaya Namoosa. Ye khulawa okalapooso, khushija eeshwa ya Yaahaya Namoosa.<sup>28</sup> Khuttha mparathu khumwinkha mwanankha otule na ye khumwinkha mamaawe.<sup>29</sup> Noosiila hapari epile anakhiyoni a Yaahaya namoosa, khuta khuthuula mwiili awe khulawa khuzikha.

### *Yinsa oniwaajisa alume alufu thaanu*

<sup>30</sup> Maaswihaapa khurutela aphale aariivo Yinsa khumuza zooshi arettiyeego na asomisiyeeyo.<sup>31</sup> Aarivo atthu awaatta aari otaaye na olaavo, paata ya Yinsa na anakhiyoni awe woona yoori khaarina kiphenyo ya oja. Ye khuwooza yoori: "Mwite nilawe puuro yawiithaleya navumule vattithiiru."<sup>32</sup> Aphano yo khulawa nkalawa mpakha puuro yawiithaliye.<sup>33</sup> Atthu awaatta khuwoona alawaka paata ya owaajuwa. Atthu a miti zooshi za ottuukhule, khutthira khufiyawo yo ahinafiye.<sup>34</sup> Eeshukhaka nkalawa Yinsa, khoona khuntti khuluy-eene ya atthu, khuwoonela huruma, maana aari nkhamma pwittipwitthi zoohiina makhampuzi. Aphano khwaaza owaasomisa vitthu zawaatta.<sup>35</sup> Weettelaka oripa, anakhiyoni awe khunsusela khumuza yoori: "Puuro eti ti yawitthaaleya, na waripa."<sup>36</sup> Owaamwaze atthu apa yoori alawe mmashapa na miti epile naattamiyeeyo yoori oozanye ethu yoojiwa aje."<sup>37</sup> Ila ye khuwaajipu yoori: "Mwiwenkhe mweeyo ena ethu yoojiwa." Yo khumuza yoori: "Atthu apa yoori aje, ninhithajiya miiya piiri za nzurukhu wa feeta!"<sup>38</sup> Yinsa khuuzela yoori: "Mwina phaawu kavi? Mwilawe moone." Anakhiyoni apale khulawa khoona khujipu yoori: "Ninaaye phaawu thaanu na swi piiri."<sup>39</sup> Aphano, Yinsa khuwaaruma yoori ooshi eekhale, khuntti khwa khuntti va nyaani piishi<sup>40</sup> Khuretta ethiipo khwaawanyeya khwa khuntti ya miiya na khuntti ya hamusiini.<sup>41</sup> Athuuliyeovo phaawu epile thaanu na swi piiri khweekesa pinkuuni khuparikhya. Nawiisha khumeya phaawu epile khuwenkha anakhiyoni awe yoori awaawanyeze atthu apale. Theenya khuwaawanyeza swi epile piiri ooshi aya.<sup>42</sup> Ooshi khuja khurupala,<sup>43</sup> na anakhiyoni khulokothela khwiitaala khelenke khumi na piiri za nyeenye za phaawu na za swi.<sup>44</sup> Atthu aajiyeyo aari alufu thaanu alume ene.

### *Yinsa oneettetta vatulu wa maati*

<sup>45</sup> Elottelanaka, Yinsa khuwaaruma anakhiyoni awe yoori awele nkalawa alokoze Betezayiita phantte ya kaapu ya ntthatta, wakathi ye asaliyeeyo aleezananaaka atthu.<sup>46</sup> Paata ya oleezanana, khuwela

vakulu yoori alompe. <sup>47</sup> Weettelaka oripa, kalawa yaari vakatthi wa pahari na Yinsa aari othwe vathi. <sup>48</sup> Ye khuwoona anakhiyoni awe afutthaka kaafi woovelavelavo, maana eetta wiinyula pheeve. Lifwajiri, Yinsa khulawa aphale aariivo eettettaka vatulu wa pahari, khusala asaleela owaavikana. <sup>49</sup> Wakathi amooniyeevo eettettaka vatulu wa pahari, khusala amoona nkhama nshitapehe, aphano khusala anyakula. <sup>50</sup> Maana ooshi aamoniyeeyo aari oosuthuwa. Ila Yinsa nasaapiru khuwooza yoori: “Mwiminyale! Ti miiyo! Mwihoove!” <sup>51</sup> Aphano Yinsa khuwela nkalawa khwiya vamote na anakhiyoni awe, na pheeve khunyamala, na yo khwiya ooshanka, <sup>52</sup> maana khazaaweleyiye minjuza za phaawu. Rooho zaya zaari zookhomaala.

### *Yinsa oniwaavonisa alwele a Jenezare*

<sup>53</sup> Paata ya olokha pahari, khufiya Jenezare, ottuukho khufukelela kalawa yaya. <sup>54</sup> Wakathi apakhuwiyeovo atthu khunjuwa Yinsa. <sup>55</sup> Yo aari ovira azukulelaka nti wooshi opule, na owaathuula alwele aya va nrepa awaalawanaka ohali aari osiilaawo yoori Yinsa ori ottuukho. <sup>56</sup> Wakhula vhali aari weettaawo, mmamuti, nsitati ama mmashapa, aari othuuliwaka alwele na olawaniwa mparasa. Noovekeliwa yoori nenkawu awahi osapa nshaka la ajapi yawe; maana ooshi apale aari osapaaye aari wiiya oovona.

## 7

### *Yinsa vakatthi wa zowera za Eyahuuti*

<sup>1</sup> Mafwarizeewu na akina anamanozela a kano alankhiye Yeruza-leemu khukusanyeya na Yinsa. <sup>2</sup> Khusala awoona anakhiyoni awe akina eettaka oja na makhono aharaamu, enlupaaye yoori khanaweeni. <sup>3</sup> Mafwarizeewu na mayaahuuti ooshi khanja ahinaweeni wotwahareshiwavo, allottelaka zowera za attunkhulu a tiini. <sup>4</sup> Amana aruti oparasa, khannja ahaazeeni woosa makhono aya khpula. Anthokorela masomi makina a waatta, nkhama woosa pilawuri, mirinki, zoopo za malaatha na moolili. <sup>5</sup> Aphano mafwarizeewu na anamanozela a kano khumuuzela Yinsa yoori: “Mwaasa aya niini anakhiyoni awo ahilottelaka zowera za attunkhulu a tiini, khusala aja ahinaweeni?” <sup>6</sup> Ye khuwaajipu yoori: “Manaafikhi! Ezaaya ahupiri saaneene monkoni weenu mweeyo nkhama ethiipo yaatikhieeyo yoori: ‘Atthu apa anikishitahi na malimi, ila rooho zaya ziri peetiwene na miiyo. <sup>7</sup> Anikaaputu mahala na ansomisa mwentto wa oruma wa eenaatamu. <sup>8</sup> Mweeyo mwintarawu mirumo za Nluku na khusala mwilottela zowera za enaatamu. <sup>9</sup> Yinsa khwiishelana awoozaka yoori: “Mweeyo mwinnekesa yoori mwitthe othetekele mirumo za Nluku mwaasa wa os-hututela masomi enu! <sup>10</sup> Maana Munsa alupa yoori: ‘Onshitahi pa-paawo na mamaawo,’ na ‘antakhaaye onlaani papaaawe na mamaawwe ona ya ohukhumweliwa ofwa.’ <sup>11</sup> Ila mweeyo mwinkhupalela yoori amana nthu amuuza papaaawe ama mamaawwe yoori: Wakhula ethu kiniwinkhaanini miiyo zaakha ya omwinkha Nluku,’ <sup>12</sup> khwa nanna eto mwiwerawere ojikhanyarela omwaawuni papeenu na mameenu. <sup>13</sup> Toowo mweeyo khamwinttha fwayita nttakhuzi la Nluku, khwa opati-lana zowera zinlankhaaye wa paapa khwa aana aya. Na mwinretta vitthu zawaatta nkhama ethiipi.

<sup>14</sup> Yinsa khuwaakharipusha theenya atthu apale khuwooga yoori: "Mwikisiileze mooshi na eweeleyeni epi saana yoori: <sup>15</sup> khina ethu moote ya oje wa pinaatamu enraaye nonvira khunttha oharaamu, ila epile zininlankhaaye nroho mwawe ti eninharamushaaye. <sup>16</sup> Nkhama ntthu onaaye mashiilo oosiila ti asiile! <sup>17</sup> Paata ya owaalikha atthu apale olawa owaya, anakhiyoni khunvekela yoori awooze maana a nlikaniso aya opule. <sup>18</sup> Yinsa khuwoozela yoori: 'Kiri na mweeyo khiniweeleyani? Yoori khina etthu moote eninviraaye pinaatamu eninharamushaaye? <sup>19</sup> Maana khineetta nroho mwawe, ila mwijijohojoho mwawe, nawiisha khwiithiwamo.' Khwa ethiipo mattakhuzi apale, Yinsa khutukhuru ottha wiiya halaali vitthu zooshi. <sup>20</sup> Khurutela olupa yoori: "Etile eninsaruwaaye pinaatamu ti eninharamushaaye. <sup>21</sup> Maana nrooho ti, enlakhaamo zauwupuweliwa zootakhala, oshawi akhapa, wiiya, wuula, <sup>22</sup> oraruwa, okhwiririwa, vitthu zootakhala, ohata, oralana woohiiyi wa halaali, nrima, waapa, ojoona na ololo. <sup>23</sup> Zootakhala zooshi zinlankha nroho wa ntthu na piitthiipo zininharamushaaye pinaatamu."

### *Waamini wa muukha mmote weeletto*

<sup>24</sup> Yinsa khulaawo okhule waya khulawa phantte ya Tiiro na Sitooni, khweetta nyuupa yaya eto na khaatakhiye ojuwiwa ti ntthu, ila khuhiwahi ojittha sirini. <sup>25</sup> Ila nasaapiru muukha mmote, aarina mwanawewe wa nnatti ariina sheethwani, asiiliyeevo monkoni wa ye, khuta khukokhora nshini wa moolu a Yinsa. <sup>26</sup> Muukha otule aari nkereeka ya siiro-fineesiya aavokoliweewo, khusala anvekela Yinsa yoori amwikare sheethwani otule aari mmwiili wa mwanawewe. <sup>27</sup> Ila Yinsa khumuza yoori: "Owaalikhe klapula aana aje arupale. Khahi yoolotteya oihuula phaawu ya aana khuwenka anapwa." <sup>28</sup> Muukha otule khujipu yoori: "Khweele, Mbwana aka, ila hatha anapwa, annja tathela vathi wa meeza eniwaakwaayo asimaana. <sup>29</sup> Aphano ye khumuza yoori: "Mwaasa wa nanna ojipwiyeego, weeyo, etta; sheethwani ansaruwa mwanawo." <sup>30</sup> Muukha otule khurutela owawe na khunsikana mwanawewe arapaleliye voolili, sheethwani otule anlikhiye.

### *Yinsa oninvonisa ntthu woohittakhuli na woohisiili*

<sup>31</sup> Elottelanaka, Yinsa khulankha mmuti mphule wa Tiiro na khulokha Sitooni mpakha ntthatta la Kalileya nti wa Tekapolishi. <sup>32</sup> Aphano khutiseliwa mwinyi mmote woohisiili na wookukuma, khunvekela yoori anttheele makhono ye. <sup>33</sup> Yinsa khunlazavo vakatthi wa atthu apale awaatta na khunttha zaala omashiilo wawe. Elottelanaka khutthema na khusapa nlimi la mwinyi aya otule. <sup>34</sup> Aphano khweekesa otulu, khwiitha phuumu na khumuza mwinyi otule yoori: "Efata" enlupaaye yoori: "Ofunule." <sup>35</sup> Wakathi otthuupule mashiilo a mwinyi otule khufunuwa na nlimi lawe khuveya, ye khwaaza ottakhula woohiina tafwawuthi. <sup>36</sup> Yinsa khuwooga yoori ahimuze hatha ntthu. Ila oligha toowo, khwa nanna aari owaakhattazaavo, yo aari otepa olaleya. <sup>37</sup> Atthu ooshi aari osilaaye aari wiiya ootikiniwa channu na khusala alupa yoori: "Ye onretta vitthu zooshi saana, mpakha oniwaattakhulisa apale ohittakhuli na owaasiilisa ananhisiili."

<sup>1</sup> Ziviriyeovo siikhu vattithiiuru, atthu akina awaatta khukusanyeya vamote na Yinsa. Mwaasa wa atthu apale khaarina etthu yoojiwa, khuwaakhuwela anakhiyoni awe khuwooza yoori: <sup>2</sup> “Kiniwoonela hurredum aathu apa, maana ana siikhu ttatthu ari vamote na miiyo na khana hatha etthu yoojiwa. <sup>3</sup> Amana miiyo kiwooza olawa owaya najala zaya, yo antta okwa ntarikhi maana akina alankha peetiwene. <sup>4</sup> Anakhiyoni awe khujipu yoori: “Vayi khwa puuro eti niriiyo ya wiitthaleya ntthu anwahaaye opattha phaawu zoofiyela oja atthu apa?” <sup>5</sup> Yinsa khuuzela yoori: “Mweeyo mwina phaawu kavi?” Yo khujipu yoori: “Sapa.” <sup>6</sup> Ye khuwaaruma atthu apale yoori eekhale vathi. Elottelanaka khuthuula phaawu epile sapa, khunshukhurwela Nluku, khumeya khuwenkha anakhiyoni awe yoori awawanyele atthu apale. Yo khuretta ethiipile, <sup>7</sup> Aarina theenya swi kiina ttiitthittiithi, khuthuula, khuparikhya na khuwooza anakhiyoni awe yoori awawanyele atthu apale. <sup>8</sup> Atthu apale khuja mpakha orupala. Na khukusanya nyeeny zaasaliyyeeyo khwiitaala khelenke sapa. <sup>9</sup> Aarivo thamani ya atthu alufu nne, khuleezanana. <sup>10</sup> Nasaapiru khweetta mmwaatiya na anakhiyoni awe khusala alawa nti wa Talimanuuta.

### *Mafwarizeewu anveka alama moote*

<sup>11</sup> Mafwarizeewu khuta na khwaaza omuuzela Yinsa yoori amoone, na khunvekela alama ya pinkuuni. <sup>12</sup> Ye khusisimira nkaththi-nkaththi na khuri: “Mwaasa aya niini khapila eti ekekaka alama moote ya minjuza? Miiyo kinhakikhi yoori hatha alama moote khanlawa winkhiwa.” <sup>13</sup> Aphano khuwaalikha apale aya, khurutela nkalawa khusala alawa phantte kiina.

### *Othowelelisana wa mafwarizeewu*

<sup>14</sup> Anakhiyoni apale eettiye osahawu othuula phaawu, aarina phaawu moote paasi nkalawa. <sup>15</sup> Yinsa khuwooza yoori: “Mwijeekesele na mwiiyane phoole na fwaramento za mafwarizeewu na ya Herooti.” <sup>16</sup> Yo khusala akheetisana araka: “Mwaasa aya woohiina phaawu.” <sup>17</sup> Yinsa ajuwiyeovo yoori antta okheetisana, khuwooza yoori: “Mwaasa aya niini mwinkhetisanaka monkoni wa ohiina phaawu? Nalelo khiniweleyani wala khamwinskiila? Rooho zenu mweetta wuumisa? <sup>18</sup> Mweeyo mwinaaye maasho ila Khamwinoona, mwinaaye mashiilo ila khamwinskiila, hatha khamwinfikhiri? <sup>19</sup> Wakathi opule kaameyiyeeyo phaawu khuwenkha atthu apale alufu thaanu, khelenke kavi za nyeeny za-saliyeeyo?” Anakhiyoni apale khujipu yoori: “Khumi na piiri.” <sup>20</sup> Khi wakathi opule kaameyiyeeyo phaawu sapa yoori kiwenkhe atthu apale alufu nne, zaasaliye khelenke kavi za nyeeny mwaakhupeliyeeyo? Anakhiyoni khujipu yoori sapa. <sup>21</sup> Ye khuwooza yoori: “Mweeyo nalelo khiniweleyani?”

### *Ovonisiwa wa ntthu woohooni nti wa Betezayiita.*

<sup>22</sup> Aphano yo khufiya Betezayiita, atthu akina ottuukhule khuntanelaa Yinsa ntthu woohooni, khusala anvekela yoori ansape. <sup>23</sup> Ye khunthula ntthu otule khunlawana othetekela wa mmuti mphule, khulawa khutthemela mmaasho na khunttheela makhono. Yinsa khumuuzela yoori: “Weeyo onwahi woona etthu?” <sup>24</sup> Ntthu otule khweekesa otulu khuri: “Kiniwoona atthu anumpuwa nkhamma miithi enttaaye weetteta. <sup>25</sup> Theenya, Yinsa khunttheela makhono ntthu otule na khufinikha

maasho awe. Aphano maasho awe khufunuwa na khurutela woona zooshi saaneene.<sup>26</sup> Yinsa khunruma olawa owawe amuuzaka yoori: "Ohivire mmuti."

### *Otukhuru wa Pheeturu*

<sup>27</sup> Yinsa na anakhiyoni awe khulawa nti waattamananiyeeyo Sezareeya ya Filiipe. Ntarikhi eettaka olawa, khusala awoozela yoori: "Atthu anri miiyo ki paani?"<sup>28</sup> Yo khunjipu yoori: "Akina anri weeyo o Yaahaya Namooda, akina anri o Aliyaasi, akinoko aya anri weeyo ommote wa manapiyu."<sup>29</sup> Yinsa khuwoozela yoori: "Khi mweeyo? Mwinri miiyo ki paani?" Pheeturu khujipu yoori: "Weeyo o Al-Masiihu!"<sup>30</sup> Yinsa khuwaaruma yoori ahimuuze hatha ntthu monkoni wawe ye.

### *Yinsa onlupa ofwa na osisimuwa wawe*

<sup>31</sup> Aphano ye khusala owaasomisa araka: Mwaana wa Pinaatamu aarina ya ohoochiwa pi vitthu zawaatta na okatthaliwa pi mahaakhimu a tiini na attunkhulu a tiini, anamanozela a kano na ooliwe, ila siikhu ya ttaatthu asisimuwe.<sup>32</sup> Ye khulupa woosileyavo monkoni aya opo. Aphano Pheeturu khunkhewelete othetekele khusala anshowera.<sup>33</sup> Yinsa khurutela aphale aariivo anakhiyoni awe khusala aweekesa na khunshowera Pheeturu yoori: "Osale nyuma waka, Sheethwani! Weeyo khunuupuwela vitthu za Nluku, ila vitthu za eenaatamu.<sup>34</sup> Aphano khuwaakhuwela atthu na anakhiyoni awe khuwoza yoori: "Nkhama ntthu ontakha okilotta, ajikatthale mweenyewe, athuule nsalapa awe akilotte.<sup>35</sup> Maana otule antakhaaye wuusuru ohaayi awe ontta omwaashikha, ila otule onimwaashikhaaye ohaayi awe, mwaasa wa miiyo na mwaasa wa hapari zooshapweya onta wuusurukha.<sup>36</sup> Ena fwayita-ni ntthu oshintta olumwenku wooshi, mwisho waya khumwaashikha nafusi yawe?<sup>37</sup> Ama niini ntthu anwahaaye opatili na nafusi yawe?<sup>38</sup> Amana ntthu apatthiwa haaya khwa miiyo na mattakhuzi aka khwa khapila epi zoovonya na za twampi, Mwaana wa Pinaatamu onteela opatthiwa haaya khwa otu aya wakathi anttelaaye ota nsifwa wa Papaawe na malayikha ttakatthiifu."

## 9

<sup>1</sup> Khusala alupa theenya yoori: "Kiniuuuzani khweele yoori: Khwa apa ariiye apha, akina khanfwa ahooneeni ofwalume wa Nluku otakha na owahi."

### *Yinsa, Munsa na Eliyaasi*

<sup>2</sup> Ziviriyeovo siikhu sitha, Yinsa khunthuula Pheeturu, Tiyaaku na Yaahaya paasi, khuwaalawana vamwaako woolepa woohiivo hatha ntthu nkina. Attaaphale Yinsa khwiya woozukulisiwa ettaka omoona.

<sup>3</sup> Kuwo zawe khwiya zoottakattha nkhamma etthu yawaara ameenaatho ahinwahaaye ofula khuttakatthisa nkhamma toowo.<sup>4</sup> Khuwaapuwelela Aliyaasi na Munsa, khusala attakhulana Yinsa.<sup>5</sup> Aphano Pheeturu khumuza Yinsa yoori: "Mwaaliimu ti yooshapweya wiikhala attaapha.

Nintta ojeka heema ttatthu, moote yawo, moote ya Munsa na kiina ya Aliyaasi."<sup>6</sup> Pheeturu khaari ojuwa etthu yoolupa, maana yo aari wa woova.<sup>7</sup> Elottelanaka khupuwa liwiku khuwaakhutela, na khusileya huula yaari oraaye: "Otu Mwanaka wompheta waka; mwinsiileze".<sup>8</sup> Nasaapiru, wakathi eekesiyeeyo nkerekhere, khuhimooni hatha ntthu nkina theenya woohiyyi Yinsa.<sup>9</sup> Eettaka wiishukha vamwaako

aphale, Yinsa khuwooza yoori ahimuuze hatha ntthu etile oniyeyo, mpakha Mwaana wa Pinaatamu asisimuwe muufwa.<sup>10</sup> Mwaasa opule khuthokorela atthaaporu paasi, khusalana okeetisana maana a “osisimuwe muufwa”.<sup>11</sup> Khumuuzela yoori: “Mwaasa wa niini, ana-manozela a kano alupaka wiiya yoohithajiya Aliyaasi ota khpula?”<sup>12</sup> Yinsa khuwaajipu yoori: “Khweele Aliyaasi ona ya ota khpula, amana ata onrutisela opheeya vitthu zooshi. Khi mwaasa aya niini yaatikhawaka yoori Mwaana wa Pinaatamu ona ya ohoowa channu, okatthaliwa na otarawiwa?<sup>13</sup> Ila, miiyo kiniwuzani yoori Aliyaasi ata, yo khunrettela zooshi aatakhiyeyo nkhama zaatkhieezo monkoni wa ye”.

### *Ovonisiwa wa shapu aariina sheethwani*

<sup>14</sup> Wakathi afiyeevo aphale aariivo anakhiyoni apale akina, khoona khuntti khuluyeeene ewaazukuleliye apale na anamanozela a kano eettaka okheetisana na anakhiyoni.<sup>15</sup> Atthu apale paata ya omoona Yinsa, khwiyya ooshanka khutthirela khunchelisa.<sup>16</sup> Yinsa khuwoozela yoori: “Mwinkhetisana niini?”<sup>17</sup> Mwinyi mmote aari vakatthi wa khuntti etile khujipu yoori: “Mwaaliimu, miiyo kootisela mwanaka ariina sheethwani aninkhattazaaye ottakhula.<sup>18</sup> Wakhula vahali aninsikanaavo, onta onkwisela vathi. Khusala alaza maphovu na owina meeno, na wookowa. Kawaavekela anakhiyoni awo yoori amwiikare sheethwani aya oto, ila yo khuhinkhitiri.<sup>19</sup> Aphano Yinsa khujipu yoori: “Oo, atthu oohaarmini, mpakha lini kiiyaka vamote na mweeyo? Mpakha lini kuuvilelakani? Mwikitiisele shapu oto.”<sup>20</sup> Aphano yo khuntisa. Wakathi sheethwani amooniyeevo Yinsa, nasaapiru khuntothela mwaana otule ozoromowa woohusutivo khukwela vathi, khwaaza oju-upurusha alazaka maphovu.<sup>21</sup> Yinsa khumuuzela paapa wa mwaana otule yoori: “Zamwaaza lini epi?” Papaawe mwaana khujipu yoori: “Thanku avokoliwe.<sup>22</sup> Swaafu zawaatta, sheethwani oto, onta onkwisela vamoottho na mmaati yoori amuule. Ila nkhama onwahi oretta ethu, noonele huruma onaawuni.”<sup>23</sup> “Onwahi?” Alupaka Yinsa. “Zooshi zinwaheya khwa otule ankhupalaaye.”<sup>24</sup> Nasaapiru paapa wa mwaana otule khunyakula araka: “Kinkhupali; okaawuni muuhikupali mwaka!”<sup>25</sup> Wakathi Yinsa onniyeevo yoori khuntti khuluyeeene yeettaka okusanyeya, khunsukisa sheethwani araka: “Sheethwani woohittakhuli na ohisili, miiyo kinuuruma yoori onlikhe na ohinruletheenya.”<sup>26</sup> Sheethwani khunyakula, khunsakhinya woohusutivo khusaruwa, shapu khwiyya nkhama ntthu woofwa, khufiyelela atthu akina olupa yoori: “Afwa.”<sup>27</sup> Ila Yinsa khunkhola nkhono awe khunlansa, na khwiyya wa weemela.<sup>28</sup> Paata ya Yinsa orutela owawe, anakhiyoni awe khumuuzela othetekele yoori: “Mwaasa aya niini nahaakhitireliyeyo omwiikara?”<sup>29</sup> Ye khuwaajipu yoori: “Eto oniikareya khwa lompa na ofuka paasi.”

### *Yinsa onlupa theenya ofwa wawe na osisimuwa wawe*

<sup>30</sup> Yo khulaawo okhule aariwo na khulokhela Kalileya. Yinsa khaatakhiye atthu ojuwa ohali aariwo,<sup>31</sup> maana eetta owaasomisa anakhiyoni awe na awoozaka yoori: “Mwaana wa Pinaatamu onsaleela winkheleliwa mmakhono wa anaatamu. Yo anlawa amuule, ila siiku

ya ttaatthu onlawa asisimuwe.”<sup>32</sup> Ila yo khayaaweleyiye etthu aari otakhaaye olupa na eetta woova omuuzela.

### *Nwulu muufwalume wa pinkuuni*

<sup>33</sup> Khufiya Kafwaranaawu. Ari owawe, ye khuwoozela anakhiyon ni awe yoori: “Ntarikhi mwaari okheetisana niini?”<sup>34</sup> Ila yo khuhilupi hatha etthu, maana aari onyakulisana yoori anjuwe paani eeyiyeyo nwulweene channu vakathi vaya.<sup>35</sup> Eekhaliyeovo, Yinsa khuwaakhuwela apale khumi na awiri khuwooza yoori: “Nkhama ntthu ontakha wiiya wa mwanzo, ona ya wiiya wawiishela na eeye karumeya wa ooshi.”<sup>36</sup> Khunthuula mwaana mmote khunttha vakaththi vaya, khunkholela nkhono awe na khuwooza yoori:<sup>37</sup> “Wakhula otule animpwekherelaaye nsimaana nkhama otu, khwa nzina laka, onikipwekherela miiyo, na otule anikipwekherelaaye khanikipwekherela miiyo, ila onimpwekherela otule akiperekhiyeeyo.

### *Otule ahiniiphiriwaaye ti fweeyo ori khwa fweeyo*

<sup>38</sup> Yaahaya khunkhuwela Yinsa khumuaza yoori: “Mwaaliimu, namoona mwinyi mmote eekaraka masheethwani khwa nzina lawo, fweeyo khunlikhisa mwaasa woohiiyi wa khuntti yeetthu.”<sup>39</sup> Yinsa khumuaza yoori: “Mwihibitazz, maana khina anrettaaye minjuba khwa nzina laka, elottelanaka khukittakhula wootakhalavo.”<sup>40</sup> Maana otule ahiniiphiriwaaye ti fweeyo, ori khwa fweeyo.<sup>41</sup> Nakatalikha, kini-wuuzani khweele yoori: Otule aniwinkhaanini maati oonywa, koopho moote khwa nzina laka, mwaasa wa mweeyo wiiya atthu a Al-Masihu, weekhwhee khinteeela omwaashikha phakari yawe.

### *Okwiselana ntwampi*

<sup>42</sup> “Amana ntthu ankwsa mmote wa apa attiithi akikhupaliyeeyo miiyo, afwataali weeselieliwa mpahari afukeliwe liwe liwululene mmmisiko.”<sup>43</sup> Na nkhono awo amana wuukosisa, oshije. Afwataali weetta muuhaayi ori woorakala, ehiyeeni wiiyana makholo awo mawiri khweetta motthooni, ohali oriiwo moottho ohinzimaaye.<sup>44</sup> [Ottuukho nyunku yaya ehinfwaaye wala moottho aya ohinzimaaye.]<sup>45</sup> Na muulu awo amana wuuthowelelisa, oshije. Afwataali weetta muuhaayi ori woorakala, ehiyeeni wiiyana moolu mawiri khweetta motthooni,<sup>46</sup> [ottuukho nyunku yaya ehinfwaaye na moottho aya ohinzimaaye.]<sup>47</sup> Na amana liisho lawo limote luuthowelelisa, olazemo. Afwataali weetta muufwalume wa Nluku na liisho limote paasi ehiyeeni wiiyana oomawiri ila khweeselieliwa motthooni,<sup>48</sup> ottuukho nyunku yaya ehinfwaaye na moottho aya ohinzimaaye.<sup>49</sup> Maana wakhula mmote onlawa alukanive moottho.<sup>50</sup> Mwiinyu pi wooshapweya; ila mwiinyu aya amana olıkha onyuunya, wala khunrutiseleya! Mwiye mwiinyu mweeyo ena, na mwiikhale na heeri mmote na nzeenu.”

## 10

### *Monkoni wa waashana*

<sup>1</sup> Aphano Yinsa khulaavo aphale vaya khusala alawa nti wa Yudeya na phantte kiina ya Yorotaani. Theenya khuntti moote khuta aphale aariivo. Nkhama ethiipo aazowereliyeozo khusala awaasomisa.

<sup>2</sup> Mafwarizeewu akina khunsusela yoori amweeze amuuzelaka yoori:

“Halaali nlume omwaasha muukha awe?”<sup>3</sup> Ye khuwaajipu yoori: “Munsa aruma niini?”<sup>4</sup> Yo khulupa yoori: “Munsa aninkha ruhusa ya waatikha talakha khumwiikara.”<sup>5</sup> Yinsa awaaajipwaka khuri: Mwaasa wa wuuma rooho, tiito ye oolikheliyeeni oruma opo aatikhiyeyo.<sup>6</sup> Ila Nluku omwanzo amumpa nlume na muukha.<sup>7</sup> Mwaasa wa ethiito, nlume oninlikha papaawe na mamaawe khujikusanya na muukhaawe,<sup>8</sup> na oowiiri anretteya wiiya mwiili mmote paasi. Toowo, yo khaniiya awiri, ila oniiya mwiili mmote.<sup>9</sup> Nakatalikha, etile Nluku akusanyiyeyo, ahiiyeye anvalulaaye.<sup>10</sup> Wakathi Yinsa ari owawe, anakhiyoni awe khumuuzela theenya monkoni wa mattakhuzi atthaapale.<sup>11</sup> Ye khuwaajipu yoori: “Wakhula otule animwaashaaye muukhaawe na khunrala muukha nkina, ontta oraruwa.<sup>12</sup> Muukha naye amana antthira mannawe khuraliwa ti nlume nkina, ontta oraruwa”.

### *Yinsa na asimaana*

<sup>13</sup> Atthu akina aari owaatana asimaana yoori asapiwe ti Yinsa, ila anakhiyoni awe eetta owaashoweraka.<sup>14</sup> Yinsa paata ya woona vitthu epile, khuhintuveli na khuwooza yoori: “Mwiwaalikhe asimaana akiteele miyo, mwihiwaakhattaze; maana ofwalume wa Nluku pi waya.<sup>15</sup> Kiniuuuzani khweele yoori: Otule ahimpwekhrellaaye ofwalume wa Nluku nkhamma nsimaana, khanteela weettamo.<sup>16</sup> Elottelanaka, khuwaathuula asimaana, khuwaattheela makhono na khuwaaparikhya.

### *Shapu thajiri*

<sup>17</sup> Wakathi Yinsa aari weettelaaye osaruwa, mwinyi mmote khutthira amweettelaka khulawa khunkokhorela na khumuuzela yoori: “Mwaaliimu woosaana, kiretteniini yoori kipatthe ohaayi wa mileele?”<sup>18</sup> Yinsa khunjipu yoori: “Mwaasa aya niini okiithaka woosaana? Khaavo woosaana, woohiyyi mmote paasi Nluku.<sup>19</sup> Weeyo onjuwa oruma onraaye: ‘Ohuule, ohiraruwe, ohiiye, Ohilupe oshaahiti woovonyeya, ohinhate ntthu na onshitahi papaaowo na mamaawo.’<sup>20</sup> Mwinyi otule khulupa yoori: “Mwaaliimu, zooshi epo kinshututela thanku oshaapu aka.”<sup>21</sup> Yinsa khumweekesa na khumpheta. Khumuua yoori: “Enusaleela ethtu moote. Olawe woozanyise vitthu zawo zooshi, nzurukhu aya owenkhe asikhini na weeyo ontta wiiyana nuju pinkuuni; nawiisha ote okilotte.”<sup>22</sup> Paata ya mattakhuzi apale, shapu otule khwiyya woottetheya khulaavo ari woohuzunikha, maana aarina maali zawaatta.

<sup>23</sup> Yinsa khweekesa nkerekhere khuwooza anakhiyoni awe yoori: “Nanna enlipaazo thaajiri weetta muufwalume wa Nluku.”<sup>24</sup> Anakhiyoni awe khwiyya ooshanka khwa mattakhuzi apale. Ila Yinsa khurutela olupa theenya yoori: “Aanaaka, nanna enlipaazo weetta muufwalume wa Nluku!<sup>25</sup> Eniiya yookhweya Enkamiyya ovira valiphotto la sikano, zayita thajiri weetta muufwalume wa Nluku.”<sup>26</sup> Anakhiyoni awe khwiyya ooshanka, khusala oozelana mmote na nzaawe yoori: “Nkhama pi toowo, paani anttelaaye wuusurukha?”<sup>27</sup> Yinsa khuweekesa khuwooza yoori: “Khwa pinaatamu khinwaheya, ila Nluku wala; khwa Nluku vitthu zooshi zinwaheya.”<sup>28</sup> Aphano Pheeturu khwaaza omuuza yoori: “Fweeyo nalikha zooshi yoori nuulotte.”<sup>29</sup> Yinsa khujipu araka: “Kiniuuuzani khweele yoori: khaavo anlikhaaaye vaje vawe, ttwiye, nlupuwe, mamaawe, aana

awe ama mashapa awe, mwaasa wa miiyo na hapari zooshapweya,<sup>30</sup> ahipwekheraaye venkivene ohaayi otthuupu, swaafu miiya theenya ya manyupa, attwi, alupu, maama, paapa, aana ama mashapa na olupatthiwa. Mwiisho waya ohaayi wa mileele.<sup>31</sup> Awaatta eeyiye amwanzo, anttela wiishela; na awiishela anttela wiiya amwanzo.”

### *Yinsa onrutela olupa ofwa wawe na osisimuwa wawe*

<sup>32</sup> Yo eetta owelela Yeruzaleemu, Yinsa khuwaalokoza. Anakhiyon i khwiya onshanka, na apale aari onlottaaye khwiya awoova. Theenya Yinsa khuwaakhuwela apale khumi na awiri na khuwooza vitthu zaari weettelaaye onrettikhanel araka:<sup>33</sup> “Moone, fweeyo ninwelela Yeruzaleemu, mwaana wa pinaatamu onlawa enkheeliwe mahaakhimu a tiini na anamanozela a kano. Yo anttela onhukhumwela ofwa na omwinkhelela mmakhono wa amalapo,<sup>34</sup> anttela onveyisa, ontthemela, onjapha na amuule. Paata ya siikhu ya ttatthu asisimuwe.”

### *Oveka wa Tiyaaku na Yaahaya*

<sup>35</sup> Aphano Tiyaaku na Yaahaya, aana a Zepeteewu, khumwaattama Yinsa khumuaza yoori: “Mwaaliimu, nintakha yoori oninkhe ethu ninttelaaye wuuvekela.”<sup>36</sup> Yinsa khuwoozela yoori: “Mwintakha yoori kuuretteleni niini?”<sup>37</sup> Khujipu yoori: “Oninkhe ruhusa yoori khwa nsiifwa mwawo, fweeyo neekhale mmote nkhone nlume mmote nkhone nkha.”<sup>38</sup> Ila Yinsa khuwooza yoori: “Khamwinjuwa ethu mwinvekaaye. Mwinwahi mweeyo onywela koopho etile kinyweliyeyeo ama opwekherela woosiwa opu khoosiweeyo miiyo?”<sup>39</sup> Yo Khujipu yoori: “Ninwahi.” Yinsa khuwooza yoori: “Mweeyo mwinlawwa mwanywele koopho kinyweliyeyeo na mwinlawwa moosiwe nkhamma khoosiweeyo miiyo;<sup>40</sup> ila phantte eto ya wiikhala nkhone nlume aka ama nkhone nkha khahi miiyo kininkhaaye. Maana puuro yaya eto ti ya apale oothokoreliwa.”<sup>41</sup> Noosila vitthu epile, apale khumi khwiya ookasirikha khwa Yaahaya na Tiyaaku.<sup>42</sup> Ila Yinsa khuwaakhuwela khwiya vamote naye, khuwooza yoori: “Mweeyo mwinjuwa yoori apale aninkhiwaaye ofwalume wa olokozela khpila anshintta na owahi ariinaaye.<sup>43</sup> Ila vakatthi venu mweeyo ehiiye toowo. Otule antakhaaye wiiya ntunkhulu vakatthi venu mweeyo ona ya wiiya othuuto arumeayaaye;<sup>44</sup> otule antakhaaye wiiya wa mwanzo vakatthi venu eeye namarumeya enu mooshi mweeyo.<sup>45</sup> Maana Mwaana wa pinaatamu khateleeni orumeyeliwa, ila orumeya na winkha ohaayi awe khwa owaakaphula atthu awaatta.

### *Ovonisiwa wa ntthu woohooni wa Yeriko*

<sup>46</sup> Khweetta Yeriko. Wakathi Yinsa na anakhiyon i awe vamote na khuntti khuluyeene yaari olankhaaye Yeriko Baritimeewu woohooni mwaana wa Timeewu nazimola eettiye wiikhala kharipu ya tarikhi.

<sup>47</sup> Noosila yoori Yinsa wa Nazareeti ontta ovira, khwaaza okhuwa araka: “Yinsa, mwaana wa Daawuuda, koonele huruma!”<sup>48</sup> Atthu awaatta khusala anshowera yoori eeye woonyamala, ila ye khusala akhanyarela araka: “Mwaana wa Daawuuda, koonele hurumal!”<sup>49</sup> Yinsa khweemela khuri: “Mwinkhuwele.” Khukhuwelwa otule woohooni khumuaza yoori: “Ofurahi, olankhe, Ye ontta wuukhuwela!”<sup>50</sup> Khweesela ajipi yawe toole, khwiirukha khweemela khulawa aphale

aariivo Yinsa. <sup>51</sup> Yinsa khumuuzela yoori: “Ontakha yoori miiyo kurettele niini?” Mwinyi otule woohooni khujipu yoori: “Mwaaliium, miiyo kintakha woon!” <sup>52</sup> Yinsa khumuuzza yoori: “Olawe! Amini yawo yawuusuru.” Nasaapiru khwaaza woon na khusala anlotta Yinsa ntarikhi mphule.

## 11

### *Yinsa onvira na oshintta Yeruzaleemu*

<sup>1</sup> Wakathi aattameliyeovo Yeruzaleemu, khufiya Betifwaaje na Betaaniya, kharipu ya mwaako wa oluveera, Yinsa khuwaaruma anakhiyon awe awiri, <sup>2</sup> khuwooza yoori: “Mwilawe mmuti mpho mwaat-tameliyeemo, mwifiyaka mwininsikana mwaana wa puuru afukiwe ahinaweliweke ti hatha ntthu. Mwinfukule mwintiise. <sup>3</sup> Amana apuwa ntthu awuuzelani yoori: ‘Mwaasa niini mwirettaka vitttu epo?’ Mwinjipu yoori: ‘Mbiana ontta onhithajya na oninrutisa nasaapi.’” <sup>4</sup> Yo khulawa khunsikana mwaana wa puuru afukeleliwe, vanlako nwulu wa ntarikhi ya vaje, anfukulaka. <sup>5</sup> Atthu aari attaaphale khuwoozela araka: “Eto mwinrettaaye niini ya onfukula mwaana wa puuru oto?” <sup>6</sup> Anakhiyoni apale khujipu ethhiipile Yinsa awooziyeeyo, na ye khuwaalika olawana. <sup>7</sup> Khuntiisela mwaana wa puuru otule Yinsa, khutthaavo kuwo zawe na khuwela. <sup>8</sup> Atthu awaatta khusala attattikha kuwo zaya ntarikhi na akina khusala atthaamo virapi aashijiyeeyo ntthuttu. <sup>9</sup> Apale aalokoziyeeyo na apale aari onlottaaye khusala anyakula araka: “Hosaana!” Wooparikhiiyiwa ti otule antaaye khwa nzina la Mbiana!” <sup>10</sup> Wooparikhiiyiwa saana ofwalume ontaaye wa papeethu Daawuuda!” Hosaana pinkuuni!” <sup>11</sup> Yinsa khufiya Yeruzaleemu na khulawa mpakha nnyupa woosifwiwamo. Khoona zooshi na wiiya waariipiye, khulawa Betaaniya na anakhiyoni awe apale khumi na awiri.

### *Yinsa ont waharesha nyuupa yoosifwiwamo*

<sup>12</sup> Mmeesho mwaya, wakathi aari olankhaaye Betaaniya, Yinsa khunkhola jala. <sup>13</sup> Ari peetiwene, khoona muutthi wa mfikeera wooripelela mathapa, khulawa woona nkhamma aari osikanamo nshumo. Wakathi aattameliyeeyo, khuhisikanimo hatha etthu, woohiiyi mathapa, maana khawaari wakathi wa wiima fiiku. <sup>14</sup> Aphano khuza mfikeera opule yoori: “Khina anttelaaaye oja theenya mishumo khwa weeyo.” Anakhiyoni awe khusiila alupaka mattakhuzi apale. <sup>15</sup> Yinsa khufiya Yeruzaleemu, khuvira nnyupa woosifwiwamo na khwaaza oweekara apale aari wuuzyisaaye na apale aari wuuzyanyaaye. Khupwalula khukulu za anamapatilisa nzurukhu na za apale aari wuuzyisaaye jiwa. <sup>16</sup> Khaari ontakhela ntthu oviranamo ethu yauuuzyisa nnyupa woosifwiwamo. <sup>17</sup> Khusala asomisa araka: “Khayaatikhiiweeni yoori: ‘Nyuupa yaka enttela wiiya nyuupa yoolompiwamo khwa atthu ooshi ila mweeyo mwarettisa wiiya likurakuza la manantarawu.’” <sup>18</sup> Mahaakkimu a tiini na anamanozela a kano khusiila mattakhuzi apale na khwaaza weekesa nanna ya omuula, maana eetta omoova, mwaasa wa khuntti khuluyeene yaari oshankisiwa pi masomi awe. <sup>19</sup> Weettelaka oripa, yo khulaamo nsitati mphule.

### *Mfikeera wa wuumma*

<sup>20</sup> Mmeesho mwaya supuyeene, khoona mfikeera opule ori wawuma mpakha na mitathaari zaya. <sup>21</sup> Pheeturu khuupuwela na khumuza Yinsa yoori: “Mwaaliimu! Woone mfikeera opule waalaaniyeyeo wooma.” <sup>22</sup> Yinsa khunjipu yoori: “Wiiyane amini khwa Nluku. <sup>23</sup> Miyo kiniwuuzani khweele yoori, wakhula otule anttelaaye wuuza mwaako opu yoori: ‘Okhuleyevu apha waajeeselele mpahari,’ na khuhina hatha nshikili nroho mwawo, ila khukhupalela yoori enrettikhana etile olupiyeyo, entta oretteya. <sup>24</sup> Apho, miyo kiniwuza yoori, zooshi weeyo onvekaazo khwa lompa, khukhupalela yoori apwekherela, on-teela opattha. <sup>25</sup> Na amana olompaka, khwiyyana nzaawo okosiyeeyo, onswaamihi, yoori naye Paapa wa pinkuuni oswaamihi twampi zawo. <sup>26</sup> Ila mweeyo amana mwihiwsaamihi, na mweeyo Paapa wa pinkuuni khanswaamihi twampi zenu.

### *Ofwalume wa Yinsa na woosa wa Yaahaya*

<sup>27</sup> Khufiya theenya Yeruzaleemu, wakathi Yinsa aari oviraaye nnyupa woosifwiwamo, khususeliwa ti mahaakhimu a tiini, anamanozela a kano na attunkhulu a tiini, <sup>28</sup> khusala amuuzela yoori: “Vitthu epi, onrettana ofwalume waani? Paani awinkhiyeeyo ofwalume wa orettana?” <sup>29</sup> Yinsa khujipu yoori: “Miiyo kintakha kiwuuzele, amana okijipu, kintta owuuza ofwalume kinrettanaaye vitthu epi. <sup>30</sup> Nkakuuze, woosa wa Yaahaya waari wa pinkuuni ama waari wa anaatamu?” <sup>31</sup> Yo khusala anyakulisana araka: “Amana niri ‘ti-ya pinkuuni,’ ontta onuuzela yoori: ‘Aphano mwaasa aya niini mwihihkhupalelaka?’” <sup>32</sup> Ila nihijilipisane olupa yoori waari wa atthu!” Maana yo aari owoova atthu, weekhwhee atthu aari ookhupali yoori Yaahaya aari napiyu. <sup>33</sup> Aphano khunjipu Yinsa araka: “Khanijuweeni.” Yinsa zwaamu yawe khujipu yoori: “Hatha vattithiiru, miyo akiniwuuzani owahi kinrettanaaye vitthu epi.”

## 12

### *Nlikaniso wa anamalima*

<sup>1</sup> Aphano Yinsa khwaaza ottakhula na milikaniso yoori: “Mwinyi mmote khuzala miitthi za wuuva, khujekelela khwiyya nkathhi, khuthipa kulaathayini yoori asala atthaamo wuuva na khujecka korofwa. Paata ya toole khurentteriwa anamalima ye khusaafiri. <sup>2</sup> Wakathi wa wuurla, khunruma karumeya awe khwa anamalima yoori enkhiwe phantte ya mishumo za wuuva. <sup>3</sup> Ila yo khunkhola khumpiye na khumiikara woohimwinkhi etthu. <sup>4</sup> Aphano khumperekha karumeya awe nkina yo khunvonya khunwozola veeshwa, na khunttukhana. <sup>5</sup> Khumperekha theenya nkina khumuula. Khuwaaperekha theenya awaatta akina; khupiwi na akina khuuliiwa. <sup>6</sup> Aari osala mmote yoori amperekhe, mwanawe wompheta wawe. Mwiisho waya khumperekha na khuri: ‘Otu mwanaka antta onshitahi.’ <sup>7</sup> Ila anamalima apale khuuzana yoori: ‘Otu ti namarithi. Nlaweni nimuule, nirithi fweeyo.’ <sup>8</sup> Aphano khunkhola mwaana otule, khumuula khumweeselela oje wa nshapa. <sup>9</sup> Yinsa khuuzela yoori: “Mweenyewe nshapa ontela owaarettela niini? Ye ontta ota awoole anamalima apale nshapa laya awenkhe anamalima akina. <sup>10</sup> Khamwinasome etthu enlupaaye zawaatikhiiwa ttakatthiifu? Liwe anamajeka akatthaliyeeyo, nttho laya laretteya wiya

liwe linkhomaazaaye! <sup>11</sup> Eto enlankha wa Mbwana na ti yootikinisa khwa fweeyo.' <sup>12</sup> Aphano khwaaza weekesa nanna ya onkhola, maana eettiye ojuwa yoori nlikaniso opule aalupiyeyo waari owaalupa yo. Ila eetta owoova atthu, attaphale khunlikha khusala alawa safwari yaya.

### *Oriphawa lumpuru*

<sup>13</sup> Paata ya toole, khurumiwa mafwarizeewu akina na attunkhulu akina a khuntti ya Herooti olawa ottakhulana Yinsa eekesaka yoori ansikanane ntakhuzi loovonyeya. <sup>14</sup> Wakathi afiyeevo aphale aariivo Yinsa khulupa yoori: "Mwaaliimu, ninjuwa yoori o weekhwhee na khunjilikha oshawurisiwa ti ntthu. Maana khuniwaaphuka atthu khwa nanna ariizo, ila onsomisa wawaamineyavo tarikhi ya Nluku. Nkanuuze: Halaali onripha lumpuru Seezari ama wala? <sup>15</sup> Ila Yinsa khumweeleya onaaifikhi waya khuwoozela yoori: "Mwaasa aya niini mweeyo mwikootootaka? Mwikitiisele nzurukhu yoori moone." <sup>16</sup> Yo khutana nzurukhu opule, ye khuwoozela yoori: "Ratarato eti na waatikha opu pi waani?" Khujipuza yoori: "Seezari." <sup>17</sup> Aphano Yinsa khuri: "Mwimwinkhe Seezari etile yiyyiye ya Seezari, na ya Nluku etile yiyyiye ya Nluku." Khwiya onshankela.

### *Osisimuwa khweele*

<sup>18</sup> Masatukhi akina, apale anlupaaye yoori khawiivo osisimuwa, khuta aphale aariivo Yinsa khulupa yoori: <sup>19</sup> "Mwaaliimu, Munsa anilikhela zawaatikhiwa yoori, amana afwa ttwi na khunlikha muukhaawe ahinvokoleenei aana, alooziwe ttwiye yoori epuwe peewu khwa zwaamu ya ttwiye. <sup>20</sup> Moone, aarivo attwi sapa, otu wa mwanzo khuloola na khufwa ahiwaalikheeni hatha aana. <sup>21</sup> Waphiiri khulooziwa muukha otule aafweliweeyo ti mannawe na ye khufwa, woohinlikhi mwaana; na wattaatthu khwiya ethiipo. <sup>22</sup> Ethiipile oosaapa khuhijaalikhi hatha aana. Mwiisho waya muukha otule na ye khufwa. <sup>23</sup> Wakathi woosisimuwa, khwa ooshi apa sapa anttelaaye wiiya muukhawe tuuvi? Maana ooshi anrala!" <sup>24</sup> Yinsa khuwaajipu yoori: "Mweeyo mwattettekhiwa, maana khamwinjuwa zawaatikhiwa ttakatthiifu wala owahi wa Nluku! <sup>25</sup> Pi toono, wakathi woosisimuwa muufwa, khamwinlawa ooloola, wala olooziva, ila mwinttela wiiya nkhamma malayikha a pinkuuni. <sup>26</sup> Mweeyo khamwina some nkithaapu ya Munsa etthu yaatikhiweeyo monkoni wa osisimuwa? Wakathi aari ottakhulaaye va muutthi opule waari okholelaaye, yaatikhiwa yoori Nluku aamuuziye Munsa yoori: "Miiyo ki Nluku wa Eburahiima, wa Esiyaakha na wa Yaakhumpa." <sup>27</sup> Moone, Nluku khahiyo wa ananfwa, ila Nluku wa atthu haayi. Mwattettekheyen venkivene.

### *Oruma nwulu*

<sup>28</sup> Namanozela wa kano mmote noowasiila akheetisanaka khunsusela, ajuwiyeovo yoori ajipu saana, khumuuzela yoori: "Khi oruma wamwanzo khwa zooshi pi puuvi?" <sup>29</sup> Yinsa khujipu yoori: "Oruma wamwanzo khwa zooshi pi opu: Osiileze, Ezirayiilu, Mbwana Nluku eetthu ti eeyiye Mbwana otthwe paasi. <sup>30</sup> Omphete paasi Mbwana Nluku awo khwa rooho yawo yooshi na nafusi yawo yooshi na akhili zaho zooshi na kuvu zaho zooshi. <sup>31</sup> Waphiiri pi opu: 'Omphete nzaawo nkhamma ethiipo onjiphetaazo omweenyewe. 'Khawiivo nrumo nkina nwulu nkhamma opu.' <sup>32</sup> Namanozela wa kano otule khuri: "Kemaani,

Mwaaliimu, walupa na haakhi yoori ye mmote paasi, na khaavo nkina woohiiyi ye,<sup>33</sup> na omphete na rooho yawo yooshi na akhili zaho na kuvu zaho zooshi na omphete nzaawo nkhamma ethiipo onjiphetaazo ti yooziti zaakha yoolukuziwa na twaha.<sup>34</sup> Yinsa amooniyeevo yoori ajipu waakhilivo, khumuuya yoori: “Weeyo khuri peetiwene na ofwalume wa Nluku.” Elottelanaka, khuhiivo hatha mmote aari omuuzelaaye.

### *Al-Masiihu Mbwana wa Daawuuda*

<sup>35</sup> Yinsa eettaka osomisa nnyupa ya Nluku, khuwoozela yoori: “Anlupa toovi anamanozela kano yoori Al-Masiihu mwaana wa Daawuuda?”<sup>36</sup> Daawuuda aya alupa khwa Rooho Ttakatthiifu yoori: ‘Mbwana amuuza Mbwana aka yoori wiikhale nkhone nlume aka, mpakha miiyo kiwaatthe maatuwi awo vathi wa moolu awo.’<sup>37</sup> Daawuuda aya onimwiitha yoori ‘Mbwana’. Toovi anttelaaaye wiiya mwaanawe?” Khuntti khuluyeene yaari osileza wootuveliavo.<sup>38</sup> Yinsa eettaka owaasomisa, aari owooya yoori: “Phoole na anamanozela kano. Yo oniwaatuvela weettetta awaliye ajapi zoolepa na opwekherela mwache-liwa vaporasa,<sup>39</sup> owaatuvela wiikhala wiilokozi nsinakooka na pu-uro zooshitahiwa mmajampo,<sup>40</sup> atthaapo antapanya mmanyupa anan-fweliwa pi amannazaya na ojihakikhi khwa oretta lompa zoolepa; apa aya anttela ohoowa khwa ophukiwa woolwaazavo!”

<sup>41</sup> Yinsa eekhaliye waattamela puuro etile eninkhiwaavo zaakha, aari woona nanna khuntti etile yaari otthaamo nzurukhu n'yoopo ya zaakha. Mathaajiri awaatta aari otthaamo wawaatta.<sup>42</sup> Khumoona muukha namafweliwa ti mannawe mmote wa masikhini, atthaakamo ttoosu piiri.<sup>43</sup> Yinsa khuwaakhuwela anakhiyoni awe khusala awooza yoori: “Kiniuwuzani khweele yoori namafweliwa otu ti mannawe atthaamo n'yoopo wa zaakha zayita akina aya.<sup>44</sup> Maana ooshi enkha tathela, ila otu na osikhini awe enkha wooshi aari ororomelaaye.

## 13

### *Yinsa onlupa opwechiwa wa Nyuupa Yoosifwiwamo*

<sup>1</sup> Wakathi Yinsa aari osaruwaavo nnyupa yoosifwiwamo, nakhiyoni awe mmote khumuuya yoori: “Mwaaliimu nkoona! Maweni mawul-weene toono na manyupa ooshapweyisana toono!”<sup>2</sup> Yinsa khunjipu yoori: “Woona manyupa mawulumawulu apa? Khalinlawa liwe wiiya vatulu wa liwe nzaaya lihinttelaaye opwechiwa.”

### *Alama ya mwiisho wa wakathi*

<sup>3</sup> Yinsa aarettiye eekhaliye vamwaako Oluveera omaasho wa nyuupa yoosifwiwamo, Pheeturu, Yaakhumpa, Yaahaya na Antere khumuuzela othetekeli yoori: <sup>4</sup> “Onuuze, wakathi-ni enttelaaaye orettikhana vitthu zaya epo, na enttela wiiyavo alama-ni yoothoonyeza yoori zooshi zasaleela orettikhana?”<sup>5</sup> Yinsa khuwooya yoori: “Phoole yoori mwihi-hatiwe ti hatha ntthu.<sup>6</sup> Maana awaatta anta khwa nzina laka alupaka yoori: ‘Miiyo ki Al-Masiihu!’ na aniwahata attu awaatta.<sup>7</sup> Amana mwisiila viittha ama hapari za viittha, mwihoove maana epo ena zooret-tikhana, ila nalelo kinttela wiiya mwiisho.<sup>8</sup> Khapila moote enlawa yoomanane khapila kiina, na ofwalume onlawa woomanane ofwalume nkina. Zinlawa zeeyeve visikinyaatthi khwa phantte zoofwarikhana na jala. Epo zaya yaazo ya vitthu za olwaaza.<sup>9</sup> Mweeyo mwiiyane

phoole, maana mwinlawa mwenkheleliwe wa anamaphuka na mwinlawa mwajaphiwe mmasinakooka, na mwilawaniwe wa misatoro na wa afwalume, mwaasa wa miiyo, yoori mwiye mashaahiti.<sup>10</sup> Ila eni-hithajiya olaleyiwa hapari zooshapweya khapula khwa khapila zooshi.<sup>11</sup> Amana mwithuuliwa olawa ofukiwa na ophukiwa, mwihihukulikhe etthu yoolupa, ila ethiito mwinttelaaye winkhiwa wakathi aya othuupo mwilupe ethiito, maana khahiyo mweeyo mwinttakhulaaye, ila Rooho Ttakatthiifu.<sup>12</sup> Twi mmote onlawa anleve ttwiye yoori ooliwe, na paapa onleva mwanawe. Aana anlawa awazukuluwele apapa zaya awoole.<sup>13</sup> Atthu ooshi anttela owiinani mwaasa wa miiyo. Ila otule anttelaaye ovilela mpakha mwiisho, ontta wuusurukha.

### *Ohoowa nwulweene*

<sup>14</sup> Amana moona okufuru wa woopisa wa pala nhali woohifwayi wiiyamo (ansomaaye ti emweeleye), aphano apale anttelaaye wiiya Yudeya atthirele omwaako.<sup>15</sup> Otule anttelaaye wiiya vatulu wa nyuupa ahishukhevo yoori alawe owawe, wala ahivire othuula etthu ya nnyupa mwawe.<sup>16</sup> Otule aniiyaaye ntthuttu ahirutele onti yoori athuule juupa yawe.<sup>17</sup> Ootakhaliwa aakha apale anttelaaye osikaniwa ari awiimitta ama eettaka waamwisa!<sup>18</sup> Mwinvekele Nluku yoori vitthu zaya epo ehirettikhane mwiita.<sup>19</sup> Maana, siikhu zaya epo onttela wiiyavo ohoowa ohineeyekevo thanku Nluku ompe olumwenku, na khunteela opuwa nkina nkhamma opo.<sup>20</sup> Eriwaka Nluku khaafupheyisiye siikhu zaya epo, khaavo aari weettelaaye wiiya haayi, ila mwaasa wa apale awathawuliyeeyo, afupheyisa siikhu zaya epo.<sup>21</sup> Aphano, amana ntthu awuuzani yoori: ‘Al-Masihu otu ariiye apha!’ ama ‘Moone, otule ari okhule!’ mwihihupali.<sup>22</sup> Maana anlawa apuwe Al-Masihu oojipanka na manapiyu oojipanka anttelaaye othoonyeza alama na vitthu zootikinisa yoori kusapi awahi owaattettekha ananthawuliwa.<sup>23</sup> Mweeyo mwiyyane phoole! Miiyo kiniuwuzani zooshi epo zihinaret-tikhane.

### *Ota wa mwaana wa pinaatamu*

<sup>24</sup> Ila siikhu zaya epo, paata ya pala eto ya ohoowa, njuwa linnntela oriipa na mweezi onttela olikha waara.<sup>25</sup> Matthottowa akhwe pinkuuni na kuvu ziriiye pinkuuni zinttela osakhinyeya.<sup>26</sup> Aphano, mwinttela omoona Mwaana wa Pinaatamu mmawiku na owahi nwulweene na siifwa.<sup>27</sup> Ye onttela oruma malayikha awe khwa phantte nne zooshi za nkerekhere wa olumwenku mpakha nkerekhere ya pinkuuni yoori awaakusanye ananthawuliwa awe.

### *Nsomo wa mfikeera*

<sup>28</sup> “Mwijinozele nlikaniso wa nfikeera. Amana virapi zaya ziny-owela na mathapa khwaaza ophutuwela enthoonyeza yoori mwiita onttta waattamela.<sup>29</sup> Ethiipo theenya mweeyo, amana moona vitthu epo zeettaka orettikhana, mwijuwe yoori ye ori kharipu ya va milako.<sup>30</sup> Miiyo kiniuwuzani khweele yoori khapila eti kinvira vitthu epi zihirettikhaneeni.<sup>31</sup> Pinku na vathi zooshi zintela ovira, ila mattakhuzi aka khanviraru.<sup>32</sup> Ila monkoni wa siikhu ama wakathi khina anjuwaaye; wala malayikha pinkuuni wala Mwaana, woohiiyi Paapa.<sup>33</sup> Phoole, mwiye woojeekesela, maana khamwinjuwa ofiya wa wakathi aya opo.<sup>34</sup> Eri nkhamma ntthu anlikhaaye nyuupa yawe khuretta safwari ya

peetiwene; ila ahinalawe, khuwaalikhela ofwalume, akarumeya awe wakhula mmote sharuthi yawe, khunruma namweekesela yoori asale aweekeselaka.<sup>35</sup> Tiito, mwijeekelesa, maana mweeyo khamwinjuwa wakathi mweenyewe nyuupa anttelaaye oruti; enttela wiiya njuwa looveva, osikhu layili, lifwajiri ama supu.<sup>36</sup> Amana ye ata woohileezi, ti ahiwaasikane eettaka olala.<sup>37</sup> Epile kiniwuuzaanini, kiniwuuzani mooshi: ‘Mwijeekelesa!’ ”

## 14

### *Shawuri za omuula Yinsa*

<sup>1</sup> Zaari osaleela siikhu piiri paasi yoori efiye siikhu ya Paashikowa na siikhu ya Njampo la Phaawu Zoohiina Fwaramento. Mahaakhimu a tiini na anamanozela a kano aari weekesa nanna ya onkhola Yinsa sirini yoori amuule.<sup>2</sup> Yo aari olupa yoori: “Khanininkhola vanjampo yoori nihipuwise nzuuzu vakatthi wa atthu.”

### *Yinsa onvaaziwa mafuttha Betaaniya*

<sup>3</sup> Yinsa ari Betaaniya, eekhaliye vameeza owawe mwinyi mmote anithiwaaye Simawu namaharaja, khutawo muukha aataniyeeyo suupha ya mafuttha oonukhela awaatta nzurukhu. Khupwecha suupha etile khumwiithela Yinsa veeswa vawe.<sup>4</sup> Apale aari attaphale khwiiya ookatipukha khusala oozana atthaaporu yoori: “Aharipwela-ni mafuttha apale.<sup>5</sup> Maana aari owahi wuuzanyisa miiya ttatthu za nzurukhu wa paratha, aari weettelaaye winkhiwa asikhini.” Yo khunshowera muukha otule.<sup>6</sup> Ila Yinsa khuwaalikhisa araka: “Mwinlikhe muukha otu khwa heeri, Mwanvelaveliseli? Ye akirettela miiyo eththu yooshapweya.<sup>7</sup> Maana asikhini mwina mweeyo mileele, na mwinwahi owaawuni mwitakharu. Ila miiyo akinteeela wiiya vamote na mweeyo mileele.<sup>8</sup> Ye aretta etile awahiyeeyo. Avaaza mafutta oonukhela mwiili aka raku zeene, atthenkezaka ozikhiwa waka.<sup>9</sup> Kiniwuuzani khweele yoori: wakhula vahali linta fusiriwaavo ntakhzila Nluku khwa olumwenku wooshi, epi arettiyeeyo muukha otu, zeettaka olupiwa noofikhiriwa ye.”

### *Yuuda oninzinkula Yinsa*

<sup>10</sup> Aphano Yuuda Eshikariyoote, mmote wa apale khumi na awiri, khulawa wa mahaakhimu a tiini khwa shawuri za onzinkula Yinsa.<sup>11</sup> Yo wakathi ansiliyevo khwiiya oofurahi na khumwaahiti Yuuda omwinkha nzurukhu. Khwa wakathi aya opo Yuuda aari weekesa kiphenyo saana yoori anzinkule.

### *Yinsa onja njampo la paashikowa*

<sup>12</sup> Siikhu ya mwanzo ya Njampo la Phaawu Yoohiina Fwaramento, wakathi waazoweriyeeyo orettiwa twaha pwittipwitthi yoojeliwa paashikowa, anakhiyoni a Yinsa khumuuzela yoori: “Ontakha yoori neette vayi nootthenkesele eththu yoojiwa ya paashikowa?”<sup>13</sup> Yinsa khuwaaruma anakhiyoni awe awiri khuwooza yoori: “Mwilawe mpakha ositati, ottuukho mwinlawwa mwansikane mwinyi athuuliye yuuku ya maati. Mwinlotte othuuto,<sup>14</sup> mwimuuze mweenyewe nyuupa ethiito anttelaaye oviramo yoori ‘Mwaaliimu onta wuuzela: Orivayi nsana aka wa omaka-vo, kinttelaaaye onja-vo paashikowa na anakhiyoni aka?’<sup>15</sup> Aphano ye onta wuunozani mweeyo khwa

nyuupa ya vatulu nsana nwulweene na zooshi mwinihithajyaaye. Mwitthenkeze attaapho njampo lethu.”<sup>16</sup> Anakhiyoni apale awiri khulawa mpakha ositati, khusikana zooshi nkhama ethhiipile Yinsa aalupiyeezo na khuntthekeza paashikowa.<sup>17</sup> Wakathi oripiyeego, Yinsa khuta na anakhiyoni awe apale khumi na awiri.<sup>18</sup> Ari vameeza eettaka oja Yinsa khuri: “Weekhwhee kiniwuuzani yoori mmote wa mweeyo anjaaye na miiyo onkizinkula.”<sup>19</sup> Ooshi khwiya oohuzunikha na khwaaza wuuzela wakhula mmote khwa zwaamu yawe yoori: “Talili khahiyi miiyo?”<sup>20</sup> Yinsa khujipu yoori: “Mmote wa khumi na awiri anjanaaye miiyo parathu moote.”<sup>21</sup> Mwaana wa Pinaatamu onlawa afwe, nkhama ethhiipo yaatikheweeyo monkoni wa ye. Ila wootakhaliwa ti otule anttelaaye onzinkula Mwaana wa Pinaatamu! Afwataali ahivokoliweeni!”

### *Njampo la mwiili na taamu ya Mbwana*

<sup>22</sup> Ettaka oja, Yinsa khuthuula phaawu, khuparikhiya, khumeya, khuwenkha anakhiyoni awe na khuwooza yoori: “Mwithuule; opu mwiili aka.”<sup>23</sup> Elottelanaka, khuthuula jiikira, khushukhurwela, khuwenkha anakhiyoni awe na ooshi khunywa.<sup>24</sup> Khuwooza yoori: “Eti ti taamu yaka ya wahati yiithiweeyo khwa zwaamu ya atthu ooshi.<sup>25</sup> Miiyo kiniwuuzani khweele yoori akinteela onywa theenya nshumo wa nrayi wa wuuva, mpakha siikhu kinttelaaye onywa theenya na mweeyo muufwalume wa Nluku.”<sup>26</sup> Paata ya yo wiipa liipo, khulankha khusala alawa omwaako Oluveera.

### *Yinsa oninchimulela Pheeturu*

<sup>27</sup> Aphano Yinsa khuwooza yoori: “Mooshi mweeyo mwinlawa mwakanswi. Maana yaatikhwa yoori: ‘Kininvulalisa nshuki aya, na pwittipwithi zaya zinttela omwazeya.’<sup>28</sup> Ila paata ya osisimuwa waka, kinttela olokoza Kalileya.”<sup>29</sup> Aphano Pheeturu khutukhuru araka: “Hatha nkhama ooshi eetta wuutthira, miiyo akinuutthira.”<sup>30</sup> Yinsa khunjipu yoori: “Weekhwhee kiniwuza yoori leelo osikhu otthuupu, likukhuwi lihineekhe swaafu piiri, onteela okikhana swaafu ttatthu.”<sup>31</sup> Ila Pheeturu khusala akhanyarela channu araka: “Hatha nkhama kintakha wuuliwa vamote na weeyo, akinteela wuukhana.” Ooshi khulupa ethhiipo.

### *Yinsa nwoorotha wa Yetemaani*

<sup>32</sup> Aphano khulankha khulawa puuro eniitthiwaaye Yetemaani, khuwooza anakhiyoni awe yoori: “Mwiikhale apha, miiyo kinttela olompa.”<sup>33</sup> Khunthuula Pheeturu, Tiyaaku na Yaahaya khwaaza oshukulikha, othunkuwikha na ohuzunikha.<sup>34</sup> Yinsa khuwooza yoori: “Nafusi yaka ti ya ohuzunikha venkivena woosaleela ofwa; mwisale apha na mwieekesele.”<sup>35</sup> Yinsa khuwaasusa vattithiiru khukokhora na khusala alompa yoori nkhama enwaheya aattuwananisiwe wakathi opu wa ohoowa.<sup>36</sup> Aari olupa toono: Oo Paapa zooshi khwa weeyo zinwaheya. Okaattuwananise miiyo jiikira eti ya ohoowa. Ila ehirettikhane khwa matakhele aka, ila khwa matakhele awo.<sup>37</sup> Apho khurutela aphale aari-ivo anakhiyoni awe, khuwaasikana eettaka olala. Khumuza Pheeturu yoori: “Simawu, onitta olala? Khuwaheeni ojeekesela nenkawu wakathi mmote?”<sup>38</sup> Mwieekesele na mwilompe, yoori mwihikwele muuzyiniwa; rooho ti yookhomaala, ila mwiili pi woottettheya.”<sup>39</sup> Yinsa

khuwaasusa opheya khusala alompa, arutelaka mattakhuzi mamoteru.<sup>40</sup> Wakathi arutiyeovo khuwaasikana eettaka olala theenya, mwaasa maasho aya eetta owaalemela; khaari ojuwa etthu yoojipu.<sup>41</sup> Khuta swaafu ya ttaatthu khuwooza yoori: "Nalelo mwintta olala na ovumula? Zafiyela! Wafiya wakathi wa Mwaana wa Pinaatamu winkheleliwa mmakhono wa anatwampi.<sup>42</sup> Mwilankhe, nilawe! Mwimoone namazinkula ori kharipu.

### *Ofukeliwa wa Yinsa*

<sup>43</sup> Yinsa nalelo eettaka ottakhula, khusala ata Yuuda mmote wa anakhiyoni apale khumi na awiri. Aari ota na atthu awaatta athuuliye phanka na kolomontto, aarumiweeyo ti mahaakhimu a tiini, ana-manozela a kano na attunkhulu a tiini.<sup>44</sup> Namazinkula aawooziye alama araka: "Otule kinttelaaye ompatikha, ti othuuto; mwinkhole mwinthuule saana."<sup>45</sup> Wakathi afiyeovo, ye khumwaattama khumuaza yoori: "Mwaaliimu!" na khumpatikha.<sup>46</sup> Atthu apale khunkhola Yinsa na khunkholelala.<sup>47</sup> Aphano mmote wa anakhiyoni awe aariina kharipu, khufuttha phanka khunvavela khushija nshiilo la karumeaya wa haakhimu nwulu wa tiini.<sup>48</sup> Yinsa khuwooza yoori: "Mwakiteela na phanka na mikokontto yoori mwikikhole nkhamma nantarawu?<sup>49</sup> Siikhu zooshi kaari vamote na mweeyo kisomisaka Nnyupa Woosifwiwamo, khuhikikholi; ila zooshi epi zaariye yoori emariseli zawaatikhiwa ti manapiyu.<sup>50</sup> Anakhiyoni awe ooshi khumwanswi na khutthira.<sup>51</sup> Ila shapu mmote, aajifinikhiyeeyo nkhammi woolakala paasi aari onlottaaye Yinsa. Yo khunkhola,<sup>52</sup> ila khuvula nkhammi opule, khutthira waazu.

### *Yinsa vakatti wa Mashawuriyi*

<sup>53</sup> Khunthuula Yinsa khunlawana wa haakhimu nwulu wa tiini na khuthukumana mahaakhimu a tiini ooshi, attunkhulu a tiini na anamanozela a kano.<sup>54</sup> Pheeturu khusala awaalotta ari peetiwene mpakha nlikokoro wa haakhimu nwulu wa tiini, na khulawa khwi-ikhala na anamarumeyela, oothaka moottho.<sup>55</sup> Mahaakhimu a tiini na Mashawuriyi ooshi aari weekesa onsikanana Yinsa paathuli moote yoori anhukhumwele ofwa, ila khuhinsikanani hatha moote.<sup>56</sup> Maana awaatta aari olawela oshaahiti woovonyeya khwa Yinsa, ila tukhuru zaya khazaari sawasawa.<sup>57</sup> Aphano khulankha atthu akina na onlupeza vitthu zoovonyeya.<sup>58</sup> "Fweeyo nansiila alupaka yoori: 'Kimpwecha Nyuupa eti Yoosifwiwamo yoojekiu pi makhono a anaatamu, na siikhu ttatthu kijeke kiina, yoohijekiu pi makhono eenaatamu.'"<sup>59</sup> Ila hatha nkhamma piitthiipo, mattakhuzi aya khaari wiiya sawasawa.<sup>60</sup> Khulankha haakhimu nwulu wa tiini khumuuzela Yinsa yoori: "Khunjipu mattakhuzi apa onlokoveziwaaye?"<sup>61</sup> Ila Yinsa khwiya woonyamala, khuhijipu hatha etthu. Haakhimu nwulu wa tiini khurutela omuuzela theenya yoori: "Weeyo o Al-Masiihu, mwaana wa Nluku Wooparikhiyiwa?"<sup>62</sup> Yinsa khujipu yoori: "Miiyo ki othuuto, na mwinlawwa mwamoone Mwaana wa Pinaatamu eekhaliye nkhamo nlume wa Nluku wa owahi zooshi, na ataaka mmawiku a pinkuuni."<sup>63</sup> Aphano haakhimu nwulu wa tiini khuvarula kuwo zawe na khuri: "Khi ninrettanna oshaahiti nkina!"<sup>64</sup> Mweeyo mwasiila okufuru wawe. Mwinuupuwela niini?" Atthu ooshi anri onsuhi wuuliwa.<sup>65</sup> Aphano akina khwaaza ontthemela khunfinikha omaasho

wawe khusala ampwakula na amuuuzela yoori: “Ti paani oopiyeeyo? Onlupe!” Anamweekesela khunkhola na khumpwakula.

### *Pheeturu oninkhana Yinsa*

<sup>66</sup> Pheeturu aarettiye ari vathi nlikokoro wa nyuupa etile wakathi atiyeyeo njaazi wa haakhimu nwulu wa tiini. <sup>67</sup> Amooniyeovo Pheeturu eettaka woottha moottho khuri: “Weeyo waari na Yinsa wa Nazareeti.” <sup>68</sup> Ila Pheeturu khukhana araka: “Akininjuwa, na wala akinsiila ethu onlupaaye.” Khusaruwela nlako wa nlikokoro. <sup>69</sup> Wakathi njaazi otule amooniyeovo theenya, khuwooza apale aariina attaphale yoori: “Otu mmote wa atthaapo.” <sup>70</sup> Ila khukhana theenya. Oviriyeevo wakathi vattithiiru, apale aariina atthaapale theenya khumuuzza Pheeturu yoori: “Weekhwelle, weeyo o mmoteru na atthaapo, maana onkalileya. <sup>71</sup> Ye khwaaza onlaani na olapha yoori: “Akininjuwa pinaatamu aya oto oninlupaaye.” <sup>72</sup> Nasaapiru likukhuwi khwiikha swaafu ya phiiri. Pheeturu khuupuwela mattakhuzi Yinsa amuuziyeeyo yoori: “Likukhuwi lihineekhe swaafu piiri, onikikhana swaafu ttatthu.” Khulaavo aphale vaya khusala alila.

## 15

### *Yinsa ari wa Pilaatu*

<sup>1</sup> Supuyeene, khukusanyeya Mahaakhimu a tiini, attunkhulu a tiini, anamanozela a kano na Mashawuriyya ooshi, khunfuka Yinsa khunthula khumwinkha Pilaatu. <sup>2</sup> Pilaatu khumuuzela yoori: “Weeyo o mfwalume wa mayaahuuti?” Ye khujipu yoori: “Weeyo ti onlupaaye.” <sup>3</sup> Mahaakhimu a tiini khunlokoveza vitthu zawaatta Yinsa. <sup>4</sup> Pilaatu khurutela omuuzela theenya yoori: “Weeyo khunjipu? Nkoona vitthu kavi anuulokovezaaye.” <sup>5</sup> Ila Yinsa khuhijipu hatha ethu Pilaatu khwiiya wooshanka.

### *Yinsa ahukhumweliwa ofwa*

<sup>6</sup> Yaari zowera yaya, wakathi wa Njampo la Paashikowa, Pilaatu onfukulela napherezu mmote, otule aari ovekiwaaye ti atthu. <sup>7</sup> Mwinyi mmote anitthiwaaye Baraba aafukeliwe vamote na anamakhijili mwaasa wa omuula ntthu wakathi wa nzuzu. <sup>8</sup> Khuntti ya atthu etile khuta na khunvekela Pilaatu yoori arette etile awaaazoweziyeeyo owaarettela. <sup>9</sup> Aphano Pilaatu khuwoozela yoori “Mweeyo mwintakha yoori kinfukulele mfwalume wa mayaahuuti?” <sup>10</sup> Maana ye aari ojuwa saaneene, yoori mahaakhimu a tiini anleviye Yinsa mwaasa wa nrima. <sup>11</sup> Ila mahaakhimu a tiini awaakhanyareliye atthu apale yoori anvekele Pilaatu aaze onfukulela Baraba khwa otakha waya. <sup>12</sup> Pilaatu khuwoozela theenya yoori: “Kinrettele niini mwinyi otu mweeyo mwinimwiitthaaye mfwalume wa mayaahuuti?” <sup>13</sup> Yo khunyakula araka: “Akhomeliwe!” <sup>14</sup> Ila Pilaatu khuwoozela yoori: “Niini arettiyeeyo yootakhala?” Ila yo khusala atepa onyakula araka: “Akhomeliwe!” <sup>15</sup> Pilaatu eekesaka otuvelisa khuntti etile ya atthu, khunfukulela Baraba na khuruma ojaphiwa Yinsa na olawa okhomeliwa.

### *Anajanka aninveyisa Yinsa*

<sup>16</sup> Anajanka khunthuula Yinsa, khunlawana nlikokoro wa nyupu kihuulu ya nsatoro khukusanya khuntti khuluyeeene ya anajanka. <sup>17</sup> Khunwalisa juupa yookhuttuwa, khuvaasha khaara ya miwa khunwalisa mmwishwa. <sup>18</sup> Khusala anchelisa araka: “Wiiye haayi, mfwalume wa mayaaahuuti!” <sup>19</sup> Khusala ampiya veeshwa vawe na nthala na ontthemela, akokhoraka na omwaaputu.

### *Okhomeliwa wa Yinsa*

<sup>20</sup> Paata ya ontukhana, anajanka apale khunvula kuwo yookhuttuwa khunwalisa kuwo za wiiya zawe. Aphano khunsarulela vaje yoori alawe ankhomele. <sup>21</sup> Khukutthanana mwinyi mmote wa Sireene aari wiithiwaaye Simawu, papaawe Alishantere na Ruufu, aari olankhaaye omashapa. Khunkhanyarela othuula nsalapa wa Yinsa. <sup>22</sup> Yo khunthuula Yinsa khunlawana puuro eniitthiwaaye Kolokoota, eriina maana a puuro ya likurakuza la eeshwa. <sup>23</sup> Khusala atakha omwinkha viinyu yoophakanyaniwa mafuttha oonukhela, ila ye khuhinywi. <sup>24</sup> Aphano khunkhomela na khwaawanyana kuwo zawe khwa weekesa nasipu yoori ajuwe wakhula ntthu phantte ari weettelaaye osalana. <sup>25</sup> Aakhomelaniwe wakathi wa saa-ttaatthu, supu. <sup>26</sup> Pi etthiipo yaatikhi-weeyo khwa olokoveziwa wawe yoori: MF WALUME WA MAYAAHUUTI. <sup>27</sup> Vamote na ye aakhomeliwe manantarawu awiri, mmote nkono nlume, nkina nkono nkha, <sup>28</sup> [na khurettikhana epile zawaatikhiwa zaalupiyeeyo yoori: “Ye aatthanttiwe nkhamma namatapanya.”]

<sup>29</sup> Apale aari oviraaye attaphale, eetta ontukhana na osakhinya viishwa zaya araka: “Haya, weeyo ompwechaaye Nyupu Yoosifwambo, khwa siikhu ttatthu khujeka. <sup>30</sup> Wiishukhe vansalapa apho na ojuusuru omweenyewe!” <sup>31</sup> Khwa nanna etthiipile, mahaakhimu a tiini na anamanozela a kano khusala alupa atthaaporu anveyisa yoori: “Awoosuru akina, ila khanwahi ojuusuru mweenyewe. <sup>32</sup> Wiishukhe vansalapa apho O Al-Masiihu, mfwalume wa Ezirayiilu, wiishukhe yoori niwoone na nuukhupali.” Apale aakhomeliweeyo, na yo eetta ontukhana theenya.

### *Ofwa wa Yinsa*

<sup>33</sup> Yaapuwiye yiiza olumwenku wooshi, waaza atuhuri mpakha alaasiri. <sup>34</sup> Payina ya alaasiri, Yinsa khukhuwa na huula ya onyakula, araka: “Elooyi, Elooyi, Lama sabatani?” Eto ena maana ya “Nluku aka, Nluku aka, mwaasa aya niini okanswaka? <sup>35</sup> Wakathi atthu apale aari attaphale asiiliyeevo mattakhuzi apale, khulupa yoori: “Mwisiile, oninkhuwela Aliyaasi!” <sup>36</sup> Mmote aari attaphale khutthira khulawa khunaanisa shiponja na vinaakiri, khupweha va muutthi na khumwinkha Yinsa yoori anywe na khuri: “Mwinlikhe, nimooone nkhamma Aliyaasi onta anlazevo aphale vaya. <sup>37</sup> Ila Yinsa khunyakula channu khwiittha phuumu. <sup>38</sup> Phazira ya Nnyupu Woosifwiwamo khvaruwa khwaawanyeya phantte piiri, waaza vatulu mpakha vathi. <sup>39</sup> Wakathi namalokozela wa anajanka aariiye omaasho wa Yinsa, ooniyeeyo nanna afwiyeeyo, khuri: “Wekhwhee mwinyi otu aari Mwaana wa Nluku!”

<sup>40</sup> Aakha akina aari oretta eettaka woona vitthu epile zaari orettikhanaaye ari peetiwene. Khwa atthaapo aarivo Mariyamu Mataleena, Mariyamu mamaawe Tiyaaku, nsimaana wa Yuusufu, na Salome.

<sup>41</sup> Aakha aya apo amperekhiye Yinsa na omwaawuni wakathi ariyo Kalileya. Owaalikha apo aya, aarivo aakha akina awaatta aalawaniyeeyo Yeruzaleemu.

### *Ozikhiwa wa Yinsa*

<sup>42</sup> Njuwa leettelaka otupweela, mwaasa wa wiiya siikhu ya otherenkeza Saapatu, <sup>43</sup> Yuusufu wa Arimateeya, mwinyi wa fwayita na aari oretta phantte ya Mashawuriya, oto naye aari oweja ota wa ofwalume wa Nluku, khulawa woominyalavo wa Pilaatu na khuveka mwiili wa Yinsa. <sup>44</sup> Pilaatu khwiiya wooshanka noosila yoori Yinsa afwa. Khunkhuvwela namalokozela wa anajanka khumuuzela nkhamma Yinsa afwa. <sup>45</sup> Wakathi ooziveevo ti namalokozela wa anajanka, khumwinkha mwiili wa Yinsa Yuusufu. <sup>46</sup> Aphano Yuusufu khuuzanya kuwo yoolakala yoopeepheya, khwiishusha mwiili wa Yinsa vansalapa aphale, khumputaputela va kuwo etile yoolakala na khuntha nkhapuri yaathipiweeyo va mwaako. Nawiisha, khatthaavo liwe vanlako vaya. <sup>47</sup> Mariyamu Mataleena na Mariyamu mamaawe Yuusufu, aarettiye eettaka woona na khoona mwiili wa Yinsa vahali waatthiweevo.

## 16

### *Osisimuwa wa Yinsa*

<sup>1</sup> Paata ya ovirisa Saapatu, Mariyamu Mataleena, Salome na Mariyamu mamaawe Tiyaaku, khuuzanya mafuttha oonukhela yoori eetthele mwiili wa Yinsa. <sup>2</sup> Siikhu ya mwanzo ya sumana supuyeene, njuwa leettelaka opuwa, aakha apale khulawa okhapuri. <sup>3</sup> Ntarikhi khusala oozelana yoori: “Paani anttelaaye onilazelavo liwe lifukaniweeyo nlako wa khapuri?” <sup>4</sup> Maana liwe laya laari liwululene. Ila noofiya okhule, khoona liri loolaziwavo. <sup>5</sup> Aviriyeovo nkhapuri mphule, khumoona shaapu awaliye kuwo zoolakala eekhaliye nkono nlume, na khwiiya awoova. <sup>6</sup> Khuwooza yoori: “Mwihoove, mweeyo mwinimweekesa Yinsa wa Nazareti, aakhomeliweeyo. Ye asisimuwa! Khaamo mphu, moone puuro aattattikheliwevo. <sup>7</sup> Mwilawe na mwawooze anakhiyon i awe na Pheeturu yoori: ‘Ye alokoza eettaka Kalileya.’ Ottuukho mweeyo mwinlawwa mwamoone, nkhamma ethiipo awuuziyeenini.” <sup>8</sup> Eettaka outhukumela na osuthuwa, aakha apale khulaawo na khutthiram u nkhapuri mphule. Na khuhimuuzi hatha ntthu, maana aari awoova.

### *Yinsa onimpeweleta Mariyamu Mataleena*

<sup>9</sup> Wakathi Yinsa asisimuviyeovo lifwajiri la siikhu ya mwanzo ya sumana, khumpuwelela omwanzo ene Mariyamu Mataleena, otule eekariweeyo mmwili mwawe masheethwani sapa. <sup>10</sup> Ye khulawa owooga ashirikha awe Yinsa, maana yo aari oohuzunikha na olila. <sup>11</sup> Wakathi asiiliyeovo yoori Yinsa ori haayi na ampuweleliye Mariyamu Mataleena yo khuhikhupali.

### *Yinsa oniwaapuwelela anakhiyon i awiri*

<sup>12</sup> Paata ya vitthu epile, Yinsa khujithoonyeza khwa wuuso nkina vakatthi wa anakhiyon i awe awiri alottaka tarikhi ya omashapa. <sup>13</sup> Yo khuruti khuta khuwooza mattakhuzi apale azaaya; ila theenya apale khuhikhupali. <sup>14</sup> Omwiisho waya Yinsa khuwaapuwelela apale khumi na mmote, wakathi aariyo vameeza, na khuwaashowera mwaasa

woohikhupali na wuuma rooho zaya, maana khawaasileziye apale aamoniyeeyo wakathi asisimuwiyeovo.<sup>15</sup> Khuwooza yoori: "Mwilawe olumwenku wooshi mwawalaleyele atthu ooshi hapari zooshapweya.<sup>16</sup> Otule ankhupalelaaye na khoosiwa onta wuusurukha, ila otule ahinkhupalelaaye oniiyana paathuli.<sup>17</sup> Alama epi enttela owaalokoza apale anikikhupalaaye miiyo: khwa nzina laka aniikaza masheethwani, anlawa attakhule luuka pheeya,<sup>18</sup> ankhola nyookha na onywa amali ya wuula, ila khuhiwaaretti hatha etthu na owaattheela atthu makhono khuvona."

*Yinsa oneetta pinkuuni*

<sup>19</sup> Paata ya owooza mattakhuzi apale, Mbwana Yinsa khuweziwa pinkuuni khwiikhala nkhono nlume wa Nluku. <sup>20</sup> Aphano anakhiyonii apale khulankha khulawa olaleya phantte zooshi, Mbwana aari owaawuni ahakikhaka mattakhuzi aya na alama zaari owaalottaaye.

## Luuuka

### *Yaazo*

<sup>1</sup> Weeyo Tiyoofilu woohishimiwa, atthu a waatta aajilipisiye waatikha hatiithi ya vitthu ziviriyeeyo vakatthi vethu. <sup>2</sup> Apale aari mashaahiti ooniyeeyo omwanzweene zirettikhana, khwiya anamalaleya a ha-pari zooshapweya za ntakhuzi la Nnyizinku, atthaapo pi anifiseliy-eeyo fweeyo. <sup>3</sup> Na miiyo zaamu yaka khusala kitholathola woohilazeli varanka epile zirettikhaniyeozy zaazaka, khulakela owaatikhela zooshi woolotteyavo, <sup>4</sup> yoori wiiyane nroromelo khwa mattakhuzi apa a haakhi osiliyyeeyo.

### *Onlaleyiwa ovokoliwa wa Yaahaya Namoosa*

<sup>5</sup> Wakathi Herooti ari nsatoro wa Yudeya, aarivo haakhimu wa tiini mmote wa khuntti ya Abiiya aari wiitthiwaaye Zakariiya. Muukhaawe aari wiitthiwa Elizabeeti aari woojama wa mahaakhimu a tiini. <sup>6</sup> Oowiiri aya aari atthu ookhweele nkathhi wa mwentto wa Nnyizinku na ooshututela wa waamineyavo kano na oruma wooshi wa Mbwana. <sup>7</sup> Elizabeeti khaarina mwaana mwaasa woohiina mavokozi na oowiiri aya aari awuuluvala.

<sup>8</sup> Siikhu moote Zakariiya aari okhola khaazi yoohaakhimu wa tiini Nnyuupa wa Nnyizinku Yeruzaleemu, mwaasa yoori yaari zwaamu ya khuntti yawe okhola khaazi yaya etile. <sup>9</sup> Nkhama ethiipo aazowere-liyeeyo attunkhulu a tiini, ye aathawuliwe nkathhi wa nasipu yoori asala akhoza ovupa puuro ttakatthiifu ya Mbwana. <sup>10</sup> N'ooifiya wakathi wookhoza ovupa, atthu ooshi apale aari vaje aari ovira alompaka.

<sup>11</sup> Aphano nlayikha la Mbwana khunteela Zakariiya nkhono-nlume vaalitaari onkhoziwaavo ovupa. <sup>12</sup> Wakathi ye ooniyeovo nlayikha ntthile, khwiya wooshanka na wa woova channu. <sup>13</sup> Nlayikha kumuza yoori: “Ohoove Zakariiya! Nnyizinku asiila lompa yawo; muukhaawo Elizabeeti onteela ompattha mwaana. Weeyo onteela ontthaja nzina la Yaahaya. <sup>14</sup> Ye onttela wiiya furaha yootuveliwa wawo, atthu a waatta anteela ofurahela ovokoliwa wawe, <sup>15</sup> maana ye onteela wiiya ntatkhuze mmakhono wa Mbwana Nnyizinku. Khanteela onywa viinyu wala onywa vitthu zoohapala. Onttela wiiya wa wiitaazaniwa Rooho Ttakatthiifu ari mwirukulu wa mamaawo. <sup>16</sup> Onteela owaataana atthu awaatta a Ezirayeele wa Mbwana Nnyizinku aya. <sup>17</sup> Onteela operekhiwa ti Mbwana na onttela wiiya wookhomaala na woowahi nkhamma napiyu Aliyaasi, yoori azukulise rooho za apaapa eeyane osiliana na aanaaya, na yoori awaazukuluse anamakhijili eettettise haakhi, toowo phi anttelaaavo ozukulisa rooho zaya yoori ampokherele Mbwana ataaka.”

<sup>18</sup> Aphano Zakariiya khuuzela nlayikha ntthile yoori: “Kinteela ohakikhi toovi ethu yaya eto? Miyo kooluvala na muukhaaka oolulava.”

<sup>19</sup> Khujipu nlayikha liraka: “Miiyo ki Jipiriilu, kiniiya vamote na Nnyizinku, akiruma yoori kite kiwuuze hapari epi zooshapweya. <sup>20</sup> Wiiya khukhupaleeni mattakhuzi apa kiwuuziyeozy, onttela wiiya woohit-takhuli mpakha siikhu zinttelaaye orettikhana vitthu epi. Zintela orettikhana wakathi aya otthuupo.”

<sup>21</sup> Nalelo atthu aari onwejaaye Zakariiya khushanka mwaasa woorupaza Nnyupa wa Nnyizinku. <sup>22</sup> N'oosaruwa, khuhisala awahi ottakhulana atthu apale. Yo khujuwa yoori wanteeliye wahayi\* Nnyupa wa Nnyizinku. Khwiiya woohittakhuli khusala attakhula na makhono.

<sup>23</sup> Wakathi eeshisiyevo siikhu zookhola khaazi z'oottunkhulu wa Nnyupa wa Nnyizinku, khurutela owawe. <sup>24</sup> Paata ya toole, muukhaawee Elizabeeti khwiimittha, khuhisala asaruwa nnyupa mpakha nyeezi mithaanu. <sup>25</sup> Khuri: "Aphano Mbwana ajipu lompa yaka, eeshisa haaya etile kaariina na atthu."

*Onlaleyiwa ovokoliwa wa Yinsa*

<sup>26</sup> Mweezi wasiitha wa erukulu ya Elizabeeti, Nnyizinku khuruma nlayikha Jipiriilu olawa sitati ya Kalileya nti wa Nazareeti <sup>27</sup> yoori lilawe wa mwaari mmote woohijansiliwi aari wiithiwaaye Mariyamu, aaposiweeyo ti shapu mmote aari wiithiwaaye Yuusufu woojama wa mfwalume Daawuuda. <sup>28</sup> Nlayikha ntthile n'onsikana khumuuzo yoori: "Heeri yiye vamote na-weyo Mariyamu! O wooziti oshapweyiwa, Mbwana ori vamote na-weyo."

<sup>29</sup> Ye khwiiya woozinkireya mwaasa wa mattakhuzi apale, khuvira apheliezaka maana a hapari zaya epile. <sup>30</sup> Nlayikha khurutela omuuza liraka:

"Ohoove Mariyamu,  
wapattha rehema omaasho wa Nnyizinku.

<sup>31</sup> Onteela wiimittha ompatthe mwaana wanlume  
ontthaje nzina la Yinsa.

<sup>32</sup> Ye onteela wiiya ntthunkhulu,  
nka eetthiwaka Mwaana wa Nnyizinku Nwulu wa Pinkuuni.

Mbwana Nnyizinku onteela omwinkha  
ofwalume wa papaawe Daawuuda.

<sup>33</sup> Na onteela wiiya mfwalume wa Ezirayeele khwa mileele,  
ofwalume awe khunteela wiisha."

<sup>34</sup> Aphano Mariyamu khuuzela nlayikha yoori: "Zinttela orettikhana toovi na miiyo akininjuwa nlume?"

<sup>35</sup> Nlayikha khujipu liraka: "Rooho Ttakatthiifu ontta owiishukhela, owahi wa Nnyizinku Nwulu wa Pinkuuni onttela wuufinikha na mwiivuuli awe. Ti eto Mwaana onttelaaye ompattha, onteela wiithiwa Ttakatthiifu, Mwaana wa Nnyizinku. <sup>36</sup> Omoone jamaayo Elizabeeti, otule yaari oriwakaaye khanvokola, ila apha na wuuluvala wawe nasaapi eti eemiththa opu mweezi wasiitha. <sup>37</sup> Maana, mmakhono wa Nnyizinku khayiivo etthu moote ehinwaheyaaye."

<sup>38</sup> Mariyamu khuri: "Kiri raati miiyo karumeya wa Mbwana; mattakhuzi apa onlupaaye phi arettikhane khwa miiyo." Nlayikha ntthile khulaavo khulawa.

*Mariyamu oninthotola Elizabeeti*

<sup>39</sup> Ziviriyeovo siikhu, Mariyamu khujilokothela khusala alawa na waakuva sitati moote yaari nti wa nnyaako za Yudeya. <sup>40</sup> N'oofiya khuvira nnyupa owawe Zakariiya khunchelisa Elizabeeti. <sup>41</sup> Ye n'osila

\* <sup>1:22</sup> Maana a wahayi othoonyeziwa wa manapiyu nkathhi wa mattakhuzi, ti Nnyizinku.

mwacheliwa etile ya Mariyamu, mwaana aari mwiirukulu mwawe khujisakhinya. Elizabeeti khwiiya wa wiitaazaniwa Rooho Ttakatthiifu.  
<sup>42</sup> Khukhuwa na kuvu araka:

“Wooparikhiiyiwa ti weyo Mariyamu  
 vakathi wa aakha,  
 na wooparikhiiyiwa mwaana oto  
 ariiye mwiirukulu mwawo!

<sup>43</sup> Miiyo ki paani wooteela wooniwa ti maama wa Mbwanaaka?  
<sup>44</sup> N'ooсиila mwacheliwa yawo, mwaana ariiye mwiirukulu mwaka eetta ojisakhinya wafurahavo. <sup>45</sup> Wooparikhiiyiwa ti weyo okhupaliyeeyo yoori anteela orettikhana mattakhuzi apa wuuziweeyo a phantte ya Mbwana.”

*Oshukhuru wa Mariyamu*  
<sup>46</sup> Aphano Mariyamu khuri:

“Nafusi yaka enlaleya owula  
 wa Mbwana,  
<sup>47</sup> Rooho yaka ti yomfurahela  
 Nnyizinku namuusuru aka,  
<sup>48</sup> mwaasa yoori Yeakuupuwela  
 miiyo karumeyaawe woohiitaali mmaasho.  
 Waaza attaapha, peewu za atthu ooshi  
 zinttela okiittha yoori muukha wooparikhiiyiwa,  
<sup>49</sup> mwaasa yoori Nnyizinku Woowahi  
 arettu vitthu khuluzeene muuhaayi mwaka;  
 nzina lawe ttakatthiifu.  
<sup>50</sup> Ye oniwaahurumiya atthu a peewu zooshi apale animoovaaye.  
<sup>51</sup> Aretta vitthu khuluzeene na makhono awe,  
 khuwaamwaza apale oojikhupali khwa shawuri za nroho mwaya.  
<sup>52</sup> Awaalaza afwalume ohaakhimu aya  
 khuwaalansa atthu apale oojipushuwisa.  
<sup>53</sup> Aweetaaza vitthu apale ariina jala, na  
 khuweekara mathaajiri makhonoru.  
<sup>54</sup> Amwaawuni karumeyaawe Ezirayeele,  
 oopuwelaka huruma aarinaaye  
<sup>55</sup> na Eburahiima na peewu yawe khwa mileele,  
 nkhamma ethiipo aawooziyeego amarehemu apapazeththu.”

<sup>56</sup> Mariyamu eekhaliye nyeezi mittathu wa Elizabeeti nawiisha khu-rutela owawe

*Ovokoliwa wa Yaahaya Namoosa*

<sup>57</sup> Khufiya wakathi wa Elizabeeti opattha ekumi, khunvokola mwaana wanlume. <sup>58</sup> Anamwaattamanani awe na ajamaaze khusiila elupiwaka huruma khuluyeene Mbwana amooneleyeyo Elizabeeti, khulawa khufurahi vamote na-ye.

<sup>59</sup> Efiyyevo siikhu yanaane, mwaana otule khulawa khukhiriysiwa khusala atakha otthajiwa nzina la papaaawe Zakariiya. <sup>60</sup> Ila mamaawe khujipu araka: “Ii wala! Nzina lawe zinttela wiya Yaahaya.”

<sup>61</sup> Yo khulupa yoori: “Weeyo khuna jamaayo ariina nzina laya nttho!”

<sup>62</sup> Aphano khwinkhiwa alama papaawe yoori lijuwiwe nzina aari otakhaaye onthaja mwaana otule. <sup>63</sup> Zakariiya khuveka lipawu ntiithiiru, khwaatikhavo yoori: “Nzina lawe ti Yaahaya.” Athu ooshi khushanka. <sup>64</sup> Nasaapiru Zakariiya milomo zawe khufunuwa na nlimi lawe khushashuwa, khwaaza ottakhula ansifwaka Nnyizinku. <sup>65</sup> Anamwaattamanani awe ooshi khwiya awoova, hapari epile khumwazeyela nti wooshi wa nnyaako wa Yudeya. <sup>66</sup> Athu ooshi aasiiliyeeyo khusala oopuwela oozelanaka yoori: “Mwaana aya otu onttela wiiya paani?” Nkhono wa Mbwana ori vamote na-ye.

*Liipo la Zakariiya*

<sup>67</sup> Zakariiya paapa wa mwaana otule, khumwiitaala Rooho Ttakaththifu khwaaza olaleya mattakhuzi a Nnyizinku araka:

<sup>68</sup> “Asifwiwe Mbwana Nnyizinku,  
    Nluku wa Ezirayeele,  
ateeliyeeyo owaawuni  
    na owaataphula athu awe.

<sup>69</sup> Nnyizinku aninkha  
    nusura yookhomaala  
khwa ojama wa karumeyaawe mfwalume Daawuuda,

<sup>70</sup> nkhamma aalupiyeezo rakuzeene  
    khwa manapiyu awe oottakatthiifu.

<sup>71</sup> Ye aanaahitiye onuuusuru  
    nkaththi wa maatuwi etthu,  
anitaphulaka mmakhono wa apale  
    aniiphiiriwaaye ti fweyo,

<sup>72</sup> awaathoonyezaka huruma amarehemu apapazeththu,  
    na oopuwelaka wahati woottakatthiifu aarettiyeeyo na-yo.

<sup>73</sup> Na olapha aalaphisaniyeeyo  
    na marehemu papeeththu Eburahiima,

<sup>74</sup> alaphaka yoori aari oteela  
    onoopola mmakhono wa maatuwi etthu,

yoori ninrumeyeYe woohoovi,

<sup>75</sup> woottakatthifubo na washariyavo omaasho wawe  
    siikhu zooshi zoohaayi etthu.

<sup>76</sup> Weeyo mwanaka onteela wiitthiwa oriwa napiyu wa Nnyizinku  
    Nwulu wa Pinkuuni,  
    onttela wiiya namalokozisiwa wa Mbwana

yoori omwaattalelele tarikhi zawe,

<sup>77</sup> owaalaleyelaka athu awe  
    nusura entaaye khwa nswammaha

wa twampi zaya,

<sup>78</sup> maana Nnyizinku ethu ti wa huruma.

    Ontelela othoonyeza nuuru yawe vakatthi vetthu,

<sup>79</sup> ewaamwasikhele apale  
    ari n'yiiza na vamwiivuuli woofwa,  
    yoori eneettettise ntarikhi ya heeri.”

<sup>80</sup> Mwaana otule khuvira awulaka na rooho yawe khusala ekhomaala, khwiikhala makuluttu mpakha siikhu apuweleliyeevo vakaththi wa atthu a Ezirayeele.

## 2

### *Ovokoliwa wa Yinsa*

<sup>1</sup> Wakathi aya opo Seezari Akuushitu mfwalume nwulu, aaru-miye yoori atthu ooshi apale a nkatthi woofwalume wa Rooma aa-rina yoolawa waatikhiwa nwarakha ya afwalume. <sup>2</sup> Waatikhiwa opo wamwanzo waarettikhaniye Kureeniyo ari mfwalume wa Siiriya.

<sup>3</sup> Wakhula ntthu khusala alawa nti aavokoliweewo olawa waatikhiwa.

<sup>4</sup> Yuusufu na-ye khulankha Kalileya sitati ya Nazareeti, khusala alawa Yudeya sitati ya Belemu ottuukho aavokoliweewo wa mfwalume Daawuuda. Ye eetteliye waatikhiwa maana aari woojama wa Daawuuda. <sup>5</sup> Aalawiye na mposaawe Mariyamu ari wa wiimitha.

<sup>6</sup> Siikhu zaya epo ari Belemu ottuukhule, Mariyamu khumfiyela siikhu zoopattha ekumi. <sup>7</sup> Khumpattha mwaana w'oomwanzo awe wanlume, khumputaputela vakuwo, khuntattikhela nkashothi zaari ojaamo nyama, mwaasa yoori khaarina puuro yoomaka.

### *Malayikha na Amakhampuzi*

<sup>8</sup> Nti otthuupule aariwo amakhampuzi aari wiikhalaaye ntthuttu ashukisaka pwittipwitthi zaya na weekesela osikhu wooshi. <sup>9</sup> Nlayikha la Mbwana khwiishukhela attaphale aariivo amakhampuzi apale. Nu-uru ya Mbwana khuwaamwasikhela, khwiiya awoova channu. <sup>10</sup> Ila nlayikha ntthile khuwooza yoori: “Mwihoove! Miiyo kateela owuuzani hapari zooshapweya za furaha khuluyeene, enttelaaye wiiya ya atthu ooshi. <sup>11</sup> Leelo ethiiti, sitati ya Daawuuda mwavokoleliwa Namuusuru eeyiye Al-Masiihu, Mbwana. <sup>12</sup> Alama yenu ti eto: mwininsikana mwaana aputaputeliwe vakuwo, attattikheliwe nkashothi enjakaamo nyama.”

<sup>13</sup> Nasaapiru khupuwa malayikha a waatta, khuphakanyeya na ntthile lamwanzo, khusala ansifu Nnyizinku araka:

<sup>14</sup> “Asifwiwe Nnyizinku otulu,  
na vathi apha heeri yiiye  
vamote na atthu ooshi awaatakheliyeyo osaana.”

<sup>15</sup> Wakathi malayikha apale aruteliyeevo pinkuuni, amakhampuzi khuuzana yoori: “Nlaweni Belemu noone etthu erettikhaniyeewo, etile Mbwana anuuziyeyo.”

<sup>16</sup> Yo khuhirupazi, khulawa khunsikana Mariyamu na Yuusufu na mwaana otule attattikheliwe nkashothi zinjakaamo nyama.

<sup>17</sup> N'oomoona mwaana otule, yo khusala alupa epile ooziweezo ti nlayikha monkoni wa Ye. <sup>18</sup> Ooshi apale aasiiliyeyo hapari aari olupaaye amakhampuzi apale, khwiiya ooshanka. <sup>19</sup> Ila Mariyamu aatthiiye varoho vawe vitthu epile aari osilaazo, khusala apheleleza maana aya. <sup>20</sup> Paata ya toole, amakhampuzi apale khurutela ntthuttu anttitthimisaka Nnyizinku na ansifwaka khwa zooshi aasiiliyeyo na oniiyeezo, ethiipile nlayikha laawooziyeyo.

### *Okhiriya wa Yinsa*

<sup>21</sup> N'ooifiya siikhu naane, mwaana otule khukhiriysiwa, khutthajiwanzina la Yinsa, nttintthile aalupiyeyo nlayikha ahineemitthiwe.

*Othoonyeziwa wa Yinsa Nnyupa wa Nnyizinku*

<sup>22</sup> N'ooivira siikhu zootwahareshiwa Mariyamu na Yuusufu, nkhamaa etthiipo zaari olupaazo kano za napiyu Munsa, khunthuula mwaana otule khunlawana Yeruzaleemu yoori enkheleliwe mmakhono wa Mbwana <sup>23</sup> maana yaatikhwa nkano wa Mbwana yoori: "Mwaana wamwanzo wanlume ona yoophakuliwa khwinkhiwa Mbwana." <sup>24</sup> Yuusufu na Mariyamu khwinkha twaha nkhamaa etthiipo zinrumaazo kano za Mbwana: "makhoko mawiri ama jiwa piiri."

<sup>25</sup> Wakathi aya opo Yeruzaleemu aariwo mwinyi mmote aari wiithiwaaye Simiyooni, aari wa shariya na woomoova Nnyizinku. Ye aari owejela wuusurwiwa wa atthu a Ezirayeele. Rooho Ttakatthiifu yaari vamote na-ye <sup>26</sup> na khunthoonyeza yoori khaari ofwa ahimooneeni Al-Masihu wa Mbwana. <sup>27</sup> Simiyooni khweetta Nnyupa wa Nnyizinku alokozie ti Rooho Ttakatthiifu, wakathi apapaze antaniyeevo Yinsa yoori aretteliwe etile yaalupiweeyo nkano, <sup>28</sup> Simiyooni khunthuula mwaana otule mmakhono mwawe khunshukhurwela Nnyizinku araka:

<sup>29</sup> "Mbwanaka, aphano kimfwa na heeri  
maana yarettikhana etile waahitiyeeyo.

<sup>30</sup> Koona nusura yawo  
<sup>31</sup> owaattaleleliyeeyo atthu ooshi.

<sup>32</sup> Ye nuuru yoomwaasikhela khabila zooshi za amalapo\*  
na siifwa ya atthu awe a Ezirayeele."

<sup>33</sup> Papaawe na mamaawe khwiya ooshanka mwaasa wa mattakhuzi apale aari onlupezaaye Simiyooni mwaana otule. <sup>34</sup> Simiyooni khuwaa-parikhya, khumuza Mariyamu maama wa mwaana yoori: "Mwaana otu Nnyizinku anthawula yoori atthu awaatta a Ezirayeele ajikwise ama awoosuru. Ye alama ya Nnyizinku ila atthu a waatta anlawa ankathale. <sup>35</sup> Mwaasa wa ethiito, wuupuwela wa nroho wa atthu a waatta onteela osaruwa; weeyo Mariyamu enteela wuupattha huzuni khuluyeene nkhamaa phanka yoonoliwa yoori eshije nafusi yawo."

<sup>36</sup> Attaaphale aarivo sharifwa mmote aari wiithiwaaye Aana. Aari mwaana wa Fwanuweele wa lihimo la Asheeri, aari wa wuuluvala. Eekhalaniye mannawe nyaakha sapa, <sup>37</sup> paata yomfwela mannawe, khuhiraliwi mpakha opattha nyaakha thamaaniini na mine. Khaari olaamo Nnyupa wa Nnyizinku nthana na osikhu, khaazi yawe yaari omwaaputu Nnyizinku ofuka na olompa. <sup>38</sup> Wakathi otthuupo khwaaza onshukhurwela Nnyizinku attakhulaka monkoni wa mwaana otule, awoozaka atthu ooshi apale aari owejelaaye wookhowa wa Yeruzaleemu.

<sup>39</sup> Yuusufu na Mariyamu nawiisha oretta zooshi epile zaari orumaaizo kano ya Mbwana, khurutela Kalileya sitati ya Nazareeti owaya.

<sup>40</sup> Mwaana khusala awula saaneene na khwiya njuwi nwulweene, rehema ya Nnyizinku yaari vamote na-ye.

*Yinsa Nnyupa wa Nnyizinku*

\* <sup>2:32</sup> Amalapo maana aya atthu ooshi apale ooiiyi mayahuuti.

<sup>41</sup> Wakhula mwaakha Mariyamu na Yuusufu aari weettaka Yeruzaleemu onjampo la Paashikowa. <sup>42</sup> Wakathi Yinsa apatthiyeevo nyaakha khumi na miwiri, Mariyamu na Yuusufu khulankha khusala alawa onjampo la Paashikowa nkhamma ethhiipile aazowereliyeezo, alawaka anthuuliye Yinsa. <sup>43</sup> N'oofiya khuretta njampo ntthile khwiisha, khusala arutela owaya. Yinsa khusala Yeruzaleemu, mamaawe na papaawe woohijuwi. <sup>44</sup> Yo aari woona yoori ori khuntti etile yaari orutelaaye ont, khuvira siikhu ntero eettaka weettetta, aphano khwaaza omweekesa awoozelaka ajamaaze na ashirikhaawe. <sup>45</sup> Khuhisala ampattha, khurutela Yeruzaleemu olawa omweekesa. <sup>46</sup> Eviriyevo siikhu ttatthu, khunsikana ari Nnyupa wa Nnyizinku eekhaliye na anamasomisa awulu a tiini eettaka onsiila na omuuzel. <sup>47</sup> Ooshi apale aari onsiilaaye khunshankela mwaasa woojuwa wawe na nanna aari owaajipwaazo. <sup>48</sup> Aphano apapaze n'oomoona khushanka, mamaawe khumuuzela araka: "Mwanaka! Niini epi oniretteliyeezo? Miiyo na papaawo naari wa wantipweya naaza raku oweekesa."

<sup>49</sup> Ye khujipu yoori: "Mwaari okeekesela-ni? Khamwaari ojuwa yoori miiyo kaarina ya wiiya Nnyupa wa Paapa?" <sup>50</sup> Yo khuhiveeleyi ethu aari olupaaye.

<sup>51</sup> Yinsa khurutela nti wa Nazareeti na papaawe na mamaawe khusala awaashututela. Mamaawe aari oretta athokorelaka vitthu epile zooshi nroho mwawe. <sup>52</sup> Yinsa khusala avira awulaka nkaththi wa ojuwa, hirimu na nrehema ya Nnyizinku na atthu.

### 3

#### *Otafusiri wa Yaahaya Namoosa*

<sup>1</sup> Mwaakha wakhuumi na thaanu Seezari Tibeeriyu ari mfwalume nwulu wa Rooma, Pontiyu Pilaatu ari liwaali wa Yudeya. Herooti ari nsatoro wa Kalileya na ttwiye Filiipe na-ye ari wa Itureeya na Tarakhoniiti, Lusaaniya ari nsatoro wa Abileen. <sup>2</sup> Anaasi na Khayiifwa aari mahaakhimu awulu a tiini. Mwaakha aya pi otthuupo enkhiweeyo mattakhuzi a Nnyizinku Yaahaya mwaana wa Zakariiya makuluttu. <sup>3</sup> Ye khuzukulela miti zooshi zaattameliyeyo muuttho Yorotaani, awoozaka atthu yoori athupwiye twampi zaya aswaamihiiwe ti Nnyizinku na oosiwe. <sup>4</sup> Nkhama ethhiipo zaatkheweeyo nkithaapu ya napiyu Ezayiyya: "Owaapho ntthu ankhuwaaye n'yaara araka:

'Mwaattalele tarikhi ya Mbwana,  
na mwishapweyise miphiiitelo zaya.'

<sup>5</sup> Makunte ooshi asireliwe,  
nyaako na kulu zooshi zipweiwi,  
tarikhi zoonyokowa zookoleliwe,  
epile zoothipeya zishottheliwe.

<sup>6</sup> Atthu ooshi anteela woona  
nusura ya Nnyizinku.'

<sup>7</sup> Yaahaya khusala awooza atthu apale aari otaaye woosiwa araka: "Khapila za nyookha! Paani awuuziyeenini otthira hukhumu ya Nnyizinku entaaye?" <sup>8</sup> Mwirette vitthu enthoonyezaaye yoori khweele mwathupwiya, khahiyoo ojilupeza yoori 'Eburahiima ti papeetthu'. Miyo kiniuuuzani yoori khwa liwe ntthi Nnyizinku onwahi owaattala

aana a Eburahiima.<sup>9</sup> Nshokha latthiiwa nshini wa mitathaari za miitthi, wakhula muutthi ohiniimaaye mishumo zooshapweya ontta oshijawa weeseleeliwe vamoottho.”

<sup>10</sup> Atthu khusala amuuuzela araka: “Apho nirette niini?”

<sup>11</sup> Ye khuwaajipu yoori: “Otule ariina hempe piiri, moote amwinkhe otule ahina. Otule ariina etthu-yoojiwa awaameele apale ahina.”

<sup>12</sup> Khulankha anamariphisa lumpuru yoori alawe oosiwe khumuuzela Yaahaya yoori: “Mwanliimu, khi fweeyo nirette niini?”

<sup>13</sup> Ye khuwaajipu araka: “Mwihiriphise mwizitisa hisapu mwirumi-weeyo.”

<sup>14</sup> Anajanka na-yo khumuuzela yoori: “Khi fweeyo niri toovi?” Khuwaajipu yoori: “Mwihiwaanyakanye atthu mwiroromelaka kuvi zenu, wala mwihiwaalokoveze vitthu zoohiiyi ethiipo, mwishukhur-wele ethiito mwimpattaaye.”

<sup>15</sup> Nroromelo wa atthu khusala ovira weekezeleyaka oonaka yoori Yaahaya ti Al-Masihu. <sup>16</sup> Ye khuwooza ooshi apale aariivo yoori: “Weekhweele miiyo kiniwoosanani maati, ila onta nkina ariina owahi wookiziti miiyo, wala akinsuhi ofukula mikhoysi za jampala zawe. Ye onteela owoosani na Rooho Ttakatthiifu na moottho.” <sup>17</sup> Onaaye fosholo mmakhono mwawe anttelaaaye ophakulana tiriku na maveya. Athuule tiriku atthe vanthala vawe, maveya aya eeselele vamoottho ohinzi-maaye.”

<sup>18</sup> Khwa mattakhuzi makina a waatta, Yaahaya aari owaahirimiza na owaatafusirela atthu hapari zooshapweya. <sup>19</sup> Na khunshowera nsatoro Herooti mwaasa wonrala Herodiya muukha wa ttwiye na retta vitthu zootakhala za waatta. <sup>20</sup> Elottelanaka Herooti khweekezelaa zooshi epile, khuruma ofukeliwa Yaahaya nkalapooso.

### *Woosiwa wa Yinsa*

<sup>21</sup> Wakathi Yaahaya aari owoosaavo atthu ooshi apale, Yinsa na-ye khuta attaphale oteela woosiwa. Ye alompaka pinku khufukuwa, <sup>22</sup> Rooho Ttakatthiifu khumwiishukhela nkhamma jiwa. Khusileya huula yoolankha pinkuuni eraka: “Weeyo o mwanaka kinuuphetachaaye na wookituvela channu.”

### *Ntathaari w'oojama wa Yinsa*

<sup>23</sup> Yinsa wakathi aaziyeovo olaleya hapari zooshapweya, aarettiye arina nyaakha talaathiiini. Ye aari mwaana wa Yuusufu nkhamma ethiipo atthu aari waakanyaeraazo,

Yuusufu aari mwaana wa Heeli,

<sup>24</sup> Heeli aari mwaana wa Mataati,

Mataati aari mwaana wa Leevi,

Leevi aari mwaana wa Melikhi,

Melikhi aari mwaana wa Yanaayi,

Yanaayi aari mwaana wa Yuusufu.

<sup>25</sup> Yuusufu aari mwaana wa Matathiiya,

Matathiiya aari mwaana wa Amooshi,

Amooshi aari mwaana wa Nahuumu,

Nahuumu aari mwaana wa Heshiili,

Heshiili aari mwaana wa Nakhaayi,

<sup>26</sup> Nakhaayi aari mwaana wa Maathi,

- Maathi aari mwaana wa Matathiiya,  
 Matathiiya aari mwaana wa Shemeeni,  
 Shemeeni aari mwaana wa Yosheekhi,  
 Yosheekhi aari mwaana wa Yuuda,
- <sup>27</sup> Yuuda aari mwaana wa Yohanaani,  
 Yohanaani aari mwaana wa Reesa,  
 Reesa aari mwaana wa Zorobabeeli,  
 Zorobabeeli aari mwaana wa Sheyalitiyeeli,  
 Sheyalitiyeeli aari mwaana wa Neeri,
- <sup>28</sup> Neeri aari mwaana wa Meelikhi,  
 Meelikhi aari mwaana wa Aadi,  
 Aadi aari mwaana wa Kosaamu,  
 Kosaamu aari mwaana wa Elimadaamu,  
 Elimadaamu aari mwaana wa Eeri,
- <sup>29</sup> Eeri aari mwaana wa Yoshuwa,  
 Yoshuwa aari mwaana wa Eliyezeeri,  
 Eliyezeeri aari mwaana wa Yoriimu,  
 Yoriimu aari mwaana wa Mathaati,  
 Mathaati aari mwaana wa Leevi,
- <sup>30</sup> Leevi aari mwaana wa Simiyooni,  
 Simiyooni aari mwaana wa Yuuda,  
 Yuuda aari mwaana wa Yuusufu,  
 Yuusufu aari mwaana wa Yonaamu,  
 Yonaamu aari mwaana wa Eliyakhiimu,
- <sup>31</sup> Eliyakhiimu aari mwaana wa Meleeya,  
 Meleeya aari mwaana wa Meena,  
 Meena aari mwaana wa Matatha,  
 Matatha aari mwaana wa Nathaani,  
 Nathaani aari mwaana wa Daawuuda,
- <sup>32</sup> Daawuuda aari mwaana wa Yeese,  
 Yeese aari mwaana wa Obeedi,  
 Obeedi aari mwaana wa Bowaazi,  
 Bowaazi aari mwaana wa Salimooni,  
 Salimooni aari mwaana wa Nashooni,
- <sup>33</sup> Nashooni aari mwaana wa Aminadabu,  
 Aminadabu aari mwaana wa Adimiini,  
 Adimiini aari mwaana wa Ariini,  
 Ariini aari mwaana wa Hesherooni,  
 Hesherooni aari mwaana wa Pereezi,  
 Pereezi aari mwaana wa Yuuda,
- <sup>34</sup> Yuuda aari mwaana wa Yaakhumpa,  
 Yaakhumpa aari mwaana wa Esiyaakha,  
 Esiyaakha aari mwaana wa Eburahiima,  
 Eburahiima aari mwaana wa Teera,  
 Teera aari mwaana wa Nahoori.
- <sup>35</sup> Nahoori aari mwaana wa Serukhi,  
 Serukhi aari mwaana wa Reewu,  
 Reewu aari mwaana wa Peleekhi,  
 Peleekhi aari mwaana wa Ebeeri,  
 Ebeeri aari mwaana wa Saala,
- <sup>36</sup> Saala aari mwaana wa Kayinaamu,  
 Kayinaamu aari mwaana wa Arifwakisaati,  
 Arifwakisaati aari mwaana wa Sheemu,

- Sheemu aari mwaana wa Nuuhi,  
 Nuuhi aari mwaana wa Lameekhi,  
<sup>37</sup> Lameekhi aari mwaana wa Methusaleemu,  
 Methusaleemu aari mwaana wa Henookhi,  
 Henookhi aari mwaana wa Yareeti,  
 Yareeti aari mwaana wa Mahalaleeli,  
 Mahalaleeli aari mwaana wa Kayinaamu.  
<sup>38</sup> Kayinaamu aari mwaana wa Enooshi,  
 Enooshi aari mwaana wa Seethi,  
 Seethi aari mwaana wa Adamu,  
 Adamu wa Nnyizinku.

## 4

### *Ozayiniwa wa Yinsa ti Sheethwani*

<sup>1</sup> Yinsa aarutiye omutto Yorotaani ari wa wiitaala Rooho Ttakathifiu, aalokoziwe ti Rooho Ttakathifiu ethiito mpakha makuluttu. <sup>2</sup> Nttumpho khuzayiniwa ti Sheethwani siikhu arupayiini. Siikhu zaya epile khaari oja etthu, nawiisha khunkhola jala.

<sup>3</sup> Sheethwani khumuza yoori: “Nkhama o mwaana wa Nnyizinku orume liwe nttho lithatuwe liiye phaawu.”

<sup>4</sup> Ila Yinsa khunjipu araka: “Yaatikhwi nkithaapu yoori: ‘Khahiyophaaawu paasi enimwinkhaaye ohaayi pinaatamu’.”

<sup>5</sup> Sheethwani khunweza vatulu, nasaapiru khunnoza ofwalume wooshi w'oolumwenku. <sup>6</sup> Khumuza yoori: “Kintta owinkha ofwalume na siifwa z'oolumwenku opu wooshi, mwaasa yoori zooshi kenkhiwa miiyo, na miiyo kinimwinkha otule kinintakhelaaye. <sup>7</sup> Amana okikokhorela miiyo na khukaaptu, zooshi zintta wiiya zaawo.”

<sup>8</sup> Yinsa khunjipu yoori: “Nttakhuzi la Nnyizinku lalupa yoori: ‘Omwaaptu Mbwanaawo Nnyizinku na onrumeyele othuuto paasi.’”

<sup>9</sup> Aphano Sheethwani khunlawana Yeruzaleemu khunweza vatulu woolepavo wa Nyuupa ya Nnyizinku khumuza yoori: “Nkhama o mwaana wa Nnyizinku ojeeselele vathi aphale, <sup>10</sup> maana yaatikhwiwa nkithaapu yoori:

‘Ye onta oruma malayikha awe awinanele.

<sup>11</sup> Atthaapo antta wuukholelala na makhono aya  
 yoori ohikwakwanttuwe valiwe.’”

<sup>12</sup> Yinsa khunjipu yoori: “Nttakhuzi la Nnyizinku lalupa yoori: ‘Ohimweeze Mbwana Nnyizinku awo.’”

<sup>13</sup> Sheethwani nawiisha onzayini wooshi, khumwaattuwa khusala ajejela wakathi wonkhweyela.

### *Yinsa onaaza khaazi yawe nti wa Kalileya*

<sup>14</sup> Aphano Yinsa khurutela Kalileya, owahi wa Rooho Ttakathifiu ori vamote na-ye. Hapari zaari olupaaye monkoni wa ye khumwazeyela miti zooshi za nkerekhere. <sup>15</sup> Aari osomisa mmampyupa woosifwiwamo Nnyizinku, atthu ooshi khusala anttottopela.

<sup>16</sup> Khulawa mpakha sitati ya Nazareeti ohali aleliweewo. Siikhu ya saapatu khweetta nnyupa woosifwiwamo Nnyizinku nkhamma etthiipo aazowereliyezo. Khulankha yoori asome. <sup>17</sup> Khwinkhiwa kithaapu ya

napiyu Ezaaya. Khufunula khusala athola khusikana vahali yaatikhiveevo yoori:

18 "Rooho ya Mbwana  
eri vamote na-miyo,  
akithawaza yoori kiwaatafusirele  
hapari zooshapweya asikhini  
na olaleya otaphuliwa wa anamahuzunikha,  
owoonisa apale oochooni,  
owaavumulisa apale oohukhumwiwa,  
19 na olaleya yoori wafiya  
mwaakha wa rehema ya Mbwana."

20 Yinsa khufinikha kithaapu etile khumwinkha karumeya wa nnyupa woosifwiwamo Nnyizinku, Ye khwiikhala. Atthu ooshi apale aariimo khusala amweekesa. 21 Ye khuwooza yoori: "Leelo zarettikhana epile zaatikhiveeyo, ethiipi mwinttaaye wiisharu osila."

22 Atthu ooshi khusala anttottopela, na khwiiya ootikinisiwa mwaasa wa mattakhuzi a rehema aari olankhaaye nkhanyo mwawe, khusala oozelana yoori: "Khahi mwaana wa Yuusufu otu?"

23 Yinsa khuwooza yoori: "Khweele khweele mweeyo mwinlawwa mwakuuze kittaphi mmote enraaye toono: 'Tothoro ojivonise omweenyewe! Orette mmuti mwawo mphu minjuza nisiiliyeeyo epile orettiyeezo Kafwaranawu.'"

24 Khulupa theenya yoori: "Wookhwelle kiniwuuzani yoori khaavo napiyu mmote ankhupaliwaaye mmuti mwawe. 25 Na weekhweli wakathi wa napiyu Aliyaasi, Ezirayeele aariwo aakha oofweliwa pi amanna zaya wakathi yaafukiweevo pinku nyaakha mittatthu na nyeezi sitha, yaapuwiye jala miti zooshi. 26 Ila Nnyizinku khuhinrumi Aliyaasi Ezirayeele, okhule aari wiikhalaawo apale aya, khunruma Sarefathi tuniya ya Sitooni aariwo muukha mmote woofweliwa ti mannawa. 27 Siikhu za napiyu Elizeewu, Ezirayeele aariwo anamakuttula a waatta, khuhiivo hatha mmote aavonisiweeyo ila Naamani wa nti wa Siiriya ti ye aavonisiweeyo otthwe."

28 Atthu ooshi aari nnyupa woosifwiwamo Nnyizinku, n'oosiila mat-takhuzi apale aari olupaaye Yinsa yo khwiiphiiriwa. 29 Khwiikariwamo nsitati mphule khulawaniwa vamwaako yaajekiweevo sitati yaya etile, yoori ansukhumele vathi. 30 Ila Yinsa khuvira vakatthi vaya khusala alawa.

### *Yinsa onimwiikara sheethwani*

31 Paata ya toole Yinsa khwiishukhela sitati ya Kafwaranawu, nti wa Kalileya, khusala awaanozela siikhu ya saapatu. 32 Yo aari ooshankisiwa na onozela wawe, mwaasa yoori ntthakhuzi lawe laarina ofwalume.

33 Nnyupa woosifwiwamo Nnyizinku aarimo ntthu mmote aariina sheethwani. Aphano sheethwani khunyakula na kuvu zawe zooshi araka: 34 "Eeee! Onnitakhela-ni weeyo Yinsa wa Nazareeti? Wateela onankameza? Miyo kinuujuwa weeyo yoori o Ttakatthiifu wa Nnyizinku!"

35 Yinsa ansukisiye sheethwani araka: "Nyamala, mwaattuwe ntthu oto!" Attaaphale sheethwani khunkwisela vathi ntthu otule atthu eettaka omoona, khuhinvulalisi khumwaattuwa.

36 Atthu ooshi aari ooshankisiwa, khusala oozana atthaaporu: "Nttakhuzi-ni ntthi? Khwa ofwalume na owahi wawe otu onruma masheethwani khusaruwa!"<sup>37</sup> Aphano siifwa ya Yinsa yaamwazeyeliye miti zooshi za nkerekhere.

### *Yinsa ona owahi vatulu wa masheethwani na marati*

38 Yinsa khusaruwamo nnyupa woosifwiwamo Nnyizinku khweetta owawe Simawu. Nkhwewe Simawu aari nlwele hooma, yo khunveke-laza Yinsa yoori anvonise. 39 Ye khwiinama khwiikara hooma etile khunlikha, nasaapiru nunu otule khulankha khusala awaarumeyela.

40 Njuwa litupweelaka\* atthu ooshi apale aariina marati khusala atiseliwa Yinsa, Ye n'oowaattheela makhono n'oowaavonisa. 41 Theenya aarivo atthu a waatta aari owaasaruwaaye masheethwani anyakulaka araka: "Weeyo o mwaana wa Nnyizinku!" Yinsa khusala amaruwa alikhisaka masheethwani apale ottakhula, maana yo aari ojuwa yoori ye ti Al-Masiihu.

### *Yinsa onlaleya hapari zooshapweya*

42 N'oocha Yinsa khulankha khusala alawa mmakuluttu. Atthu a waatta khusala amweekesa, n'onsikana khuhisala atakha onlikha olawa.<sup>43</sup> Ye khuwooza yoori: "Enhithajiya theenya miiyo olawa sitati ki-inna olaleya hapari zoofwalume wa Nnyizinku, kaperekheliwa ethiipo."

44 Ye aari otafusiri mmanyupa woosifwiwamo Nnyizinku a Yudeya.

## 5

### *Yinsa oniwaakhuwela anakhiyoni awe a mwanzo.*

1 Siikhu moote, Yinsa aari nshini wa ntthatta la Kalileya, khuzukuleliwa pi atthu a waatta yoori asiile ntthakhuzi la Nnyizinku.<sup>2</sup> Ye khoona nyaatiya miwiri ziri vapatari wa ntthatta ntintthile, zaalikhewevo pi anamajiyi aari woosaaye matthavi aya. <sup>3</sup> Yinsa khupakhira mmwaatiya mmote waari wa Simawu khunvekela yoori asusisele mpahari, khwiikhala khusala awaanozela atthu.

4 Nawiisha onozela khumuza Simawu yoori: "Othuule mwaatiya awo mwilawe vahali wa wiichavo mwajijiye."

5 Simawu ajipwaka khuri: "Mbwana, naijiya osikhu na osikhu khuhipatthi etthu, wiiya walupa yoori neese, nintta weesa."

6 Yo khulawa khweesa matthavi aya khuula swi za waatta mpakha khusala avaruwa matthavi aya. <sup>7</sup> Khuwaakhuwela ashirikhaaya aari mwaatiya nkina yoori ate arinkaanye, khwiitaaza nyaatiya zaya zoomiwiri mpakha osaleela ozama.

8 Simawu Peeturu nawoona etthu etile yaarettikhaniyeeyo, khunkokhorela Yinsa amuuzaka yoori: "Mbwana, okisuse maana miiyo ki natwampi."<sup>9</sup> Simawu na ashirikhaawe khuzinkuwa mwaasa wa swi epile za waatta apatthiyeeko. <sup>10</sup> Yaakhumpa na Yaahaya, aana a Zebedayo, ashirikha a Simawu aari ojiyanaaye khwiilya ootkinisiwa.

\* 4:40 Otupweela wa njuwa siikhu ya saapatu mayaahuuti aariwoona yoori siikhu ttakatthiifu yavira.

Aphano Yinsa khumuuzu Simawu yoori: "Ohoove, waaza NASAAPI eti onttela wiiya namajiya wa atthu." <sup>11</sup> Khuwelelisa nyaatiya zaya nkulu, khulikha vitthu zaya zooshi khusala anlotta Yinsa.

*Yinsa oninvonisa namakuttula*

<sup>12</sup> Yinsa ari sitati moote, khuvira mwinyi mmote aariina makuttula. N'oomoona Yinsa khukokhora khusijiti khumuuzu araka: "Kinuuvekela yoori nkama watakha Mbwanaaka, kivonise."

<sup>13</sup> Ye khookola nkono awe khunsapa khumuuzu yoori: "Katakha vona!" Wakathi otthuupule khweele khuvona.

<sup>14</sup> Yinsa khumuuzu yoori: "Vitthu epi ohimuze hatha ntthu, ila olawe wajithoonyeze wa haakhimu wa tiini, othuuto oorettele twaha yoovonisiwa wawo nkama ethhiipile alupiyeezo napiyu Munsa, yoori wiiye oshaahiti vakatthi wa atthu aya apale."

<sup>15</sup> Aphano hapari zawe zaari ovira zimwazeyaka. Atthu a waatta khusala ata oteela osiila hapari, na oteela ovonisiwa marati aya. <sup>16</sup> Yinsa aari olaakavo n'oolawa makuluttu olompa.

*Ovonisiwa wa mwinyi woarakala*

<sup>17</sup> Siikhmoote Yinsa eetta onozela, apho vaya aari onozelaavo aarivo mafwarizeewu na anamanozela a kano aalankhiyeeyo miti mikina za Kalileya na Yudeya mpakha Yeruzaleemu. Owahi wa Mbwana waari vamote na-ye woowaavonisa alwele. <sup>18</sup> Aphano atthu akina khuntana mwinyi aariina supiyaani anttattikheliye vanrepa, yo aari otakha omniphenyisa ampwehe omaasho wa Yinsa. <sup>19</sup> Ila nawoona yoori khayiivo kiphenyo mwaasa wa atthu waatta, khuwela vatulu wa nyuupa khutamula liphala khumiishushela vakatthi wa atthu omaasho wa Yinsa.

<sup>20</sup> Ye nawoona amini aariina atthu apale, khumuuzu nasupiyaani otule yoori: "Swaahipu twampi zaho zaswaamihiwa."

<sup>21</sup> Aphano mafwarizeewu na anamanozela a kano khusala attettha araka: "Otu aya paani ankufurwaaye? Ti paani anwahaaye oswaamihi twampi woohiiyi Nyizinku?"

<sup>22</sup> Yinsa khujuwa eththu aari ofikhiraaye, khuwoozela yoori: "Mwashukulikhela-ni nroho mwenu?" <sup>23</sup> Yookhweya ti tiivi omuuza yoori twampi zaho za swaamihiwa ama yoori olankhe weettette?

<sup>24</sup> Apho mwijuwe yoori Mwaana wa Pinaatamu onaaye owahi wooswaamihi twampi vathi apha." Khumuuzu nasupiyaani otule yoori: "Olankhe othuule nrepa lawo olawe owawo." <sup>25</sup> Nasaapiru ntthu otule khulankha vakatthi wa atthu khuthuula nrepa lawe ntthile aattattikheliweeveo khusala alawa owawe ansifwaka Nyizinku.

<sup>26</sup> Atthu ooshi aariivo khwiya ooshanka na woova channu, khusala ansifu Nyizinku araka: "Leelo noona vitthu zootikinisa."

*Okhuwelila wa Leevi\**

<sup>27</sup> Paata yawiisha vitthu epile, Yinsa khulankha khusala alawa, khun-sikana mwinyi mmote aari oriphisaaye lumpuru aari wiithiwaaye Leevi eekhaliye vahali aari oriphisaavo malumpuru awe, khumuuzu yoori: "Okilotte." <sup>28</sup> Ye khulikha khaazi zawe zooshi khusala anlotta.

<sup>29</sup> Leevi khuretta njampo liwululene owawe vamote na Yinsa, aariivo theenya anamariphisa lumpuru akinoko aya na atthu akina eekhaliye

\* 5:26 Nzina ntthi la Leevi khwa luuka ya Ekereku linri Matewuzhu.

vamote na-ye.<sup>30</sup> Mafwarizeewu na anamanozela a kano khusala a waat-takhula anakhiyon a Yinsa araka: "Mwaasa aya niini mweeyo mwi-janaka na mwinywanaka anamariphisa malumpuru na anatwampi?"

<sup>31</sup> Yinsa khuwaajipu araka: "Akumi khanlawaniwa wa tothoro ila alwele,<sup>32</sup> miiyo akaawaateeliye anashariya kaawaateeliye anatwampi yoori alikhe oretta twampi."

### *Monkoni woofuka*

<sup>33</sup> Attu akina khumuza Yinsa yoori: "Anakhiyon a Yaahaya Namooosa na anakhiyon a mafwarizeewu amfuka na anlompa, ila awo weeyo khamfuka, antta oja na onywa."

<sup>34</sup> Yinsa khuwaajipu yoori: "Enrettikhana toovi owooza anamala-leyiwa harusi ofuka namaposa arivo?<sup>35</sup> Ila onteela ofiya wakathi mposi anttelaaye olaziwavo vakatthi vaya, wakathi aya opo, anteela ofuka."

<sup>36</sup> Elottelanaka Yinsa khulupa nlikaniso mmote araka: "Khaavo an-shijaaye patakha ya kuwo pheeya yoori arette yaapa ya kuwo yoovutta, n'ooretta toowo etile pheeya entta oharipwuya, mwaasa wa patakha etile ya kuwo pheeya eththiweevo oheezani na etile yoovutta.<sup>37</sup> Khaavo anthuulaaye viinyu pheeya ottha ntompwiyo ya shapala ya raku. N'ooretta toowo entta ophutuwa, viinyu ya yiittikhe ttompwiyo zaya ziharipwuya.<sup>38</sup> Viinyu pheeya entthiwa ntompwiyo pheeya.<sup>39</sup> Khaavo anraaye anywiye viinyu ya raku khutakha onywa viinyu pheeya, maana ontta olupa yoori: 'Poora etile ya raku.'

## 6

### *Yinsa ti mwennyewe saapatu*

<sup>1</sup> Saapatu moote, Yinsa eetta ovira nshini wa nshapa la tiriku. Anakhiyon aye khusala avurula asusuraka na makhono arafunaka phunjye zaya. <sup>2</sup> Mafwarizeewu khusala awoozela yoori: "Mwaasa aya niini mwirettaka vitthu ziyyiye mwiikho orettiwa saapatu?"

<sup>3</sup> Ye khuwaajipu araka: "Khamwinasome ethu aarettiyeeyo Daawuda wakathi yankholiyeovo jala na ashirikha awe?<sup>4</sup> Ye aaviriye Nnyupa wa Nnyizinku khuthuula phaawu zoohalaalishiwa khurafuna kiina khuwenkha ashirikhaawe, ila alupa aarina ruhusa yoorafuna aari mahaakhimu a tiini paasi."<sup>5</sup> Yinsa khulupa araka: "Mwaana wa pinaatamu ti Mbiana mwennyewe saapatu."

### *Mwinyi woorakala nkono*

<sup>6</sup> Saapatu kiina, Yinsa khuvira nnyupa woosifwiwamo Nnyizinku khusala awaanozela, aarimo mwinyi mmote waarakaliyeeyo nkono nlume. <sup>7</sup> Anamanozela a kano na mafwarizeewu eetta omweekesela yoori amoone Yinsa nkhamma aari onvonisa siikhu ya saapatu, yoori ankwisele paathuli. <sup>8</sup> Ila ye aari ojuwa ethu aari wuupuwelaaye atthu apale. Khumuza mwinyi otule woorakala nkono nlume yoori: "Olankhe ote vakatthi apha." Mwinyi khulankha khweemela.

<sup>9</sup> Aphano Yinsa khuwoozela yoori: "Ensuhayye orettiwa saapatu ti tiivi? Yooshapwuya ama yootakhala, wuusuru ama wuula?"

<sup>10</sup> Khuweekesa atthu ooshi apale aariivo khumuza mwinyi otule yoori: "Wookole nkono awo." Ye khookola, khuvona. <sup>11</sup> Anamanozela a kano na mafwarizeewu khwiiphiiriwa khusala awaza ethu yonrettela Yinsa.

*Othawuliwa wa anakhiyon i khumi na awiri*

<sup>12</sup> Siikhu zaya epile Yinsa khulankha khusala alawa omwaako olompa, khwiisha osikhu wooshi eettaka olompa. <sup>13</sup> N'oocha khuwaakhuwela anakhiyon i awe khuwaathawula khumi na awiri, atthaapo theenya khuwenkha nzina la owaaswihaapa. <sup>14</sup> Simawu antthajiye nzina la Pheeturu, Antere twiyye Simawu, Yaakhumpa, Yaahaya, Filiipe, Patrumeeuw. <sup>15</sup> Mateewuzhu, Tome, Yaakhumpa mwaana wa Alufayo na Simawu aniiithiwaaye Zelooti, <sup>16</sup> Yuuda mwaana wa Yaakhumpa, na Yuuda Iskariyooti otule aari weettelaaye onkholisa Yinsa.

*Onozela na ovonisa wa Yinsa*

<sup>17</sup> Yinsa khwiishukha vamwaako na maaswihaapa awe khweemela nshini wa mwaakho vahali aariivo anakhiyon i awe na khuntti ya atthu a Yudeya yooshi na a Yeruzaleemu, mpakha apale a miti za waattamela pahari, Tiyo na Sitooni. <sup>18</sup> Apale aateeliyeyo osiila na ovonisiwa moolwele aya, mpakha na apale aari wantipwiwaaye ti masheethwani aari ovonisiwa. <sup>19</sup> Atthu ooshi aari otakha onsapa Yinsa mwaasa yoori waari onsaruwa owahi khusala owaavonisa ooshi.

<sup>20</sup> Aphano Yinsa khulansa maasho khuweekesa anakhiyon i awe khuwooza yoori:

“Ananshapweyiwa ti mwneyo mwiiyiye asikhini,  
maana Ofwalume wa Nnyizinku pu weenu.

<sup>21</sup> Ananshapweyiwa ti mwneyo enuukholaanini jala aphano,  
maana mwinlawwa mwarupale.

Ananshapweyiwa ti mwneyo mwinlilaaye aphano,  
maana mwinteeela otheya.

<sup>22</sup> Ananshapweyiwa ti mwneyo,  
mmana atthu eephiiriwaka ti mwneyo, awiikarani, oottukhanani  
na khuwoonani ohifwayi mwaasa wonlotta Mwaana wa  
Pinaatamu.

<sup>23</sup> Wakathi aya otthuupo, mwiiye woofurahi na mwitthape, maana  
tthuvo yenu eniyya khuluyeene pinkuuni. Maana wa nanna ethiipi,  
apapa zaya na-yo aawaaretteliye manapiyu.

<sup>24</sup> Ila olaanikha pu weenu mweeyo mwaamathaajiri,  
maana mwapokhera tthuvo yenu vathi attaapha.

<sup>25</sup> Olaanikha pu weenu mweeyo ziwiitaaleliyeenini vitthu-zoojiwa,  
maana mwinteeela okholiwa ti jala.

Olaanikha pu weenu mweeyo mwiriina furaha eleelo eti,  
maana mwinteeela ojikhupanyera na olila.

<sup>26</sup> Olaanikha pu weenu mweeyo  
mmana mwittottopeliwaka pi atthu ooshi,  
maana apapa zaya aawaaretteliye ethiipo manapiyu oojipanka.

<sup>27</sup> Nakataalikha mweeyo mwinikisiilaaye, kiniuuuzani yoori mwiaaphete maatuwi enu, mwiwaarettete saana apale aniiphiiriwaaye ti  
mwneyo. <sup>28</sup> Mwiwaaparikhie apale anuulaanaanini na mwiwaalompele  
apale anuurettelaanini zootakhala. <sup>29</sup> Nkhama ntthu oopwakula nlaku  
limote, na ntthi likina ontheteezele. Nkhama ntthu oovula juupa,

ohinkhattaze othuula hempe yawo.<sup>30</sup> Omwinkhe wakhula otule anuuvekelaaye, nkhamma nthu athuula etile yiyyiye yaawo, ohinkhanyarele wuurutisela.<sup>31</sup> Epile mweeyo zinuutvelaanini oretteliwa pi azeenu, na-mweyo mwiwaarettele azeenu ethiipo.

<sup>32</sup> Amana mwiwaaphetaka apale anuuphetaanini paasi, fwayitani mwineekeselaaye mmakhono wa Nnyizinku? Hatha anatwampi atthaapo aniwaapheta apale na-yo aniwaaphetaayo.<sup>33</sup> Amana mwiwaarettelaka saana apale na-yo anuurettelaanini saana paasi, fwayitani mwinteeelaaye wiiyana? Hatha anatwampi atthaapo na-yo anretta etthiipo.<sup>34</sup> Amana mwiweepaashaka paasi apale mwinkhupalaaye wuрутиселани, fwayita-ni mwinteeelaaye wiiyana? Hatha anatwampi atthaapo aniipaashana aroromelaka orutiselana.<sup>35</sup> Mwiwaaphete maatuwi enu, mwiwaarettele zooshapweya, mwiweepaashe mwiheekeselaka wuрутиселани. Toowo tthuvo yenu enttela wiiya khulyeene na mwinttela wiiya aana a Nnyizinku Wooziti, maana Nnyizinku oniwaashapweyela rooho hatha na apale ahinshukhurwaaye na alupa ootakhala rooho.<sup>36</sup> Mwiye woohurumiya nkhamma ethiipi Papeenu wa pinkuuni na-ye eeyiye wa huruma.

<sup>37</sup> Mwihi mphuke ntthu nzeenu na Nnyizinku khanuuphukani, mwihinhukhmu ntthu nzeenu na Nnyizinku khanuhukhumuni. Mwinswaamihii ntthu nzeenu na Nnyizinku ontta wuuswaamihini.

<sup>38</sup> Mwiwenkhe azeenu na Nnyizinku ontta owinkhani: na mphimo khwaamili, wookhitteleliwa na wa wiitala mpakha wiittikha. Maana mphimo otthuupo mwimphimanaaye na-mweyo mwinteeela ophimeliwa otthuupo.”

<sup>39</sup> Yinsa khulupa nlikaniso mmote araka: “Attu oo hooni khanlozana, antta okwiselana nliphotto.<sup>40</sup> Nakhiyon khaninziti mwaniimu awe, ila wakhula otule ansomiseyaaye saana oniyya nkhamma mwaniimu awe.

<sup>41</sup> Onri je woona etutu eriyye mmaasho wa nzaawo ohoonaka muutthi opule oriyye mmaasho mwawo?<sup>42</sup> Enrettikhana toovi weeyo omuuzaka nzaawo yoori: ‘Twiiyaku, nkankaani kuulaze etutu eto eriyye mmaasho mwawo,’ na khupe weeyo ohiwahaka woona muutthi opule oriyye mmaasho mwawo? Naafikhi! Olazemo khapula muutthi oriyye mmaasho mwawo, toowo ontta woona saana, na phi onlazaamo etutu eriyye mmaasho wa nzaawo.”

### *Muutthi na mishumo zaya*

<sup>43</sup> “Khawiivo muutthi wooshapweya oniimaaye mishumo zootakhala, wala muutthi wootakhala oniimaaye mishumo zooshapweya.<sup>44</sup> Maana wakhula muutthi onjuweya mwaasa wa mishumo zaya; nnyiwa khishumiwamo mishumo za muuyu, mmthalala khanshumiwamo wuvuva.<sup>45</sup> Ntthu wookemaani, nroho mwawo onsarulamo vitthu zooshapweya, na ntthu wootakhala rooho, nroho mwawo onsarulamo vitthu zootakhala, maana milomo zawe zinttakhala ethiipile ziitaaliyeyo nroho mwawo.

<sup>46</sup> Mwinkikheweleta-ni yoori ‘Mbwana, Mbwana’, mwihirettaka epile kiniwuzaanini?<sup>47</sup> Miyo kinuuthoonyezani ntthu anlikananaaaye otule ansiilaaye mattakhuzi aka na khushututela.<sup>48</sup> Onlikanana ntthu ajekaka nyuupa yawe khuthipa khwiichisa saaneene khutha vanchina la mawe woozivalavo. Khuta nnyeri khupiya nyuupa etile

ila khuhisakhinyeyi mwaasa woozivalisiwa. <sup>49</sup> Ila otule ansiilaaye mattakhuzi aka khuhishututeli onlikanana ntthu ajekiye nyuupa yawe vanshaka woohizivalivo. Khuta nnyeri khupiya nyuupa etile nasaapiru khukwa, khupwecheya khuhisali hatha ethtu.”

## 7

### *Amini ya namalokozela wa anajanka*

<sup>1</sup> Eeshiyeevo mattakhuzi apale aari owoozaaye atthu, khweetta sitate ya Kafaranawu. <sup>2</sup> Ottuukho aariwo namalokozela mmote wa anajanka w'eerooma, aariina karumeyaawe wompheta aari olwaazi-waaye khusala asaleela ofwa. <sup>3</sup> Wakathi namalokozela wa anajanka otule asiiliyeevo monkoni wa Yinsa, khuwaaperekha attunkhulu akina amayaahuuti yoori anvekele Yinsa ate anvonise. <sup>4</sup> Yo n'onsikana khunvekela wookhanyarelavo araka: “Mwinyi oto onsuhi waawuniwa, <sup>5</sup> mwaasa yoori oniiya owaapheta atthu etthu na anijekela nyuupa yoosifwiwamo Nnyizinku.”

<sup>6</sup> Aphano Yinsa khulankha khusala alawa vamote na-yo, asaleelaka ofiya, namalokozela otule khuwaaruma ashirikha awe olawa omuuza yoori: “Mbwana, ohijantipu khinsuhi weeyo ovira nnyupa mwaka. <sup>7</sup> Ti eto miiyo kinoona yoori akinsuhi okutthanana weeyo, ila olupe nttakhuzi limote paasi karumeyaaka ontta ovona. <sup>8</sup> Miiyo kinaaye afwalume akizitiyeeyo, ila na miiyo theenya kinaaye anajanka ankishututelaaye. Kinimuza najanka mmote yoori: ‘Olawe’, khulawa; nkina yoori: ‘Aruti’, khuruti. Kinimuza karumeyaaka yoori: ‘Retta eti’, ye khuretta.”

<sup>9</sup> Yinsa asiiliyeevo mattakhuzi apale khwiya wooshanka, khuzukuluwa khuwoza atthu apale aari omperekhaaye yoori: “Hatha Eziray-ele ottuukho akooneeniwo amini nkhamma eti.” <sup>10</sup> Ashirikha apale aaru-miweeyo khurutela owawe namalokozela otule, khunsikana karumeya otule avoniyi.

### *Yinsa onisisimula mwaana wa nunu mmote woofweliwa ti mannawe*

<sup>11</sup> Mmeesho mwaya Yinsa khulankha khusala alawa sitati ya Nayini, anakhiyoni awe na khuntti ya atthu a waatta khusala enlotta. <sup>12</sup> Asaleelaka ofiya vanlako wa sitati etile, khusala asaruwa atthu aari weettelaaye ozikha. Otule aari weettelaaye ozikhwa aari mwaana wa nunu mmote woofweliwa ti mannawe, ye aarina mwaana mmote othu-uto paasi; atthu a waatta aari olawa vamote na-ye. <sup>13</sup> Wakathi Mbwana Yinsa amooniyeevo nunu otule, khumoonela huruma khunkhuwela khumuuzu yoori: “Ohilile!”

<sup>14</sup> Aphano khuwaasusela khusapa janaayiza, apale aathuuliyeeyo khweemela. Yinsa khulupa araka: “Shapu! Kinuuruma yoori olankhe!” <sup>15</sup> Shapu otule khulankha khwiikhala khusala attakhula; Yinsa khumwinkha mamaawee.

<sup>16</sup> Atthu ooshi khwiya awoova khusala ansifu Nnyizinku araka: “Napiyu nwulweene aniteela, ninoona yoori Nnyizinku aateeliye owusuru atthu awe.” <sup>17</sup> Hapari epile za Yinsa khumwazeyela Yudeya yooshi mpakha miti epile zaattamananiyeeyo.

### *Yaahaya oniwaaruma anakhiyoni awe wa Yinsa*

<sup>18</sup> Yaahaya khuuziwa pi anakhiyoni awe vitthu epile zooshi. Ye khuwaakhuwela awiri,<sup>19</sup> khuwaaruma yoori alawe amuuzele Mbwana yoori: "Weeyo ti otu naari onwejaaye ama ninweje nkina?"

<sup>20</sup> Yo khulawa mpakha ottuukhule aariwo Yinsa khumuza yoori: "Neetta orumiwa ti Yaahaya yoori nite niwuuzele nkhamma otule naari onwejaaye ti weyo, ama nivire ninwejaka nkina?" <sup>21</sup> Wakathi otthuupule Yinsa khuwaavonisa alwele a waatta, anamarakala, apale aariina masheethwani, khuwaafunula maasho apale oofoonni. <sup>22</sup> Aphano Yinsa khuwaajipu yoori: "Mwilawe mwamuuze Yaahaya ethiipo mooniyeezo na mwisiliyeezo; apale oofoonni antta woona, apale oorakala antta weetteta, anamakuttula antta otwahareshiwa, apale oohisiili ansiila, anamfwa asisimuliwa, na hapari zooshapweya antta olaleyeliwa asikhini. <sup>23</sup> Wooshapweyiwa ti otule ahinphiiriwaaye ti miiyo."

<sup>24</sup> Anakhiyoni a Yaahaya n'oolaavo, Yinsa khusala owoozaka atthu monkoni wa Yaahaya yoori: "Makuluttu mweetteliye woona niini? Teeetthe yiiniswaka ti pheevu? <sup>25</sup> Ama moona niini? Mwinyi mmote awaliye kuwo zooshapweya? Apale anwalaaye kuwo zootafikhana aniiya nraaha na aniikhala nkorofwa y'oofwalume. <sup>26</sup> Khi moona niini? Napiyu? Pi ethiipo kiniuuuzani yoori, Yaahaya awaaziti manapiyu akinoko aya.

<sup>27</sup> Otu ti otule laari onlupaaye Nttakhuzi la Nnyizinku yoori:

'Kinlawa kamperekhe karumeyaaka omaasho wawo  
yoori aattalele tarikhi yawo.'

<sup>28</sup> Miiyo kiniuuuzani yoori vakatthi wa apale avokoliweeyo pi aakha, khina mmote anzitiyeeyo Yaahaya; ila otule eeyiye ntitthiiru muufwalume wa Nnyizinku, nwulweene zayita ye."

<sup>29</sup> Atthu ooshi mpakha anamariphisa lumpuru khusiila mattakhuzi a Yinsa. Yo khukhupalela shariya ya Nnyizinku, maana aari awoosiwa ti Yaahaya. <sup>30</sup> Ila mafwarizeewu na anamanozela a kano khukhijilela matakhero a Nnyizinku khuhosiwi ti Yaahaya.

<sup>31</sup> "Anaatamu apa a leelo eti kiwaalattisane niini? <sup>32</sup> Alattanana khuntti ya asimaana eekhaliye vaparasa akhuwelanaka araka. 'Fweeyo n'oovumiselani phivi za vaharusi mweeyo khuhiiini; khwiipa liipo la huzuni mweeyo khuhilili.' <sup>33</sup> Khuta Yaahaya Namooosa woofuka na ahinnywaaye viinyu, mweeyo mwinri: 'Ye onaaye masheethwani.' <sup>34</sup> Ata Mwaana wa Pinaatamu onja na onnywa, mweeyo mwinri: 'Mmoone nsokho otu! Nanhapaliwa, nshirikha wa anamariphisa lumpuru na anatwampi.' <sup>35</sup> Apale anlottaaye ojuwa wa Nnyizinku, anthoonyeza yoori pi wookhweeli."

### *Natwampi aavaaziyeeyo mafuttha moolu a Yinsa*

<sup>36</sup> Mfwarizeewu mmote anvekeliye Yinsa yoori alawe aje owawe. N'oofiya Yinsa khwiikhala yoori aje. <sup>37</sup> Omuuta otthuupule muukha mmote wa natwampi wa sitati ethiitile, khujuwa yoori Yinsa ontta oja wa mfwarizeewu, khuthuula suupha yawe ya mafuttha oonukhela. <sup>38</sup> Khulawa khweemela onyoko wa Yinsa nshini wa moolu awe khusala alila. Mishozi zawe khusala zittonkela moolu a Yinsa. Khusala akukutta na nyuuli zawe na opejari moolu a Yinsa avaazaka mafuttha oonukhela.

<sup>39</sup> Aphano mfwarizeewu otule nawoona vitthu epile khusala alupa nroho mwawe araka: “Otu eriwaka aari napiyu eetta ojuwa yoori mwanankha otu aninsapaaye natwampi.”

<sup>40</sup> Yinsa khumuza Simawu yoori: “Kintakha owuuza etthu.”

Simawu khujipu yoori: “Kuuzeni mwanliimu.”

<sup>41</sup> Yinsa khumuza yoori: “Atthu awiri eetta wiiliwa nzurukhu ti mwinyi mmote aari wiipaashisakaaye, otu mmote aari wiiliwa miiya thaanu, otu nkina aari wiiliwa hamusiini. <sup>42</sup> Ila oowiiri khuhiiivo mmote aawahiyeeyo onripha, ye khuwaaswaamihi oowiiri. Atthu apa awiri amphetachiyeeyo ti tuuvi?”

<sup>43</sup> Simawu khujipu araka: “Kinoona yoori ti otule aswaamihieeyo wa waattavo.”

Yinsa khumuza yoori: “Walikanisa.”

<sup>44</sup> Ye khumuza Simawu anthoonyezaka muukha otule araka: “Onimoona mwanankha otu? Miyo kata vaje vavo apha khuhikinkhi hatha maati yoori koose moolu aka, ila ye oosa moolu aka na mishozi zawe khukukuttha na nyuuli zawe. <sup>45</sup> Khukipokhereleeni na peeju, ila ye khalikheleleeni opejari moolu aka. <sup>46</sup> Khukivaazeeni mafuttha oonukhela mmwishwa mwaka, ila otu avaaza mafuttha moolu aka. <sup>47</sup> Pi apho kiniwuzaaye yoori twampi zawe epile za waatta ariinaazo za swaamihia; mwaasa woophetacha wawe. Ila otule aswaamihieeyo vattithiiuru opheta wawe vattithiiuru.”

<sup>48</sup> Yinsa khumuza mwanankha otule yoori: “Twampi zaho za swaamihia.”

<sup>49</sup> Apale eekhaliyeeyo khusala oozelana yoori: “Otu paani anwahaaye owaaswaamihi twampi atthu.”

<sup>50</sup> Ila Yinsa khumuza muukha otule yoori: “Waamini waho wa wuusuru: olawe na heeri.”

## 8

### *Aakha aari onrumeyelaaye Yinsa*

<sup>1</sup> Paata ya toole, Yinsa khusala eettetta sitati khwa sitati na nti khwa nti alaleyaka hapari zooshapweya zoofwalume wa Nnyizinku. Anakhiyon ni awe apale khumi na awiri aari vamote na-ye, <sup>2</sup> na aakha akinoko aya apale aavonisiweeyo masheethwani na marati: Mariyamu aari wiitthiwaaye Mataleena, otule ansaruwiyeeyo masheethwani sapa, <sup>3</sup> na Zhuwaana muukha wa Kuuza, nsatoro wa Herooti, Suzaana na aakha akinoko aari ontthanittaaye Yinsa na vitthu zaya vamote na anakhiyon ni awe.

### *Nlikaniso wa namazala*

<sup>4</sup> Phantte za waatta za miti aari otawo atthu enkeene oteela okuthanana Yinsa. Aphano ye khulupa nlikaniso mmote araka: <sup>5</sup> “Aarivo namazala mmote aalawiye ozala peewu zawe. Amwazaka, kinoko khukwela nshini wa tarikhi, khuluwatthiwa na khujiwa pi anyannyi. <sup>6</sup> Peewu kinoko khukwela vahali aariivo mawe, khoottha ila khuuma mwaasa woohiivo maati. <sup>7</sup> Peewu kinoko khukwela vanyiwa, khuwula vamote na nyiwa, khurapeliwa pi nyiwa khufwa. <sup>8</sup> Ila peewu kinoko khukwela vanshaka wooshapweya, khuwula khwiima mishumo miiya wakhula peewu.”

Alupiyeevo toole, ye khukhuwelela araka: “Ariina mashiilo ti asiile!”

<sup>9</sup> Anakhiyoni awe khumuuzela maana a nlikaniso aya opule. <sup>10</sup> Yinsa khuwaajipu yoori: "Mweeyo mwenkhiwa ojuwa zootikinisa zoofwalume wa Nnyizinku, ila akinoko anuuzaniwa nlikaniso yoori oonaka ahisala ajuwa, asiilaka ehisala eweeleya."

*Yinsa oneeleza maana a nlikaniso wa namazala*

<sup>11</sup> Maana a nlikaniso opu pi toono: peewu eti enthoonyeza ntakhuzila Nnyizinku. <sup>12</sup> Peewu zaakweliye ntarikhi, zinlikanisaniwa atthu apale ansilaaye ntakhuzila Nnyizinku ila sheethwani khulazavo varoho vaya ntakhuzi ntthile yoori ahaamini apattha wuusurukha. <sup>13</sup> Peewu epi zaakweliye vamawe, zinlikanisaniwa atthu apale ansilaaye ntakhuzila Nnyizinku khupokherela na furaha. Ila mwaasa woohiina mitathaari, wakathi vattithiiru nawootootiwa ti sheethwani anlikha waamini waya. <sup>14</sup> Peewu epi zaakweliye vanyiwa, zinlikanisaniwa atthu apale ansilaaye ntakhuzila Nnyizinku, ila mwaasa wooshukulikhela opattha tuvela na haali za meekhazi, yo waamini waya vattithi-vattithi onzima, ahifiyelelaka wiima mishumo. <sup>15</sup> Peewu epi zaakweliyi vanshaka wooshapweya, zinlikanisaniwa atthu apale ansilaaye ntakhuzila Nnyizinku khuthokorela nroho mwaya khushututela na khwiyyana niiya, apo anima mishumo zooshapweya.

*Nlikaniso wa khattaya*

<sup>16</sup> Khaavo ankozaaye khantteya khufinikha na enyipo wala khupweha nlivuku. Entthiwa vahali onooneyaavo yoori esala ewaamwasikhela apale anviraaye nnyupa. <sup>17</sup> Khayiivo envithiwaaye ehinttelaaye osaruwela oje, zooshi epile za siiri enttela wiiya payana. <sup>18</sup> Apho mwiyane ophoole wa nanna yoosila, otule ariina onta weekezeliwa, ila otule ahina hatha na etile anuupuwelelaaye wiiyan onta onyakanyiwa.

*Mamaawe na attwiize Yinsa*

<sup>19</sup> Mamaawe na attwiize Yinsa khulankha yoori amoone, ila kuhisala ewaheya mwaasa yoori aarivo atthu a waatta. <sup>20</sup> Khuuziwa Yinsa yoori: "Vaje apho atavo mamaawo na attwiizo."

<sup>21</sup> Ye khuwaajipu araka: "Maama na attwiizaku pi apale ansilaaye Nttakhuzila Nnyizinku khushututela."

*Yinsa onnyamaza pheevo*

<sup>22</sup> Siikhu moote, Yinsa khuwoza anakhiyoni awe yoori: "Olawa neette phantte ya kaapu kinoko." Khupakhira nkalawa khusala alawa. <sup>23</sup> Aphano eettaka olawa Yinsa khusala alala, khupuwa pheevo ya waatta kalawa khusala esaleela ozama. <sup>24</sup> Anakhiyoni apale khoova khusala anlansa Yinsa araka: "Mwanliimu, Mwanliimu nasaleela ozama!"

Yinsa khulankha khunyamaza pheevo na mawipi, khupuwa nreke. <sup>25</sup> Nawiisha khuwozelaa anakhiyoni awe yoori: "Waamini wenu ori vayi?"

Yo khwiyya awoova na ooshanka khusala oozelana, araka: "Otu aya paani anrumaaye pheevo na mawipi khunshututela?"

*Oyonisiwa wa nlume mmote aariina masheethwani ootakhala*

<sup>26</sup> Yinsa na anakhiyoni awe khulankha khulokhela Keraaza, kaapu ya Kalileya. <sup>27</sup> Wakathi Yinsa apakhuwiweeo nkalawa, khuta nlume mmote wa sitati ethiitile aariina masheethwani a waatta. Ye eekhaliye

siikhu za waatta ahiwalaka kuwo na ahiikhalaaka vaje, aari wiikhala mvilalo.<sup>28</sup> N'oomoona Yinsa khunyakula, khunkokhorela khukhuwa araka: "Onkitakhela-ni, Yinsa mwaana wa Nnyizinku Nwulu wa Pinku-uni? Safwatali ohikihukhumu."<sup>29</sup> Ye aalupiye mattakhuzi apa mwaasa yoori Yinsa aarumiye onsarعوا masheethwani. Masheethwani apale eekhaliye siikhu za waatta mmwiili wa nlume otule. Na afukani-waavo makwinjili khwinkhiwa atthu oomweekesela, eetta ottumulaka n'oothuuliwa pi masheethwani n'onlawana makuluttu.

<sup>30</sup> Aphano Yinsa khumuuzela yoori: "Weeyo nzina lawo o paani?" Ye khujipu yoori: "Miiyo nzina laka ki omathi," mwaasa yoori ntthu otule aamweettiye masheethwani a waatta mmwiili mwawe.<sup>31</sup> Masheethwani apale khusala anvekela Yinsa yoori ahiikarele khilintti.

<sup>32</sup> Liphanko liwululene la kuluwe laari oshukisiwa vamwaako, masheethwani apale khunvekela ruhusa Yinsa yoori eette nkuluwe, ye khukhupalela.<sup>33</sup> Wakathi aliiyeemo masheethwani apale mmwiili wa nlume otule khweetta nkuluwe, aphano kuluwe khusala zitthira ziishukhela vantthatta khutupweela.

<sup>34</sup> Apale aari oshukisaaye kuluwe epile nawoona vitthu epile zaaret-tikhaniyeego, khutthira khulawa khulupa hapari epile nsitati mphule na miti mikinoko zaya.<sup>35</sup> Khulawa atthu a waatta olawa woona vitthu epile zaarettikhaniyeego. Wakathi amwaattamiyeeyo Yinsa, khumoona nlume otule ansaruwiyeeyo masheethwani eekhaliye nshini wa moolu a Yinsa awaliye kuwo zawe na athiiyemo akhili zawe, yo khwiya awoova.<sup>36</sup> Apale ooniyyeeyo, khulawa khuwooza atthu nanna aavon-isiweezo nlume otule.<sup>37</sup> Aphano atthu ooshi apale a nti opule wa Keraaza khunvekela Yinsa yoori aleemo mmuti mwaya mwaasa wa woova channu, Ye khuwela nkalawa khulaawo.

<sup>38</sup> Nlume otule ansaruwiyeeyo masheethwani khusala anvekela Yinsa amuuzaka yoori anlikhe alawe vamote na-ye. Ila Yinsa khumuza olawa araka:<sup>39</sup> "Orutele owawo wawooze atthu etile Nnyizinku ooret-teliyeeyo." Nlume otule khulankha khusala alawa owawe alaleyaka sitati yooshi etile aaretteliweeyo ti Yinsa.

### *Owahi wa Yinsa khwa marati na ofwa*

<sup>40</sup> Wakathi Yinsa arutiyeovo, khuntti khuluyeene ya atthu ooshi atthaapale aari onwejaaye khumpokherela na furaha.<sup>41</sup> Aphano mwinyi mmote aari wiiithiwaaye Yayiiru namalokozela wa nyuupa yoosifwiwamo Nnyizinku, khuta khunkokhorela Yinsa nshini wa moolu awe anvekelaka yoori alawe owawe,<sup>42</sup> mwaasa yoori mwanawe aariina mmote paasi wa nyaakha khumi na miwiri aari osaleela ofwa.

Yinsa alawaka, atthu khusala aphanunya-phunyana.<sup>43</sup> Attaaphale khutavo muukha aariina nyaakha khumi na miwiri ari nlwele, yaari omwiittikhayye taamu wakhula siikhu. Khuharipu nzurukhu awe wooshi aariina nkathhi wa akulukhala, ila khuhiiivo mmote aawahiy-eeyo onvonisa.<sup>44</sup> Ye khuta mpakha onyoko wa Yinsa khusapa ajapi yawe vattithiiru, omuuta otthupule khulikha wiittikha taamu etile.

<sup>45</sup> Yinsa khuuzela yoori: "Paani akisapiyeeyo?"

Atthu ooshi khusala akhana, Pheeturu khulupa yoori: "Mbwana, atthu pi a waatta pa yo anuuphunyaaye na wuusukhuma!"

<sup>46</sup> Ila Yinsa khusala avira akhanyarelaka yoori: “Nna akisapiyeyo keetta woona okisaruwiye owahi waka.”

<sup>47</sup> Aphano muukha otule ooniyeovo yoori khaari owahi ojivitha, khuta eettaka othukumela khunkokhorela Yinsa vakatthi wa atthu ooshi khusala alupa wa nanna ansapiyeezo na avoniyeozo nasaapiru.

<sup>48</sup> Attaaphale Yinsa khumuza yoori: “Mwanankha waamini wawo woovonisa! Olawe na heeri.”

<sup>49</sup> Attakhulakula ethhiipile Yinsa, khuta karumeya mmote wa vaje vawe Yayiiru khumuza yoori: “Ohimwantipu Mbwana olawa vamote nawayeo, maana mwanawo aya afwa.”

<sup>50</sup> Yinsa n'osila khumuza Yayiiru yoori: “Ohoove, wiyane amini, mwanawo ontta wiiya nkumi.”

<sup>51</sup> N'oofiya owawe Yayiiru, Yinsa khuhinlikhi hatha ntthu ovira nnyupa mphule, khuvira na Pheeturu, Yaahaya, Yaakhumpa, papaawe mwaana na mamaawe. <sup>52</sup> Atthu ooshi aasaliye vaje eettaka olila, Yinsa khuwooza yoori: “Mwihilile, otu khafweeni ontta olala.”

<sup>53</sup> Yo khusala antheya Yinsa mwaasa wa ojuwa yoori afwa. <sup>54</sup> Ye khuntheteezel a nkhone awe khumuza yoori: “Mwaari, lankha!”

<sup>55</sup> Rooho yawe khunrutela khulankha nasaapiru. Aphano Yinsa khumuza papaawe yoori amwinkhe ethu-yoojiwa. <sup>56</sup> Papaawe na mamaawe khwiiya ooshanka, ila Yinsa khuwooza yoori mwihimuze hatha ntthu vitthu epi zirettikhaniyezo.

## 9

### *Yinsa oniwaaruma maaswihaapa awe khumi na awiri*

<sup>1</sup> Yinsa khuwaakusanya maaswihaapa awe khumi na awiri khuwenkha owahi na ofwalume wa wiikara masheethwani a wakhula nanna na woovonisa. <sup>2</sup> Khuwaaruma olawa olaleya ofwalume wa Nnyizinku na owaavonisa alwele. <sup>3</sup> Khuwooza yoori:

“Mwilawaka mwihithuule hatha ethu, wala pakhora, wala mfukho, wala phaawu, wala nzurukhu, wala ajapi yaphiiri. <sup>4</sup> Nyuupa ethiito mwinttelaaye opokhereliwa, mwimake attaapho mpakha olaavo.

<sup>5</sup> Amana mwihipokhereliwi saana, mwilaakamo nsitati mwaya mpho mwitathe lifufu la mmoolu mwenu khwa oshaahiti waya yo.” <sup>6</sup> Aphano yo khulankha khusala alawa aviraka mmamiti alaleyaka hapari zooshapweya na awaavonisaka alwele wakhula phantte.

### *Mishikili za Herooti*

<sup>7</sup> Nsatoro Herooti khusiila vitthu zaari orettikhanaazo ye khwiiya wootikiniwa mwaasa atthu akina aari olupa yoori Yaahaya ti ye asisimuwiye muufwa. <sup>8</sup> Akina aari olupa yoori Aliyaasi ti ye awaa-puweleliye, akina aari olupa yoori oto napiyu mmote wa raku eetta osisimuwa. <sup>9</sup> Ila Herooti khulupa yoori: “Yaahaya miiyo kaarumiye yoori ashijiwe, khi oto kininsilaaye alupiwaka na anrettaaye vitthu epo ti paani?” Khusala atakhacha yoori amoone.

### *Yinsa oninkha khuntti ya atthu ethu-yoojiwa.*

<sup>10</sup> Maaswihaapa apale n'ooruti khumuza Yinsa zooshi aarettaziyezo. Aphano, ye khuwaathuula khusala alawa sitati moote yaari wiitthiwaaye Betesayita. <sup>11</sup> Ila khuntti ya atthu n'oojuwa khusala anlotta. Ye khuwaapokherela khusala awoozza monkoni woofwalume wa Nnyizinku na awaavonisaka apale aari ohithajiyaa ye ovonisiwa.

<sup>12</sup> Njuwa leettelaka oveva, apale khumi na awiri khumwaattama Yinsa khumuuzo yoori: "Owooze atthu apa alawe mmamiti mpho amake eekesaka ethu-yoojiwa, maana mphu niriimo makuluttu." <sup>13</sup> Ye khuwaajipu yoori: "Mweeyeena mwiwenkhe ethu-yoojiwa." Yo khunjipu araka: "Niriinaaye apha, phaawu thaanu na swi piiri paasi, woohiiyi olawa wuuzanya etthu-yoojiwa khiniwaafiyela atthu ooshi apa." <sup>14</sup> Alume aariivo aari etthu ya alufu thaanu, ila ye khuwoza anakhiyoni awe yoori: "Mwiweekhaze atthu hamusiini wakhula khuntti." <sup>15</sup> Yo khuretta ethiipo khuweekhaza ooshi. <sup>16</sup> Khuthuula phaawu thaanu na swi epile piiri khweekesa otulu, khuparikhya khumeya khuwenkha anakhiyoni awe yoori awaawanyeze atthu apale. <sup>17</sup> Ooshi khuja khurupala, epile zaasaliyiye khulokottheliwa khwiitaala khelenke khumi na piiri.

### *Otukhuru wa Pheeturu*

<sup>18</sup> Siikhu moote, Yinsa eetta olompa otthwe, anakhiyoni awe ari kharipu, nawiisha khuwoozela yoori: "Atthu anri miiyo ki paani?"

<sup>19</sup> Yo khunjipu yoori: "Akina anri weeyo o Yaahaya Namoosa, akina Aliyaasi, akina theenya anlupa yoori weeyo o napiyu mmote wa raku weetta osisimuwa."

<sup>20</sup> "Khi mweeyo mwinri ki paani?" Pheeturu khujipu araka: "Weeyo o Al-Masiihu wa Nnyizinku."

<sup>21</sup> Yinsa khuwaahirimiza yoori vitthu epile ahimuze hatha ntthu.

<sup>22</sup> Khuwoza araka: "Mwaana wa Pinaatamu ona yoohoowa nkathhi wa vitthu za waatta na okatthaliwa pi anamalokozela a tiini na attunkhulu a mahaakhimu a tiini mpakha anamanozela a kano; onlawa afwe, siikhu yattaatthu asisimuwe."

<sup>23</sup> Khuvira awoozaka atthu ooshi yoori: "Nkhama ntthu atakha okilotta miiyo, ona yojikatthala mwennyewe, khuvikela nsalapa awe wakhula siikhu khusala akilotta. <sup>24</sup> Amana ntthu atakha wuusuru ohaayi awe, ontta ompwetheya; ila otule onimpwetheyaaye ohaayi awe mwaasa wa miiyo, oto onteela wuusurukha. <sup>25</sup> Ona fwayita-ni ntthu opattha vitthu zooshi z'olumwenku, ila khujipwetechama khujitapanya mwennyeweru? <sup>26</sup> Otule anikoonelaaye haaya miiyo na mattakhuzi aka, na Mwaana wa Pinaatamu onteela omoonela haaya mmana ataaka nnuuru mwawe na nnuuru wa Paapa na malayikha oottakathiifu. <sup>27</sup> Kiniuuuzani khweele yoori awaapo apha akina ahintelaaye ofwa mpakha oone ofwalume wa Nnyizinku."

### *Ozukulisiwa wa Yinsa*

<sup>28</sup> Ziviriyeevo etthu ya siikhu naane paata yoolupa mattakhuzi apale, Yinsa khunthuula Pheeturu, Yaahaya na Yaakhumpa, Ye khuwelaa vamwaako olawa olompa. <sup>29</sup> Alompaka ethiipile omaasho wawe khuzukuluwawo, kuwo zawe khwiyya zoolakala na za waara nkhamma ozerima. <sup>30</sup> Nasaapiru khumpuwelela atthu awiri khusala attakhulana, aari Munsa na Aliyaasi. <sup>31</sup> Aatiyye nnuuru ya pinkuuni khusala amuuza Yinsa khwa nanna aari weettelaazo ohoowa na ofwa Yeruzaleemu nkhamma ethiipo Nnyizinku asharutheliyeeyo.

<sup>32</sup> Pheeturu na ashirikha awe aarettiye eettaka olala, wakathi asisimuwyeevo khoona nuuru ya Yinsa na atthu awiri amweemeleliye.

<sup>33</sup> Atthu apale eettaka olawa Pheeturu khumuuz Yinsa yoori: "Mwanliimu, ti yooshapweya wiikhala attaapha! Nintta ojeka mapantta mattathu, limote laawo, limote la Munsa, na limote la Aliyaasi." Pheeturu khaari ojuwa etthu aari ottakhulaaye.

<sup>34</sup> Attakhulaka ethhiipile, khuta liwiku khuwaafinikha, anakhiyoni apale khwiya awoova wakathi ooniyeovo liwiku liwaafinikhaka atthu apale. <sup>35</sup> Mmawiku mphule khupuwamo huula yaari oraaye: "Otu mwanaka woorthawuliwa; mwinsiileze etile anlupaaye." <sup>36</sup> Paata yoonyamala huula etile Yinsa khusalavo otthwe. Siikhu zaya epile anakhiyoni apale khwiya oonyamala, khuhimuuzi hatha ntthu vitthu epile ooniyeelo.

### *Ovoniwiwa wa shapu aariina sheethwani*

<sup>37</sup> Mmeesho mwaya nawiishukha vamwaako, khuta khuntti ya atthu a waatta oteela okutthanana Yinsa. <sup>38</sup> Vakatthi wa khuntti ya atthu atthaapale khupuwavo mwinyi aari okhuwaaye araka: "Mwanliimu, kinuvrekela yoori wamoone mwanaka, maana kina mmote oihuuto paasi. <sup>39</sup> Sheethwani eetta onvelavelisa khusala anthukumelisa, onnyakulisa na onkwisela vathi n'oolaza maphovu, khaninlikha ahinvulaliseeni. <sup>40</sup> Kaawaavekeliye anakhiyoni awo yoori amwiikare sheethwani aya oto, yo khumoojeela."

<sup>41</sup> Yinsa khujipu araka: "Oo! Atthu oo haamini na ootakhala rooho! Mpakha lini kiilyaka vamote na-mweyo na kuuvilelakan? Ontiise apha mwanawo aya oto."

<sup>42</sup> Alawaniwaka ethhiipile, sheethwani khunkwisela vathi khusala anthukumelisa, Yinsa khumwiikara sheethwani khuvona mwaana otule, khumwinkha papaawe. <sup>43</sup> Atthu ooshi khwiya ooshanka mwaasa woowahi wa Nnyizinku.

Yo aashankeliye vitthu epile aari orettaazo Yinsa, ye khuwooza anakhiyoni awe yoori: <sup>44</sup> "Mwisiileze saana mattakhuzi apa kiniwusaanini: Mwaana wa Pinaatamu ontela winkheleliwa mmakhono wa anaatamu." <sup>45</sup> Ila yo khuhisala ajuwa maana a mattakhuzi aya apale mwaasa yoori aari ovitheya yoori ahiweeleye na khusala oova omuuzela.

### *Nttunkhulu muufwalume wa pinkuuni*

<sup>46</sup> Khupuwa onyakulisana vakatthi wa anakhiyoni apale eekesaka onjuwa paani wa yo aari weettelaaye wiiya nttunkhulu. <sup>47</sup> Ila Yinsa khujuwa etthu aari wuupuuelaaye yo, khunthuula mwaana khumweemesa omaasho wawe. <sup>48</sup> Aphano khwooza anakhiyoni awe yoori: "Otule animpokherelaaye mwaana otu khwa nzina laka, onikipokherela miyo; otule anikipokherelaaye, onimpokherela otule akirumiyeeyo. Otule anjipushuwisaaye vakatthi venu mooshi, nttunkhulu ti oihuuto."

<sup>49</sup> Yaahaya khulupa yoori: "Mwanliimu, namoona ntthu anikaraaye masheethwani khwa nzina lenu. Fweeyo khunkhattaza mwaasa woohi-iyi wa khuntti yetthu."

<sup>50</sup> Yinsa khwooza yoori: "Mwihinkhattaze. Maana otule ahinvirikanaaye na-fweyo ori phantte yetthu."

### *Asamariiya aninkathala Yinsa*

<sup>51</sup> Osaleelaka ofiya wakathi wa Yinsa orutela pinkuuni, khujilakelela weetta sitati ya Yeruzaleemu. <sup>52</sup> Khuwaalokozisa akarumeya awe,

yo alawaka khusapuwa nti wa Samariiya yoori amweekesele puuro yoomakavo.<sup>53</sup> Ila atthu a nti wa Samariiya khuhimpokhereli, maana aajuwiye yoori eetta ovira eettaka Yeruzaleemu.<sup>54</sup> Yaakhumpa na Yaahaya nawoona vitthu zaya epile khumuuba Yinsa yoori: "Mbwana, ontakha yoori nirume moottho wa pinkuuni owaalukuze, nkhamma ethiipo Aliyaasi aaretiiyeezo\*?"<sup>55</sup> Ila Yinsa khuzukuluwa khuwaamaruwela araka: "Mweeyo khamwinjuwa rooho mwiriinaazo†.<sup>56</sup> Mwaana wa Pinaatamu khateeleeni opwetecha nafusi za atthu, aateeliye wuusuru." Aphano khulankha khusala alawa nti nkina.

### *Monkoni wa apale aninlottaaye Yinsa*

<sup>57</sup> Eettaka olawa ntarikhi khupuwa ntthu mmote khumuuba yoori: "Kintta wuulotta wakhula vahali oneettaavo."

<sup>58</sup> Yinsa khunjipu araka: "Ananthala anaaye maphotto aya, anyannyi anaaye vijaaro zaya, ila Mwaana wa Pinaatamu khana vahali woovumulisavo eeshwa yawe."

<sup>59</sup> Yinsa khumuuba ntthu nkina yoori: "Okilotte."

Ye khujipu araka: "Mbwana, okilikhe khapula kilawe kanzikhe paapa."

<sup>60</sup> Yinsa khumuuba yoori: "Owaalikhe anamfwa awaazikhe anamfwa aya; weeyo olawe walaleye ofwalume wa Nnyizinku."

<sup>61</sup> Khupuwa ntthu nkina theenya khumuuba Yinsa yoori: "Kintta wuulotta Mbwana, ila okilikhe khapula kawaaleeze ajamaazaku."

<sup>62</sup> Yinsa khunjipu yoori: "Otule aneesaaye makhono awe alimaka khusala eekesa nyuma khaneezela muufwalume wa Nnyizinku."

## 10

### *Yinsa oniwaaruma anakhiyoni awe sapiyiini na awiri*

<sup>1</sup> Paata ya toole, Mbwana khuwaathawula anakhiyoni awe akinoko sapiyiini na awiri, khuwaaruma yoori alawe awiri-awiri alokoze nsitati na mmiti wooshimo mphule aari weettelaaye oviramo.<sup>2</sup> Ye khuwooza yoori: "Wuurula pu wa waatta, ila anakhaazi vattithiiru. Mwinvekele Mwennyewe nshapa yoori awaaperekhe anakhaazi a w提醒. <sup>3</sup> Mwilawe, kinuuruman i nkhamma pwittipwithi zinttaaye vakatthi wa miiji. <sup>4</sup> Mwihithuule mfukho wala napampa, ama jampali wala mwiheemele ntarikhi mwichelisa.

<sup>5</sup> Wakhula nyuupa mwimfiyaaye mwilupe khapula yoori: 'Heeri yiiye vamote na-mweyo vaje apha.' <sup>6</sup> Amana eeyavo ntthu wa heeri, heeri yenu enttela wiiya vamote na othuuto; amana ahiivo entta w提醒. <sup>7</sup> Mwiheettette nyuupa khwa nyuupa, ila mwiikhale nyuupa ethiito mwije mwinywe wakhula etile mwinttelaaye w提醒. <sup>8</sup> Mwihithuule mfukho wala napampa, ama jampali wala mwiheemele ntarikhi mwichelisa.

<sup>8</sup> Wakhula sitati mwimfiyaaye khupokhereliwa saana, mwije ethuyoojiwa mwinttelaaye w提醒. <sup>9</sup> Mwiwaavonise alwele mwinttelaaye owaasikana na mwiwooze atthu yoori: 'Ofwalume wa Nnyizinku ori kharipu na-mweyo.'<sup>10</sup> Wakhula sitati mwineettaaye amana mwihipokhereliwi, mwileemo mwilawe ntarikhi mwiwooze yoori:<sup>11</sup> 'Lifufu la sitati yenu ntthi liniphariyeeyo mmoolu mwetthu, nootathelani mwamwennyewe; ila mwijuwe yoori ofwalume wa Nnyizinku ori

\* 9:54 Aaya eti kithaapu kiina khayatikhweenimo. † 9:55 Aaya eti kithaapu kiina khayatikhweenimo.

kharipu na-mweyo.' ”<sup>12</sup> Yinsa khuwooza theenya yoori: “Kiniuuuzani yoori siikhu ya kхиyaama, Nnyizinku onteela woonela tthakaraka Sootoma zayita sitati eto.

<sup>13</sup> Olaanikha pu waawo weeyo Korazini, na weeyo Betesayita! Eri-waka minjuza epi zirettikhaniyeezo mphu, zeettiyе orettikhana sitati ya Tiiro na Sidooni, athupwiyiye raku twampi zaya awala saakhu eekhala vafutha. <sup>14</sup> Nakataalikha siikhu ya kхиyaama, Nnyizinku onteela woonela tthakaraka Tiiro na Sidooni zayita mweeyo. <sup>15</sup> Weeyo Kafvaranawu onoona yoori onsisiwiwa mpakha pinkuuni? Wala! Aphо onteela wiishukhela motthooni.

<sup>16</sup> Otule anusuusilezaanini, onikisiileza miiyo; otule anuukatthalaaanini, onikikatthalaa miiyo. Otule anikikatthalaaaye miiyo, oninkatthalaa otule akirumiyeeyo.”

*Oruti wa anakhiyoni sapiyiini na awiri apale aarumiweeyo*

<sup>17</sup> Anakhiyoni apale sapiyiini na awiri khuruti ari oofurahi khulupa yoori: “Mbwana, hatha masheethwani aari onishututela amana nit-takhulaka khwa nzina lawo.”

<sup>18</sup> Yinsa khuwaajipu yoori: “Miiyo kamoona Epiliisi akwaka otulu nkhama ozerima. <sup>19</sup> Mwikisileze! Kiniwinkhani owahi wooluwattha nyookha, wenye khuhuurettini hatha ethtu, na oshintta owahi wooshi wa atwi\*. <sup>20</sup> Mwihifurahi mwaasa wa masheethwani wuushututelani, mwifuraheli mazina enu waatikhiwa pinkuuni.”

<sup>21</sup> Wakathi otthuupule Yinsa khwiyya woofurahi nkathhi wa Rooho Ttakathiifu, khuri: “Kinuusifu weeyo Paapa, Mbwana wa pinkuuni na vathi maana vitthu epi zeeya zoovitheya vakathhi wa ajuwi na asomi, khuwaathoonyeza asimaana; khweele Paapa, ti nanna waatakhiyeezo.

<sup>22</sup> Zooshi kenkhiwa ti Paapa; na khaavo aninjuwaaye Mwaana woohiyi Paapa, wala aninjuwaaye Paapa woohiiyi Mwaana, na otule Mwaana anintakhelaaye yoori anjuwise.”

<sup>23</sup> Paata ya toole, khuwaakhuwela anakhiyoni aweru paasi khuwooza yoori: “Ooparikhiiya pi apale anoonaaye epi mwinoonaazo. <sup>24</sup> Kiniuuuzani yoori manapiyu a waatta na afwalume aari otakha wooma vitthu ethhiipi mwinoonaazo ila khuhooni na aari otakha osila epi mwinsiilaazo ila khuhisiili.”

*Nsamariiya wooshapweya rooho*

<sup>25</sup> N'ooreetta toole, namanozela mmote wa kano khulankha yoori amweeze Yinsa khuri: “Mwanliimu, kurette-ni yoori kipatthe ohaayi wa mileele?”

<sup>26</sup> Yinsa khumuuzela yoori: “Yaatikhiwa niini nkithaapu ya kano wala eniweeleya toovi amana osomaka?”

<sup>27</sup> Ye khujipu araka: “‘Omphete Mbwana Nnyizinku awo na rooho yawo yooshi na nafusi yawo yooshi, na kuvu zawo zooshi na akhili zawo zooshi’ na ‘omphete namwaattamanani awo nkhama ethhiipo onjiphetaazo omwennyewe’.”

<sup>28</sup> Aphano Yinsa khumuuzela yoori: “Wajipu saana. Orettaru ethhiipo onnta opattha ohaayi wa mileele.”

<sup>29</sup> Ila namanozela wa kano otule aari otakha ojihakikhi khumuuzela Yinsa theenya yoori: “Namwaattamanani aka ti paani?”

---

\* **10:19** Atuwi otu Epiliisi.

<sup>30</sup> Yinsa khunjipu araka: “Aarivo ntthu mmote aari olankhaaye Yeruzaleemu eettaka Yeriko, khuvithaaleliwa pi malatarawu khunyakanyiwa vitthu zawe, khuvuliwa kuwo zawe, khupiwa khulikhiwa asaleelaka ofwa. <sup>31</sup> Erettiyeovo toole, khuviravo haakhimu wa tiini mmote, n'oomoona ntthu otule khunwerawera. <sup>32</sup> Khuviravo theenya nleevi† mmote, n'oomoona ntthu otule ari ntarikhi mphule khunwerawera. <sup>33</sup> Aphano khuviravo nsamariiya‡ mmote aari weetaaye safwari zawe, n'oomoona ntthu otule khumoonela huruma. <sup>34</sup> Khumwaattamela khoosa makhwatta awe na mafuttha na aalikoro khufuka na alikatuala, khunthuula khunttha vappuru vawe khunlawana onyuupa ya aletto khumwiinanelaa. <sup>35</sup> Mmeesho mwaya, khulaza mizurukhu miwiri za feeta aariinaazo khumwinkha mwennyewe nyuupa khumuuzu yoori: ‘Omwiinanele ntthu otu mpakha wakathi kinrutaavo, wakhula etile onttelaaye oharipu khwa ye, kintta ota kuuriphe n'ooruti.’”

<sup>36</sup> Aphano Yinsa khumuuzela namanozela wa kano otule yoori: “Khwa attuu apa attatthu paani omooneliyeeyo wiiya namwaattamanani awe nampiwa pi malatarawu?”

<sup>37</sup> Ye khujipu yoori: “Ti otule amooneliyeeyo huruma.” Yinsa khumuza yoori: “Na-weyo olawe warette ethhiipo.”

### *Owawe Maarata na Mariyamu*

<sup>38</sup> Yinsa na anakhiyonii awe eetta ovira alawaka khufiya mmuti, khupuwa muukha mmote aari wiitthiwaaye Maarata, khumpokherela.

<sup>39</sup> Ye aarina ttwiye aari wiitthiwaaye Mariyamu, eekhaliye nshini a moolu wa Mbwana Yinsa khusala asiila mattakhuzi apale aari olupaaye.

<sup>40</sup> Ila Maarata eetta ojizukulela mwaasa wa waatta khaazi, khulawa aphale aariivo Yinsa khumuuzu yoori: “Mbwana, khinuujali ttwiyyaku okilikhela khaazi za waatta otthome? Omuuze ate akikholise!”

<sup>41</sup> Mbwana khunjipu yoori: “Weeyo Maarata washukulikha na wajikhaza na vitthu za waatta. <sup>42</sup> Ila eti moote ti yiye yootafikhana. Mariyamu athawula phantte yooshapweya ahinnyakanyeyaaye.”

## 11

### *Yinsa oniwaanozela anakhiyonii awe nanna yoolompa*

<sup>1</sup> Siikhu moote Yinsa eetta olompa vahali vaya apho, eeshiyeevo mmote wa anakhiyonii awe khuri: “Mbwana, oninozele olompa nkhamma etthiipile Yaahaya Namoosa na-ye awaanozeliyeeko anakhiyonii awe.”

<sup>2</sup> Aphano, Yinsa khuwooza yoori: “Amana mwilompaka mwisala mwiri toono:

Papeetthu,

littitthimisiwe nzina lawo loottakatthifu.

Wiishushe Ofwalume awo.

<sup>3</sup> Oninkhe wakhula siikhu etthu-yoojiwa ninhithajijaaye.

<sup>4</sup> Oniswaamihi twampi zetthu,

nkhamma etthiipi na-fweyo nininswaamihaaye

wakhula otule annikosaaye.

---

† **10:32** Aleevi aari awaziri a mahaakhimu a tiini. ‡ **10:33** Asamariiya aari attuu ootarawiwa pi mayahuuti.

Ohinilikhelele nizayiniwaka ti sheethwani, [[ila onuuusuru khwa vitthu zootakhala]]\*.”

<sup>5</sup> Yinsa khuwooza theenya yoori: “Nkaakanyerelani mmote wamweyo anlankhaaye osikhu layili, khulawa ompiyela nlako swaahipu awe araka: ‘Swaahipu, kiipaashe phaawu ttatthu,<sup>6</sup> mwaasa yoori eetta ota swaahipu aka ont na akina hatha etthu yoomwinkha.’

<sup>7</sup> Khi amana swaahipu enu oojipuni ari nnyupa mwawe araka: ‘Ohikantipu! Miyo kafuka milako zaka, karapalela na aanaaka alala; akinwahi olankha yoori kuupatthise phaawu zaya.’<sup>8</sup> Weekhweele miyo kiniwuuzani yoori, hatha nkhamma khatakheeni olankha yoori oopatthise phaawu mwaasa w'oswaahipu, oniishela olankha na awinkhe zooshi onhithajiyazo mwaasa wa nthiti.

<sup>9</sup> Ti eto kiniwuuaanini yoori: Mwiveke, mwintta winkhiwa; mweekese mwintta opattha; mwipiye nlako mwintta ofukuleliwa.<sup>10</sup> Maana wakhula anvekaaye oninkhiwa, aneekesaaye ompattha, ampiyaaye nlako ontta ofukuleliwa.

<sup>11</sup> Paapa-ni mmote wa mweeyo anraaye mwanawewe anvekeliye phaawu khumwinkha liwe? Ama anvekeliye swi khumwinkha nyookha?<sup>†</sup> <sup>12</sup> Wala anvekeliye laayi khumwinkha wenye? <sup>13</sup> Moone, mweeyo wootakhala rooho mwinjuwa owenkha aaneenu vitthu zooshapweya, sapiseni Paapa wa pinkuuni khanziti owenkha Rooho Ttakatthiifu apale aninvekelaaye?”

### *Owahi wa Yinsa wa wiikara masheethwani*

<sup>14</sup> Siikhu moote, Yinsa aari omwiikara sheethwani mmwiili wa mwinyi mmote antotheliyeeyo ohittakhuli. Wakathi ansaruviyeevo sheethwani otule, ye khwaaza ottakhula; apale aari omoonaaye khushanka. <sup>15</sup> Ila athu akina khusala alupa yoori: “Ye oniikara masheethwani na owahi wa Belezibuuli<sup>‡</sup>, mfwalume wa masheethwani.” <sup>16</sup> Akinoko eetta omweeza, khusala anvekela alama moote ya pinkuuni.

<sup>17</sup> Yinsa khujuwa vitthu aari ofikhiraazo, khuwooza yoori: “Ofwalume woojaawanya khusala wuumana oniishelana otapanyeya, na ojama wa waawanyeya oniishelana wiisha. <sup>18</sup> Nkhama Epiliisi eetta ojaawanya, ofwalume awe ontela wiiyavo toovi? Mweeyo mwinlupa yoori miyo kiniikara masheethwani khwa owahi wa Belezibuuli. <sup>19</sup> Nkhama pi ethhipo, khi aaneenu anikara na owahi waani? Atthaapo pa yo anttelaaaye wuuthoonyezani yoori khamwina shariya. <sup>20</sup> Ila nkhama khweele masheethwani apa kiniikhara na owahi wa Nnyizinku, eto enthoonyeza yoori ofwalume wa Nnyizinku wafiya vakatthi venu.

<sup>21</sup> Ntthu woozivala na wojuumaanya, amana eekeselaka vaje vawe saaneene, mali zawe ziniiya zookholeleleya. <sup>22</sup> Ila ntthu woozivala zayita ye, amana ankukuttela khunshintta ontta onnyakanya zaana zawe anroromelaazo athuule phantte ya mali zawe.

<sup>23</sup> Otule ahina vamote na-miyo oto ona lupattha na-miyo, otule ahinkusanyaaye na-miyo ontta omwaza.”

---

\* <sup>11:4</sup> Warakha za raku khina aaya eti ya 4. † <sup>11:11</sup> Kithaapu za kiina khina mattakhuzi aya apa: ‘anvekeliye phaawu khumwinkha liwe?’ ‡ <sup>11:15</sup> Nzina likina la Epiliisi ti Belezibuuli.

<sup>24</sup> Yinsa khurutela olupa yoori: "Sheethwani, amana alaamo mmwiili oneekesa puuro yoohiina maati yoori avumule, n'oohisikani puuro ye onlupa yoori kintta orutela mphule kaariimo. <sup>25</sup> Amana aruti asikana nnyupa ori wooseeliwamo na wa waattaleliwamo, <sup>26</sup> onttta oruti eet-tele masheethwani makinoko sapa ootepa zayita otule, aviremo asala eekhala nttumphule. Attaaphale ohaayi wa ntthu aya otule oniiya wootepta zayita omwanzo."

<sup>27</sup> Yinsa eettaka olupa mattakhuzi apale, muukha mmote aari attaaphale khunyakula araka: "Wooshapweyiwa muukha otule oo-vokoliyeeyo khuwaamwisa."

<sup>28</sup> Ila Yinsa khunjipu araka: "Ooshapweyiwa pi apale ansiilaaye nt-takhuzi la Nnyizinku khushututela."

### *Alama ya Yuunusa*

<sup>29</sup> Wakathi atthu akusanyeyiyeovo vahali vamote, Yinsa khusala alupa yoori: "Atthu a leelo pi ootakhala rooho, anveka woona alama ya minjuza ila khanlawa othoonyeziwa hatha alama moote, yoohiyyi etile ya napiyu Yuunusa. <sup>30</sup> Nkhama ethhiipo Yuunusa eeyiyeeyo alama ya atthu a Neniive, na-ye Mwaana wa Pinaatamu onttela wiiya alama ya atthu a leelo. <sup>31</sup> Siikhu ya khiyaama rayisi wa kusini onttela olankha awaaphuke atthu a aphano; maana ye alankha okhu wiisheliyeewo olumwenku oteela osiila ojuwa wa Seleyimaana, ila otu mwiriina apha anziti Seleyimaana. <sup>32</sup> Siikhu ya khiyaama atthu a Neniive anttela wuuphukani mweeyo, maana yo athupwiya twampi zaya, n'osila tafusiiri epile aari olupaazo Yuunusa; otu mwiriina apha nasaapi anziti Yuunusa."

### *Nuuruya mwiili*

<sup>33</sup> Yinsa khuvira alupaka yoori: "Khaavo ntthu ankhozaaye khantteya khuvitha ama khukhutela na yuuku, ila entthiwa vahali wa wooneyavo yoori esala ewaamwasikhela apale anviraaye nnyupa. <sup>34</sup> Khantteya ya mwiili maasho, amana maasho awo eeya oosaana, mwili awo wooshi oniiya wa nuuru. Ila amana maasho awo ahiiyi saana mwili awo oniiya n'yizza. <sup>35</sup> Wiiyane phoole na nuuru eto oriinaaye yoori ehiye yiiza. <sup>36</sup> Amana mwiili awo wooshi wiiyana nuuru khuhina hatha phantte moote ya yiiza, oniiya woomwasikheliwa nkhamma khantteya yuumwasikhelaka weeyo."

### *Yinsa na mafwarizeewu na anamanozela a kano*

<sup>37</sup> Wakathi Yinsa eeshiyeovo ottakhula, mfwarizeewu mmote khumuuzu olawa oja owawe. Ye n'oofiya khwiikhala vameeza.

<sup>38</sup> Mfwarizeewu otule khushanka mwaasa woomoona Yinsa eettela oja woohinawi.

<sup>39</sup> Mbwana khuwooza yoori: "Mweeyo mafwarizeewu, mwinoosa koopho na parathu oje waya, ila rooho zenu zeetaala vitthu za omaasho kopho na zoohusuti. <sup>40</sup> Alolo! Otule aattaliyeeyo oje khahi othuuto attaliyeeyo nkathhi? <sup>41</sup> Khapula mwaaze winkha etile eriiye nkathhi wa rooho yenu nkhamma zimola, toowo mwintta woona zooshi ziwi-ikhaleliyeni saana.

<sup>42</sup> Olaanikha pu weenu mweeyo mafwarizeewu, maana mwininkha lifunku lakhuumi mathapa na vitthu za nwoorotha, ila khusala

mwitarawu shariya na pheta ya Nnyizinku! Mweeyo mwina yooretta vitthu epo woohilikh phantte kiina.

<sup>43</sup> Olaanikha pu weenu mweeyo mafwarizeewu, wawuutuvvelani puro ya wiilokozi nnyupa woosifwiwamo Nnyizinku na ochelisiwa wa shitahavo vamwanttiwa.

<sup>44</sup> Olaanikha pu weenu mweeyo, mwiyyiyeyo nkhamma khapuri yoohooneyi anviraavo atthu vatulu vaya khuhijuwi.”

<sup>45</sup> Aphano namanozela wa kano mmote khunjipu Yinsa araka: “Khahiyo toowo! Mattakhuzi apo kinoona yoori annithoonya fweeyo.”

<sup>46</sup> Yinsa khuri: “Olaanikha pu weenu mweeyo anamanozela a kano, mwiniwaapwecherisaaye atthu mapwattha oolemelala wala mweeyo mwihihwahaaye osapa na yaala yenu.

<sup>47</sup> Olaanikha pu weenu mweeyo mwiniwaajekelaaye khapuri zooshapweya manapiyu, atthaapale ooliiweeyo pi amarehemu apapazenu. <sup>48</sup> Apho mweeyo mwinthoonyeza yoori mwinlawela oshaahiti wookhupalela epile apapazenu arettiyeeyo, yo awoola manapiyu, mweeyo khuwaajekela khapuri zooshapweya. <sup>49</sup> Ti eto Nnyizinku alupiyeeyo nkathhi woojuwa wawe yoori: ‘Kinlawa kawaaperekhe manapiyu na maaswihaapa; yo anteela owoola, akina aweekarise.’ <sup>50</sup> Mwaasa wa manapiyu apa ooliiweeyo tokhiya olumwenku waazaka, atthu ooshi apa a leelo eti ana paathuli. <sup>51</sup> Waaza taamu ya Apeele mpakha taamu ya Zakariya otule ooliiweeyo kharipu ya vaalitaari vaje wa nyuupa ya Nnyizinku. Kiniwuuzani yoori, atthu a leelo anlawa ahukhumwiwe mwaasa wa ethiito.

<sup>52</sup> Olaanikha pu weenu mweeyo anamanozela a kano, maana mwathuula efukulo yoojuwa, ila khuhivrimo na khuwaakkhattaza apale aari otakhaaye oviramo.”

<sup>53</sup> Paata ya Yinsa olaavo aphale vaya, mafwarizeewu na anamanozela a kano khwaaza omuuzela vitthu za waatta ari ootkipukha. <sup>54</sup> Yo aari onwazela shawuri yoori kusapi onalupa eththu, apatthe onlokoveza.

## 12

### *Ohirimiza na olipisela*

<sup>1</sup> Khuntti ya atthu khukusanyeya, mwaasa wa waatta akinoko khusala aluwatthana. Yinsa khuwooza khapula anakhiyon awe yoori: “Phoole na thwapiya zoonaaafikhi za mafwarizeewu. <sup>2</sup> Khayiivo yoovithiwa ehinteelaaye ovithuliwa na zooshi epile zoottiyeleliwa zinteeala ojuwiwa.” <sup>3</sup> Zooshi zinlupiwaazo n'yiiza, zinlawa zasaruleliwe veetakale, na zooshi epile zinlupiwaazo sirini zinlawa zeeye payana.

### *Nimoove Nnyizinku paasi*

<sup>4</sup> Yinsa khuvira attakhulaka araka: “Miiyo kiniwuuzani ashirikha yoori: Mwihiwoove apale anuulaaye mwiili, nawiisha khuhireteli hatha eththu. <sup>5</sup> Miiyo kintta wuuthonyezani paani woomoova: Mwimoove Nnyizinku otule anwahaaye wuula mwiili enu, nafusi yenu khweeselela motthooni. Oto ti mwiriina yoomoova. <sup>6</sup> Anyannyi athaanu attiithi-attiithi khanuuzyisiwa sinku piiri? Ila apo aya khaavo mmote Nnyizinku aninsahawaaye. <sup>7</sup> Hatha na nyuuli za mmwishwa mwenu zooshi pi za waalakiwa. Mwihiwove, mweeyo mwinaaye fwayita zayita anyannyi apo a waatta.”

### *Otukhuru na onkatthala Yinsa*

<sup>8</sup> Yinsa khuri: "Miiyo kiniuuuzani yoori: otule antukhurwaaye vakatthi wa atthu yoori namalottela aka, Mwaana wa Pinaatamu onteela otukhuru vakatthi wa malayikha a Nnyizinku. <sup>9</sup> Ila otule ankikatthalaaye vakatthi wa atthu, na-ye onteela okathaliwa vakatthi wa malayikha a Nnyizinku. <sup>10</sup> Wooshi otule anintarawaaye Mwaana wa Pinaatamu onswaamihiva, ila otule ankufurwelaaye Rooho Ttakatthiifu khanswaamihiva.

<sup>11</sup> Amana mwithuuliwa olawa ophukiwa nnyupa woosifwiwamo Nnyizinku ama wa afwalume, mwihiyane shaakha khwa nanna mwinttelaaye ojaakisa ama ethu mwinttelaaye olupa. <sup>12</sup> Wakathi otthuupo Rooho Ttakatthiifu entta wuuthoonyezani ethu yoolupa."

### *Thaajiri woohiina akhili*

<sup>13</sup> Mwinyi mmote wa khuntti etile khunvekela Yinsa araka: "Mwanliimu, omuuze ttwiiyaku akaawanyele maali epile alikiyyeeyo papeethu."

<sup>14</sup> Yinsa khunjipu araka: "Weyo, paani akirettiye wiiya namaphuka enu wala namwaawanya wa maali zenu?" <sup>15</sup> Khuwoza yoori: "Phoole na omaashokopho wooshi wa vitthu, mwaasa yoori ohaayi wa pinaatamu khunlipa na vitthu epile ampatthaazo za waatta."

<sup>16</sup> Yinsa khulupa nlikaniso araka: "Aarivo mwinyi mmote wa thaajiri aaruweriyeyo channu. <sup>17</sup> Ye khusala awaza toono: 'Kirette-ni? Akina vahali wootthaavo peewu zaka epi.'

<sup>18</sup> Khulupa yoori: 'Aa, kajuwa ethu yooretta. Kintta opwecha matthala apa mattiitthi kijke mawulu-mawulu yoori kittheemo peewu zaka na vitthu zaka zooshi epile kiriinaazo. <sup>19</sup> Nawiisha, kuuze nafusi yaka yoori: onaaye peewu na vitthu za waatta zintoshelezaaye nyaakha za waatta; ovumule, oje, onywe na opuhe.'

<sup>20</sup> Ila Nnyizinku khumuuba yoori: 'Nlolo! Osikhu otthuupu onta ofwa. Maali zawo paani anttelaaye osalana?"

<sup>21</sup> Yinsa khumarisela araka: "Ntthu oto ori nkhamma atthu apale anlipanaaye maali zaya ila khuhiyi mathaajiri mmakhono wa Nnyizinku."

### *Onroromela Nnyizinku*

<sup>22</sup> Aphano Yinsa khuwoza anakhiyoni awe araka: "Ti eto kiniuuuzanini yoori: mwihiyane shaakha na ohaayi enu, wala ethu mwinttelaaye oja ama ethu mwinttelaaye owala. <sup>23</sup> Maana ohaayi ona fwayita khuluyeene zayita ethu-yoojiwa na mwiili ona fwayita khuluyeene zayita kuwo. <sup>24</sup> Mwiwoone anakhuku; khanzala wala khanuurula hatha ntthala khana loopwehavo vitthu-zoojiwa zaya, ila Nnyizinku oniwenkha etthu-yoojiwa. Mweeyo mwinaaye fwayita khuluyeene zayita anyannyi apo! <sup>25</sup> Paani vakatthi venu anwahaaye weekezelama mansha awe hatha nkhamma eetta oshukulikhela? <sup>26</sup> Mweeyo khamwinwahi oshintta vitthu ttiitthi-ttiitthi, khi mwinshukulikhela toovi kinoko zaya?

<sup>27</sup> Moone nanna anwulaazo maluwa oshapweya ntthuttu, khankhola khaazi wala khanvaasha kuwo, ila kiniuuuzani yoori: Seleyimaana aari thaajiri nwulweene, ila khawaleeni kuwo zooripelela nkhamma maluwa atthaapo. <sup>28</sup> Nnyizinku onwalisa nyaani ziriye ntthuttu leelo meesho zeettelaka olukula, sapiseni mweeyo atthu a amini ttiitthiiru khatepeeni wuuwalisani? <sup>29</sup> Mwihihukulikhela etthu mwinttelaaye oja ama

onywa.<sup>30</sup> Atthu apale ahininjuwaaye Nnyizinku pa yo anshukulikhe-laaye vitthu epo, ila mweeyo Papeenu onjuwa yoori enuuuhithajiyani vitthu epo.<sup>31</sup> Mweekese khapula Ofwalume wa Nnyizinku, vitthu zaya epo mwintta weekezelawa.”

<sup>32</sup> Yinsa khulupa theenya araka: “Mwihoove mweeyo mwiiyiye nkhamma khuntti ttiitthiiru ya pwittipwitthi, maana Papeenu ti ye atakhiye owinkhani Ofwalume awe.<sup>33</sup> Muuzanyize zooshi mwiriinaazo nzurukhu aya mwiwenkhe asikhini, mwijaattalelele mifukho zihin-varuwaaye, toowo mwinthokorela maali pinkuuni zihiniishaawo, okhu ahimfiyaawo nantarawu wala maweephe yoori aharipu.<sup>34</sup> Maana attaapho eniiyaavo maali zawo rooho yawo eniiya attaapho.”

### *Anamarumeyela oojeekesela*

<sup>35</sup> Yinsa khuvira alupaka yoori: “Mwiiye anamarumeyela oojeekesela na khantteya zenu ziri zookhoziwa.<sup>36</sup> Mwina yawiyya nkhamma anamarumeyela aninwejelaaye mbwanaaya yoori arutaka onjampo la harusi, amana apiya nlako amfukulele nasaapiru.<sup>37</sup> Ooshapweyiwa anamarumeyela apale mbwanaaya anttelaaye owaasikana eettaka ojeekesela. Kiniwuuzani khweele yoori mbwanaaya na-ye ontta ojivalisa yoori arumeye, awooze wiikhala vameeza asala awaarumeyela.<sup>38</sup> Hatha nkhamma ata osikhu layili ama lifwajiri, ooshapweyiwa anamarumeyela apale mbwanaaya anttelaaye owaasikana ari oojeekesela.<sup>39</sup> Mwijuwe yoori eriwaka mwennyewe nyuupa eetta ojuwa wakathi nantarawu antaavo, toono ahinlikhaka ovira nnyupa mwawe.<sup>40</sup> Namweyo mwiiye woojeekesela, maana Mwaana wa Pinaatamu ataaka khaavo anjuwaaye wakathi aya.”

### *Karumeya wa waamineya na woohaaminey*

<sup>41</sup> Aphano Pheeturu khumuuzela Yinsa yoori: “Mbwana, nlikaniso opo pu weethu ama pu wa atthu ooshi?”

<sup>42</sup> Mbwana khujipu araka: “Paani eeyiyeeyo karumeya wa waamineya na w'aakhili, mbwanaawe amwinkhiyeeyo owaalokozela akarumeya azaawe na Owenkha ethu-yoojiwa mmana ofiya wakathi?

<sup>43</sup> Wooshapweyiwa karumeya otule mbwanaawe amana ataaka anttelaaye onsikana arettaka ethiipo.<sup>44</sup> Weekhwhee, kiniwuuzani yoori ontela wiiya wa waaminiwa alikheliwe weettettisa maali zooshi.

<sup>45</sup> Mwaakanyerele, karumeya otule amana alupa nroho mwawe yoori: ‘Mbwanaaka khanta nasaapi,’ khwaaza owaapiya akarumeya apale akina aakha na aalume, okhuno ajaka, anywaka na ahapaliwaka,

<sup>46</sup> mbwanaawe ontela ota siikhu etile ye ahaari waakanyerelaaye na wakathi ahaari ofikhirelaaye, ahukhumwiwe venkivene athiiwe puuro ya atthu ooхаamineyi.

<sup>47</sup> Karumeya otule anjuwaaye matakhele a mbwanaawe, ila khuhisala ajeekesela na khuhisala arettu epile antkhaazo mbwanaawe, onteela ohukhumwiwa na ojaphiwa venkivene.<sup>48</sup> Ila otule ahinrettaaye matakhele a mbwanaawe mwaasa woohijuwi, onteela ojaphiwa na ohukhumwiwa vattithiiru. Wakhula otule enkhiweeyo za waatta ona yoorutisa za waatta; na otule aaminiweeyo venkivene, onlawa aveke-liwe zooziti channu.”

### *Waawanyeya mwaasa wa Yinsa*

<sup>49</sup> Yinsa khuri: "Miiyo kateela okhoza moottho vatuniya, enikituvela ovira okholelaka! <sup>50</sup>\* Ila yamwanzo kina yoohoowa kifwe, kina huzuni mpakha vitthu epi zirettikhane ziishe! <sup>51</sup> Mweeyo mwinaakanyera yoori miiyo katana heeri vatuniya? Wala! Kiniwuuzani khweele yoori miiyo katiisa ohisiilani. <sup>52</sup> Waaza leelo eti mpakha okho ninttaawo, nkatthi woojama wa atthu athaanu, onteela opuwamo waawanyeya; attatthu ohisiilanani apale awiri, apale awiri ohisiilanani apale attatthu. <sup>53</sup> Paapa wuumana na mwanawewe na mwaana wuumana na papaawe. Maama wuumana na mwanawewe wankha, mwaana wankha wuumana na mamaawe, namaraliwa wuumana na nkhwewe, akhwe wuumana na namaloola."

### *Alama za wakathi*

<sup>54</sup> Yinsa khuwooza atthu aakusanyeyiyeyo yoori: "Mweeyo amana moona liwiku liwelelaka phantte y'ookhu lintupweelaawo njuwa mwinlupaka yoori: 'Entakha onya vuula', khweele khurettikhana. <sup>55</sup> Amana moona pheevu ya kuusi mwinlupaka yoori: 'Enteela opuwa haari', khweele khurettikhana. <sup>56</sup> Manaafikhi! Mweeyo mwinjuwa olupa alama za vatuniya na z'ootulu; aphano toovi mwihijuwaka olupa alama za wakathi opu?

<sup>57</sup> Mwaasa aya niini mwihijuwaka othawula etile yiyyiyeyo ya shariya? <sup>58</sup> Amana weeyo na muumani awo mwilawaka wa namaphuka, enhithajiya osiilana khpula rakuzeene mwihiinalawe, maana amana ofiya wa namaphuka ontta omuuza namweekesela ootthe nkalapooso. <sup>59</sup> Miiyo kiniwuuzani khweele yoori khunlaamo ohiripheeni khpula."

## 13

### *Othupwiya ama ofwa*

<sup>1</sup> Wakathi aya opule, atthu aariivo khumuuzi Yinsa yoori Pilaatu awoola atthu akina a Kalileya wakathi aari orettaavo twaha zaya. <sup>2</sup> Yinsa khuwaajipu yoori: "Mweeyo mwinoona yoori akalileya apo aari anatwampi zayita atthu akina, mwaasa woohoowa toowo? <sup>3</sup> Miiyo kiniwuuzani yoori: wala! Apho amana na-mweyo mwihihupwiyi twampi zenu, mooshi mwintta opwetheya nkhamo yo. <sup>4</sup> Ama mweeyo mwinaakanyera yoori apale khumi na wanaane yaawaakweliyeeyo korofwa ya Siloowe aari anapaathuli zayita apale aniikhalaaye Yeruza-leemu? <sup>5</sup> Wala! Kiniwuuzani theenya yoori amana mwihihupwiyi twampi zenu mooshi mwintta opwetheya nkhamo ethiipo na-yo apwetheyiyeezo."

### *Mfikeera woohiimi*

<sup>6</sup> Aphano Yinsa khulupa nlikaniso opu onraaye: "Mwinyi mmote aarina mfikeera awe aazaliyeeyo mmashapa mwawe. Khulankha olawa oshuma mishumo zaya, hatha mmote khuhisikanimo. <sup>7</sup> Aphano khumuuzi namalimela nshapa ntthile yoori: 'Kina nyaakha mittatthu kitaaka oshuma, kihisikanakamo hatha etthu. Okakatte! Mwaasa wa etthu-ni ottiyelelaka puuro ya mahala?'

\* **12:50** 'Eu seja batizado com um certo batismo' khwa luuka ya kereeku.

<sup>8</sup> Ila karumeyaawe otule khunjipu araka: ‘Mbwana, kinuuvekelani yoori mwilikhe mfikeera opu wiye nttumphu mpakha mwaakhani; miyo kintta othipa nshini mwaya kisala kiithela vitutu.<sup>9</sup> Mwaakha nkina amana wiima mishumo ti yooshapweya; amana ohiimi okakatte.’”

### *Muukha Woovonisiwa Saapatu.*

<sup>10</sup> Siikhu ya saapatu, Yinsa eetta osomisa nnyupa moote yoosifwiwamo Nnyizinku. <sup>11</sup> Nttumphule aarimo muukha aari ohoochiwaaye ti sheethwani khwa nyaakha khumi na minaane, aari wookhutupuwa ahaari owahaaye wookowa. <sup>12</sup> Wakathi Yinsa amoonyeego khunkhuwela khumuza yoori: “Maama mwavona orati enu.”

<sup>13</sup> Yinsa khunttheela makhono nunu otule omuuta otthuupule khookowa, khwaaza otthapa ansifwaka Nnyizinku. <sup>14</sup> Ila haakhimu wa nyuupa yoosifwiwamo Nnyizinku khwiya wa wiiphiiriwa mwaasa wa Yinsa ovonisa siikhu ya saapatu, ti eto aawooziyeeyo atthu yoori: “Ziwaapho siikhu sitha zookhola khaazi; mwisala mwita siikhu ethiipo yoori mwivonisiwe, ila saapatu wala.”

<sup>15</sup> Aphano Mbwana khujipu araka: “Manaafikh! Paani mmote wa mwego anraaye efiye saapatu khuhifikuli mompe zawe na apurwe awe olawa onywisa maati? <sup>16</sup> Nunu otu peewu ya Eburahima, eettiye ofukiwa ti Epiliisi khwa nyaakha khumi na minaane, nanna-ni ahaari weettelaaye otaphuliwa mwaasa wa wiiya saapatu?”

<sup>17</sup> Alupiyeego mattakhuzi apale, maatuwi awe Yinsa ooshi khuwaapattha haaya, atthu ooshi aariivo khwiya oofurahi mwaasa wa vitthu zooshapweya epile aari oreetaazo Yinsa.

### *Nlikaniso wa phunje ya mfikeera na Fwaramento*

<sup>18</sup> Yinsa khulupa yoori: “Ofwalume wa Nnyizinku onlattana na niini, wala kilattisane niini? <sup>19</sup> Opo ori nkhamma phunje ya mfikeera, mwinyi mmote anthuulaaye khulawa khuzala mmashapa mwawewe. Khuwula khwiya muuthi nwulweene, anyannyi o'otulu khusala ajekamo vijaaro zaya nvirapi mwaya.”

<sup>20</sup> Yinsa khulupa theenya araka: “Ofwalume wa Nnyizinku walattana na niini? <sup>21</sup> Opo ori nkhamma fwaramento muukha anthuulaaye khuttha ofu koopho ttatthu, khujakuwa wooshi.”

### *Nlako woophunyeya*

<sup>22</sup> Yinsa eetta ovira anozelaka nsitati na miti mikina za waatta eettaka Yeruzaleemu. <sup>23</sup> Ntthu mmote khumuuzela yoori: “Mbwana, vattithiiru atthu anttelaaye wuusurukha?”

<sup>24</sup> Yinsa khunjipu araka: “Mwijilipise yoori mwivire vanlako woophunyeya, maana a waatta anlawa eekese ovira ila khanteela owahi.

<sup>25</sup> Mwennyewe nyuupa amana alankha afuka nlako awe, mweeyo mwinsala vaje mwipiyaka nlako na mwivekaka yoori: ‘Mbwana mwini-fukulele!’

Ye ontta wuujipuni araka: ‘Akinjuwa ohali mwinlankhaawo.’

<sup>26</sup> Aphano mwinlawa mwalupe yoori: ‘Naja vamote, khunywa vamote na wanozela mmuti mwetthu.’

<sup>27</sup> Ila ye onlawa ajipu yoori: ‘Akinuujuwani wala ohali mwinlankhaawo akinjuwawo, mwikisuse mweeyo anamarettaa zootakhala.’

<sup>28</sup> Mwinlawa mwamoone Eburahiima, Esiyaakha, Yaakhumpa na manapiyu ooshi ari muufwalume wa Nnyizinku, ila mweeyo mwikkare-liwe oje. Attaapho onlawa weeyevo olila na oluma meeno. <sup>29</sup> Athu anttela olankha malawa-njuwa akina okhu lintupweelaawo njuwa, kusini na kashikhazini ate eekhale vameeza woofwalume wa Nnyizinku. <sup>30</sup> Miyo kiniwuuzani khweele yoori, awaapho amwanzo anttelaaye wiiya awiishela, na awiishela anttelaaye wiiya amwanzo.”

### *Yinsa onoonela huruma Yeruzaleemu*

<sup>31</sup> Wakathi otthuupule khutavo mafwarizeewu khumuaza Yinsa yoori: “Oleovo apha, maana Erooti ontakha owuula.”

<sup>32</sup> Ye khuwaajipu yoori: “Mwilawe mwamuuze nanthala aya oto yoori: Leelo na meesho kiniikara masheethwani na owaavonisa alwele, siikhu yattaatthu kintta wiishisa khaazi yaka. <sup>33</sup> Enhithajiya, leelo, meesho na nrotto ovira kilawaka; maana weekhwhee khaavo napiyu amfwaaye nti nkina woohiyyi Yeruzaleemu!”

<sup>34</sup> Yeruzaleemu, Yeruzaleemu, oniwoolaaye manapiyu na owaavonya anamalaleya apale omperekheziwaaye! Swaafu kavi miiyo kitakhaka owaakusanya aanaawo nkhamma mwanakhu aniwaakusanyaazo aanaawe mmapaphelo mwawe, ila weeyo khuhitakhi? <sup>35</sup> Apho moone yoori nyuupa yenu enttela wiiya puuro yoohiikhaliwi. Weekhwhee kiniwuuzani yoori khamwintela okoona theenya mpakha wakathi mwinttelaaye olupa yoori: ‘Attottopeliwe otule antaaye khwa nzina la Mbwana!’”

## 14

### *Ovonisa nkina Siikhu ya Saapatu*

<sup>1</sup> Saapatu moote, Yinsa aalawiye wa ntunkhulu mmote wa mafwarizeewu olawa oja, atthu aari ntumphule khusala amweekesela Yinsa. <sup>2</sup> Attaaphale aariivo, arivo mwinyi aavipiyeyo mwili awe wooshi. <sup>3</sup> Yinsa khuwoozela mafwarizeewu na anamanozela a kano araka: “Enkhupaleliwa onvonisa nlwele saapatu ama wala?” <sup>4</sup> Ila yo khwiyya oonyamala. Attaaphale, khunkhola mwinyi otule nkono awe, khunvonisa khumuaza olawa safwari zawe.

<sup>5</sup> Aphano khuwoozela yoori: “Paani wa mweyo anraaye amooniye mwanawе ama mompe yawe ekweliye vanlipu khuhilazivo nasaapiru eri saapatu?”

<sup>6</sup> Yo khuhiwahi ojipu.

### *Ojipushuwisa na omakeleya.*

<sup>7</sup> Wakathi ajuwiyeveo yoori atthu apale aalaleyiweeyo njampo aari othawula puuro za wiilokozi, Ye khulupa nlikaniso opu: <sup>8</sup> “Amana olaleyiwa njampo la harusi, ohithawule puuro etile ya wiilokozi, maana khinjuweya alaleyiwe ntthu wootepa oshitahiwa zayita weeyo. <sup>9</sup> N'oota otule oolaleyiyeeyo onta owuuza yoori: ‘Puuro eto omwinkhe otu’. Attaaphale weeyo oniiya woopatthiwa ti haaya olawaka wiikhala puuro ya wiishela. <sup>10</sup> Ila amana olaleyiwa ona yawiikhala puuro ya wiishela, n'oota otule oolaleyiyeeyo onta owuuza yoori: ‘Swaahipu, ote wiikhale puuro eti ya wiilokozi’. Aphano, weeyo onttela wiiya woohishimiwa venkivene vakatthi wa ananlaleyiwa ooshi. <sup>11</sup> Maana wakhula otule anjiwilisaaye onta opushuwisiwa na otule anjipushuwisaaye onta owulisiwa.”

<sup>12</sup> Attaaphale Yinsa khumuza mwinyi otule anlaleyiyeyo yoori: "Amana wiiyana etthu-yoojiwa yawo ama njampo lawo ohiwaalal-eye attwiizo, ashirikhaawo, ajamaazo ama anamwaattamanani awo oothaajiri, yoori na-yo ahuulaleye wumpuwa nkhamma oriphana. <sup>13</sup> Ila amana wiiyana njampo owaalaleye asikhini, anamarakala na atthu oochooni. <sup>14</sup> Toowo oparikhiiyiwa onttela wiiya wawo, maana apo aya khanlawa wiiyana etthu yawuurutisela. Oraphiwa wawo onttela ota siikhu yoosisimuliwa anashariya."

*Nlikaniso wa njampo liwululene*

<sup>15</sup> Ntthu mmote wa atthaapale aariina vameeza asiiliyeevo mat-takhuzi apale khumuza Yinsa yoori: "Ooshapweyiwa pi apale anttelaaye oja njampo l'oofwalume wa Nnyizinku."

<sup>16</sup> Aphano Yinsa khujipu yoori: "Mwinyi mmote aarina njampo lawe khuwaalaleya atthu a waatta. <sup>17</sup> N'ooifiya wakathi khunruma karumeyaawe olawa owooza anamalaleyiwa yoori: 'Mwite, zalikana.'

<sup>18</sup> Ila wakhula mmote khwaaza olupa tafwawuthi zawe, wamwanzo khulupa yoori: 'Keetta wuuzanya nshapa laka, apha kinttel awoona, kinveka nswammaha.'

<sup>19</sup> Waphiiri khulupa yoori: 'Keetta wuuzanya mompe khumi zoolima, kintakha kilawe keezelele, kinveka nswammaha.'

<sup>20</sup> Wattaathu khuri: 'Kintta wiisharu oloola, akinwahi olawa.'

<sup>21</sup> Karumeya otule khuruti khulawa khumuza mbwanaawe vitthu epile. Mwennyewe njampo khwiya wa wiiphiiriwa khulupa yoori: 'Waakuve olawe mmatarikhi na mmamuti wa sitati wawaatiise anamarakala, asikhini na apale oochooni.'

<sup>22</sup> Karumeya otule n'ooruti khulupa yoori: 'Mbwana, karetta epile mwaakirumiyeego, ila nalelo zinsala puuro.'

<sup>23</sup> Mbwanaawe khumuza yoori: 'Olawe mmatarikhi khuulu na mmamiphiitelo, wa waakhanyarele apale onttelaaye owaasikana ate eetaale vaje vaka. <sup>24</sup> Kiniwuuzani yoori khaavo khwa apale aalaleyiweeyo anttelaaye oja njampo laka.'

*Nanna ya wiiya namalottela wa Yinsa*

<sup>25</sup> Siikhu moote, atthu a waatta eetta onlottelela Yinsa, Ye khuzukuluwa khuwooza yoori: <sup>26</sup> "Otule antakhaaye okilotta, ona yookipheta channu zayita papaawe, mamaawe, muukhaawe, aanaawe, attwiize, alupuwe, ama ohaayi awe, n'oohiretti ethiipo khaniyya nakhiyon aka. <sup>27</sup> Wakhula otule ahinhuulaaye nsalapa awe akilotta khaniyya nakhiyon aka.

<sup>28</sup> Paani wa mweeyo anraaye atakhaka ojeka korofwa yawe, ahinaaaya wiikhala khapula attheela hisapu vitthu zintakhaavo oona nkhamma onwahi wiishisa? <sup>29</sup> Ahirettiru ethiipo, ye onta waaza ila khaniishisa. Atthu apale anttelaaye omoona antta ontheya alupaka yoori: <sup>30</sup> 'Mwinyi otu aaza ojeka ila khanwahi wiishisa.'

<sup>31</sup> Ama mfwalume-ni anraaye alawaka wuumana viitha na mfwalume nkina khuhuaazi wiikhala khapula apheloleza na anajanka awe apale alufu khumi, nkhamma anlawa awaakhitiri apale alufu eshiriini anttelaaye wuumanana? <sup>32</sup> Amana ahiretti toowo, apale ahinafiye ari peetiwene nalelo, onta onruma waziri awe olawa owaavekela heeri. <sup>33</sup> Khwa nanna ethiipo wakhula mmote wa mweeyo ahinlikhaaye epile ariinaazo khansuhi wiiya nakhiyon aka.

<sup>34</sup> Mwiinyu ona fwayita, khi mmana olilha onyuunya onrutiseleya toovi onyuunya waya? <sup>35</sup> Khunretteliwa etthu wala mmashapa ama shituruumu, onta wiithiwa.

Otule ariina mashiilo, ti asiile.”

## 15

### *Pwittipwitthi ya waashikha*

<sup>1</sup> Wakathi nkina anamariphisa lumpuru na anatwampi khusala ata oteela onsiila Yinsa. <sup>2</sup> Mafwarizeewu na anamanozela a kano khusala aapa araka: “Mwinyi otu oniwaapokherela anatwampi khusala aja vamote na-yo.”

<sup>3</sup> Aphano Yinsa khuwooza nlikaniso mmote araka: <sup>4</sup> “Paani mmote wa mweyo anraaye arina pwittipwitthi zawe miiya khumwaashikha moote, khuhilikhi ntthuttu epile tiisiini na tiisiya zisaliyeezo, eettela etile moote emwaashikhiyeeyo mpakha opattha? <sup>5</sup> Amana asikana ontta ovikela ari woofurahi, <sup>6</sup> khusala arutela owawe. N'oofiya oniwaakhuwela maswaahipu zawe na anamwaattamanani awe awooze yoori: ‘Nlaweni nitthape, maana kapattha pwittipwitthi yaka etile yaakaashikhiyeeyo.’ <sup>7</sup> Khwa nanna ethiipo kiniwuuzani yoori ontela wiiyawo otthapa nwulweene pinkuuni mwaasa wa natwampi othupwiya, zayita atthu tiisiini na tiisiya anashariya ahinhithajiyaaye othupwiya.”

### *Nzurukhu wa waashikha*

<sup>8</sup> Kuvira araka: “Ama muukha-ni anraaye arina nzurukhu awe khumi, khumwaashikha mmote khuhikhozi khantteya aseela nnyupa mwawe, eekesa w'aakhilivo mpakha opattha? <sup>9</sup> Amana apattha oniwaakhuwela maswaahipu zawe na anamwaattamanani awe awooze yoori: ‘Nlaweni nitthape, maana kapattha nzurukhu aka opule waakaashikhiyeeyo.’ <sup>10</sup> Miyo kiniwuuzani yoori eniiyavo furaha khuluyeeene vakathhi wa malayikha a Nnyizinku mwaasa wa natwampi mmote othupwiya.”

### *Nlikaniso wa mwaana wa waashikha*

<sup>11</sup> Yinsa khurutela theenya yoori: “Aarivo mwinyi mmote aariina aanaawe awiri. <sup>12</sup> Otu nttiithi aya khumuuzza papaawe yoori: ‘Paapa, mwikinkhe lifunku la erathi yaka.’ Papaawe khuwaawanyela maali epile aanaawe.

<sup>13</sup> Oviriyeevo wakathi vattitthiiru, mwaana otule nttiithi khuthuula maali zawe epile aawanyeliweezo khulawa tuniya kiina ya woolepawo. Ottuukho khuharipu maali zawe epile khwa mwentto woololo. <sup>14</sup> N'oohariipu zooshi khupuwa jala ya waatta mmuti mwaya mphule, ye khusala ahankayikha. <sup>15</sup> Khulankha mpakha wa mwinyi mmote wa tuniya ethiitile khunvekela khaazi, ye khumwinkha oshukisa kuluwe zawe ntthuttu. <sup>16</sup> Ye aari ohithajiya oja vitthu epile zaari ojiaaazo pi kuluwe na khaavo aari omwinkhaaye etthu-yoojiwa.

<sup>17</sup> Khujipayini khuri: ‘Anakhaazi a paapa ana etthu-yoojiwa yoowaafiyela, miyo kiri okhuno entta okikhola jala. <sup>18</sup> Kintta olankha kilawe wa paapa khamuuze yoori: Paapa, kakosa mmakhono wa Nnyizinku na mmakhono mwenu. <sup>19</sup> Akinsuhi theenya wiithiwa yoori ki mwanenu, mwikipokherele nkama mmote wa anakhaazi enu.’ <sup>20</sup> Khulankha khusala alawa mpakha wa papaawe.

Nalelo ari peetiwene papaawe khumoona, khwiyyana huruma khluyene khusala antthirela khulawa khumpatikha na khumpejari.

<sup>21</sup> Attaaphale mwaana otule khumuza papaawe yoori: ‘Paapa, kakosa mmakhono wa Nnyizinku na mmakhono mwenu. Akinsuhi wiithiwa yoori ki mwanenenu.’

<sup>22</sup> Ila papaawe khuwooza akarumeya awe yoori: ‘Mwaakuve, mwitiise kuwo zooziti oshapweya mwinwalise. Na peetthe mwinwalise nzaala mwawe na shapattho mmoolu mwawe. <sup>23</sup> Mwilawe onzizi mwanthuule mwaana wa mompe otule eesheliyeeyo oneneva mwite mwishije, nirette njampo la furaha. <sup>24</sup> Mwaasa yoori mwanaka otu aafwiyye apha ori haayi; aashikhie apha apattikhana.’ Khwaaziwa njampo.

<sup>25</sup> Epo zaari orettikhana mwaana otule nwulu ari omashapa. Khuta mpakha kharipu na vaje, khusala asiila koma zeettaka ovuma na athu eettaka wiina. <sup>26</sup> Aphano ye khunkhuwela karumeya mmote wa vaje attaaphale khumuuzela niini yaari orettikhanaaye. <sup>27</sup> Ye khumuza yoori: ‘Ttwiiyo ti ye arutiyeeyo, papaawo khunshijela mwaana wa mompe otule eesheliyeeyo oneneva, mwaasa wompokherela ari haayi.’

<sup>28</sup> Mwaana otule nwulu khwiippiiriwa khuhisala atakha oviramo. Attaaphale papaawe khusaruwa khusala ankhanyarela. <sup>29</sup> Ila ye khumuza papaawe yoori: ‘Moone! Nyaakha za waatta kuurumeyelakan, wala akinakhijilele hatha nttakhuzi lenu limote. Ila khamwinakinkhe hatha puuzi moote yoori kirette njampo na ashirikha aka. <sup>30</sup> Arutiyeeyo mwanenu oto aharipwieeyo vitthu zenu na amalempe, mwanshijela mwaana wa mompe otule wooneneva aya.’

<sup>31</sup> Aphano papaawe khumuza yoori: ‘Mwanaka! Wakhula siikhu oniyya vamote na-miyo, wakhula etile kiriina ti yaawo. <sup>32</sup> Ila yaari ohithajiyi oretta njampo la furaha, mwaasa yoori ttwiiyo aafwiyye apha ori haayi, aashikhie apha apattikhana.’”

## 16

### *Nlikaniso wa namalokozela wa anakhaazi woohaamineyi*

<sup>1</sup> Yinsa khuwooza anakhiyoni awe yoori: “Aarivo mwinyi mmote wa thaajiri aariina namalokozela wa anakhaazi awe, khuzziwa yoori: ‘Namalokozela otule ontta ohariju maali zawo.’ <sup>2</sup> Ye khunkhuwelisa khumuuzela yoori: ‘Niini epi kinsiilaazo onrettaazo weeyo? Otiise warakha za kontha koone ethtu oretteliyeeyo nzurukhu aka. Maana khunteela orutela wiiya namalokozela wa anakhaazi.’

<sup>3</sup> Namalokozela wa anakhaazi otule khuupuwela toono: ‘Kinttela oretta-ni mbwanaaka amana akilikhisa khaazi? Othipa akinkhitiri na olawa olola enikipattha haaya. <sup>4</sup> Aa, kajuwa ethtu yooretta yoori amana kikariwa atthu akipokherele mmavaje mwaya.’

<sup>5</sup> Aphano ye khuwaakhuwela ooshi apale aari wiiliwaaye ti mbwanaawe. Khumuuzela otule wamwanzo yoori: ‘Oniwila kavi mbwanaaka?’ <sup>6</sup> Ye khujipu yoori: ‘Onikiila ttompwiyo miiya za mafuttha.’

Namalokozela wa anakhaazi otule khuri: ‘Teeni yawo ti eti eriiye vawarakha apha, wiikhale waatikhe hamusiini.’

<sup>7</sup> Elottelanaka khumuuzela otule waphiiri yoori: ‘Khi weeyo oniiliwa kavi ti mbwanaaka?’ Ye khujipu yoori: ‘Kiniiliwa miphimo miiya za

tiriku.' Namalokozela wa anakhaazi otule khumuuya yoori: 'Teeniyawo eti eriiye vawarakha apha, waatikhe thamaaniini.'

<sup>8</sup> Aphano mbwanaawe khuntottopela namalokozela wa anakhaazi otule woohaamineyi mwaasa wa akhili epile aariinaazo. Miyo kiniuwuzani yoori, atthu a voolumwenku apha ana akhili za waatta mmenttezi mwaya, zayita atthu apale aneettettaaye nnuuru. <sup>9</sup> Apho kiniuwuzani yoori: mwirumeyele maali zenu za voolumwenku apha zoohiiyi za shariya yoori mwiwaapatthe ashirikha, amana ziwiishelani yo oopokhereleni pinkuuni.

<sup>10</sup> Otule anaamineyaaye khwa ethu ttiitthiiru onaamineya khwa etthu khuluyeene; otule ahinaamineyaaye khwa ethu ttiitthiiru hatha etthu khuluyeene khanaamineya. <sup>11</sup> Nkhama khamwaamineyeeni na maali za voolumwenku zoohiiyi za shariya, paani anttelaaye owaaminini na maali zookhwhee? <sup>12</sup> Nkhama khamwaamineyeeni na vitthu za watthu, paani anttelaaye owinkhani ethu enttelaaye wiiya yeenu?

<sup>13</sup> Khaavo karumeya anwahaaye owaarumeyela a mbwana awiri, mwaasa yoori ontta omwiiphiirisa mmote, antovelise otu nkina; ama oniiya wa waamineya khwa otu mmote, antarawu otu nkina. Khinwaheya onrumeyela Nnyizinku na Nzurukhu."

<sup>14</sup> Mafwarizeewu apale oopheta nzurukhu na kuvu, n'ooisiila mat-takhuzi apale khusala antheya Yinsa antarawaka. <sup>15</sup> Aphano Ye khuwooza yoori: "Mweeyo pi apale oojoona wiiya anashariya vakatthi wa atthu, ila Nnyizinku onjuwa rooho zenu. Etile atthu anoonaaye wiiya ya fwayita, omaasho wa Nnyizinku ti yootaraweya."

### *Owahi wa Kano*

<sup>16</sup> Kano na manapiyu khazilikheleeneen mpakha wakathi wa Yaahaya. Waaza wakathi otthuupo hapari za Ofwalume wa Nnyizinku zinvira zilaleyiwaka, wakhula ntthu onjilipisa yoori eettemo. <sup>17</sup> Ti yookhwewya pinku na vathi wiisha zayita olaziwavo alama ttiitthiiru ya ntakhuzi la kano.

<sup>18</sup> Wakhula nlume animwaashaaye muukhaawe khunrala muukha nkina ontta oraruwa; na aninralaaaye muukha otule wa waashiwa na-ye ontta oraruwa."

### *Thaajiri na Laazaru*

<sup>19</sup> Yinsa khurutela olupa theenya yoori: "Aarivo mwinyi mmote wa thaajiri aari owalaaye kuwo zooshapweya na zootafikhana, na wakhula siikhu eetta opuha, owawe yaari wiipikhiwaho ethu-yoojiwa ya nnofu.

<sup>20</sup> Vanlako wa thaajiri otule aattattikheliwevo masikhini mmote wa waatta makhwatta aari wiithiwaaye Laazaru. <sup>21</sup> Aari ohithajiya oja tathela zaari okwaazo vameeza wa thaajiri otule, anapwa khusala ata olapa makhwatta awe.

<sup>22</sup> Masikhini otule khufwa, khuthuuliwa pi malayikha khulawa khwiyya vamote na Eburahiima. Na-ye thaajiri otule khufwa khulawa khuzikhiwa. <sup>23</sup> Motthooni okhule eettaka woona shaani, ye khulansa maasho awe khweekesa otulu khumoona Laazaru ari mpavu wa Eburahiima. <sup>24</sup> Ye khusala akhuwa araka: 'Paapa Eburahiima, kooneleni hurreda! Mwinrume Laazaru anaanise yaala yawe na maati ate azizimise nlimi laka, maana kintta ohukhumweya vamootttho apha kiriivo.'

<sup>25</sup> Eburahiima khunjipu yoori: ‘Mwanaka, omfwahamu yoori muuhaayi mwawo waapokheriye vitthu zooshapweya, ila Laazaru muuhaayi mwawe eetta ohoowa. Aphano ye asithirikha, weeyo onta ohoowa.<sup>26</sup> Olikha eto, vakatthi vetthu yaththi wavo khilintti khuluyeene ehnlokheyaaye ntthu olankha okhuno ataaka okho wala okho ataaka okhuno.’

<sup>27</sup> Thaajiri khulupa yoori: ‘Paapa Eburahiima, safwatali kinuuveke-lani yoori mwinrume Laazaru alawe wa ajamaazaku,<sup>28</sup> kinaaye attwiizaku athaanu alawe awooze yoori ahipatthe ota okhuno kiriwo woohoowiwayo.’

<sup>29</sup> Eburahiima khunjipu yoori: ‘Attwiizo anaaye kano za Munsa na kithaapu za manapiyu, asiileze ethiipo.’

<sup>30</sup> Thaajiri khukhanyarela araka: ‘Wala paapa Eburahiima! Amana ntthu asisimuwa muufwa alawa awooza, antta othupwiya.’

<sup>31</sup> Eburahiima khujipu yoori: ‘Ahisiileziru kano za Munsa na za manapiyu, hatha nkhamma ntthu eetta osisimuwa muufwa, yo khanteela okhupali.’”

## 17

### *Twampi na nswammaha*

<sup>1</sup> Yinsa khuwooza anakhiyoni awe yoori: “Enteela opuwa vitthu zinteeelaaye owaakwisela atthu ntwampi, ila atakhaliwa otule anttelaaye othowelela.<sup>2</sup> Afwataali ntthu otupweeziwa mpahari afukeleliwe liwe liwululene mmwisiko, ehiyeeeni owaathewelesa apele eeyiye ooikhomaali.<sup>3</sup> Mwiiyane ophoole: ttwiyo amana ookosa, onshowere; amana athupwiya, onswaamihi.<sup>4</sup> Amana ookosa swaafu sapa siikhu moote, na wakhula swaafu khusala ata olupa yoori: ‘Kathupwiya’, onswaamihi.”

### *Weekezelia wa amini*

<sup>5</sup> Maaswihaapa khunvekela Yinsa yoori: “Mbwana, weekezele amini yetthu!”

<sup>6</sup> Mbwana khujipu araka: “Eriwaka amini yenu yeettiye wiiya nkhamma phunje ttiitthiiru ya muuyu, mweetta wuuza muutthi opu yoori: ‘Okhuleye watupweele mpahari,’ opo weetta wuushututelani.”

<sup>7</sup> Yinsa khuvira alupaka yoori: “Paani mmote wa mweyo anraaye nakhaazi awe woolima, ama wooshukisa pwittipwitthi ntthuttu, eettaka otaru animuuzaaye yoori: ‘Ote niikhale vameeza apha nije!’<sup>8</sup> Kinoona yoori khaavo! Ila khapula onimuza yoori: ‘Wiipikhe ethu-yoojiwa, owale kuwo zawo okirumeyele kijaka na kinywaka. Aphano amana kiisha na weeyo oje na onywel’<sup>9</sup> Karumeya otule oninsuhı oshukhweliwa mwaasa wooretta etile aarumiweeyo? Kinoona yoori wala!<sup>10</sup> Etthiipo na-mweyo, amana mwireetta epile mwirumiweezo, mwina yoolupa yoori: ‘Naakarumeya oohiina maana; naretta etile naariina yooretta paasi.’”

### *Yinsa oniwaavonisa anamakuttula khumi*

<sup>11</sup> Yinsa eettaka Yeruzaleemu, aaviriye enakatthi-nakatthi ya Samari-ya na Kalileya.<sup>12</sup> N'oofiya nti aya opo, khuta anamakuttula khumi khweemela peetiwene<sup>13</sup> khusala ankhuwela araka: “Yinsa, Mwanliimu, noonele huruma!”

<sup>14</sup> Ye n'oowoona khuwooza yoori: "Mwilawe mwajithoonyeze wa mahaakhimu a tiini." Eettaka olawa ethhiipile, yo khwiya oovona.

<sup>15</sup> Mmote wa apale khumi, nawoona yoori avona, khuruti ansifwaka Nnyizinku na huula yoonyakula. <sup>16</sup> Khukokhora khufiyisa ajihi yawe vathi, khunshukhurwela Yinsa; ye aari nsamariiya.

<sup>17</sup> Yinsa khumuuzela yoori: "Khahi atthu khumi avoniyeeyo? Khi apa akina tiisiya ari vayi?" <sup>18</sup> Khaavo awahiyeeyo oruti oteela onshukhurwela Nnyizinku, woohiiyi otu wa malaponi?" <sup>19</sup> Yinsa khumuuzza yoori: "Olankhe olawe amini yawo yauusuru."

### *Matelo a Ofwalume wa Nnyizinku*

<sup>20</sup> Yinsa eetta wuuzeliwa pi a mafwarizeewu wakathi waari weetelaavo ota Ofwalume wa Nnyizinku. Ye khujipu araka: "Ofwalume wa Nnyizinku otaaka khunttela wiiya ethu enooneyaaye. <sup>21</sup> Khina anttelaaye olupa yoori: 'Moone, opu ori apha!' ama 'Opule oriyye okhule!' Maana ofwalume wa Nnyizinku ori vakatthi venu."

<sup>22</sup> Attaaphale khuwooza anakhiyoni awe yoori: "Ontela ofiya wakathi mwinttelaaaye otakha wiiyana vamote nenkawu siikhu moote Mwaana wa Pinaatamu, ila ehisala ewaheya. <sup>23</sup> Akinoko anlawa alupe yoori: 'Ori okhule!' ama 'Ori apha!' ila mwihilankhe olawa omweekesa. <sup>24</sup> Nkhama ethiipo taari enzerimaaye phantte moote yeettaka phantte kiina, enteela wiiya ethiipo siikhu anttelaaye ota Mwaana wa Pinaatamu. <sup>25</sup> Ila mwanzo ye ona yoohoowa venkivene na okatthaliwa pi atthu a leelo.

<sup>26</sup> Nkhama zaarettikhaniyeezo wakathi opule wa Nuuhi, enttela orettikhana ethiipo wakathi wa Mwaana wa Pinaatamu. <sup>27</sup> Atthu eetta oja na onywa, na oralana, mpakha siikhu Nuuhi aapakhiriyeeyo mmwaarakka, khuta nnyeri ooshi khufwa.

<sup>28</sup> Nkhama zaarettikhaniyeezo wakathi wa Loothi. Atthu eetta oja na onywa, wuuzanya na wuuzanyisa, ozala na ojeka manyupa aya. <sup>29</sup> Wakathi Loothi aliiyeewo Sotooma, khukwa vuula pinkuuni ya moottho na oka, khuwoola atthu ooshi.

<sup>30</sup> Enttela orettikhana ethiipo siikhu anttelaavo ota Mwaana wa Pinaatamu. <sup>31</sup> Siikhu yaya eto, otule anttelaaye wiiya vatulu wa nyupu ahiishukhe yoori alokotthele vitthu ziriiye nnyupa mwawee; otule anttelaaye wiiya ntthuttu ahirutele onti. <sup>32</sup> Mwimfikhirele muukha wa Loothi! <sup>33</sup> Otule antakhaaye wuusuru ohaayi awe onta ompwethaya, ila otule onimpwethaya onta wuusuru. <sup>34</sup> Miiyo kiniwuuzani yoori: osikhu wa siikhu ethiitile, atthu awiri oorapalela olili mmote, onttela othuuliwavo mmote asalevo mmote. <sup>35</sup> Atthu awiri achilaka tiriku, onttela othuuliwavo mmote asale mmote. <sup>36</sup> [Atthu awiri ari mmashapa, onttela othuuliwavo mmote asale mmote.]\*

<sup>37</sup> Yo khumuuzela Yinsa yoori: "Mbiana, enttela orettikhana vayi?" Yinsa khuwaajipu yoori: "Vahali aniiyaavo muufwi, anakhuku aniiya attaapho."

## 18

### *Nlikaniso wa namaphuka wootakhala rooho*

\* **17:36** Warakha za raku khina aaya eti ya 36.

<sup>1</sup> Yinsa khuwooza anakhiyoni awe nlikaniso mmote yoori aarina yoolompa woohilikheleli wala woohinyoonyeyi. <sup>2</sup> Ye khulupa yoori: “Sitati moote aariwo namaphuka mmote ahaari omoovaaye Nnyizinku, wala ahaari onshitahaaye ntthu. <sup>3</sup> Sitati ethiitile aariwo nunu mmote woofweliwa ti mannawe aalawiiyeeyo onvekela namaphuka otule araka: ‘Okaawanyele haakhi khwa muumani aka.’

<sup>4</sup> Khunkatthalela wakathi mwinkeene, ila omwiisho waya khusala alupa nroho mwawe yoori: ‘Nakihimoovi Nnyizinku na ohinshitahi ntthu, <sup>5</sup> nunu otu aaza raku okantipu; kintta omwaawanyela haakhi na paathuli yoori ahirutele okiwuti.’

<sup>6</sup> Mbwana Yinsa khuvira alupaka yoori: “Mwisiileze saana etthu anlupaaye namaphuka otu woohiiyi wa shariya. <sup>7</sup> Nnyizinku khani-waawanyela shariya ananthawuliwa awe apale aninvekelaaye nthana na osikhu, hatha nkhamma Ye eetta orupaza owaajipu? <sup>8</sup> Kiniuuuzani yoori Ye oniwaawanyela shariya woohirupazi. Aphano Mwaana wa Pinaatamu wakathi anrutelaavo voolumwenku apha, onteela osikanavo amini?”

### *Nlikaniso wa mfwarizeewu na namariphisa lumpuru*

<sup>9</sup> Yinsa khulupa nlikaniso mmote awoozaka atthu apale aari ojoon-aaye wiiya makhaamili khusala awaatarawu azaaya. Ye khuri: <sup>10</sup> “Alume awiri aaviriye Nnyupa wa Nnyizinku khusala alompa; mmote aari mfwarizeewu, nkina aari namariphisa lumpuru. <sup>11</sup> Mfwarizeewu ari wa weemela, aari olompa nkaththi-nkaththi araka: ‘Nnyizinku, miiyo kinuushukhurwela maana miiyo aki nkhamma atthu, apale oheettelii shariya, malatarawu anamararuwa, wala nkhamma namariphisa lumpuru oto ariiyi apho. <sup>12</sup> Miiyo kimfuka siikhu piiri wakhula sumana na kininkha zaakha khwa lifunku lakhuumi ya wakhula etile kimpattaaye.’

<sup>13</sup> Ila namariphisa lumpuru eemeliye peetiwene, ye hatha khaari wi-inuwa yoori eekese otulu, ila ajipiyaka veefuwa aari ori: ‘Oo Nnyizinku koonele huruma, miiyo ki natwampi.’

<sup>14</sup> Miiyo kinuuuuzani yoori, namariphisa lumpuru aalawiye owawe ari woohakikhwa ti Nnyizinku, ila otule woojikhupali wala. Maana otule anjiwulisaaye ontta opushuwisiwa, ila otule anjipushuwisaaye ontta owulisiwa.”

### *Yinsa oniwaaparikhya asimaana*

<sup>15</sup> Atthu akina khusala awaatiisa asimaana yoori asapiwe ti Yinsa. Ila anakhiyoni awe n'oowoona khusala awaamaruwela. <sup>16</sup> Ila Yinsa khuwaakhuwela asimaana apale araka: “Mwiwaalikhe asimaana akitteele miiyo, mwiliwaakkhattaze; maana Ofwalume wa Nnyizinku pu waaya apale eeyiye nkhamma asimaana. <sup>17</sup> Miiyo kinuuuuzani khweele yoori wakhula otule ahimpokherelaaye Ofwalume wa Nnyizinku nkhamma nsimaana, khanteela weettamo.”

### *Thaajiri na Yinsa*

<sup>18</sup> Nttunkhulu mmote khumuuzela Yinsa yoori: “Mwanliimu woosaana, kirette niini yoori kipatthe ohaayi wa mileele?”

<sup>19</sup> Yinsa khunjipu araka: “Mwaasa wa niini okikhuelaka yoori woosaana? Khaavo ntthu woosaana woohiiyi Nnyizinku paasi.

<sup>20</sup> Weeyo onjuwa mirumo za Nnyizinku: ohiraruwe, ohuule, ohiye,

wala ohilawele oshaahiti woovonyeya, onhishimu papaawo na mamaawo.”

<sup>21</sup> Mwinyi otule khujipu yoori: “Waaza osimaana aka zooshi epo kinretta.”

<sup>22</sup> Yinsa n'oosiila mattakhuzi apale khumuza yoori: “Enuusaleela etthu moote. Wuuzanyise vitthu zawo zooshi nzurukhu aya owenkhe asikhini, toowo onta wiiyana maali pinkuuni; nawiisha ote okilotte.”

<sup>23</sup> N'oosiila mattakhuzi apale khwiya woozinkuwa venkivene, mwaasa yoori ye aari thaajiri nwulweene. <sup>24</sup> Yinsa n'oomoona yoori azinkuwa khulupa yoori: “Nanna enlipaazo thaajiri weetta muufwalume wa Nnyizinku! <sup>25</sup> Ti yookhweya enkamiiya ovira valiphotto la sikano zayita thaajiri weettamo muufwalume wa Nnyizinku.”

<sup>26</sup> Apale aari onsiilaaye khumuuzela yoori: “Nkhama pi toowo, paani anwahaaye wuusurukha?”

<sup>27</sup> Yinsa khujipu yoori: “Etile pinaatamu ahinwahaaye Nnyizinku onwahi.”

<sup>28</sup> Aphano Pheeturu khumuza Yinsa yoori: “Woone! Fweeyo nalikha vitthu zetthu zooshi, khusala nuulotta.”

<sup>29</sup> Yinsa khujipu araka: “Miiyo kiniwuuzani khweele yoori, wakhula otule anlikhaaye nyuupa yawe ama muukhaawe, ama attwiize ama apapaze, ama aanaawe mwaasa wa Ofwalume wa Nnyizinku, <sup>30</sup> oto on-teela opokhera venkivene vathi attaapha, na omwiisho waya apokhere ohaayi wa mileele.”

### *Yinsa oniwooza anakhiyoni awe ofwa na osisimuwa wawe*

<sup>31</sup> Yinsa khuwaakhuwelela othetekelé anakhiyoni awe apale khumi na awiri khuwoza yoori: “Mwisiileze! Apha nintta Yeruzaleemu, ottuukho zinttelaawo orettikhana zooshi epile zaatikheweeyo pi manapiyu monkoni wa Mwaana wa Pinaatamu. <sup>32</sup> Ye onttela winkheleliwa mmakhono wa amalapo, antheye, anveyise, antthemele, <sup>33</sup> anjaphe na amuule. Ila siikhu yattaatthu onttela osisimuwa.”

<sup>34</sup> Anakhiyoni awe khuhiveleyi mattakhuzi aya apale maana aari oovitheya, yo khuhijuwi etthu aari olupaaye.

### *Ovonisiwa wa ntthu woohooni wa Yeriko*

<sup>35</sup> Yinsa asaleelaka ofiya Yeriko, mwinyi mmote woohooni eekhaliye nshini wa tarikhi alolaka zimola. <sup>36</sup> N'oosiila shintto za atthu aari oviraaye, ye khuuzela etthu yaari orettikhanaaye. <sup>37</sup> Khuuziwa yoori: “Yinsa wa Nazareeti ti ye anviraaye.”

<sup>38</sup> Aphano ye khusala akhuwa araka: “Yinsa, Mwaana wa Daawuuda, koonele huruma!”

<sup>39</sup> Atthu apale aari oviraaye khusala ammaruwela yoori anyamale, ila ye khusala atepa okhuwa araka: “Yinsa, Mwaana wa Daawuuda, koonele huruma!”

<sup>40</sup> Aphano Yinsa khweemela khuruma yoori atiiseliwe mwinyi otule. N'ootiseliwa khumuuzela yoori: <sup>41</sup> “Ontakha yoori kuuretele niini?”

Ye khujipu yoori: “Mbwana, kintakha kirutele woona.”

<sup>42</sup> Attaaphale Yinsa khumuza yoori: “Ona! Amini yawo yoovonisa.”

<sup>43</sup> Nasaapiru ye khurutela woona, khusala anlotta Yinsa ansifwaka Nnyizinku. Wakathi atthu ooniyeovo etile yaarettikhaniyeeyo, khunsifu Nnyizinku.

## 19

### *Yinsa na Zakewu namariphisa lumpuru*

<sup>1</sup> Yinsa khuvira sitati ya Yeriko ettaka olawa. <sup>2</sup> Ottuukho aariwo mwinyi mmote aari wiithiwaaye Zakewu, ntunkhulu wa anamariphisa lumpuru na aari thaajiri. <sup>3</sup> Ye aari otakha omoona Yinsa, ila khuhisala awahi mwaasa woofupheya channu na atthu aari enkeene. <sup>4</sup> Aphano khutthira khulokoza khulawa khuwela mmuthi yoori awahi omoona, mwaasa yoori Yinsa aari weettela ovira attaphale.

<sup>5</sup> Yinsa n'oofiya puuro etile, khweekesa otulu khumoona khumuua yoori: "Zakewu, waakuve wiishukhe, leelo kinttela omaka vaje vawo."

<sup>6</sup> Attaaphale, ye khwiishukha wa waakuvavo khumpokherela Yinsa na furaha.

<sup>7</sup> Atthu apale akinoko aari woonaaye vitthu epile, khwaaza ottettha araka: "Nka mooneni otu ontela omaka vaje wa natwampi!"

<sup>8</sup> Zakewu khulankha khweemela khumuua Mbwana yoori: "Woone Mbwana! Kintta Owenkha asikhini phantte moote ya maali zaka na apale kaari oweeyelaaye, kintta owaarutisela swaafu nne."

<sup>9</sup> Aphano Yinsa khulupa yoori: "Leelo vaje apha yafiyavo nusura maana otu na-ye peewu ya Eburahiima. <sup>10</sup> Mwaasa yoori Mwaana wa Pinaatamu ateela oweekesa apale aashikhiyeeyo awoosuru."

### *Nlikaniso wa nzurukhu khumi wa feeta*

<sup>11</sup> Yinsa aattameliyeovo Yeruzaleemu, atthu khusala oopuwela yoori Ofwalume wa Nnyizinku waari oteela orettikhana nasaapiru. Aphano Yinsa khulupa nlikaniso opu araka: <sup>12</sup> "Nlume mmote w'oojama wootafikhana, aasaafiriye khulawa nti woolepawo yoori athawaziwe ofwalume nawiisha aruti. <sup>13</sup> Ahinalawe khuwaakhuwela akarumeya awe khumi, wakhula mmote khumwinkha nzurukhu wa feeta\* khuwooza yoori: 'Mwirettele zanshara mpakha miiyo oruti.'

<sup>14</sup> Ila atthu a mmuti mwawe khwiya awiiphiriwa, khunruma waziri onlotta olawa olupa yoori: 'Khanimweepu wiiya mfwalume ethu.'

<sup>15</sup> N'oothawaziwa ofwalume khurutela owawe, khulawa khuwaakhuwela akarumeya awe apale aawenkiyeeyo nzurukhu wa feeta yoori ajuwe fwayita apattheliyeeyo wakhula ntthu.

<sup>16</sup> Khuta otule wamwanzo khulupa yoori: 'Mbwana, nzurukhu opule mmote mwaakinkhiyeeyo kapatthela fwayita, wafiya khumi.'

<sup>17</sup> Mbwanaawe khunjipu yoori: 'Waretta saana, o karumeya wa waamineya. Mwaasa yoori weeyo waamineya khwa vitthu vattithiiru, aphi ontela wiiya mfwalume wa sitati khumi.'

<sup>18</sup> Otule waphiiri khuta khulupa yoori: 'Mbwana, nzurukhu enu opule mwaakilikheliyeeyo, kapatthela fwayita wafiya mithaanu.'

<sup>19</sup> Khumuua yoori: 'Kemaani, weeyo ontela wiiya mfwalume wa sitati thaanu.'

<sup>20</sup> Otule wa wiishela khuta khulupa yoori: 'Mbwana, nzurukhu enu opu, miiyo kaathiiye mmufukho khuthokorela. <sup>21</sup> Miiyo keetta owoovani mwaasa woojuwa yoori mweeyo mwa awoopisa, mwintulu etthu mwihibitokoreleeni na mwinuurula mwihibzaleeni.'

<sup>22</sup> Mbwana otule khuri: 'Karumeya wootakhala rooho! Kintta wuphuka khwa mattakhuzi awo atthaapo! Weeyo waajuwiyie yoori ki

\* **19:13** Hisapu ya wakhula karumeya aari opokheraaye yaari ofiyela ya nyeezi mine.

ntthu wa woopisa, kinthuulavo etile kihithokoreleeni na kinuurula etile kihizaleeni.<sup>23</sup> Khi wahaathuuliye nzurukhu aka ottha mpango n'ooruti kisikana ottheerelaniye?

<sup>24</sup> Khuwooza apale aariattaaphale yoori: 'Mwinnyakanye nzurukhu aya opo mwimwinkhe otule ariina khumi.'

<sup>25</sup> Yo khujipu yoori: 'Otu aya mwinlupaaye yoori nimwinkhe onaaye nzurukhu khumi!'

<sup>26</sup> Mbwana khulupa yoori: 'Kiniwuuzani khweele yoori otule ariina ontta weekezelwa, otule ahina hatha etile ariina ontta onyakanyiwa.

<sup>27</sup> Maatuwi aka apale ahaari okitakhelaaye ofwalume, mwiwaatiise apha ooliiwe kiwoonaka.' "

### *Ofiya wa Yinsa Yeruzaleemu*

<sup>28</sup> Paata ya wiisha olupa mattakhuzi apale, Yinsa khusala avira awele-laka eettaka Yeruzaleemu.<sup>29</sup> Asaleelaka ofiya nti wa Betifwaye na wa Betaaniya kharipu ya mwaako Oluveera†, khuwaalokozisa anakhiyon awe awiri.<sup>30</sup> Khuwooza yoori: "Mwilawe mmuti mphule, mwifiyaka mwinlawwa mwansikane mwaana wa puuru afukeleliwe woohaazi opakhiriwa. Mwimfukule mwintiise.<sup>31</sup> Amana apuwa ntthu awuuze-lani yoori: 'Mwinimfukulela-ni?' Mwinjipu yoori: 'Mbwaneetthu ti ye anintakhaaye.'

<sup>32</sup> Apale aawaarumiyeeyo khulawa khusikana nkhamma ethiipile aalupiyeeko Yinsa.<sup>33</sup> Wakathi aari omfukulaavo mwaana wa puuru otule, ennyewe khuwoozela yoori: "Mweyo! Mwaana wa puuru oto mwinimfukulela-ni?"

<sup>34</sup> Yo khujipu yoori: "Mbwaneetthu ti ye anintakhaaye."

<sup>35</sup> Aphano khuntiisela Yinsa, yo khuttattikhavo kuwo zaya vappuuru Ye khupakhiravo.<sup>36</sup> Ataaka Yinsa, atthu khusala attattikha kuwo zaya ntarikhi.<sup>37</sup> Wakathi aattameliyeovo vamwiishukhelo wa mwaako Oluveera, khuntti ya anakhiyon ooshi khwiya oofurahi khwaaza onyakula ansifwaka Nnyizinku khwa minjuza epile ooniyyeeko,<sup>38</sup> araka:

"Attottopeliwe mfwalume antaaye

khwa nzina la Mbwana.

Yiiyewo heeri pinkuuni

na siifwa otulu."

<sup>39</sup> Mafwarizeewu apale aari vakathi wa atthu apale khusala amuuza Yinsa yoori: "Mwanliimu, owooze anakhiyon awo anyamale."

<sup>40</sup> Ye khuwooza yoori: "Atthu apa amana anyamala, mawe pi anttelaaaye onyakula."

### *Yinsa onlila oonelaka huruma Yeruzaleemu*

<sup>41</sup> Wakathi Yinsa afiyyeovo Yeruzaleemu, nawoona sitati etile khulila,

<sup>42</sup> araka: "Oo! Yeruzaleemu, eriwaka waari onjuwa otule aniwinkhaaye heeri leelo! Ila apho epo zaya zavitheya khwa weyo.<sup>43</sup> Onlawa wafiye wakathi maatuwi enu anttelaaye wuukukuttelani phantte zooshi ari mmaphotto mwaya.<sup>44</sup> Onttela ophwantteliwa vamote weeyo na aanaawo, khalinlawwa osala hatha liwe vatulu wa liwe nzaaya, maana weeyo khumpokhereleeni Nnyizinku wakathi aateeliyeeyo owuusuru."

† 19:29 Oluveera muutthi oriina mishumo zaya enriwaaye azetoona.

### *Yinsa Nnyupa wa Nnyizinku*

45 Yinsa khuvira Nnyupa wa Nnyizinku khusala aweekara apale aari wuuzanyisaamo,<sup>46</sup> awoozaka yoori: “Yaatikhiwa yoori: ‘Nyuppa yaka enttela wiiya nyuppa yoolompiwamo, ila mweeyo mwarettisa wiiya puuro ya malatarawu.’”

47 Wakhula siikhu Yinsa eetta onozela Nnyupa wa Nnyizinku, ila attunkhulu a mahaakhimu a tiini, anamanozela a kano na anamalokozela a atthu aari weekesa shawuri zoomuula,<sup>48</sup> ila khuhisala apattha nanna yooretta, maana atthu ooshi aari omwiitaalela Ye n'onsileza.

## 20

### *Ofwalume wa Yinsa na woosa wa Yaahaya*

<sup>1</sup> Siikhu moote, Yinsa aari owaanozela atthu Nnyupa wa Nnyizinku na awaatafusirelaka hapari zooshapweya. Nttumphule khutamo attunkhulu a mahaakhimu a tiini, anamanozela a kano na anamalokozela a tiini. <sup>2</sup> Yo khusala amuuzelaraka: “Vitthu epi onrettana ofwalume-ni, wala ti paani awinkhiyeeyo ofwalume aya opo?”

<sup>3</sup> Yinsa khuwaajipu yoori: “Na-miyo kintta owuuzelani etthu moote mwikuuze;<sup>4</sup> woosa wa Yaahaya waari wa pinkuuni ama wa anaatamu?”

<sup>5</sup> Yo khusala oozelana atthaaporu araka: “Amana nilupa yoori waari wa pinkuuni, ontta onuuzelaraka: ‘Khi mwaasa aya niini mwihinkhupalelaka?’ <sup>6</sup> Na amana nilupa yoori waari wa anaatamu, atthu ooshi antta onivonya na mawe maana ankhupalela yoori Yaahaya napiyu.”

<sup>7</sup> Attaaphale yo khujipu yoori: “Khanijuweeni nlupa amwinkhiyeeyo ofwalume.”

<sup>8</sup> Aphano Yinsa khuwooza yoori: “Na-miyo akiniwuuzani ofwalume kinrettanaaye vitthu epi.”

### *Anamalima oohisuhi*

<sup>9</sup> Yinsa khulupa nlikaniso awoozaka atthu yoori: “Aarivo mwinysi mmote aazaliyeeyo mmashapa mwawee miitthi za wuuva, khuweekesa atthu yoori asala alimela, ye khulawa safwari yawe khwiikhala siikhu za waatta. <sup>10</sup> N'oofiya wakathi wa wuurla khunruma karumeyaawe mmote yoori alawe enkiwe wuuva, ila anamalima apale khumpiya, khumwiikara woohimwinkhi etthu. <sup>11</sup> Mwennyewe nshapa khunruma nkina, na oto theenya yo khunveyisa, khumpiya khumwiikara woohimwinkhi etthu. <sup>12</sup> Aphano khunruma wattaatthu, anamalima apale khumpiya, khunvulalisa na khumwiikara.

<sup>13</sup> Paata ya toole, mwennyewe nshapa khusala oopuwela araka: ‘Kirette-ni? Aa! Kintta onruma mwanaka kinimphetachaaye, n'oomoona khweele khweele antta onhishimu.’

<sup>14</sup> Anamalima apale wakathi amooniyeovo mwaana wa mwennyewe nshapa ntthile khulupa yoori: ‘Namarithi nshapa ntthi ti otu. Olawa nimuule, liiye leetthu.’ <sup>15</sup> Khunsukhumela othetekeli wa nshapa khumuula.

Mwennyewe nshapa ontela owaarettela niini?<sup>16</sup> Ye ontta ota awoole anamalima apale, nshapa laya ntthile awenkhe atthu akina.”

Atthu apale aariivo n'oosiila mattakhuzi apale khulupa yoori: “Zihirettikhane vitthu epo!”

<sup>17</sup> Yinsa khuweekesa khuwoozela yoori: “Maana a mattakhuzi apa aatikhiweeyo anlupa-ni?”

‘Liwe ntthile eeseliyeeyo anamajeka nyuupa,  
larettiwa wiiya liwe lootafikhana zayita mawe ooshi.’

<sup>18</sup> Otule anttelaaye okwela liwe nttho ontta onyenyeaya, na otule lininkwelaaye ontta osakeya eeye lifufu.”

*Wuuzela monkoni wa lumpuru*

<sup>19</sup> Attunkhulu a mahaakhimu a tiini na anamanozela a kano khusala eekesa nanna yonkhola wakathi otthuupule, maana yo aajuwiye yoori nlikaniso opule oniwaalupa yo. Ila khuhisala akholeya mwaasa woowoova atthu apale aari attaphale.

<sup>20</sup> Aphano yo khusala anlupattha, khuwaaruma atthu aari ojinkhelelaaye wiiya anashariya onsayo sirini, yoori ansikanane paathuli anhole anlawane wa mfwalume.

<sup>21</sup> Yo khusala amuuzela yoori: “Mwanliimu, fweeyo najuwa yoori onttakhula na onnozela epile ziiyiyeeyo za shariya, ninjuwa yoori khuninthawula ntthu, onnozela haakhi wa nanna Nnyizinku antakhaazo. <sup>22</sup> Nkanuuze, nkhamma ti yooshapweya oripha lumpuru la Seezari ama wala?”

<sup>23</sup> Yinsa khujuwa olavilavi aya khuwooza yoori: <sup>24</sup> “Nkakitiiseleni nzurukhu apha. Ratarato eti vanzurukhu apha ti yaani?” Atthu khujipu yoori: “Ti ya Seezari!”

<sup>25</sup> Khuwooza yoori: “Mwimwinkhe Seezari etile yiyyiye ya Seezari na mwimwinkhe Nnyizinku etile yiyyiye ya Nnyizinku.”

<sup>26</sup> Yo khuhisala ansikanana hatha paathuli vakatthi wa atthu apale; khwiya ootikinisiwa pi mattakhuzi apale aajipwiweeyo ti Yinsa, yo khunyamala.

*Wuuzela monkoni woosisimuwa*

<sup>27</sup> Masatukhi apale ahaari okhupalaaye osisimuwa wa anamfwa, khulawa akina khumwaattama Yinsa. <sup>28</sup> Khusala alupa yoori: “Mwanliimu, Munsa aatikha yoori, nlume amana afwa, muukhaawe ahin-vokoleleeni mwaana, ona yooraliwa ti ttwiye ampatthele aana eeye a marehemu ttwiye. <sup>29</sup> Aarivo attwi sapa: otu nwulu aya khuloola khufwa, muukhaawe ahimpattheleeni mwaana. <sup>30</sup> Khuraliwa ti ttwiye, khufwa ahimpattheleeni mwaana, <sup>31</sup> khuraliwa ti ttwiye wattaatthu, khufwa ahimpattheleeni mwaana, ooshi apale sapa khufwa woohimpattetheli mwaana. <sup>32</sup> Omwiisho waya muukha otule khufwa. <sup>33</sup> Siikhu yoosisimuwa onttela wiiya muukha waani maana oosaapa anraliye?”

<sup>34</sup> Aphano Yinsa khuwaajipu yoori: “Atthu a voolumwenku apha anloola na anraliwa. <sup>35</sup> Ila atthu apale anttelaaye osuhi olawa pinku-uni noosisimuwa muufwa, khanlawa oloola wala oralika; <sup>36</sup> maana khamfwa theenya, anttela wiiya nkhamma malayikha na aana a Nnyizinku, mwaasa yoori asisimuleliwa muuhaayi. <sup>37</sup> Hatha napiyu Munsa athoonyeza monkoni woosisimuwa wa anamfwa, wakathi moottho opule waari okholelaaye vamutthi nwishi, ye khunkhuvila Mbwana yoori, Nnyizinku wa Eburahiima wa Esiyaakha na wa Yaakhumpa. <sup>38</sup> Eto enthoonyeza yoori Nnyizinku khahiyoo wa anamfwa, Nnyizinku wa atthu awoona. Maana khwa Ye atthu ooshi anaaye ohaayi.”

<sup>39</sup> Anamanozela akina a kano apale aari attaphale khumuuzu yoori: “Wajipu saana Mwanliimu!” <sup>40</sup> Khuhiivo hatha ntthu kiina wootakha omuuzela theenya.

*Al-Masiihu Mbwana wa Daawuuda*

<sup>41</sup> Elottelanaka Yinsa khuwoozela yoori: "Mwaasa aya niini atthu alupaka yoori Al-Masiihu mwaana wa Daawuuda?

<sup>42</sup> Daawuuda alupa nkithaapu ya Zaapuuri yoori:

'Mbwana Nnyizinku,  
amuuza Mbwanaaka yoori:  
"Wiikhale nkhono-nlume aka,  
<sup>43</sup> mpakha miiyo kithe  
moolu awo vatulu wa maatuwi awo."

<sup>44</sup> Nkhama Daawuuda onimwiittha Al-Masiihu yoori Mbwana, enretikhana toovi wiiya mwanaawe?"

*Yinsa na anamanozela a kano*

<sup>45</sup> Atthu ooshi khusala ansileza, Yinsa khuwoosa anakhiyoni awe yoori: <sup>46</sup> "Phoole na anamanozela a kano, apale woowaatuvela owala ajapi zoolepisana, ochelisiwa vaparasa na woowaatuvela wiikhala puuro za wiilokozi nnyupa woosifwiwamo Nnyizinku na puuro za wiilokozi vanjampo, <sup>47</sup> aniweeyelaaye anamfweliwa pi amanna zaya vitthu zaya\*, ajinkhaka oretta lompa zoolepa. Apo aya anlawa apokherele hukhumu khuluyeene."

**21***Zaakha ya muukha woofweliwa ti mannawe*

<sup>1</sup> Yinsa khuwoona mathaajiri alazaka zaakha zaya atthaaka n'yopo ya zaakha. <sup>2</sup> Khumoona theenya nunu mmote wa masikhini woofweliwa ti mannawe, alazaka zaakha ttoosu piiri. <sup>3</sup> Yinsa khulupa yoori: "Kiniwuzani khweele yoori nunu otu wa masikhini woofweliwa ti mannawe, enkha zayita atthu ooshi. <sup>4</sup> Maana apale ooshi na othaajiri aya enkha tathela na khusalana, ila nunu otu na osikhini awe enkha wooshi aari ororomelaaye."

*Yinsa onlupa monkoni wa woopwechiwa Nyuupa ya Nnyizinku*

<sup>5</sup> Anakhiyoni awe akina khusala attottopela Nyuupa ya Nnyizinku yaajekaniweeyo mawe ooshapweya na vitthu zaatthiiweemo zoolaziwa nkhamma zaakha, Yinsa khuwoosa yoori: <sup>6</sup> "Enlawa zafiye siikhu vitthu zaya epo mwinoonaazo zinttelaavo opwecheliwa, maana khalinlawwa olikihiwa liwe vatulu wa liwe nzaaya."

*Olupatthiwa na ohoowa*

<sup>7</sup> Yo khumuuzela yoori: "Mwanliimu, vitthu zaya epo zinteeela oretikhana lini? Wala alama-ni enttelaaaye onijuwisa yoori zasaleela oretikhana?"

<sup>8</sup> Yinsa khuwaajipu yoori: "Phoole! Mwihihatiwe, maana anlawa apuwe atthu a waatta araka, 'Al-Masiihu ti miyo!' ama 'Wakathi wafiya!' Ila mwihiwaalotte apo aya. <sup>9</sup> Amana mwisillaka viitha ama nzuuzu mwihoove, maana epo zaya zina yoorettikhana khapula, ila wakathi aya opo khahiyo wiisha w'oolumwenku."

<sup>10</sup> Yinsa khulupa theenya yoori: "Khapila moote enlawa yoomanane na khapila kiina, na ofwalume woomanane ofwalume nzaaya.

\* **20:47** Aniwaajelaaye anamfweliwa pi amanna zaya khwa luuka ya ekereeku.

<sup>11</sup> Phantte za waatta za miti zinlawa zapuwe visikinyaatthi khulu-khulu, jala, marati, vitthu zootikinisa na theenya alama khulu-khulu zoolankha pinkuuni.

<sup>12</sup> Khapula zihinarettikhane vitthu zaya epo, mwinlawa mwalupatthiwe, mwilawaniwe mmakhono wa afwalume na mahaakhimu, mwiphukiwe nnyupa woosifwiwamo Nnyizinku, mwifukeliwe mwaasa wookilotta miiyo. <sup>13</sup> Enttela orettikhana yoori wiiye oshaahiti enu. <sup>14</sup> Mwiiye awiitthaaza rooho zenu, mwihishukulikhele etthu mwinttelaaaye ojipu mmana ofiya wakathi aya opo. <sup>15</sup> Maana miiyo kinlawa kawinkheni mattakhuzi na ojuwa nanna yoowaajipu maatuwi enu, ahinttelaaye owahi ozukulisa wala okheeti. <sup>16</sup> Mwinlawa mwafukisiwe wa afwalume pi apapazenu, attwiizenu, ajamaazenu na ashirikha enu, akinoko a mweeyo anlawa ooliwe. <sup>17</sup> Atthu awaatta anttela wiiya awiippiiriwa ti mwego mwaasa wa nzina laka. <sup>18</sup> Ila hatha nyuuli yenu moote khinlawa waashikha. <sup>19</sup> Mwiiye woovilela, toowo mwintta wuusurukha.”

### *Yinsa onrutela olupa opwechiwa Yeruzaleemu.*

<sup>20</sup> Yinsa khulupa theenya yoori: “Amana moona sitati ya Yeruzaleemu ezukuleliwe pi anajanka, mwijuwe yoori wafiya wakathi woopwechiwa. <sup>21</sup> Aphano apale anttelaaye wiiya nti wa Yudeya atthirele omwaako, apale anttelaaye wiiya nsitati atthiremo na apale anttelaaye wiiya ntthuttu ahirutele ositati. <sup>22</sup> Maana siikhu zaya epo enttela wiiya siikhu za hukhumu khuluyeene yoori erettikhane zooshi epile zaatikhiveezeo nkattihi wa ntakhuzi la Nnyizinku. <sup>23</sup> Atakhaliwa muukha otule anttelaaye osikaniwa ari wa wiimitha ama eettaka waamwisa siikhu zaya epo, maana vatuniya anlawa apuvevo mashakha mawulweene na hukhumu vakathi wa anaatamu ooshi. <sup>24</sup> Awaatta anttela wuuliiwa na phanka, akinoko athuuliwe nkhama anapherezu eettettisiwaka miti zooshi z'olumwenku. Yeruzaleemu enlawa yakurumuliwe pi amalapo mpakha yenzi ya amalapo wiisha.”

### *Ota wa Mwaana wa Pinaatamu*

<sup>25</sup> Yinsa khuvira awoozaka theenya yoori: “Zinlawa zeeyevo alama vanjuwa, vamweezi na vamatthottowa. Atthu a voolumwenku anttela wiiyana huzuni na woova nwulweene mwaasa woottithima na otapanyeza wa pahari. <sup>26</sup> Anlawa azirikhe atthu a waatta mwaasa wa woova vitthu zinttelaaye orettikhana voolumwenku, maana owahi wa pinkuuni onttela osakhinyeya. <sup>27</sup> Aphano phi anttelaavo wooneya Mwaana wa Pinaatamu ataaka enakatthi-nkatthi ya mawiku na owahi na nuuru khuluyeene. <sup>28</sup> Mmana zaazaka vitthu zaya epo, mwilankhe mwiinuwe mweekese otulu, maana wuusurukha wenu ori kharipu na-mwego.”

### *Nlikaniso wa mfikeera*

<sup>29</sup> Elottelanaka Yinsa khulupa nlikaniso mmote araka: “Moone mfikeera na miithi zooshi. <sup>30</sup> Amana aazaka ophutuwela mathapa aya, mwinoona na mwinjuwa yoori wasaleela ofiya mwiita. <sup>31</sup> Wa nanna ethiipo, amana moona zirettikhana vitthu epo, mwijuwe yoori Ofwalume wa Nnyizinku wasaleela ofiya.

<sup>32</sup> Miiyo kiniwuuzani khweele yoori atthu apa aleelo khanlawa ofwa ooshi vitthu epi zihirettikhaneeni. <sup>33</sup> Pinku na vathi zooshi zinteela ovira, ila mattakhuzi aka khanviraru.”

### *Owahi woojeekesela*

<sup>34</sup> Yinsa khulupa yoori: “Mwiye woojeekesela yoori rooho zenu zi-hipakhire vitthu zoohifwayi, ohapaliwa, ama tafwawuthi za muuhaayi mwenu, yoori siikhu yaya ethiito ehuusikaneleni. <sup>35</sup> Maana siikhu yaya eto enttela owaatela atthu ooshi a voolumwenku nkhamma nraakho. <sup>36</sup> Mwiye woojeekesela na olompa wakhula wakathi, yoori zuuwer-awereni vitthu zaya epo zinttelaaaye orettikhana na yoori mwapatthe weemela omaasho wa Mwaana wa Pinaatamu amana ata.”

<sup>37</sup> Yinsa wakhula siikhu aari onozela vaje wa Nyuupa ya Nnyizinku, mmana oripa aari weettaka vamwaako Oluveera khwiya ottuukho mpakha ocha. <sup>38</sup> Atthu ooshi supuyeene aari weettaka vaje wa Nyuupa ya Nnyizinku olawa osiila vitthu aari onozelaazo Yinsa.

## 22

### *Shawuri za wuuliwa Yinsa*

<sup>1</sup> Osaleelaka ofiya wakathi woorettiwa njampo la phaawu yoohiina fwaramento, liniitthiwaaye Paashikowa\*,<sup>2</sup> attunkhulu a mahaakhimu a tiini na anamanozela a kano aari owaza shawuri zoomuula Yinsa sirini, khuhisala ewaheya mwaasa woovoova atthu.

<sup>3</sup> Ila Epiliisi khumweetta Yuuda, aari wiittheliwaaye Shikariyooti, wa khuntti ya apale khumi na awiri. <sup>4</sup> Ye khulawa osiilanana attunkhulu a mahaakhimu a tiini na attunkhulu a anamweekesela a Nyuupa ya Nnyizinku, yoori eekese shawuri yonkolisa Yinsa. <sup>5</sup> Yo khuwaatuvela khumwaahiti Yuuda omwinkha nzurukhu wa feeta. <sup>6</sup> Ye khukhupali khusala eekesa kiphenyo yonkolisa Yinsa, woohiivo hatha ntthu.

<sup>7</sup> Khufiya siikhu yoorettiwa njampo la phaawu yoohiina fwaramento, siikhu yaya ethiito yaarina yootwahiwa pwittipwitthi yoojeliwa Paashikowa. <sup>8</sup> Yinsa khunruma Pheeturu na Yaahaya araka: “Mwilawe mwaattalele ethu-yoojiwa ya Paashikowa.”

<sup>9</sup> Yo khumuuzela yoori: “Ontakha naattalele vayi?”

<sup>10</sup> Ye khuwaajipu yoori: “N’oofiya ositati mwinlawa mwansikane mwinyi apwecheriye yuuku ya maati. Mwinlotte mpakha nyuupa anttaamo. <sup>11</sup> Mwimuuze mwennyewe nyuupa yaya eto yoori: ‘Mwan-liimu eetta oniruma owuuzelani yoori puuro anttelaaaye ojavo njampo la Paashikowa na anakhiyon i awe pi vayi?’ <sup>12</sup> Othuuto onta wuthoonyezani nsana nwulweene wa vatulu oriina zaana zooshi, mwaattalele attaapho njampo nttho.”

<sup>13</sup> Yo khulawa khusikana epile Yinsa aawooziyeezo, khwaattalela ethu-yoojiwa ya Paashikowa. <sup>14</sup> N’oofiya wakathi Yinsa na maaswi-haapa awe khwiikhala vameeza. <sup>15</sup> Khuwoza yoori: “Kaari ohithajya venkivene onja Paashikowa vamote na-mweyo kihinalawe ohoowa. <sup>16</sup> Kiniwuuzani yoori akintela oja theenya njampo ntthi mpakha lint-telaavo omariseliwa muufwalume wa Nnyizinku.”

<sup>17</sup> Athuuliyevo jiikira khunshukhurwela Nnyizinku, khuwooza yoori: “Mwithuule mwaawanyena. <sup>18</sup> Kiniwuuzani yoori akinrutela

\* **22:1** Nzina la Paashikowa lina maana a wakathi Nnyizinku awaataphuliyeeyo Meezirayeele mmakhono wa Amisuri.

onywa nshumo wa nrayi wa wuuva mpakha ontaavo Ofwalume wa Nnyizinku.”

<sup>19</sup> Athuuliyeovo phaawu khunshukhurwela Nnyizinku, khumeya khuwenkha khuwooza yoori: “Opu mwiili aka onttelaaye ovahiwa khwa mweeyo, mwisala mwiretta ethhiipi mwikifikhiraka miiyo.”

<sup>20</sup> Khwa nanna ethiito nawiisha oja khuthuula jiikira khulupa yoori: “Jiikira eti wahati mpheya onrettiwaaye ti taamu yaka, enttelaaye wiittikha khwa mweeyo.

<sup>21</sup> Ila mwijuwe yoori, otule anttelaaye okikhola ori vameeza attaapha vamote na-miyo. <sup>22</sup> Mwaana wa Pinaatamu onttela ofwa khwa nanna ethhipo Nnyizinku asharutheliyeezo. Ila atakhaliwa otule anttelaaye onkhola. <sup>23</sup> Yo khusala oozelana atthaaporu yoori anjuwe nlupa aari weettelaaye oretta ethhu yaya eto.

### *Nttunkhulu muufwalume wa Nnyizinku ti paani?*

<sup>24</sup> Aphano maaswihaapa khusala anyakulisana atakhaka onjuwa paani eezeliyeeyo ottunkhulu vakatthi vaya. <sup>25</sup> Yinsa khuwooza yoori: “Afwalume a vathi apha aniiyana oshintta vakatthi wa atthu aya, na apale aneettettisaaye ofwalume oniwaatuvela olupeziwa onamarettta saana. <sup>26</sup> Ila mweeyo mwihiiye towo, nttunkhulu vakatthi venu eeye ti ntiitthi aya, otule anlokozelaaye eeye ti namarumeyela aya. <sup>27</sup> Nttunkhulu ti paani, ti otule aniikhalaaye vameeza ama otule anrumeyaaye? Khaniya otule aniikhalaaye vameeza? Ila vakatthi venu mweeyo, miiyo kiri nkhamma otule anrumeyaaye. <sup>28</sup> Mweeyo ti ye mwirikiye vamote na-miyo mphule kinzayiniwaamo. <sup>29</sup> Nkhamma ethhipo Paapa akinkhiyeeyo ofwalume, na miiyo kiniwinkhani mweeyo, <sup>30</sup> yoori mwije na mwinywe vameeza vaka muufwalume mwaka, na mwiikhale vakhukulu y'oofwalume yoori mwiphuke mahimo khumi na mawiri a Ezirayeele.

<sup>31</sup> Simawu, Simawu, Epiliisi avekela yoori awootooteni nkhamma em-pepetthiwaazo tiriku. <sup>32</sup> Ila miiyo koolompela yoori amini yawo ehi-waashikhe. Amana orutela wiiya vamote na-miyo, owaalipisele azawo.”

<sup>33</sup> Simawu khujipu yoori: “Mbwanaaka, miiyo kakhupali wuulotta hatha nkhamma nkalapooso, hatha nkhamma ofwa.”

<sup>34</sup> Ila Yinsa khunjipu araka: “Miiyo kiniwuza weeyo Pheeturu yoori leelo eti likukhuwi lihineekhe, onkikhana swaaafu ttatthu oraka khunkujuwa.”

<sup>35</sup> Aphano Yinsa khuwooza araka: “Wakathi opule koorumiyeenini mwihina hatha mfukho wala napampa, ama shapathu, niini yoos-aleeliyeenini?”

Yo khujipu yoori: “Hatha ethhu khayaanisaleeliye.”

<sup>36</sup> Ye khuwooza yoori: “Ila nasaapi eti otule ariina mfukho athule na napampa awe anthuule. Otule ahina phanka oozanyise ajapi yawe oozanye. <sup>37</sup> Nkhamma ethhipo Nttakhuzi la Nnyizinku linlupaazo yoori: ‘Ye onaalakiwa nkhamma nanretta zootakhala.’ Miyo kiniwuuzani khweele yoori sharuthi vitthu epi zirettikhane khwa miiyo, maana etile yaatikhiweeyo monkoni wa miiyo ena yoorettikhana.”

<sup>38</sup> Maaswihaapa apale khulupa yoori: “Fweeyo apha Mbwana ninaaye phanka piiri.” Ye khujipu araka: “Weesha mwaasa aya opo!”

*Yinsa onlompa vamwaako wa Oluveera*

<sup>39</sup> Khulankha khusala alawa vamwaako wa Oluveera nkhamma etthiipo aazowereliyezo, anakhiyoni awe khunlotta. <sup>40</sup> N'oofiya khuwooza yoori: “Mwilompe yoori mwihihikwele muuzayiniwa.” <sup>41</sup> Ye khuwaasusa vattitthiiru<sup>†</sup> khukokhora khusala alompa araka: <sup>42</sup> “Paapa amana otakha, okilaze jiikira eti yoohoowa; ila ehirettikhane otakha waka miyyo, arettikhane matakhele awo.” <sup>43</sup> [Aphano khumpuwelela nlayikha la pinkuuni khusala linlipisela. <sup>44</sup> Ari mmashakha, khusala alompa woophilipisavo, mattottonka oovujuwela wawe khuretteya wiiya taamu khusala akwela vathi.]‡

<sup>45</sup> N'oolaavo aphale aari olompaavo, khweetta aphale aariivo anakhiyoni awe, khuwaasikana eettaka olala mwaasa woohuzunikha. <sup>46</sup> Khuwoozela araka: “Mwinlala-ni? Mwilankhe mwilompe yoori mwihihikwele muuzayiniwa.”

*Okholiwa wa Yinsa*

<sup>47</sup> Eettaka ottakhula etthiipile, khutavo atthu a waatta alokoziwe ti mmote wa anakhiyoni apale khumi na awiri aari wiitthiwaaye Yuuda. Ye khuta aphale aariivo Yinsa yoori amwinkhe peezehu. <sup>48</sup> Attaaphale Yinsa khuri: “Yuuda, Mwaana wa Pinaatamu oninkholisa na peezehu?”

<sup>49</sup> Anakhiyoni awe nawoona vitthu epile khulupa yoori: “Mbwana, niwoomanane na phanka?” <sup>50</sup> Aphano nakhiyoni mmote khunshija nshiilo la nkono-nlume mwiitthwaana wa haakkimu nwulu wa tiini.

<sup>51</sup> Ila Yinsa khuri: “Onlikhe ohinrutele!” Ye khukhola nshiilo la ntthu otule khunvonisa.

<sup>52</sup> Aphano Yinsa khuwoozela attunkhulu a mahaakkimu a tiini na attunkhulu a anamweekesela a Nyuupa ya Nnyizinku na anamalokozela a tiini apale aateeliye onkhola araka: “Mwakiteela na phanka na puutta nkhamma kiiyiye namalokozela wa anazompere? <sup>53</sup> Wakhula siikhu kaari wiiya vamote na-mweyo vaje wa Nyuupa ya Nnyizinku khuhisala mwikikhola, aphano, opu wakathi enu na otule ariina ofwalume wa n'yizza.”

*Pheeturu oninkhana Yinsa*

<sup>54</sup> Aphano Yinsa n'ookholiwa khulawaniwa mpakha vaje wa haakkimu nwulu wa tiini. Pheeturu khusala anlottelela Yinsa woohimwaattami. <sup>55</sup> Yo khukhoza moottho vaje khusala oottha, na-ye Pheeturu khuta attaapho khwiikhala. <sup>56</sup> Njaazi mmote aariivo n'oomoona eekhaliye nshini wa moottho khumweekesa saaneene khuri: “Otu aari vamote na Yinsa.”

<sup>57</sup> Pheeturu khukhana araka: “Weyo mwanankha! Miiyo akininjuwa ntthu aya oto.”

<sup>58</sup> N'oovira wakathi vattitthiiru, Pheeturu khooniwa ti ntthu nkina khumuuzu yoori: “Weeyo o wa khuntti ethiitile.”

Ila Pheeturu khukhana araka: “Mwinyi, khahiyo miiyo!”

<sup>59</sup> Oviriyeevo wakathi mmote, ntthu nkina theenya khulupachacha yoori: “Khweele-khweele otu aari vamote na-ye, maana otu aya na-ye nkalileya.”

<sup>60</sup> Pheeturu khujipu araka: “Mwinyi! Miiyo akinjuwa ethu mwinlu-paaye.” Eettaka ottakhula etthiipile, likukhuwi khwiikhala. <sup>61</sup> Mbwana

† **22:41** Owaasusa vattitthiiru: luuka ya Ekereku ena maana ‘yoosusa kiyasi ya likolokotto la weesiwa.’ ‡ **22:44** Aaya epi kithaapu kiina zaraku khina.

khuzukuluwa khumweekesa Pheeturu, ye khufikhiri mattakhuzi apale ooziveeyo ti Mbwana yoori: “Leelo ethiiti likukhuwi lihineekhe, onteela okikhana swaafu ttatthu.”<sup>62</sup> Pheeturu khulaavo aphale vaya khusala alila ari wookafilikha.

<sup>63</sup> Atthu apale aari omweekeselaaye Yinsa khusala anveyisa na om-piya,<sup>64</sup> khumfinikha omaasho wawe khusala amuuzela yoori: “Weeyo khahi o napiyu? Onlupe otu oopiyieeyo!”<sup>65</sup> Khusala anlupeza mattakhuzi a waatta a mattukhano.

### *Yinsa onlawaniwa wa amashawuriya awulu*

<sup>66</sup> N'oocha khukusanyeya attunkhulu a mayaahuuti, attunkhulu a mahaakhimu a tiini na anamanozela a kano, khuthuuliwa Yinsa khulawaniwa nhali anthukumanaamo attunkhulu oophuka milattu.<sup>67</sup> Khusala amuuzela yoori: “Nkahaya, nkanuze nkama weeyo o Al-Masiihu.”

Ye khujipu araka: “Amana kiwuuzani khamwinkaamini,<sup>68</sup> na amana kiwuuzelani khamwinkijipu.<sup>69</sup> Ila waaza nasaapi ethiiti Mwaana wa Pinaatamu onttela wiikhala nkhono-nlume wa Nnyizinku Woowahi.”

<sup>70</sup> Aphano ooshi khumuuzela yoori: “Apho niri weeyo o Mwaana wa Nnyizinku?”

Yinsa khujipu araka: “Mweeyo mwalupa yoori ti miiyo.”

<sup>71</sup> Yo khulupa yoori: “Ninhithajiya shaahiti theenya? Mwennyewe alupa na nlomo awe.”

## 23

### *Yinsa onlawaniwa wa Pilaatu*

<sup>1</sup> Khulankha khuntti yooshi khunthuula Yinsa khusala anlawana wa Pilaatu.<sup>2</sup> N'oofiya khusala anlokoveza yoori: “Nansikana otu awaalikhisaka atthu etthu oriphala lumpuru la Seezari, khusala ajilupeza yoori ti Al-Masiihu na mfwalume.”

<sup>3</sup> Aphano Pilaatu khumuuzela yoori: “Ti weeyo mfwalume wa mayaahuuti?”

Yinsa khujipu yoori: “Weeyo walupa.”

<sup>4</sup> Pilaatu khuwooza attunkhulu a mahaakhimu a tiini apale na khuntti ya atthu etile yaariivo yoori: “Miiyo akinimoonana hatha paathuli otu.”

<sup>5</sup> Atthu apale khusala avira akhanyarelaka olupa yoori: “Otu onta owaatapanya atthu a Yudeya yooshi eti, aaza Kalileya mpakha ofiya okhuno.”

<sup>6</sup> Paata yoosiila mattakhuzi apale, Pilaatu khuuzela yoori: “Otu aya nkalileya?”<sup>7</sup> Pilaatu ajuwiyeovo yoori Yinsa aari wa nti wa mfwalume Herooti, khuruma olawaniwa ottuukho. Wakathi aya opo Herooti na-ye aarettiye ari Yeruzaleemu.

<sup>8</sup> Herooti n'oomoona Yinsa, khwiya woofurahi venkivene maana aaziye raku otakha omoona mwaasa woosiila vitthu aari orettaazo, khusala aweeja woona minjuza arettaka.<sup>9</sup> Aphano khusala amuuzela vitthu za waatta, ila ye khuhisala anjipu hatha etthu.<sup>10</sup> Attunkhulu a mahaakhimu a tiini na anamanozela a kano khusala anlokoveza mattakhuzi mawulu-mawulu.<sup>11</sup> Herooti na anajanka awe khwaaza onveyisa Yinsa na ontarawu, khunwalisa ajapi y'oofwalume khuruma yoori arutiseliwe wa Pilaatu.<sup>12</sup> Herooti na Pilaatu khaari osiilanaka, ila siikhu ethiito khupuwa oshirikha.

### *Yinsa onttela wuuliwa*

<sup>13</sup> Aphano Pilaatu khuwaakhuwela attunkhulu a mahaakhimu a tiini, anamaphuka milattu na atthu, <sup>14</sup> khuwooza yoori: “Mwakitiisela otu mwinlupezaka yoori onta owaatapanya atthu, ila miiyo kamuuzel a vakaatti venu mweeyo, akimoonaneeni hatha paathuli khwa vitthu epo mwininlupezaazo. <sup>15</sup> Herooti na-ye khamoonaneeni hatha paathuli, ti eto arumiyeeyo orutiseliwa okhuno. Eto enthoonyeza yoori kharetteeni ethu yoosuhi wuuliwa. <sup>16</sup> Miiyo kintta oruma opiiwa nawiisha kinleve.” <sup>17</sup> [[N'oofiya siikhu ya njampo la Paashikowa, Pilaatu aarin sharuthi yoowaafukulela atthu napherezu mmote.]]\*

<sup>18</sup> Attaaphale atthu ooshi khusala anyakula araka: “Mwimuule oto! Mwinifukulele Barabal!” <sup>19</sup> Baraba aafukeliwe mwaasa woolaza onazompere nsitati na khumuula ntthu.

<sup>20</sup> Aphano Pilaatu khurutela owooga atthu atakhaka onleva Yinsa. <sup>21</sup> Ila atthu khusala anyakula venkivene araka: “Akhomeliwe, akhomeniwe vansalapa!”

<sup>22</sup> Pilaatu khuwoozela swaafu yattaatthu: “Niini arettiyeeyo yootakhala? Miiyo akinimoonana hatha paathuli yoosuhi wuuliwa. Kinruma yoori mwinhukhumu nawiisha kinleve.”

<sup>23</sup> Ila yo khusala avira anyakulaka avekaka yoori Yinsa alawe akhomeniwe, akhanyarelaka onyakula. <sup>24</sup> Aphano Pilaatu khukhupalela oretta etile aari otakhaaye atthu apale. <sup>25</sup> Ye khumfukulela Baraba otule aafukeliweeyo mwaasa woolaza onazompere na wuula, khuwenkha Yinsa otule anvekiyeeyo yoori alawe anrettele etile aari ontakhelaaye.

### *Simawu onthuulisiwa nsalapa wa Yinsa*

<sup>26</sup> Yinsa khuthuuliwa khusala alawaniwa, eettaka olawaniwa ethiipile, khusikaniwa mwinyi mmote wa Sireeni aari wiithiwaaye Simawu, aari olankhaaye omashapa. Khukholiwa khuthuulisiwa nsalapa opule yoori anlottisele Yinsa. <sup>27</sup> Aari olottiwa pi atthu a waatta na aarivo aakha aari onlilelaaye ankhupanyeraka. <sup>28</sup> Yinsa khuzukuluwa khuweekesa aakha apale aari onlilelaaye khuwooza yoori: “Aakha a Yeruzaleemu, mwihikililele miiyo, ila mwijililele mweeyo na aaneenu. <sup>29</sup> Maana zinteela ofiya siikhu mwinttelaaye olupa yoori: ‘Ashapweyiwa aakha apale oohiina mavokozi, ahinavokole na ahinaamwise.’”

<sup>30</sup> Siikhu ethiito mwinlawa mwalupe yoori:

‘Nyaako zinikwele  
kulu zinifinikhe!’

<sup>31</sup> Muutthi nwishi onretteliwa toono khi wa wuuma onttela wiiya toovi?”†

<sup>32</sup> Khuthuuliwa theenya anazompere awiri yoori alawe ooliwe vamote na Yinsa. <sup>33</sup> N'oofiya puuro eniithiwaaye Kalavaariyu‡, Yinsa khukhomeliwa na anazompere apale awiri, mmote nkhononlume nkina nkono-nkha. <sup>34</sup> [Aphano Yinsa khulupa yoori: “Paapa,

---

\* <sup>23:17</sup> Warakha za raku khina aaya eti ya 17. † <sup>23:31</sup> Maana a muutthi nwishi anthoonyeza Yinsa otule eeyiye wa haakhi, muutthi wa wuuma onthoonyeza anatwampi. ‡ <sup>23:33</sup> Kalavaariyu maana aya likurakuza la eeshwa ya ntthu woofwa.

owaaswaamihi atthu apa maana khanjuwa ethu anrettaaye.”]§ Elotellanaka yo khwaawanyelana kuwo epile za Yinsa nkatthi wa nasipu.

<sup>35</sup> Atthu aari attaaphale aari woona zooshi. Mahaakhimu a Yudeya khusala antarawu Yinsa araka: “Ye awoosuru atthu akina, mwinlikhe ajuusuru mwennyewe nkhamma khweele ti Al-Masiihu nanthawuliwa ti Nnyizinku.”

<sup>36</sup> Anajanka na-yo khusala antarawu Yinsa antiiselaka viinyu yoonyunya, <sup>37</sup> n'oomuuza yoori: “Nkhamma khweele weeyo o mfwalume wa mayaahuuti, ojuusuru omweenyewe.”

<sup>38</sup> Vansalapa attaaphale aakhomeliweeyo, khutthiiwavo lipawu laatikhiweeyo yoori: “OTU MF WALUME WA MAYAAHUTI.”

<sup>39</sup> Anazompere apale aakhomeliweeyo vamote na Yinsa, mmote aya khusala anveyisa amuuzaka yoori: “Nkhamma weeyo o Al-Masiihu, ojuusuru na onusurwaka na-fweyo.”

<sup>40</sup> Otuple nkina khujipu ammaruwelaka nzaawe araka: “Weeyo khunimoova Nnyizinku, ye na-fweyo hukhumu yetthu moote? <sup>41</sup> Fweeyo khweele ninsuhi ohukhumweliwa epile nirettiyeego, ila ye kharetteeni hatha etthu yootakhala.”

<sup>42</sup> Aphano khulupa yoori: “Yinsa, okuupuwele amana ofiya muufwalume mwawo.”

<sup>43</sup> Yinsa khujipu yoori: “Miiyo kiniwuza khweele yoori leelo eti weeyo onttele wiiya vamote na-miyo pephooni.”

### *Ofwa wa Yinsa*

<sup>44</sup> Esaleelaka ofiya elukuluku njuwa khuzima, khupuwa yiiza olumwenku wooshi mpakha makaaripi. <sup>45</sup> Phazira khuluyeene yaari Nnyupa wa Nnyizinku khuvaruwa vakatthi. <sup>46</sup> Aphano Yinsa khukhuwa na kuvu araka: “Paapa, rooho yaka kininkhelela mmakhono mwawo.” N'oolupa ntthakhuze ntthile, khuttiya phuumu.

<sup>47</sup> Nrooma mmote aari ntthunkhulu wa anajanka, nawoona vitthu epile zaarettikhaniyeego, khunsifu Nnyizinku araka: “Khweele-khweele otu aari ntthu aari weettettisaaye shariya.” <sup>48</sup> Ooshi apale aari attaaphale, nawoona vitthu epile zaarettikhaniyeego, khuruti apiyaka vifuwa zaya athoonyezaka huzuni. <sup>49</sup> Ashirikha awe Yinsa ooshi na aakha apale anlottiyeeyo a Kalileya, aarettiye ari peetiwene eettaka woona vitthu epile.

### *Ozikhiwa wa Yinsa*

<sup>50-51</sup> Aarivo mwinyi mmote aari wiitthiwaaye Yuusufu wa sitati ya Arumateeyaa nti wa Yudeya. Ye aari wooshapweya rooho na wa shariya, na aari weekeselaaye ota wa Ofwalume wa Nnyizinku. Aari wa khuntti ya mashawuriya, ila ye khaakhupaleliye epile mashawuriya aawaziyeego na aarettiyeego. <sup>52</sup> Ye khulawa wa Pilaatu oveka mwili wa Yinsa. <sup>53</sup> Khulazavo vansalapa aphale, khuputaputela vajoora khulawa khuzikha nliphotto la mwaako laari ahinazikhewemo hatha ntthu. <sup>54</sup> Epo zaarettikhaniye juumwa ochelaniwa jumwaa-monsi\*\*.

<sup>55</sup> Aphano, aakha apale aataniyeeyo Yinsa Kalileya, khunlottelela Yuusufu omwaako okhule eetteliyeewo ozikha mwili wa Yinsa, olawa woona khapuri na mwili nanna waazikhieezo. <sup>56</sup> Nawiisha, khurutela

§ 23:34 Warakha za raku khina aaya eti ya 34.

\*\* 23:54 Jumwaa-monsi: yiiyiye saapatu, silku ttakatthiifu ya mayaahuuti.

owaya olawa waattalela mafuttha oonukhela yoori alawe avaaze mwili wa Yinsa. Jumwaa-monsi yo khuvumula nkhamma ethiipo enrumaazo kano.

## 24

### *Osisimuwa wa Yinsa*

<sup>1</sup> Siikhu yamwanzo ya sumana, jumwaa-phili supuyeene, aakha apale khusala alawa okhapuri okhule aazikhieewo Yinsa athuuliye mafuttha oonukhela apale aattaliyeeyo. <sup>2</sup> Yo n'ooziya khoona liwe ntthile laafukanieeyo nlako wa khapuri liriloolaziwavo. <sup>3</sup> N'oviramo, mwili wa Mbwana Yinsa khusikana ohimo. <sup>4</sup> Khiiya oozinkuwa venkivene, attaaphale khuwaapuwelela atthu awiri awaliye kuwo za waara. <sup>5</sup> Aakha apale khuwaapattha woova khukokhora khufiyisa ajhi zaya vathi, atthu apale khusala awoozela yoori: "Mwinimweekeselani ntthu wa woona vakatthi wa alupa oofwa? <sup>6</sup> Ye khaamo mphu; asisimuwa, muupuwele mattakhuzi apale aawuuziyeenini ari nti wa Kalileya! <sup>7</sup> Aalupiye yoori: 'Mwaana wa Pinaatamu ona ya winkheleliwa mmakhono wa anatwampi, akhomeliwe vansalapa, siikhu yattaathu asisimuwe.' <sup>8</sup> Aphano aakha apale khuupuwela mattakhuzi apale aalupiyeeyo Yinsa.

<sup>9</sup> N'ooruti okhapuri okhule, khuwooza vitthu epile zooshi maaswihaapa apale khumi na mmote na atthu apale akinoko aariivo. <sup>10</sup> Aakha aya aari Mariyamu Mataleena, Yowaana na Mariyamu mamaawe Yaakhumpa na aakha akinoko aalawaniyeeyo ottuukhu. Yo khuwooza maaswihaapa vitthu epile. <sup>11</sup> Ila maaswihaapa khuhisala akhupali mattakhuzi aakha apale, oonaka yoori aari oololo. <sup>12</sup> Aphano Pheeturu khulankha khusala atthira alawaka okhapuri, n'ooziya khuthurumelamo khusikanamo jooraru, khusala aruti ari wootikinisiwa khwa epile zaarettikhaniyeeko.

### *Anakhiyon eettaka Emawu*

<sup>13</sup> Siikhu ethiitile, anakhiyon awiri a Yinsa khulankha khusala alawa nti waari wiithiwaaye Emawu woolepelana Yeruzaleemu kiyasi ya phiima alufu khumi na moote. <sup>14</sup> Yo aari olawa attakhulaka monkoni wa vitthu epile zaarettikhaniyeeko. <sup>15</sup> Eettaka olawa ethiipile apiyaka mwaasa na akheetisanaka, Yinsa mwennyeweene khuwaatthoowela khusala alawa vamote na-yo. <sup>16</sup> Ila yo khumpuwa nkhamma oowaariipa omaasho, khuhisala anjuwa yoori Yinsa aya aari othuutule.

<sup>17</sup> Ye khuwoozela yoori: "Niini mwinnyakulisanelaaye ntarikhi mphu mweettaka weettetta?"

Yo khweemela omaasho waya athoonyezaka ohuzunikha. <sup>18</sup> Mmote wa yo aari wiithiwaaye Keleyoopa, khumuuzela Yinsa yoori: "Niri weeyo o nletto mmote paasi wa Yeruzaleemu ohinjuwaaye vitthu zirettikhaniyeeko siikhu epi?"

<sup>19</sup> Yinsa khuwoozela yoori: "Niini erettikhaniyeeyo?"

Yo khunjipu yoori: "Epile zinrettikhaneliyeeyo Yinsa wa Nazareeti. Ye aari napiyu woowahi khwa zooretta zawa na mattakhuzi awe vakatthi wa Nnyizinku mpakha wa atthu ooshi. <sup>20</sup> Ila attunkhulu a mahaakhimu a tiini na afwalume a mmuti mwetthu, khuruma ohukhumwelawa ofwa khulawa khukhomeliwa vansalapa. <sup>21</sup> Fweeyo naari ororomela yoori ti ye aari weettelaaye owoosuru atthu a Ezirayeele, thanku zirettikhane

vitthu zaya epo leelo siikhu yattaatthu. <sup>22</sup> Neeya wooshanka mwaasa yoori aakha akina a nkhuntti mwetthu, aalawiye okhapuri leelo lifwajiri <sup>23</sup> khuhisikani mwiili awe, khuta khunuza yoori ooniye malayikha, atthaapo pi alupiyeyo yoori Ye asisimuwa ori haayi. <sup>24</sup> Khulawa ashirikha etthu akina okhapuri, khusikana ethhiipile aalupiyeezo aakha apale, ila yo khuhimooni.”

<sup>25</sup> Aphano Yinsa khuwooza yoori: “Atthu oorupaza weeleyiwa na oolipa waamini zooshi epi alupiyeezo manapiyu! <sup>26</sup> Al-Masiihu khaarina yoohoowa ethiipo, yoori eette nnuuru mwawe?” <sup>27</sup> Khusala aweeleza mattakhuzi ooshi aatikhieeyo nkithaapu aari onlupaaye Ye, waaza kithaapu ya napiyu Munsa mpakha za manapiyu akinoko.

<sup>28</sup> Asaleelaka ofiya nti opule aari weettaaye, Yinsa khusala ompuwa nkhama aari otakhaaye owaavikana. <sup>29</sup> Ila yo khunkhanyarela araka: “Ohivikane wiiye attaapha na-fweyo, njuwa linttela otupweela waripa.” Yinsa khuvira nnyupa khwiya vamote na-yo.

<sup>30</sup> Wakathi eekhaliyeevo vameeza vamote na atthaapale awiri, khuthuula phaawu khuparikhiya, khumeya khuwenkha. <sup>31</sup> Attaaphale, oowiiri maasho aya khufunuwa khunjuwa yoori ti Yinsa, na-Ye khunaanel. <sup>32</sup> Aphano khusala oozelana araka: “Wakathi opule naari ottakhulanaavo ntarikhi aneelezaka mattakhuzi a nkithaapu, rooho zethu khazeetta onikaphula?”

<sup>33</sup> Yo khulankha NASAAPIRU khusala arutela Yeruzaleemu, khuwaasikana maaswihaapa apale khumi na mmote na anakhioni akina a Yinsa akusanyeyiye vahali vamote, <sup>34</sup> alupaka yoori: “Khweele Mbwana asisimuwa, ampuwelela Simawu.” <sup>35</sup> Na-yo apale awiri khusala alupa epile ooniyeozyo ntarikhi na nanna anjuwiyeozyo Mbwana wakathi ameyiyeevo phaawu.

### *Yinsa oniwaapuwelela anakhioni awe*

<sup>36</sup> Anakhioni apale nalelo eettaka ottakhula ethhiipile, Yinsa khuta vakatthi vaya, khulupa yoori: “Heeri yiiye vamote na-mweyo.”

<sup>37</sup> Yo khwiya oosuthuwa na woova amoonaka nkhama nshitapehe. <sup>38</sup> Yinsa khuwoozela yoori: “Mwasuthuwa-ni? Wala mishikili ziriye nroho mwenu pi za niini? <sup>39</sup> Moone makhono aka na moolu aka yoori ti miyo! Mwikikhole moone, maana nshitapehe khuniiyana nyama wala makhonkolo nkhama ethiipo mweeyo mwinikoonaazo.”

<sup>40</sup> Attakhulaka ethhiipile, khuwaathoonyeza makhono awe na moolu awe. <sup>41</sup> Mwaasa wa furaha khuluyeene na oshanka, yo khuhisala aamini nalelo, aphano Yinsa khuwoozela yoori: “Mwinaaye etthu-yoojiwa mwikinkhe kije?” <sup>42</sup> Yo khumwinkha phantte ya swi yawoochiwa. <sup>43</sup> Khuthuula khusala arafuna attaapho yo amoonaka.

<sup>44</sup> Nawiisha khulupa yoori: “Pi ethhiipi kaawuuziyeenini wakathi opule kaari vamote na-mweyo, yoori zaarina yoorettikhana zooshi epile zaatikhieeyo khwa miiyo nkithaapu ya kano ya napiyu Munsa na kithaapu za manapiyu akina na nzaapuuri.”

<sup>45</sup> Aphano Yinsa khuwaapatthisa fwahamu yoori ziweleye za-waatikhiwa za nkithaapu. <sup>46</sup> Khuwooza araka: “Yaatikhwa yoori Al-Masiihu aarina yoohoowa na osisimuwa siikhu yattaatthu vakatthi wa anamfwa; <sup>47</sup> na khwa nzina lawe onlawa walaleyiwe othupwiya yoori ziswaamihewe twampi, waaza Yeruzaleemu mpakha khapila zooshi

za voolumwenku. <sup>48</sup> Mweeyo mwa amashaahiti wa vitthu zaya epi.  
<sup>49</sup> Miyo kinlawa kooperekhezeni etile Paapa aahitiyeeyo, mweeye Yeruzaleemu ottuukho mpakha mwiitaazaniwe owahi wa pinkuuni.”

*Ownela wa Yinsa pinkuuni*

<sup>50</sup> Aphano Yinsa khuwaathuula anakhiyoni awe khulawana Betaaniya, n'oofiya khulansa makhono awe khuwaaparikhya.  
<sup>51</sup> Awaaparikhyaaka ethiipile, khuwaasusa khusala aweziwa alawaka pinkuuni. <sup>52</sup> Yo khumwaaputu, khurutela Yeruzaleemu na furaha khuluyeene. <sup>53</sup> Wakhula siikhu aari othukumana vaje wa Nyuupa ya Nnyizinku ansifwaka Nnyizinku.

## Yaahaya

*Nttakhuzi la Nluku lajiretta opinaatamu*

<sup>1</sup> Omwanzo laari Nttakhuzi. Nttakhuzi laari vamote na Nluku na Nttakhuzi laari Nluku. <sup>2</sup> Ye laari vamote na Nluku omwanzo.

<sup>3</sup> Vitthu zooshi zarettiwa khwa ye; eriwaka khaari ye khayiivo moote yaari weettelaaye orettiwa. <sup>4</sup> Ohaayi waari nkatthi mwawe, ohaayi opo yaari nuuru ya anaatamu. <sup>5</sup> Nuuru enaara n'yiiza, na yiiza khuhikhitiri oshintta.

<sup>6</sup> Aarivo nlume mmote aaperekhiweeyo ti Nluku aari wiitthiwaaye Yaahaya. <sup>7</sup> Ye ata nkhamma shaahiti yoori alawele oshaahiti monkoni wa nuuru, yoori atthu ooshi apatthe osiila hapari na akhupali khwa ye. <sup>8</sup> Ye khaari nuuru, ila ata nkhamma shaahiti wa nuuru. <sup>9</sup> Nuuru yekhweele, eniwaamwasikhelaaye anaatamu ooshi, yata voolumwenku.

<sup>10</sup> Nttakhuzi laari voolumwenku na olumwenku wompiwa ti ye, ila olumwenku khuhinjuwi. <sup>11</sup> Awaateliye apale eeyiyeyo awe, yo khuhimpwekhereli. <sup>12</sup> Ila apale ampwekhereliyeeyo na akhupaliyeeyo nzina lawe, awenkha ruhusa yooretteya aana a Nluku. <sup>13</sup> Atthaapo ahivokoliweeni khwa ephattu, wala khwa matakhele a onaatamu wala ohiiyi makhaamu a nlume, ila avokoliwa khwa matakhele a Nluku.

<sup>14</sup> Nttakhuzi khujiretta ntthu na khwiikhala na-fweyo. Noona siifwa yawe, siifwa nkhamma mwaana mmote paasi wa Paapa wawiitaala rehemaa na khwheelee.

<sup>15</sup> Yaahaya alaza oshaahiti awe araka: “Otu ti otule kaari onlupaaye, aari otaaye paata ya miiyo na nwulu zayita miiyo, maana ye aarivo miiyo kihineeyeyevo.” <sup>16</sup> Maana fooshi fweeyo napokherela phantte ya zooshi ariina na rehemaa khwa rehemaa. <sup>17</sup> Maana kano zatiisiwa khwa vakatthi wa Munsa; rehemaa na haakhi yata khwa Yinsa Al-Masihu. <sup>18</sup> Khina anamoone Nluku, ila Nluku mmote paasi, othuuto ariiye mpavu wa Paapa, ti anithoonyeziyeyo.

*Oshaahiti wa Yaahaya Namoosa*

<sup>19</sup> Opu oshaahiti wa Yaahaya, wakathi mayaahuuti a Yeruzaleemu awaaperekhiyeovo anamalokozela a tiini na aleevi\* yoori amuuzele yoori: “Opaani weeyo aya.” <sup>20</sup> Ye khutukhuru na khuhikatthali, khulupa woosileyavo yoori: “Akiyo Al-Masihu!”

<sup>21</sup> Khumuuzela yoori: “Aphano, weeyo o paani? Ti weeyo Aliyaasi?”

Khuri: “Akiyo!”

“Ti weeyo Napiyu aari weettelaaye ota?”

Khujipu yoori: “Wala!”

<sup>22</sup> Khumuuzela yoori: “Khi o paani? Onijipu yoori nawooze apale anirumiyeeyo. Nanna eti onjilupezaaye omweenyewe?”

<sup>23</sup> Yaahaya khujipu na mattakhuzi a napiyu Ezaaya araka: “Miiyo ki huula enkuwaaye n'yaara eraka: ‘Mookolele tarikhi ya Mbwana.’”

<sup>24</sup> Apale aarumiweeyo aari akhuntti ya mafwarizeewu, <sup>25</sup> khumuuzela yoori: “Khi oniwooselani atthu ohi Al-Masihu wala Aliyaasi ama Napiyu?

\* **1:19** Aleevi awaziri a mahaakhimu a tiini.

<sup>26</sup> Yaahaya khuwaajipu yoori: “Miiyo kinoosa na maati, ila vakatthi venu mweeyo owaapho ntthu mwihininijuwaaye,<sup>27</sup> antaaye paata ya miiyo na wala akinsuhi ofukula mikhoyi za jampali zawe.”

<sup>28</sup> Vitthu epo zarettikhana nti wa Betaaniya phantte ya khipula ya muuttho Yorotaani, ottuukho Yaahaya aari orettaawo njampo la woosa.

### *Pwittipwitthi ya Nluku*

<sup>29</sup> Mmeesho mwaya Yaahaya khumooda Yinsa eettaka ota khuri: “Mwimoone! Oto antaaye apho, pwittipwitthi ya Nluku anlazaaye twampi voolumwenku!<sup>30</sup> Otu ti otule kaari onlupaaye, wakathi opule kaari oraaye: ‘Onta nyumani waka ntthu akizitiye maana ye aarivo miiyo kihineeyevo.’<sup>31</sup> Miiyo akaari onjuwa paani yaya, kateela omoosa na maati yoori athoonyeziwe Ezirayiilu.”

<sup>32</sup> Aphano Yaahaya khulawela oshaahiti alupaka theenya yoori: “Miiyo kooma Rooho Ttakathiifu yiishukhaka pinkuuni nkhamma jiwa khum-morela ye.<sup>33</sup> Miiyo akaari onjuwa paani yaya, ila otule akirumiyeeyo omoosa na maati, khukuza yoori: ‘Weeyo onteela woona Rooho Ttakathiifu yiishukhaka na emmorelaka, ntthu aya oto ti anoosanaaye Rooho Ttakathiifu.’<sup>34</sup> Miiyo kooma vitthu epo, tiito kinlawelaaye oshaahiti yoori ye Mwaana wa Nluku.”

### *Anakhiyoni a Yinsa a mwanzo*

<sup>35</sup> Mmeesho mwaya Yaahaya aari attaaphale opheya na anakhiyoni awe awiri.<sup>36</sup> Noomoona Yinsa aviraka, khuri: “Mwimoone! Oto antaaye apho Pwittipwitthi ya Nluku!”

<sup>37</sup> Anakhiyoni apale awiri a Yaahaya noosiila mattakhuzi apale khusala anlotta Yinsa.<sup>38</sup> Aphano Yinsa khuzukuluwa khweekesa nyuma, khuwoona anakhiyoni apale awiri eettaka onlotta khuwoozela yoori: “Mweeyo mwineekesani?”

Khujipu araka: “Rabi” (liriina maana a mwaaliimu), “wamaka vayi?”

<sup>39</sup> Khuwaajipu yoori: “Olawa moonewo.”

Khulawa khoonawo ohali Yinsa amakiyeewo na khwiya vamote na ye siikhu yaya etile yooshi. Epo zaarettikhaniye payina ya saa-khuumi ya njuwa-looveva.

<sup>40</sup> Antere, ttwiye Simawu Pheeturu, aari mmote wa mamwinyi apale awiri ansiliyeeyo Yaahaya attakhulaka monkoni wa Yinsa, tiito anlottiyeeyo.<sup>41</sup> Mwanzo wonsikana aari ttwiye Simawu, na khumuza yoori: “Nampattha Al-Masiihu” (enlupaaye yoori Namathawaziwa).<sup>42</sup> Antere khunthuula ttwiye khunlawana wa Yinsa. Yinsa khumweekesa Simawu khuri: “Weeyo o Simawu, mwaana wa Yaahaya, ila waaza nasaapi nzina lawo eriwaka Seefwa.” (Seefwa enlupa yoori Pheeturu†).

### *Yinsa oninkhuwela Filiipe na Natanayeele*

<sup>43</sup> Mmeesho mwaya Yinsa khulakela olawa Kalileya na khunsikana Filiipe, khumuza yoori: “Okilotte!”

<sup>44</sup> Filiipe aari wa sitati ya Betezayiita ottuukho waari owawe Pheeturu na Antere<sup>45</sup> Filiipe khunsikana Natanayeele khumuza yoori: “Nampattha otule Munsa aatkiyeeyo nkithaapu ya kano monkoni wa ye na manapiyu. Ti Yinsa wa Nazareti, mwaana wa Yuusufu!”

† 1:42 Liriina maana a liwe

<sup>46</sup> Natanayeele khuuzela yoori: “Nazareeti, enlankhawo ethu yooshapweya?”

Filiipe khunjipu yoori: “Ote woone!”

<sup>47</sup> Yinsa amooniyeevo Natanayeele amwaattamaka khuri: “Oto mwi-izirayiilu weekhwhee, ntthu woohiina ottettekha va rooho vawe.”

<sup>48</sup> Aphano Natanayeele khumuuzela Yinsa yoori: “Mwaari okijuwa vayi?”

Yinsa khunjipu yoori: “Filiipe ahinookhuwele miiyo kiwooniye wiikhaliye nshini wa nfikeera opule.”

<sup>49</sup> Attaaphale Natanayeele khushanka khuri: “Rabi, weeyo o Mwaana wa Nluku. Weeyo O Mfwalume wa Ezirayiilu!”

<sup>50</sup> Yinsa khunjipu yoori: “Weeyo wakikhupali mwaasa wa olupa yoori kaawooniye nshini wa nfikeera? Toowo onttela woona vitthu khulukhulu zayita epi.” <sup>51</sup> Khuvira alupaka yoori: “Miiyo kiniwuuzani khweele yoori, mwinoona pinku eri yoofukuwa na malayikha a Nluku awelaka na wiishukha amwiishukhelaka Mwaana wa Pinaatamu.”

## 2

### *Yinsa ontta oharusi*

<sup>1</sup> Siikhu ya ttaatthu, khwiiyawo harusi Kanaani ya Kalileya na mamaawe Yinsa aari ottuukho. <sup>2</sup> Yinsa na anakhiyoni awe khulaleyiwa awe olawa oharusi. <sup>3</sup> Paata ya wiisha viinyu, mamaawe Yinsa khumuuzza yoori: “Yaweeshela viinyu.”

<sup>4</sup> Ila Yinsa khujipu araka: “Muukha, enihithajiya okuuza? Nalelo khunafiyi wakathi aka.”

<sup>5</sup> Aphano mamaawe khuwooza anamarumeyela yoori: “Mwirette zooshi epile anttelaaaye owuuzani.”

<sup>6</sup> Attaaphale, zaarivo zuuku sitha mayaahuuti aari orumeyelakaaye wakathi wa otwahareshiwa zaari za maliituru thamaaniini kiina zaari za maliituru miiya na eshiriini.

<sup>7</sup> Yinsa khulupa yoori: “Mwiitaaze maati wakhula yuuku,” yo khwitaaza mpakha omilomo waya.

<sup>8</sup> Aphano Yinsa khuwooza yoori: “Mwittekhe vattithiiru mwimweetisele mahutumu wa njampo.” Yo khuretta ethiipile. <sup>9</sup> Attaaphale mahutumu wa njampo khoota maati apale aarettiweeyo viinyu woohijuwi ohali yaalankhiyeewo, aari ojuwaaye anamarumeyela apale attekhiyeeyo maati aya. Aphano mahutumu khumuuzza mposi, <sup>10</sup> araka: “Atthu ooshi azowerela Owenkha atthu viinyu ya mwanzo anamalaleyiwa, amana anywa ewaatsha phi mwiniwenkhaavo viinyu yoohafwiifweya, ila weeyo nalelo wapweha viinyu yooshapweya mpakha apha.”

<sup>11</sup> Alama ya eto ya minjuza, yaari ya mwanzo Yinsa oretta nti wa Kanaani ya Kalileya. Siifwa yawe yaathonyezeyiye attaapho, na anakhiyoni awe khunkhupali.

<sup>12</sup> Paata ya vitthu epile khusala alawa Kafwaranaawu na mamaawe, attwiize na anakhiyoni awe. Khwiiya ottuukhule siikhu vattithiiru.

### *Yinsa ontwaharesha Nyuupa Yoosifwiwamo Nluku*

<sup>13</sup> Osaleelaka ofiya wakathi wa njampo la Paashikowa wa mayaahuuti, Yinsa khuwelela Yeruzaleemu. <sup>14</sup> Khuwaasikana Nnyupa Woosifwiwamo Nluku atthu aari wuuzanyaaye mompe, pwittipwitthi, jiwa, na

atthu aari opatilisaaye nzurukhu.<sup>15</sup> Aphano khweesa puutta ya nkhoyi, khuweekaramo atthu ooshi Nnyupa Woosifwiwamo Nluku, vamote na pwittipwithi mpakha mompe zaya. Khumwazela vathi nzurukhu wa apale aari opatilisaaye na khuphinttula meeza aya.<sup>16</sup> Na khuwooga apale aari wuzanyisaaye jiwa yoori: "Mwilazemo vitthu zooshi! Mwilikhe oretta pazi nyuupa ya Paapa."

<sup>17</sup> Aphano anakhiyoni awe khuupuwela zawaatikhiwa ttakatthiifu enraaye: "Ojilipisana waka khwa nyuupa yawo, Oo Nluku, enlukuzela nkathhi mwaka nkhama moottho."

<sup>18</sup> Attaaphale anamalokozela amayaahuuti khumuuzela yoori." Alama-ni ya minjuza ontakhaaye onithoonyeza" yoori weeyo onaaye owahi wooretta vitthu zooshi epo?"

<sup>19</sup> Yinsa khujipu yoori: "Mwipweche nyuupa eti ya Nluku, miiyo kintta ojeka opheya khwa siikhu ttatthu!"

<sup>20</sup> Yo khulupa yoori: "Ojekiwa wa nyuupa eti yaathuuliye nyaakha arupayiini na sitha, weeyo onlupa yoori onttela ojeka opheya khwa siikhu ttatthu?"<sup>21</sup> Ila Yinsa nyuupa aari olupaaye waari mwiili awe. <sup>22</sup> Wakathi Yinsa asisimuviyevo nkhapuri, anakhiyoni awe khuupuwela epile aalupiyeyo, aphano khukhupalela zawaatikhiwa ttakatthiifu na mattakhuzi awe.

### *Yinsa onjampo la Paashikowa*

<sup>23</sup> Wakathi Yinsa aari Yeruzaleemu, onjampo la Paashikowa, atthu awaatta khunkhupali nzina lawe mwaasa wa woona alama za minjuza epile aari orettaazo.<sup>24</sup> Ila Yinsa khaari owaamini maana aari owaajuya ooshi. <sup>25</sup> Khaari ontakha ntthu woomwinkha oshaahiti monkoni wa pinaatamu, maana ye aari ojuwa niini ephattu ya onaatamu.

## 3

### *Nkutthaano wa Yinsa na Nikoteemu*

<sup>1</sup> Aarivo mfwarizeewu mmote aari wiitthiwaaye Nikoteemu, ntunkhulu wa mayaahuuti. <sup>2</sup> Ye khulawa okutthanana Yinsa osikhu na khumuaza yoori: "Rabi, ninjuwa yoori onsomisa khwa phantte ya Nluku, maana khina anwahaaye oretta alama za minjuza nkhama epo, aheetteeni Nluku wiiya vamote na-ye."

<sup>3</sup> Yinsa khujipu yoori: "Miiyo kiniwuuzani khweele yoori, khina antakhaaye woona ofwalume wa Nluku aheetteeni ovokoliwa opheya."

<sup>4</sup> Nikoteemu khumuuzela yoori: "Nanna-ni ntthu anvokoliwaaye opheya ooluvaliye? Kinretteya ntthu weetta mwiirukulu wa mamaawe swaafu yaphiiri khuvokoliwa opheya!"

<sup>5</sup> Yinsa khujipu yoori: "Miiyo kiniwuuzani khweele yoori, aheetteeni ovokoliwa na maati na Rooho khina anwahaaye weetta muufwalume wa Nluku. <sup>6</sup> Maana otule anvokoliwaaye khwa mwiili, mwiili, na otule anvokoliwaaye khwa Rooho, rooho. <sup>7</sup> Ohiyiye wootikinisiwa mwaasa wa miiyo olupa yoori: 'Enihithajiya mweeyo ovokoliwa opheya.' <sup>8</sup> Pheevo envitelela aphale entakhaavo, ensiileya evumaka, ila khinjuweya ohali enlankhawo wala eneettaawo. Enrettikhana ethiipo khwa apale ooshi oovokoliwa khwa Rooho."

<sup>9</sup> Nikoteemu khuuzela theenya yoori: "Epo enttela orettikhana toovi?"

<sup>10</sup> Yinsa khujipu araka: “Weeyo o mwaaliimu wa nti wa Ezirayi-ilu khiniweeleya vitthu epo? <sup>11</sup> Miiyo kiniwuuzani khweele yoori, fweeyo ninlupa etile ninjuwaaye na ninlawela oshaahiti wa etile nooniyeyo; ila mweeyo khamwinkhupalela oshaahiti eththu. <sup>12</sup> Miiyo kawuuzani vitthu za vathi khamwinkhupaleeni khi mwinttela okhupalela toovi amana kiwuuzakani vitthu za pinkuuni? <sup>13</sup> Maana khina anawele pinkuuni woohiyyi otule alankhiyeeyo pinkuuni: Mwaana wa Pinaatamu. <sup>14</sup> Nkhama ethiipo Munsa alansiyeeyo nyookha n'yaara, ethiipo theenya enihithajiya Mwaana wa Pinaatamu wiiya woolansiwa, <sup>15</sup> yoori wakhula otule aninkhupalaaye eeyane ohaayi wa mileele.

<sup>16</sup> Khwa nanna ethiipo Nluku apheta olumwenku afiyelela onleva Mwanawewe mmote paasi, yoori wakhula otule aninkhupalaaye ahipwetheye ila eeyane ohaayi wa mileele. <sup>17</sup> Nluku amperekha Mwanawewe voolumwenku, khahiyo yoori ahukhumu olumwenku, ila yoori olumwenku wuusurukhe khwa ye. <sup>18</sup> Wakhula otule aninkhupalaaye khamphukiwa, ila otule ahininkhupalaaye aphukiwa, mwaasa wa ohikhupali nzina la Mwaana mmote paasi wa Nluku. <sup>19</sup> Ophukiwa waya pi opu; nuuru yata voolumwenku, ila atthu khupheta yiiza, khwi-iphiriwa ti nuuru, mwaasa wa menttezi aya aari ootakhala. <sup>20</sup> Otule anrettaye zootakhala oniiphiriwa ti nuuru na wala kheepu waattamela nuuru ontakha yoori khaazi zawe zihooneye. <sup>21</sup> Ila otule aneettettsaaye haakhi onta nnuru, yoori zooneye saaneene, yoori khaazi zawe enkholiwa khwa Nluku.”

### *Oshaahiti wa Yaahaya Namoosa monkoni wa Yinsa*

<sup>22</sup> Paata ya vitthu epile Yinsa na nakhiyoni awe khweetta nti wa Yudeya, ottuukho eeshiyewo wakathi vattitthiiru nooretta njampo la woosa. <sup>23</sup> Yaahaya naye aari owoosa atthu nti wa Enoomi, kharipu ya Saliimi maana aariwo maati awaatta na atthu aari ota oteela woosiwa. <sup>24</sup>(Vitthu epo zarettikhana Yaahaya ahinathhiwe nkalapooso). <sup>25</sup> Khupuwa onyakulisana khwa anakhiyoni akinaaya a Yaahaya na yaahuuti mmote monkoni wa njampo la otwahareshiwa. <sup>26</sup> Yo khulawa wa Yaahaya na khumuza yoori: “Rabi, mwinyi otule waariina kaapu ya muuttho Yorotaani wanlaweliyeeyo oshaahiti, onta woosa na atthu ooshi antta olawa ottuukho ariiwo.”

<sup>27</sup> Yaahaya khujipu yoori: “Khina ampwekheraaye eththu aheetteeni winkhiwa pinkuuni. <sup>28</sup> Mweeyo mwa mashaahiti wa etile kilupiyeeyo yoori: “Miiyo akiyo Al-Masihu, ila ki otule aperekhiyeeyo wiilokozi wawe.” <sup>29</sup> Namaposwa ti wa namaposa. Swaahipu aninrumeyelaaye namaposa oninjali na onsiileza oniiya woofurahi amana asiila huula ya namaposa. Eto furaha yaka yookamilikha. <sup>30</sup> Enihithajiya yoori ye awule na miiyo kijipushuwise.

<sup>31</sup> Otule anlakhaaye otulu weekhweele ori vatulu wa vitthu zooshi. Otule ari wa vathi ti wa vathi na onttakhula vitthu za vathi; ila otule alankhiyeeyo pinkuuni ori vatulu wa vitthu zooshi. <sup>32</sup> Ye ahakikhi epile oniyeezo na asiiliyeeyo ila khina ankhupalelaaye oshaahiti awe. <sup>33</sup> Otule ankhupalelaaye oshaahiti awe onhakikhi yoori Nluku haakhi. <sup>34</sup> Otule Nluku amperekhiyeeyo onttakhula mattakhuzi a Nluku, maana ye oninkha Rooho Ttakatthiifu woohiphimi. <sup>35</sup> Paapa onimpheta Mwanawewe na zooshi attha mmakhono mwawe. <sup>36</sup> Otule aninkhupalaaye Mwaana onaaye ohaayi wa mileele, ila otule aninkatthalaaye Mwaana

khanlawa woona ohaayi na theenya katapu ya Nluku empharelela khwa ye.”

## 4

*Yinsa omiya mwaasa na muukha wa Samariiya*

<sup>1</sup> Wakathi Yinsa asiiliyeevo yoori mafwarizeewu asiila yoori Yinsa ontta owaaretta anakhiyon ni owoosa zayita Yaahaya, <sup>2</sup> (eettiye ohiiyiru Yinsa aari woosaaye ila anakhiyon awe), <sup>3</sup> Yinsa khulaawo Yudeya khurutela Kaliley.

<sup>4</sup> Ila yaari ohithajiya ye ovira nti wa Samariiya. <sup>5</sup> Ye khufiya sitati moote ya Samariiya yaari wiitthiwaaye Sikaari yaattamananiyeyo nshapa la Yaakhumpa amwinkhiyeeyo mwanawewe Yuusufu. <sup>6</sup> Ottuukhule waariwo nlipu wa Yaakhumpa. Yinsa ari wooshokhera nkatti wa safwari, khulawa khwiikhala nshini wa nlipu. Zarettikhaniye payina ya atuhuri.

<sup>7</sup> Wakathi otthuupule khuta muukha wa Samariiya ottekha maati. Yinsa khumuaza yoori: “Kimeele maati vattithiiru kinywe.” <sup>8</sup> (Zarettikhaniye wakathi anakhiyon awe eettiyeeyo ositati wuuzanya ethhu-yoojiwa.)

<sup>9</sup> Muukha otule wa Samariiya khumuuzela Yinsa yoori: “Weeyo oyaaahuuti onikivekela maati miiyo, muukha wa Samariiya?” (Maana mayaahuuti na asamariiya khansilana saana.)

<sup>10</sup> Yinsa khunjipu yoori: “Weeyo eriwaka waari ojuwa tthuovo ya Nluku na paani anuuvekelaaye maati, weeyo weetta onvekela na-ye eetta owinkha maati ohaayi.”

<sup>11</sup> Muukha otule khuri: “Mbwana khuna etthu yoottekhana maati maana nlipu opu wiicha. Onttela opattha vayi maati aya apo ohaayi? <sup>12</sup> Talili weeyo onwulweene zayita papeethu Yaakhumpa? Ye aninkha nlipu otthuupo aari onywakaavo na aana awe na mompe zawe.”

<sup>13</sup> Yinsa khumuaza yoori: “Otule annywaaye maati apa onlawa eeyane nnyottha theenya, <sup>14</sup> ila otule anttelaaye onywa maati kinttelaaaye omwinkha khanlawa wiyanan nnyottha theenya. Olikha toowo, maati kinttelaaaye owinkha anttela oreteyya naattuuttu wa wiittikha maati a ohaayi wa mileele.”

<sup>15</sup> Muukha otule khumuaza yoori: “Mbwana, kimeele maati aya apo yoori kihirutele wiyanan theenya nnyottha, wala kihirutele vanlipu apha ottekha maati theenya.”

<sup>16</sup> Yinsa khumuaza yoori: “Olawe owawo, wankhuwele mannawo ote.”

<sup>17</sup> Muukha otule khujipu araka: “Akina manna.”

Yinsa khuri: “Weeyo wajipu saana olupa yoori khuna manna. <sup>18</sup> Maana waarinna amanna athaanu, ila aphano otu oriina nasaapi khahiyoo mannawo. Eto olupiyeeyo nasaapi khweele.”

<sup>19</sup> Muukha otule khuri: “Mbwana, kiniwoona yoori o napiyu.

<sup>20</sup> Amarehemu apapazethu aari waaputwaka vamwaako apha, ila mweeyo mayaahuuti mwinri Yeruzaleemu ti yiyyiye puuro ya waaputwiwawo.”

<sup>21</sup> Yinsa khumuaza yoori: “Okhupali epi kiniwuzaaye muukha, maana ontta waattamelaa wakathi mweeyo mwihinttelaaaye omwaapetu Paapa vamwaako apha wala Yeruzaleemu. <sup>22</sup> Mweeyo asamariiya

mwinaaputu etthu mwihinjuwaaye, ila fweeyo ninaaputu etile ninjuwaaye maana nusura enta khwa mayahuuti.<sup>23</sup> Khwa attaapho ontta ofiya wakathi na khweele wafiya, anamwaaputu eekhweele anttela omwaaputu Paapa khwa rooho na khweele. Anamwaaputu Paapa aniweekesaaye pi atthaapo.<sup>24</sup> Nluku rooho ti eto eniwaahithajiyaa ye apale animwaaputwaaye ana ya omwaaputu khwa rooho na khweele.”

<sup>25</sup> Muukha otule khuri: “Miiyo kajuwa yoori o Al-Masiihu (aniithiwaaye Namathawaziwa) onsaleela ota. Amana ata onteela onuuza zooshi.”

<sup>26</sup> Aphano Yinsa khumuuzo yoori: “Ti miiyo! Othuuto ontakhu-lanaaye.”

### *Anakhiyoni a Yinsa antta oruti ositati*

<sup>27</sup> Wakathi otthuupule anakhiyoni awe khuruti khwiiya ooshanka mwaasa wa onsikana apiyaka mwaasa na muukha. Ila khuhivo hatha mmote aamuzeliyeeyo yoori: “Oneekesa-ni?” Ama “Ottakhulanaka ye mwaasa aya niini?”

<sup>28</sup> Aphano muukha otule khulikha yuuku yawe khurutela ositati khuwooza atthu yoori: <sup>29</sup> “Mwite mwimoone mwinyi akuziyeeyo zooshi kinrettaazo. Talili khahiyo Al-Masiihu?” <sup>30</sup> Aphano khulankha atthu nsitati khulawa okhule aariwo Yinsa.

<sup>31</sup> Wakathi wa vittu epile anakhiyoni awe aari onkhanyarela yoori: “Rabi, mwije etthu-yoojiwa.”

<sup>32</sup> Ila ye khuwooza yoori: “Kinaaye etthu-yoojiwa mwihinjuwaaye.”

<sup>33</sup> Aphano anakhiyoni awe khusala oozelana araka: “Talili ena ntthu antiseliyeeyo etthu-yoojiwa?”

<sup>34</sup> Yinsa khuri: “Etthu yoojiwa yaka oretta matakhele a otule akiperekhiyeeyo na okhola khaazi zawe. <sup>35</sup> Mweeyo khamwinlupaka yoori: ‘Nkatthi wa nyeezi mine ninuurula?’ Miiyo kiniwuuzani yoori: Mwifunule maasho enu na moone mmashapa! Vittu zakhomaala entakha wuuriwi. <sup>36</sup> Otule anuurulaaye ompwekhera phakari yawe na onuurula mishumo za ohaayi wa mileele, khwa nanna namuurula anttelaaye ofurahi vamote na anamazala. <sup>37</sup> Maana khweele etile elupiweeyo yoori: ‘Mmote onzala nkina khuurula.’ <sup>38</sup> Miiyo koorumani yoori moorule epile mwihizaleeni. Akina akhola khaazi, mweeyo khuta opuhela khaazi yaya.”

### *Asamariiya awaatta a sitati etile aninkhupali Yinsa*

<sup>39</sup> Asamariiya awaatta a sitati etile khunkhupali Yinsa mwaasa wa oshaahiti aalupiyeeyo muukha otule araka: “Ye akuuza zooshi epile kaarettiyeeyo.” <sup>40</sup> Attaaphale paata ya Asamariiya ofiya aphale aariivo Yinsa, khunvekela yoori eeye vamote na-yo. Yinsa khwiiya vamote na-yo siikhu piiri. <sup>41</sup> Mwaasa wa mattakhuzi awe atthu awaatta khunkhupali.

<sup>42</sup> Na khumuuzo muukha otule yoori: “Aphano nakhupali, khahiyo mwaasa wa mattakhuzi apale olupiyeeyo, maana fweeyo nansiila na najuwa yoori khweele Namuusuru wa olumwenku.”

### *Yinsa oninvonisa mwaana wa waziri wa mfwalume*

<sup>43</sup> Ziviriyeovo siikhu piiri, khulaawo okhule waya khusala eetta Kalileya. <sup>44</sup> Maana Yinsa Mweenyeweene alupa yoori napiyu khanshi-tahiwa saana mmuti mwawe. <sup>45</sup> Afiiyeevo Kalileya, akalileya khump-wekherela saana yo ooniye zooshi aarettiyeozo Yeruzaleemu, vanjampo la Paashikowa, maana yo aari ottuukho.

<sup>46</sup> Khurutela theenya othotola Kanaani ya Kalileya, ottuukho atha-tushiyewo maati khwiiya viinyu. Aariwo waziri mmote aariina mwanawwe aari olwaaziwaaye Kafwaranaawu. <sup>47</sup> Wakathi asiiliy-eevo elupiwaka yoori Yinsa ori Yudeya onlanka Kalileya, khusala amweekesa nonsikana khunvekela yoori anvonise mwanawwe, aari os-aleelaaye ofwa.

<sup>48</sup> Yinsa khuri: "Mweeyo mwinkhupali paasi amana moona alama za minjuza miwulu-miwulu."

<sup>49</sup> Waziri otule khuri: "Mbwana, waakuve okilotte mwanaka ahinafwe."

<sup>50</sup> Yinsa khujipu yoori: "Olawe, mwanawo ontta wiiya haayi." Mwinyi otule khukhupalela mattakhuzi apale a Yinsa khulawa owawe. <sup>51</sup> Nalelo mwinyi otule ari ntarikhi, akarumeya awe khusala anthepeeza oteela omuza yoori mwanawo ori haayi. <sup>52</sup> Paata awoozeliyeevo yoori wakathi-ni mwaana otule apathiyeevo ashikhaali, yo khujipu yoori: "Hooma yanlikha taana payina ya saa-sapa ya makaaripi."

<sup>53</sup> Aphano papaawe mwaana khufwahamu yoori wakathi ooziweeyo ti Yinsa waari otthuupule yoori: "Mwanawo ontta wiiya haayi." Attaaphale khunkhupali Yinsa ye na vaje vawe wooshivo. <sup>54</sup> Eto yaari alama yaphiiri ya minjuza Yinsa aarettiyeeyo, paata ya olankha Yudeya eettaka Kalileya.

## 5

### *Ovonisiwa wa namarakala*

<sup>1</sup> Ziviriyeovo vitthu epile, Yinsa khulawa Yeruzaleemu mwaasa wa njampo la mayaahuuti. <sup>2</sup> Ewaakho Yeruzaleemu, kharipu ya Vanlako wa Pwittipwithi, kulaathayini khwa luuka ya meepereewu eniitthiwa Betezita, eriina mapantta mathaanu oovikhiwa. <sup>3</sup> Attaapho aari orapale-lakaavo anamarati enkeene; anamarakala, anahooni na anasupiyaani awejaka nziko wa maati\*, <sup>4</sup> maana nlayikha la Mbwana laari wi-ishukhaka swaafu kiina na wunttula maati apale. Otule aari wiiyaaye wa mwanzo weetta nkulaathayini noovona marati awe. <sup>5</sup> Attaaphale aarivo mwinyi aariina nyaakha talaathiini na minaane arina supiyaani. <sup>6</sup> Yinsa khumooma mwinyi otule ari worapalela ajuwiyeovo yoori aaza raku olwaaziwa, khumuuzela yoori: "Weeyo ontakha ovonisiwa?"

<sup>7</sup> Nlwele otule khujipu yoori: "Mbwana aka, akina hatha ntthu wookaawuni okittha nkulaathayini amana maati ontтуliwa. Kitakhaka weettamo, akina antta weettamo miiyo kihineettemo."

<sup>8</sup> Aphano Yinsa khumuza yoori: "Olankhe, othuule nrepa lawo weettette!" <sup>9</sup> Nasaapiru mwinyi otule khwiiya woovona, khuthuula nrepa lawe khwaaza weettetta.

Siikhu yaya etile yaari saapatu. <sup>10</sup> Mwaasa wa ethiito mayaahuuti khumuza otule aavonisiweeyo yoori: "Leelo saapatu, enikhattaziwa weeyo othuula nrepa lawo."

<sup>11</sup> Ye khuwaajipu yoori: “Ntthu akivonisiyeeyo ti akuuziyeeyo yoori: ‘Othuule nrepa lawo na weettette.’”

<sup>12</sup> Khumuuzela theenya yoori: “Paani mwinyi aya oto awuuziyeeyo: ‘Othuula nrepa lawo na weettetta?’”

<sup>13</sup> Mwinyi otule aavonisiweeyo khaari onjuwa paani otule aya, maana Yinsa khaari wooneya mwaasa wa wawaattiwavo.

<sup>14</sup> Paata ya vitthu epile, Yinsa khukutthanana Nnyupa Woosifwi-wamo khumuuzo yoori: “Woone, weeyo wavonisiwa! Ohirutele nt-wampi yoori ehuurettikhanele ethu yooziti.” <sup>15</sup> Mwinyi otule khulawa khuwooza mayaahuuti yoori aari Yinsa anvonisiyeeyo. <sup>16</sup> Aphano mayaahuuti khwaaza onlupattha Yinsa, maana ye eetta ovonisa saapatu. <sup>17</sup> Ila Yinsa khuwooza yoori: “Paapa ontta okhola khaazi mpakha leelo, na-miyo kintta okhola.” <sup>18</sup> Mwaasa wa ethiito mayaahuuti khusala atakha omuula, woohiiyi paasi mwaasa wa ohishututeli kano monkoni wa saapatu, ila theenya eetta olupa yoori Nluku ti Paapa na ajilikanisanaka Nluku.

### *Yinsa oneeleza khaazi yawe*

<sup>19</sup> Aphano Yinsa khuwooza yoori: “Miiyo kiniuwuzani khweele yoori, Mwaana khanretta etthu yawe, ila onretta etile animoonaaye Paapa arrettaka. Maana zooshi epile anrettaaye Paapa, Mwaana onretta et-thiipo. <sup>20</sup> Maana Paapa onimpheta Mwaana na oninthyonyeza zooshi anrettaazo, onteela onthoonyeza khaazi kiina zoziti epi yoori mweeyo mwishanke. <sup>21</sup> Maana ethiipo Paapa aniwasisimulaaye ananfwa na khuwinkha ohaayi, Mwaana naye oniwinkha ohaayi apale ye ani-watakhaaye. <sup>22</sup> Paapa khanimphuka hatha nthu, ila Paapa amwinkha Mwanawe ophuka wooshi, <sup>23</sup> yoori ooshi anshitahi Mwaana nkhamma aninshitahaazo Paapa. Otule ahinshitahaaye Mwaana khaninshitahi Paapa otule anrumiyeeyo.

<sup>24</sup> Miiyo kiniuwuzani khweele yoori, otule ansiilaaye nttakhuzi laka na aninkhupalaaye otule akiperekhiyeeyo onaaye ohaayi wa mileele, wala khamphukiwa, ila avirela ofwa yoori eeyane ohaayi. <sup>25</sup> Miiyo kiniuwuzani khweele yoori ontta ofiya wakathi, na wafiya, ananfwa anttelaaye osiila huula ya Mwaana wa Nluku na otule anttelaaye osiila oniiya haayi. <sup>26</sup> Nkhama ethiipo Paapa eeyiyeeyo mweenyewe ohaayi, amwinkha mwanawe wiyya mweenyewe ohaayi, <sup>27</sup> na amwinkha ofwalume yoori aphuke, maana ye Mwaana wa Pinaatamu.

<sup>28</sup> Mwihiye wooshankela epo zaya, maana ontta ofiya wakathi wa ooshi apale ari nkhopuri anttelaaye osiila huula yawe <sup>29</sup> anlawa asisimuwe nkhopuri. Apale aari orettaaye zooshapweya anttela osisimuwe eeye haayi, apale aari orettaaye zootakhala anttela osisimuwa eeye ophukiwa. <sup>30</sup> Ottome akinwahi oretta hatha ethu. Miiyo kimphuka khwa nanna Paapa akuuziyeeyo, na ophuka waka pi wa shariya maana akineekesa ojituvelisa, ila matakhele a otule akiperekhiyeeyo.

### *Oshaahiti monkoni wa Yinsa*

<sup>31</sup> Nkhama kinjilawela oshaahiti kimweenyewe, oshaahiti aka khahi wa khweele. <sup>32</sup> Ila owaapho nkina anlawelaaye oshaahiti monkoni wa miiyo na miiyo kinjuwa yoori oshaahiti aya opo alupiyeyo monkoni wa miiyo haakhi.

<sup>33</sup> Mwawaarumiye atthu olawa omuuuzela Yaahaya, yo khulaza os-haahiti wa khweele. <sup>34</sup> Miiyo akininhithajiya hatha ntthu okilawela oshaahiti, ila kinlupa vitthu epo yoori mweeyo mwiiye wa wuusurukha. <sup>35</sup> Yaahaya aari nkhamma likhompe laari okholelaaye nuuru yaya nawuumwasikhelani, mweeyo khukhupalela khwa wakathi vattithhiiru ofurahela nuuru yaya eto. <sup>36</sup> Ila miiyo kinaaye oshaahiti nwulweene zayita Yaahaya, mwaasa wa khaazi akinkhiyeyo Paapa yoori kikhole. Ethiito oshaahiti yoori Paapa ti akirumiyeeyo. <sup>37</sup> Paapa otu akiperekhiyeyo, onlaza oshaahiti monkoni wa miiyo. Mweeyo khamwina siile huula yawe, wala khamwina moone nanna ariyo, <sup>38</sup> theenya khamwina ntakhuzi lawe nroho, maana khamwinkhupaleeni otule amperekhiyeyo. <sup>39</sup> Mwasoma zawaatikhiwa ttakathiifu, maana mwinoona yoori khwa yo mwinaaye ohaayi wa mileele, ila pi ethiipo zinikilawelaaye oshaahiti, <sup>40</sup> ila mweeyo khamwintakha okiteela miiyo yoori mwiiyane ohaayi.

<sup>41</sup> Miiyo akinkhupalela siifwa za anaatamu. <sup>42</sup> Maana miiyo kajuwa yoori mweeyo khamwina pheta ya Nluku nkathhi mwenu. <sup>43</sup> Miiyo kata khwa nzina la Paapa, ila khamwikipediahereleeni. Nkina amana ata khwa nzina lawe mweenyewe, weekhweele mwintta ompwekherela. <sup>44</sup> Mwinttela okhupali toovi mwitakhaka osifwiwa pi atthu, mwihi-takhaka siifwa ya Nluku mmote paasi?

<sup>45</sup> Khwa ethiipo mwihaakanyere miiyo wuulokovezani mmakhono wa Paapa. Anttelaaaye wuulokovezani ti Munsa, othuuto mwiriinaaye nroromelo enu. <sup>46</sup> Eriwaka mwaari okhupalela epile Munsa alupiyeyo, mweetta okikhupalela na-miyo, maana ye aatikha vitthu monkoni wa miiyo. <sup>47</sup> Ila amana mwihihupalaka etile aatikhiyeyo, nanna-ni mwinttelaaye okhupalela etile miiyo kinlupaaye?"

## 6

### *Yinsa onjisa khuntti ya atthu*

<sup>1</sup> Paata ya vitthu epile, Yinsa khulokha ntthatta la Kalileya theenya liniithiwaaye Tiperiyaati. <sup>2</sup> Khuntti khuluyeene ya atthu khusala entotta, maana eettiye woona alama za minjuza aarettiyeego za owaavonisa alwele. <sup>3</sup> Ye khuwela vamwaako khwiikhala attaapho na anakhiyon i awe. <sup>4</sup> Esaleelaka ofiya siikhu ya orettiwa njampo la Paashikowa la mayahuuti.

<sup>5</sup> Aphano alansiyeevo maasho khoona khuntti khuluyeene ya atthu yeettaka onteela, Yinsa khumuuzela Filiipe yoori: "Noozanye vayi phaawu niwenkhe atthu apa aje?" <sup>6</sup> Aamuzeliye yoori amweeze, maana ye aajuwiyete etthu aari weettelaaye oreitta.

<sup>7</sup> Filiipe khujipu araka: "Nzurukhu miiya piiri wa feeta khunfiyela wuuzanya phaawu yoori wakhula ntthu apatthe pattaasu."

<sup>8</sup> Aphano nakhiyoni mmote anitthiwaaye Antere, ttwiye Simawu Pheeturu, khuri: <sup>9</sup> "Shaapu otu ariyi apha onaaye phaawu thaanu na swi piiri, ila epo zaya niini khwa atthu awaatta apa?"

<sup>10</sup> Yinsa khuri: "Mwiwooze atthu apo eekhale." Puuro yaya etile zaarivo nyaani zawaatta. Atthu apale khwiikhala, alumbe aari etthu ya alufu thaanu. <sup>11</sup> Aphano Yinsa khuthuula phaawu khunshukhurwela Nluku, khwaawanya na khuretta ethiipo khwa swi, wakhula ntthu khwa kхиima aari otakhaaye. <sup>12</sup> Paata ya orupalaza, Yinsa khuwooza

anakhiyoni awe yoori: "Mwilogotthele zooshi epo zisaliyeego yoori ehaashikhevo hatha moote." <sup>13</sup> Khulokotthela tathela za phaawu epile thaanu, khwiitaala khelenke khumi na piiri, aalikhieeyo apale aari orafunaaye. <sup>14</sup> Ooniyeovo alama etile ya minjuza Yinsa aaretiyeego khulupaza yoori: "Woohiivo hatha shaakha otu ti Napiyu aari weetelaaye ota voolumwenku." <sup>15</sup> Yinsa noojiwa yoori aari otakha onthuula na kuvu zaya anrette wiya mfwalume aya, khulaavo aphale vaya khulawa theenya omwaako otthwe.

*Yinsa oneetteta vatulu wa maati*

<sup>16</sup> Njuwa-looveva anakhiyoni a Yinsa khwiishukhela ontthatta. <sup>17</sup> Khupakhira nkalawa, khulokhela kaapu phantte ya Kafwaranaawu. Vathi waariipyeyevo, ila Yinsa khaari vamote na-yo. <sup>18</sup> Khusala evuma pheeve yookhomaala na mpahari khupuwamo mawipi. <sup>19</sup> Anakhiyoni eettaka ofuttha alawaka ethhiipile eettettiye kiyasi ya phiima alufu thaanu ama sitha, khusala amoona Yinsa eettaka ota eettettaka vatulu wa maati aattamelaka kalawa; yo khwiya awoova. <sup>20</sup> Ila Yinsa khuwooza yoori: "Ti-miyo! Mwihoove!" <sup>21</sup> Aphano anakhiyoni apale khumpwekherela na furaha nkalawa mphule NASAAPIRU khufiya ohali aari weettaawo.

*Yinsa phaawu ya ohaayi*

<sup>22</sup> Mmeesho mwaya, atthu apale asaliyeego phantte etile kiina ya ntthatta, khujuwa yoori kalawa moote etile yaari aphale, Yinsa kapakhiriymo, anakhiyoni awe aalawiye ottho. <sup>23</sup> Elottelanaka, kalawa kiina za sitati ya Tiperiyaati khufiya kharipu ya aphale atthu aari orafunaavo phaawu wakathi Yinsa anshukhurweliyevo Mbwana. <sup>24</sup> Wakathi atthu apale ajuwiyeovo yoori Yinsa khaarivo aphale na anakhiyoni awe, khweetta nkalawa mwaya khusala alawa Kafwaranaawu olawa omweekesa.

<sup>25</sup> Nonsikana kaapu ya ntthatta, khumuuzela yoori: "Rabi, wafiya lini okhuno?" <sup>26</sup> Yinsa khuwaajipu yoori: "Miiyo kiniwuuzani khweele yoori, mweeyo mwinikeekesa, khahiyo mwaasa wa woona alama za minjuza, ila mwaasa wa orafuna phaawu khwiya woorupala. <sup>27</sup> Mwihihkhole khaazi khwa ethhu-yoojiwa enharipweyaaye, ila khwa ethhu-yoojiwa eninkhaaye ohaayi wa mileele, ethiito Mwaana wa Pinaatamu aniwinkhaanini. Maana, Nluku Paapa, anttheliyeego alama yawe ya onhakiki."

<sup>28</sup> Aphano khumuuzela Yinsa yoori: "Ninhithajiya oretta niini yoori nikhole khaazi Nluku antakhaaye?"

<sup>29</sup> Yinsa khuwaajipu yoori: "Khaazi Nluku antakhaaye tiiti, onkhupali otule amperekhiyeego."

<sup>30</sup> Aphano khumuuzela yoori: "Alama-ni ya minjuza ontelaaye onithoonyeza yoori noone na nuukhupali weeyo? Wala ontela oretta-ni?" <sup>31</sup> Amarehemu apapazethu aja mana n'yaara, nkhama ethhiipo enlupaazo zawaatikhiwa ttakatthiifu eraka: 'Ye awenkha ethhu-yoojiwa ya pinkuuni.'

<sup>32</sup> Yinsa khuwooza yoori: "Miiyo kiniwuuzani khweele yoori: Khahiyo Munsa awinkhiyeenini phaawu ya pinkuuni, ila Paapa ti aninkhaaye phaawu ya khweele ya pinkuuni. <sup>33</sup> Maana phaawu ya Nluku ti otule eeshukhiyeego pinkuuni khwinkha ohaayi olumwenku."

<sup>34</sup> Yo khuri: "Mbwanan, oninkhe phaawu ethiito khwa mileele!"

35 Aphano Yinsa khulupa yoori: “Miiyo ki phaawu ya ohaayi. Otule anikiteelaaye miiyo khintela onkhola theenya jala na otule anikikhupalaaye miiyo khalintela onkhola theenya nnyottha.”<sup>36</sup> Ila nkhamma ethiipo miiyo kiwuuziyeeenini yoori, mweeyo mwakoonaa, ila nalelo khamwinkikhupali.<sup>37</sup> Wakhula otule Paapa anikinkhaaye, onikiteela miiyo, na otule anikiteelaaye miiyo akinteela onthanya<sup>38</sup> Maana keeshukha pinkuuni, khahiiyo yoori kirette matakhelo aka, ila kirette matakhelo awe otule akiperekhiyeeyo.<sup>39</sup> Matakhelo a otule akiperekhiyeeyo pi apa: ahikaashikhe hatha mmote wa otule akinkhiyeeyo, ila miiyo kinsisimule siikhu ya mwiisho.<sup>40</sup> Maana matakhelo a Paapa pi yoori wooshi otule animoonaaye Mwaana na khunkhupali eeyane ohaayi wa mileele na miiyo kintta onsisimula siikhu ya mwiisho.”

### *Waapa wa mayaahuuti*

<sup>41</sup> Mayaahuuti khusala aapa mwaasa wa Yinsa owooza yoori: “Miiyo ki phaawu yiishukhiyeeyo pinkuuni.”<sup>42</sup> Khurutela olupa yoori: “Khahi Yinsa otu, mwaana wa Yuusufu? Onoona yoori fweeyo khanninjuwa papaawe na mamaawe? Onlupa toovi yoori: ‘Keeshukha pinkuuni?’”

<sup>43</sup> Yinsa khuwaajipu yoori: “Mwilikhe okaapa.”<sup>44</sup> Khaavo ankiteelaaye miiyo woohiiyi otisiwa ti Paapa, otule akiperekhiyeeyo na miiyo kinisisimula siikhu ya mwiisho.<sup>45</sup> Yaatikhiwa nkithaapu za manapiyu yoori: ‘Ooshi anttela osomisiwa ti Nluku.’ Nakatalikha, wooshi otule asiiliyeeyo phantte ya Paapa na khujuwu, onikiteela miiyo.<sup>46</sup> Khina anamoone Paapa, ila otule alankhiyeeyo wa Nluku ti amooniyeeeyo Paapa.<sup>47</sup> Miyo kiniwuuzani khweele yoori: Otule anikikhupalaaye onaaye ohaayi wa mileele.<sup>48</sup> Miyo ki phaawu ya ohaayi.<sup>49</sup> Apapazenu aja mana n'yaara na khufwa.<sup>50</sup> Eti phaawu yiishukhiyeeyo pinkuuni, yoori wakhula otule anjaaye ahifwe.<sup>51</sup> Miiyo ki phaawu ya ohaayi yiishukhiyeeyo pinkuuni. Ntthu amana aja phaawu yaya eto, ontaa wiiyana ohaayi wa mileele na phaawu kininkhaaye olumwenku yoori wiiyane ohaayi, mwiili aka.”

<sup>52</sup> Aphano mayaahuuti khwaaza onyakulisana atthaaporu araka: “Mwinyi otu onttela oninkha toovi mwiili awe yoori nirafune?”<sup>53</sup> Yinsa khuwoza yoori: “Miiyo kiniwuuzani khweele yoori: Amana mweeyo mwihirafuni mwiili wa Mwaana wa Pinaatamu na khuhinywi taamu yawe, khamwina ohaayi mwaamweenywewe.<sup>54</sup> Wakhula otule anrafunaaye mwiili aka na khunywa taamu yaka onaaye ohaayi wa mileele na miiyo kintela onsisimula siikhu ya mwiisho.<sup>55</sup> Maana mwiili aka ethu-yoojiwa ya khweele na taamu yaka ethu yoonywiwa ya khweele.<sup>56</sup> Otule anrafunaaye mwiili aka na khunywa taamu yaka oto oniikhala khwa miiyo na miiyo khwa ye.<sup>57</sup> Nkhamma Paapa akiperekhiyeeyo eeyiyeeyo haayi, na miiyo kiniikhala mwaasa wa ye. Khwa ethiipo otule anrafunaaye mwiili aka oniyyana ohaayi mwaasa wa miiyo.<sup>58</sup> Eti phaawu elankhiyeeyo pinkuuni. Apapazenu aja mana na khufwa, ila otule anrafunaaye phaawu eti oniyya haayi mileele.”<sup>59</sup> Ye aalupiye mat-takhuzi apa wakathi aari osomisaaye nsinakooka ya Kafwaranaawu.

### *Anakhiyon i awaatta anintthira Yinsa.*

<sup>60</sup> Paata ya osiila mattakhuzi apale, anakhiyon enkeene khulupa yoori: “Olipa mattakhuzi aya apa. Paani anwahaaye okhitiri?”

<sup>61</sup> Ila Yinsa khujuwa nkathhi mwawe yoori anakhiyoni awe eetta onyakulisana khuwoozela yoori: "Mattakhuzi aka antta wuutapanyani?" <sup>62</sup> Khi enttela wiiya toovi amana mwimoona Mwaana wa Pinaatamu arutelaka okhu alankhiyeewo? <sup>63</sup> Rooho ya Nluku eninkha ohaayi, ila mwiili khuna fwayita; mattakhuzi apa kiwuuziyeenini pi a rooho na ohaayi. <sup>64</sup> Ila khwa ethiipo awaapho vakathi venu akina ahinkhupalelaaye." Ila Yinsa aari ojuwa omwanzweene paavi apo aya ahaari okhupalaaye na paani aari weettelaaye onzukuluwela. <sup>65</sup> Ye khuri: "Tiito kiniuuuzanini yoori, khina anwahaaye okiteela miiyo kiheetteeni winkhiwa ti Paapa."

<sup>66</sup> Wakathi otthuupule anakhiyoni enkeene khunthira na khulikha onlotta.

<sup>67</sup> Yinsa khuwoozela apale khumi na awiri yoori: "Na mweeyo mwin-takha okithira mwilawe?"

<sup>68</sup> Simawu Pheeturu khujipu yoori: "Ninttela onlotta paani? Weeyo onaaye mattakhuzi a ohaayi wa mileele. <sup>69</sup> Fweeyo ninkhupalela na ninjuwa yoori o Ttakatthiiifu wa Nluku."

<sup>70</sup> Aphano Yinsa khujipu yoori: "Khahi miiyo kiwaathawuliyeeyo apale khumi na awiri? Ila mmote wa mweeyo sheethwani." <sup>71</sup> Ye aari onlupa Yuuda, mwaana wa Simawu Eshikariyoote, aari mmote wa apale khumi na awiri, ila ti aari weettelaaye onzukuluwela Yinsa.

## 7

### *Yinsa ontta onjampo la heema*

<sup>1</sup> Paata ya vitthu epile, Yinsa khusala eettetta nti wa Kalileya, maana khaari otakha wiiya Yudeya, mwaasa wa mayaahuuti aari otakha omuula. <sup>2</sup> Ila njampo la heema la mayaahuuti leetta waattamela. <sup>3</sup> Yinsa khuuziwa ti attwiize yoori: "Weeyo ona yoolaamo mphu olawe Yudeya yoori anakhiyoni awo awahi woona khaazi onkholaaye. <sup>4</sup> Maana khina aneekesaaye ojuwiwa pi atthu awaatta ankholaaye khaazi zawe sirini. Nkhama weeyo onretta vitthu epi, othoonyeze vamwanttiwa." <sup>5</sup> Maana hatha attwiize khaari onkhupali.

<sup>6</sup> Yinsa khuwoza yoori: "Wakathi aka nalelo khunafiye, ila khwa mweeyo wakhula wakathi pi woolikana. <sup>7</sup> Olumwenku khunwahi wiiphiiriwa ti mweeyo, ila oniiphiiriwa ti miiyo, maana miiyo kininkha oshaahiti wa yoori khaazi zaya pi zootakhala. <sup>8</sup> Mwilawe onjampo, ila miiyo akinlawa maana khunafiye wakathi aka." <sup>9</sup> Paata ya olupa mattakhuzi apale khwiikhala Kalileya ottuukhule.

<sup>10</sup> Aphano paata ya attwiize olawa onjampo, ye khaalawiye payana, ila sirini. <sup>11</sup> Vanjampo aphale mayaahuuti eetta onsaya na omiuzelela araka: "Mwinyi otule ori vayi?"

<sup>12</sup> Vakathi wa atthu apale waarivo waapa monkoni wa ye, akina aari olupa toono: "Mwinyi wooshapweya rooho." Akina araka: "Wala, oniwaattettekha atthu." <sup>13</sup> Ila khaavo aari ottakhulaaye payana mwaasa wa owoova mayaahuuti.

### *Yinsa oneetta onjampo*

<sup>14</sup> Wakathi lififiyevo vakatthi njampo ntthile, Yinsa khweetta Nnyupa Woosifiwamo khwaaza osomisa. <sup>15</sup> Amayaahuuti khwiiya ooshanka na khuuzela yoori: "Mwinyi otu ajuwa toovi kano ahisomeeni?"

<sup>16</sup> Yinsa khuwaajipu yoori: “Osomisa waka khahiyo waka, walankha wa otule akiperekhiyeeyo. <sup>17</sup> Amana ntthu ajilakelela oretta matakhero a Nluku, onta osophela nkhamma osomisa waka onlankha wa Nluku ama kinjilupa ki mweenyewe. <sup>18</sup> Otule anjilupaaye mweenyewe oneekesa siifwa yawe, ila otule aneekesaaye siifwa ya otule amperekhiyeeyo, oto ti wa khweele; khayiivo hatha eththu yoovonyeya vakanthi vawe. <sup>19</sup> Munsa awinkhani kano! Ila khina mmote wa mweeyo anshututelaaye. Khi mwineekeselani okuula?”

<sup>20</sup> Atthu apale khujipu yoori: “Weeyo ona sheethwani! Antakhaaye owuula ti paani?”

<sup>21</sup> Aphano Yinsa khuri: “Keetta oretta minjuza, mooshi mweeyo khwiya wooshanka. <sup>22</sup> Mwaasa wa yoori Munsa awenkha okhiriya (weetta ohiiyiru woolankha wa Munsa ila walankha wa amarehemu apapazeththu), mweeyo mwinkhiriysiwa saapatu. <sup>23</sup> Moone, nkhamma athuuliwa nlume khukhiriysiwa saapatu, yoori kano za Munsa zimariseliwe, khi mwiniphireliwani ti miiyo mwaasa wa ovonisa mwili wooshi wa ntthu otu saapatu? <sup>24</sup> Mwihiphukane mwaasa woona nanna ariizo ntthu aya, ila mwisala mwiphukana khwa shariya.”

### *Yinsa onsomisa vanjampo*

<sup>25</sup> Atthu akina a Yeruzaleemu khusala alupa yoori: “Khahiyo mwinyi othuutu mwaari omwekesaaye yoori mwimuule? <sup>26</sup> Mwimoone, ye onttakhula vamwanttiwa, ila khuhisala apuwa hatha ntthu wonkheeti! Talili afwalume anjuwa saaneene yoori otu ti Al-Masiihu? <sup>27</sup> Ila fweeyo ninjuwa ohali alankhiyeeyo. Amana Al-Masiihu ata, khina anttelaaye ojuwa ohali alankhiyeewo.”

<sup>28</sup> Wakathi aari osomisaaye Nnyupa Woosifwiwamo, Yinsa khut-takhula woosileyavo araka: “Aaa, mweeyo mwakijuwa na mwinjuwa ohali kilankhiyeewo. Miiyo akiri apha khwa matakhero aka, ila otule akiperekhiyeeyo ti eeyiye khweele. Otule mweeyo mwihininjuwaaye, <sup>29</sup> ila miiyo kininjuwa maana kata khwa ye na ti akiperekhiyeeyo.”

<sup>30</sup> Aphano khusala atakha onkhola, ila khayiivo mmote ansapiy-eeyo maana wakathi waari ohinafiye. <sup>31</sup> Atthu enkeene aari aphale khumkhupali na khusala alupa yoori: “Amana Al-Masiihu ata, onteela oretta alama zootikinisa zayita epi arettiyeeyo mwinyi otu? Wala!”

### *Anamweekesela arumiweeyo yoori ankhole Yinsa*

<sup>32</sup> Mafwarizeewu noowasiila atthu aapaka monkoni wa Yinsa, aphano mahaakhimu a tiini na mafwarizeewu khuwaaruma anamweekesela a Nnyupa Yoosifwiwamo yoori ankhole. <sup>33</sup> Yinsa khuwooga yoori: “Kiri vamote na mweeyo wakathi vattithiiru nawiisha kinlawa wa otule akiperekhiyeeyo. <sup>34</sup> Mweeyo mwinlawa mwakeekese, ila mwihikipatthe; maana mweeyo khamwinwahi ofiya okhu kinttelaaye wiyyawo.” <sup>35</sup> Mayaahuuti khusala oozelana atthaaporu yoori: “Ontta vayi mwinyi aya otu nihinttelaaye onsikana? Talili onttela wiikhala na mayaahuuti apale anikhalaaye malaponi, ama onttela owaasomisa akereku? <sup>36</sup> Maana aya niini, a eto aalupiyeeyo yoori: ‘Mweeyo mwinlawa mwakeekese ila mwihikipatthe,’ maana ‘mweeyo khamwinwahi ofiya okhu kinttelaaye wiyyawo?’”

### *Nlipu wa maati ohaayi*

<sup>37</sup> Siikhu ya mwiisho, siikhu khuulu ya njampo, Yinsa khulankha khweemela khukhuwelela araka: “Nkhama owaapho linkholiyeeyo nnyottha, akiteele miiyo anywe.” <sup>38</sup> Maana otule anikikhupalaaye miiyo, nkhamma enlupaazo zawaatikhwa ttakatthiifu; ‘nkathhi mwawe zinttela wiittikhamu nyuuttho za maati ohaayi.” <sup>39</sup> Ye aari olupa monkoni wa Rooho Ttakatthiifu etile aari oteelaaye winkhiwa apale akhupaliyeeyo. Maana nalelo Yinsa aari ahinasifwiwe.

### *Waawanyeya wa atthu*

<sup>40</sup> Aphano noosiila atthu apale athukumaniyeeyo aphale khuri: “Otu ti Napiyu weekhwhee!” <sup>41</sup> Akina khusala alupa yoori: “Ye ti Al-Masiihu!” Akina khusala oozelana yoori: “Al-Masiihu ontela olankha Kalileya?” <sup>42</sup> Zawaatikhwa ttakatthiifu zinlupa yoori Al-Masiihu ontela olankha khwa peewu ya Daawuuda nti wa Belemu, okhu aari wiikhalaawo Daawuuda.” <sup>43</sup> Mwaasa wa ye khupuwa waawanyeya khwa atthu apale. <sup>44</sup> Akina khusala atakha onkhola Yinsa, ila khuhiiivo hatha ntthu ansapiyeeyo.

### *Anamalokozela amayaahuuti aninkatthala Yinsa*

<sup>45</sup> Anamweekesela khulawa wa mahaakhimu a tiini na mafwarizeewu, atthaapo oozeliyeeyo yoori: “Mwaasa aya niini mwihintisaka?” <sup>46</sup> Yo khujipu yoori: “Khina anattakhule nkhamma mwinyi oto anttakhulaazo.” <sup>47</sup> Mafwarizeewu khuuzela yoori: “Niri talili na mweeyo mweetta ohatiwa?” <sup>48</sup> Awaapho afwalume ama mafwarizeewu ankhupaliyeeyo? <sup>49</sup> Ila atthu apo ahinjuwaaye hatha etthu ya kano alaanikha.” <sup>50</sup> Mmote wa atthaapale aari wiitthiwaaye Nikoteemu, otule swaafu moote alawiyeeyo okuththanana Yinsa, khuuzela yoori: <sup>51</sup> “Kano zeethu khazininukhumu ntthu, ahaazeeni khapula osiiliwa khujuwiwa etthu arettiyeeyo, khahi ethiipo?” <sup>52</sup> Yo khujipu yoori: “Na weeyo wa Kalileya? Woone na onta ojuwa yoori Kalileya khampuwawo hatha napiyu.” <sup>53</sup> Aphano wakhula mmote khulankha khusala alawa owawe.

## 8

### *Muukha aasikaniweeyo araruwaka*

<sup>1</sup> Attaaphale Yinsa khulankha khusala alawa omwaako wa Oluveera. <sup>2</sup> Supuyenee khurutela Nnyupa Woosifwiwamo, atthu ooshi khusala alawa onkutthanana, ye khwiikhala khusala awaasomisa. <sup>3</sup> Anamanozela a kano na mafwarizeewu khuntana muukha mmote asikaniyeeyo eettaka oraruwa. Khumweemesa vakatthi wa atthu apale. <sup>4</sup> Khuuziwa Yinsa yoori: “Mwaaliimu, muukha otu asikaniwa eettaka oraruwa. <sup>5</sup> Muukha toowo, nkathhi wa kano za Munsa, enniruma onvonya na mawe. Khi weeyo onlupa ni?” <sup>6</sup> Aari olupa toowo atakhaka yoori apatthe nanna yonlokoveza. Ila Yinsa khwiinama khusala aatikha vathi na yaala. <sup>7</sup> Wiyya eetta okhanyarela omuuzela, Yinsa khulankha khuwooza yoori: “Otule khwa mweeyo, ahina twampi eeye wamwanzo omweeselala liwe muukha otu.” <sup>8</sup> Khurutela wiinama khusala aatikha theenya vathi.

<sup>9</sup> Noosiila mattakhuzi apale, ooshi khulaazavo mmote mmote, aaziye apale awulu. Khusalavo Yinsa na muukha otule eemeliye, attaaphale. <sup>10</sup> Aphano Yinsa khulankha khweemela khumuuzela yoori: “Muukha, ari vayi apale aya? Khina oohukhumwiyeeyo?”

<sup>11</sup> Ye khujipu yoori: "Khina mmote, Mbwana." Aphano Yinsa khu-muuza yoori: "Na miiyo akinuuuhukhumu. Olawe na ottharuwe oretta twampi."

*Yinsa nuuru ya olumwenku*

<sup>12</sup> Yinsa khurutela owooza theenya yoori: "Miiyo ki nuuru ya olumwenku; otule anikilottaye khaneetteta n'yiiza, ila oniiyana nuuru ya ohaayi."

<sup>13</sup> Mafwarizeewu khusala amuuza yoori: "Weeyo ojilawela oshaahiti omwenyeweru. Apho oshaahiti awo khahiyo wa khweele."

<sup>14</sup> Yinsa khuwaajipu araka: "Hatha nkhamma kintta ojilawela oshaahiti, oshaahiti aka pi wa okhweele, maana kinjuwa ohali kilankhiyeewo na ohali kineettaawo. Ila mweeyo khamwinjuwa ohali kilankhiyeewo wala ohali kineettaawo. <sup>15</sup> Ophuka wenu mweeyo pi wa phantte ya onaatamu; ila miiyo akinimphuka hatha ntthu. <sup>16</sup> Hatha nkhamma kintta ophuka, ophuka waka pi wa khweele, maana akiri otthome. Kina Paapa otule akiperekhiyeeyo. <sup>17</sup> Nkano zenu mweeyo yaatikhwa yoori oshaahiti wa atthu awiri pi wa khweele. <sup>18</sup> Miiyo kinjilawela oshaahiti na Paapa otule akiperekhiyeeyo onikilawela oshaahiti."

<sup>19</sup> Aphano khumuuzela yoori: "Papaawo aya ori vayi?" Yinsa khuwaajipu yoori: "Mweeyo khamwinikijuwa miiyo na khamwininjuwa Paapa, eriwaka mwaari okijuwa, mweetta onjuwa Paapa." <sup>20</sup> Ye aalupiye mattakhuzi apa eettaka osomisa Nyuppa Woosifwiwamo, kharipu ya puuro etile entthiwaamo zaakha. Ila khina mmote ankholiyeeyo, maana waari ohinafiye wakathi aya.

*Yinsa onaakisela khaazi yawe na ofwalume*

<sup>21</sup> Yinsa khurutela olupa theenya yoori: "Miiyo kintta olawa, mweeyo mwinlawa mwakeekese na mwinfwa na twampi zenu. Ohali kineettaawo mweeyo khamwineettawo."

<sup>22</sup> Aphano mayaahuuti khuuzelana yoori: "Talili ye onttela ojuula? Tiito anlupaaye yoori: 'Ohali kineettaawo mweeyo khamwineettawo?'

<sup>23</sup> Yinsa khurutela olupa theenya yoori: "Mweeyo mwa atthu a vathi attaapha; miiyo ki wa otulu. Mweeyo mwa voolumwenku; ila miiyo akiyo wa olumwenku. <sup>24</sup> Tiito kinlupaaye yoori mwinttela ofwa ntwampi mwenu. Nkhama mweeyo khamwinkhupali yoori Miiyo Ti Miiyo, weekhweele mwinttela ofwa ntwampi mwenu."

<sup>25</sup> Aphano khumuuzela Yinsa yoori: "O paani weeyo?" Yinsa khujipu yoori: "Tokhiya omwanzo kawuuzani. <sup>26</sup> Kinaaye vitthu zawaatta zoolupa na ophuka monkoni weenu mweeyo. Ila otule akiperekhiyeeyo ti wa khweele na kinuza olumwenku epile kinsiliyeeyo paasi."

<sup>27</sup> Yo khuhieeleyi yoori Yinsa aari owuuza monkoni wa Paapa.

<sup>28</sup> Aphano Yinsa khuri: "Amana mweeyo mwinsifu Mwaana wa Pinaatamu, mwintta ojuwa yoori Miiyo Ti Miiyo na akinretta hatha ethtu ya matakhelo aka, ila kinlupa etile Paapa akisomisiyeeyo. <sup>29</sup> Otule akiperekhiyeeyo ori vamote na-miyo, ye khakilikheeni wiya otthome, maana wakhula wakathi kinretta etile enintuvelaaye." <sup>30</sup> Alupiyeeyo mattakhuzi apale, atthu awaatta khumkhupali."

*Aana a Eburahtiima na aana a sheethwani*

<sup>31</sup> Yinsa khuwooza mayaahuuti apale ankhupaliyeeyo yoori: "Amana mweeyo mwijilipana ntakhuzi laka, mwinttela wiya anakhiyon iaka

khweele; <sup>32</sup> na mwinttel a ojuwa haakhi, na haakhi ethiito entta wuutaphulani.”

<sup>33</sup> Yo khunjipu yoori: “Fweeyo na peewu ya Eburahiima wala khaniyeke viitthwaana za ntthu nkina. Weeyo onlupa toovi yoori ninttel a wiya wootaphuliwa?”

<sup>34</sup> Yinsa khuwaajipu araka: “Miiyo kiniwuzani khweele yoori, wooshi otule ankosaaye mwiithwaana wa twampi. <sup>35</sup> Mwiithwaana khaniyyana puuro ya mileele vakatthi wa ajaama, ila mwaana oniyyana puuro ya mileele. <sup>36</sup> Amana Mwaana ootaphulani, weekhweele mwiniyya wootaphuwa. <sup>37</sup> Miiyo kinjuwa saaneene yoori mweeyo mwa peewu ya Eburahiima, ila mwineekesa okuula, maana khwa mweeyo ntakhuzi laka khalina puuro. <sup>38</sup> Miiyo kiniwuzani epile kooniyeezo wa Paapa, na mweeyo mwinretta epile mwisiiliyeezo wa papeenu.”

<sup>39</sup> Aphano yo khunjipu yoori: “Papeethu ti Eburahiima!” Yinsa khuwooza theenya yoori: “Nkhama mwa aana a Eburahiima, mwik-hole khaazi epile Eburahiima akholiyezo. <sup>40</sup> Ila mweeyo mwintakha okuula, kiri miiyo kiwuzyeenini haakhi etile kisiiliyeeyo wa Nluku. Eburahiima kharetteeni toowo. <sup>41</sup> Mweeyo mwinretta etile papeenu arettiyeeyo.” Yo khujipu yoori: “Fweeyo khaniyyo aana pure, ninaaye Paapa mmote paasi Nluku.”

<sup>42</sup> Yinsa khuwooza yoori: “Eriwaka Nluku aari Papeenu, mweetta okipheta, maana miiyo kalankha wa Nluku tiito kiriyo apha. Miyo akitiiseeni otthome, ila ye ti akiperekhiyeeyo. <sup>43</sup> Mwaasa wa niini mweeyo ehiweleyakani hapari zaka? Ama mwintta woona olipa ntakhuzi laka.

<sup>44</sup> Mweeyo mwinaaye papeenu, sheethwani, na mwintakha oretta etile enintuvelaaye. Ye namahusuti waaza omwanzweene wala khanalotteke haakhi, maana ye khana haakhi. Amana ahataka onlupa mattakhuzi awe, maana namahata, paapa wa ohata. <sup>45</sup> Maana mwaasa wa miiyo olupa haakhi khamwinkitakha! <sup>46</sup> Paani wa mweeyo anwahaaye okilokoveza oretta twampi? Nkhama kinlupa haakhi, khi mwaasa wa niini mwihihikhupalaka? <sup>47</sup> Otule eeyiyeeyo wa Nluku onsiila mattakhuzi a Nluku; mweeyo khamwininsiileza maana khayi mwa a Nluku.”

### *Yinsa na Eburahiima*

<sup>48</sup> Mayaaahuuti khumuuzu Yinsa yoori: “Fweeyo khanivonyeleeni olupa yoori weeyo o nsamariiya na onaaye sheethwani.”

<sup>49</sup> Yinsa khuwaajipu yoori: “Miiyo akina hatha sheethwani; olkhatoowo, kininshitahi Paapa, ila mweeyo mwinkitarawu. <sup>50</sup> Miiyo aki-neekesa ojisifu, ila owaapho anekesaaye khwa miiyo na namaphuka. <sup>51</sup> Miiyo kiniwuzani khweele yoori, otule anshututelaaye ntakhuzi laka khanteela woona ofwa.”

<sup>52</sup> Mayaaahuuti khujipu araka: “Aphano ninjuwa yoori khweele onaaye sheethwani! Eburahiima afwa, na manapiyu, ila weeyo onlupa yoori: ‘Ntthu amana ashututela ntakhuzi aka khanteela ofwa.’ <sup>53</sup> Weeyo onwulweene zayita papeethu Eburahiima? Ye afwa na manapiyu afwa, khi weeyo onjoona nkhamma paani?”

<sup>54</sup> Yinsa khuwaajipu yoori: “Nkhama kintta ojisifu, ojisifu waka khuna maana. Paapa otule mweeyo mwiniiraaye ‘Nluku ethu,’ ti ankisifwisaaye. <sup>55</sup> Mweeyo khamwinijuwa, ila miiyo kininjuwa. Eriwaka keettiye olupa yoori akininjuwa, kaari wiiya namahata nkhamma

mweeyo, ila miiyo weekhweele kininjuwa na kinshututela ntakhuzi lawe.<sup>56</sup> Eburahiima papeenu aari woofurahi paata ya woona siikhu ya ota waka; khoona na khufurahela.”

<sup>57</sup> Mayaahuuti khumuuzela yoori: “Weeyo nalelo khuneeyane nyaakha hamusiini, wamoona toovi Eburahiima?”

<sup>58</sup> Yinsa khuwaajipu yoori: “Miiyo kiniwuuzani khweele yoori, Eburahiima ahinavokoliwe Miiyo Ti Miiyo.”<sup>59</sup> Aphano mayaahuuti khuthula mawe yoori anvonye, ila Yinsa khujivitha na khusaruwamu Nnyupa Woosifwiwamo.

## 9

*Yinsa oninvonisa nthtu aavokoliweeyo ahoonaka.*

<sup>1</sup> Yinsa alawaka, ntarikhi khumoona mwinyi mmote aavokoliweeyo ari woohooni. <sup>2</sup> Anakhiyoni awe khumuuzela yoori: “Rabi, otu ovokoliwa ahoonaka, mwaasa wa twampi zawe, ama, twampi za apapaze?”

<sup>3</sup> Yinsa khuwaajipu yoori: “Khahiyio ye wala apapaze akosiyeeyo, ila vitthu epi zarettikhana yoori owahi wa Nluku othoonyezeye muuhaayi mwawe. <sup>4</sup> Maana enihithajiya okhola khaazi nthana otthuupu za otule akiperekhiyeeyo, amana oripa khina anwhaaaye okhola khaazi. <sup>5</sup> Wiiya kiri voolumwenku, ki nuuru ya olumwenku.”

<sup>6</sup> Paata ya olupa mattakhuzi apale khutthemela vathi, maattha awe khuphakanya na mattophe khuttukunttelma mmaasho wa mwinyi otule.

<sup>7</sup> Aphano khumuuzu yoori: “Olawe wajoose nkulaathayini ya Siloowe” (liriina maana a “operekhiwa”). Mwinyi otule khulawa khupoosa khuruti eettaka woona.

<sup>8</sup> Anamwaattamanana awe na apale aamoniyeeyo raku alolaka zimola khuuzela yoori: “Khahiyio mwinyi othuutu aari wiikhalkhaaye na olola zimola?”<sup>9</sup> Akina khusala alupa yoori aari ye. Akina khusala alupa yoori: “Khahiyio, eetta olattanana.” Ila mweenyeweene khusala akhanyarela yoori: “Ti miiyo ena.”

<sup>10</sup> Aphano khusala amuuzela yoori: “Afunuliwa toovi maasho awo?”

<sup>11</sup> Mwinyi otule khuwaajipu yoori: “Mwinyi anitthiwaaye Yinsa eetheyiye mattophe, khuttha mmaasho mwaka na khukuza olawa ojooosa okulaathayini ya Siloowe. Miiyo khulawa khupoosa apha kinooona.”

<sup>12</sup> Yo khumuuzela yoori: “Ori vayi mwinyi aya oto?” Mwinyi otule khujipu yoori: “Akijuweeni.”

*Mafwarizeewu animuuzela nanhooni*

<sup>13</sup> Khuthuuliwa mwinyi otule ahaari woonaaye khulawaniwa wa mafwarizeewu. <sup>14</sup> Siikhu Yinsa eetheyiyeeyo mattophe khufunulana maasho a mwinyi otule, yaari Saapatu. <sup>15</sup> Aphano mafwarizeewu khumuuzela theenya mwinyi otule nanna awahiyeego wooma. Mwinyi otule khujipu yoori: “Ye eettiye weethaya mattophe khuttha mmaasho mwaka miiyo khulawa khupoosa, apha kinoona.”

<sup>16</sup> Mafwarizeewu akina khulupa yoori: “Mwinyi oto khahiyio wa Nluku, maana khanshitahi Saapatu.” Akina aya khusala oozela yoori: “Natwampi onretta nanna-ni alama nkhama epo zootkinisa?” Attaaphale khupuwavo ohisiilani.

<sup>17</sup> Khurutela omuuzela otule ahaariwoonaaye yoori: "Khi weeyo ontela olupa niini monkoni wa oto aya, maana oofunula maasho awo?" Mwinyi otule khujipu yoori: "Ye napiyu."

<sup>18</sup> Mayaahuuti khaari okhupalela yoori ye khaari woonaka apha ti anwahaaye woona. Tiito khukhueliwa apapaze. <sup>19</sup> Khuwoozela yoori: "Otu mwanenu othuutu mwaari onlupaaye yoori avokoliwa woohooni? Khi nanna-ni anoonaavo nasaapi ti?"

<sup>20</sup> Apapaze khujipu yoori: "Fweeyo ninjuwa yoori otu mwaneththu na avokoliwa ari woohooni; <sup>21</sup> ila khanijuweeni nanna oniyeezo nasaapi eti na ntthu anfunuliyeyo maasho khaninjuweeni. Mwimuuzele mweenyewe, hirimu eto ariina, onwahi onlupa." <sup>22</sup> Apapaze aajipwiye toowo mwaasa wa owoova mayaahuuti; maana eettie olupa yoori otule anttelaaye olupa yoori Yinsa ti Al-Masiihu, ontta wiikariwa nsinakooka. <sup>23</sup> Tiito apapaze alupiyeyo yoori: "Khwa hirimu eto ariina, mwimuuzele mweenyewe."

<sup>24</sup> Khunkhueliwa swaafu ya phiiri mwinyi otule ahaari woonakaaye khumuza yoori: "Olaphe khwa Nluku na olupe haakhi. Maana najuwa yoori mwinyi aya oto natwampi."

<sup>25</sup> Mwinyi otule khujipu yoori: "Nkhama natwampi miiyo akijuweeni; eththu kinjuwaaye ti yoori miiyo akaari woona ila apha kinoona!"

<sup>26</sup> Khumuuzela theenya yoori: "Ooretela niini? Ama oofunula toovi maasho?"

<sup>27</sup> Mwinyi otule khujipu yoori: "Miiyo kawuuzani! Mweeyo khuhik-isilezi. Mwaasa niini mwintakhelaaye osiila theenya? Na-mweeyo mwintakhala mwiye anakhiyoni awe?"

<sup>28</sup> Aphano khuntukhana na khulupa yoori: "Nakhiyoni awe ti weyo! Fweeyo na anakhiyoni a Munsa! <sup>29</sup> Fweeyo ninjuwa yoori Nluku attakhula na Munsa; ila mwinyi oto fweeyo wala khaninjuwa ohali alankhiyewo."

<sup>30</sup> Mwinyi otule ahaari woonakaye khujipu yoori: "Eto eththu yootikinsia! Mweeyo khamwinjuwa ohali alankhiyewo, ila akifunula maasho miiyo. <sup>31</sup> Ninjuwa yoori Nluku khaninsileza natwampi; ila olilha toowo, nkhamma ntthu onimoova Nluku na khusala aretta matakhele awe, oto Nluku ontta onsiila. <sup>32</sup> Tokhiya olumwenku wumpiwe khina hatha ntthu mmote ana siile yoori maasho a ntthu woovokoleliwa ohooni afunuliwa. <sup>33</sup> Eriwaka mwinyi oto khaari wa Nluku, khaari owahi oretha hatha eththu."

<sup>34</sup> Mayaahuuti khunjipu yoori: "Weeyo wavokoliwa ntwampi; onaaye makhaamu oonisomisa fweeyo?" Attaaphale khumwiikara.

### *Ohooni wa nroho*

<sup>35</sup> Yinsa khusiila yoori mwinyi otule eekariwa nsinakooka. Khulankha olawa omweekesa nonsikana khumuuzela yoori: "Weeyo oninkhupali Mwaana wa Pinaatamu?"

<sup>36</sup> Ye khujipu yoori: "Mbwana, paani oto aya yoori na miiyo kinkhupali?"

<sup>37</sup> Yinsa khumuza yoori: "Weeyo wamoona ti othuutu ont takhulanayaye."

<sup>38</sup> Aphano mwinyi otule khulupa yoori: "Oo Mbwana, kookhupali!" Khunkokhorela.

<sup>39</sup> Yinsa khuri: “Miiyo kata voolumwenku apha oteela ophuka, na yoori apale ahinoonaaye oone, apale anoonaaye azukuluwe eeye oochooni”.

<sup>40</sup> Mafwarizeewu akina aya aari attaaphale nonsila alupaka mattakhuzi apale khumuuzela yoori: “Talili na-fweyo khaninoona?”

<sup>41</sup> Yinsa khuwaajipu yoori: “Eriwaka mweeyo mweettiyе wiiya woohooni, khamwaari wiiyana paathwili ya twampi; ila apha wiiya mwinlupa yoori mwinwahi woona, paathwili yenu nalelo mwinaaye.”

## 10

### *Yinsa nshuki wookhaamili*

<sup>1</sup> “Miiyo kiniwuuzani khweele yoori: Otule ahinviraaye vanlako wa nzizi la pwittipwithi, ila khweetta wawiirukhelamo, oto nantarawu na nazompere. <sup>2</sup> Otule anviraaye vanlako, oto nshuki wa pwittipwithi. <sup>3</sup> Amana ataaka oto aya, namweekesela onttta ofukula nlako na pwittipwithi zintta osiila huula yawe na ye onttta okhuwela wakhula moote na nzina laya asarulelaka vaje. <sup>4</sup> Paata ya osarula zooshi epile ziiyiyeyo zawe, onttta olokozela, khusala zinlotta maana zinjuwa huula yawe. <sup>5</sup> Ila khazinlawa onlotta ntthu woohijuweyi: zinintthira oto aya, maana khazinjuwa huula yawe.” <sup>6</sup> Yinsa awooziyе nlikaniso opo, ila yo khuhiveeleyi maana a epile aari owoozaaye.

<sup>7</sup> Yinsa khurutela owooza theenya yoori: “Miiyo kiniwuuzani khweele yoori: Miiyo ki nlako wa pwittipwithi. <sup>8</sup> Ooshi apale atiiyeyo kihinate, manantarawu na anazompere, ila pwittipwithi khuhivaasiili. <sup>9</sup> Miiyo ki nlako; otule anviraaye khwa miiyo onttta wuusurukha. Na onaaye ruhusa ya ovira khusaruwa na onsicana nnyepu. <sup>10</sup> Nantarawu onteela wiiya, wuula na otapanya; ila miiyo kata yoori mwiyyane ohaayi wawaatta na woolikana.

<sup>11</sup> Miiyo ki nshuki wookhaamili. Nshuki wookhaamili onleva ohaayi awe mwaasa wa pwittipwithi zawe. <sup>12</sup> Namapokhera, khahiyо nshuki wa pwittipwithi na khahiyо mweenyewe, amana oona miiji zitaaka, onttta otthira khulikha pwittipwithi ottho. Aphano miiji onttta wiikarisa pwittipwithi zimwazeye. <sup>13</sup> Ye onttta otthira maana onttta opokhera na khanjali pwittipwithi zaya.

<sup>14</sup> Miiyo ki nshuki wookhaamili; kinjuwa pwittipwithi zaka na yo zinikijuwa, <sup>15</sup> ethiipo Paapa anikijuwaaye na-miyo kininjuwa Paapa; na kininkha ohaayi aka pwittipwithi zaka. <sup>16</sup> Kinaaye theenya pwittipwithi kiina zihimo mmwizizi mphu. Epo enikihithajiya weettela kikusanye na epi ziiye liphanko limote na nshuki mmote na epo zinteela osiila huula yaka. <sup>17</sup> Tiito Paapa onikipheta, maana miiyo kininkha ohaayi aka yoori kipwekherele opheya. <sup>18</sup> Khina anikinyakanyaaye, ila miiyo kininkha khwa matakhele aka ooshi. Kinaaye ruhusa ya winkha na othuula. Oruma opo kapokhera wa Paapa.”

<sup>19</sup> Mwaasa wa mattakhuzi atthaapo, mayaahuuti khurutela waawanyeya theenya. <sup>20</sup> Akinoko aari olupa yoori: “Ye onaaye masheethwani na ona tuutu! Mwininsiilezela-ni?” <sup>21</sup> Akina khusala alupa yoori: “Nanna nkhamma eto yoottakhula khahiyо ya namasheethwani; sheethwani khanwahi ofunula maasho a ntthu woohooni!”

*Mayaahuuti khaninkhupali Yinsa*

<sup>22</sup> Waari wakathi wa mwiita Yeruzaleemu laariwo njampo la winkhelela. <sup>23</sup> Yinsa aari ovira Nlivenu la Seleyimaana vaje wa Nnyupa Woosifwiwamo. <sup>24</sup> Aphano mayaahuuti khunzukulela khusala amuuzel a yoori: “Onnilikhela mishikili mpakha lini? Onuuze saana nkhamma weeyo o Al-Masiihu?”

<sup>25</sup> Yinsa khuwaajipu yoori: “Miiyo kawuuzani, ila mweeyo khuhikhupali. Khaazi kinkholaa zo miyo khwa nzina la Paapa enhakikhi monkoni waka miiyo. <sup>26</sup> Ila mweeyo khamwinkhupalela maana khayi mwa pwittipwithi zaka. <sup>27</sup> Pwittipwithi zaka ensiila huula yaka na miiyo kinjuwa na enikilotta. <sup>28</sup> Miiyo kininkha ohaayi wa mileele; wala khazimpwethaya na khaavo anttelaaye olazamo mmakhono mwaka. <sup>29</sup> Paapa otu akinkhiyeeyo epi, nwulweene zayita vitthu zooshi, na mmakhono wa Paapa khina anwahaaye olazamo. <sup>30</sup> Miiyo na Paapa na amote.”

<sup>31</sup> Mayaahuuti khuthuula mawe opheya yoori anvonye, <sup>32</sup> Yinsa khuwooza yoori: “Miiyo karetta vakatthi venu vitthu zawaatta zooshapweya Paapa akirumiyeeyo oretta, khwa zooshi ti tiivi mwintakhelaaye okivonyela?”

<sup>33</sup> Mayaahuuti khunjipu Yinsa yoori: “Khahiyo mwaasa wa khaazi zooshapweya ninttelaaye wuupwechela, mwaasa wa okufuru, maana weeyo o pinaatamu, ila onjirettia wiyya Nluku.”

<sup>34</sup> Yinsa khuwooza yoori: “Yaatikhiwa nkano mwenu na ‘Miiyo khulupa yoori: Mweeyo mwa miluku!’ <sup>35</sup> Nkhama ye awaatthaja o miluku apale liwaateliyeeyo ntakhuzi la Nluku, (na zawaatikhiwa ttakatthiifu khazinfujiwa), <sup>36</sup> aphano otule Paapa anttakatthisiyeeyo na khumperekha voolumwenku, mwinri: ‘Weeyo onamakufuru,’ mwaasa wa niini kilupaka yoori ‘Ki mwaana wa Nluku?’ <sup>37</sup> Amana kihikholi khaazi ya paapa, khamwinkikhupalela miiyo. <sup>38</sup> Ila nkhamma kinretta, hatha nkhamma khamwinkikhupali miiyo, mwikhupalele khaazi ethiito, yoori mwiwahi ojuwa na oweeleyani yoori Paapa ori vamote na miiyo na miiyo kiri wa paapa.” <sup>39</sup> Khusala atakha onkhola theenya, ila Yinsa khusuruwamo mmakhono mwaya.

<sup>40</sup> Aphano Yinsa khulokha opheya muuttho Yorotaani khulawa mpakha puuro etile Yaahaya aari owoosaawo atthu, eettaka waazaru khaazi yawe. Khwiikhala ottuukho. <sup>41</sup> Atthu awaatta khulawa mpakha aphale aariivo khusala alupa yoori: “Yaahaya khaarettiye alama za minjuza, ila zooshi epile aari olupaazo monkoni wa mwinyi otu zaari za haakhi.” <sup>42</sup> Attaaphale atthu awaatta khumkhupali Yinsa.

## 11

### *Ofwa wa Laazaru*

<sup>1</sup> Aarivo mwinyi mmote aariwitthiwaaye Laazaru ye aari wa nti wa Betaaniya, ottuukho aari wiikhalaawo Mariyamu na twiilye Maarata. Laazaru otule khwiiya nlwele. <sup>2</sup> Mariyamu otu, nlupuwe Laazaru aari olwaaziwaaye, ti otule aavaziyeeyo mafuttha oonukhela moolu a Yinsa khukukuttha na nyuuli zawe. <sup>3</sup> Alupuwe khunruma ntthu olawa omuuza Mbwana yoori: “Mbiana, jiraani awo nlwele.”

<sup>4</sup> Wakathi Yinsa asiiliyeovo vitthu epile khuri: “Olwele aya opo khunlawa omuula, pi wa siifwa ya Nluku, yoori Mwaana wa Nluku asifwiwe khwa olwele otthuupo.” <sup>5</sup> Yinsa aari omphetta Maarata, Mariyamu na

Laazaru.<sup>6</sup> Ila wakathi asiiliyeevo olwele opule aarupaziyewo siikhu piiri okhule aariwo.

<sup>7</sup> Nawiisha khuwooza anakhiyonи awe yoori: “Nlaweni theenya nirutele Yudeya.”

<sup>8</sup> Anakhiyonи khulupa araka: “Rabi, onfwahamu yoori khwa siikhu vattithiiru mayaahuuti aari otakha wuuvonya, apho onrutela ottuukho?”

<sup>9</sup> Yinsa khujipu araka: “Nthana khuna wakathi khumi na miwiri? Ntthu amana eettetta nthana khankwakwattuwa, maana onoona nuuru ya olumwenku otthuupu.<sup>10</sup> Ila amana ntthu eettetta osikhu onta okwakwanntuwa maana khiniyyavo nuuru.”

<sup>11</sup> Paata ya olupa toowo, khurutela theenya araka: “Swaahipu eethu Laazaru onta olala, ila miiyo kineetta ottuukhu kanlanse.”

<sup>12</sup> Aphano anakhiyonи awe khumuuzu theenya yoori: “Mbwana, nkhamma ye onta olala, onvona.”<sup>13</sup> Ila Yinsa aari olupa yoori Laazaru afwa. Ila yo aari waakanyera yoori aari olupa osikizi paasi.

<sup>14</sup> Aphano Yinsa khuwooza saana yoori: “Laazaru afwa,<sup>15</sup> ila Miiyo ki woofurahi mwaasa woohiilo okhuwaya, maana toowo mweeyo mwinttela okikhupali. Nlaweni mpakha owawe.”

<sup>16</sup> Aphano Tome aari wiitthiwaaye Maphapo khuwooza anakhiyonи azaawe: “Nlaweni nafwe vamote na-ye.”

### *Yinsa oniwaathuza nafusi alupuwe Laazaru*

<sup>17</sup> Wakathi Yinsa afiyyevo ansikaniye Laazaru azikhiwe ziviriyevo siikhu nne.<sup>18</sup> Betaaniya waari kharipu kiyasi ya mwentto wa phiima alufu ttatthu olankha Yeruzaleemu,<sup>19</sup> na mayaahuuti enkeene aalawiye onthotola Maarata na Mariyamu na onzuru mwaasa wa opwetheyiwa ti nlupwaaya.<sup>20</sup> Maarata noosiila yoori Yinsa onta ota khunthepeeza, ila Mariyamu aasaliye eekhaliye onti.

<sup>21</sup> Maarata khumuuzu Yinsa yoori: “Mbwana, eriwaka waario, nlupwaaka khaari ofwa.<sup>22</sup> Ila theenya kinjuwa yoori hatha nkhamma nasaapi eti, Nluku oniwinkha wakhula etile oninvekelaaye.”

<sup>23</sup> Yinsa khumuuzu: “Nlupuwo onteela osisimuwa.”

<sup>24</sup> Maarata khuri: “Miiyo kajuwa yoori onsisimuwa va osisimuliwa wa siikhu ya mwiisho.”

<sup>25</sup> Yinsa khulupa araka: “Miiyo ki osisimuwa na ohaayi; otule anikaaminaaye miiyo hatha nkhamma eetta ofwa oniiya ohaayi,<sup>26</sup> na wakhula otule ari haayi na khukaamini miiyo khanfwaru. Weeyo onkhupali epo zaya?”

<sup>27</sup> Ye khujipu yoori: “Miiyo, Mbwana kinkhupali yoori o Al-Masiihu, mwaana wa Nluku, aari weettelaaye ota voolumwenku.”

<sup>28</sup> Paata ya olupa mattakhuzi apale, khulawa owawe na khunkhuwelela Mariyamu othetekeli khumuuzu yoori: “Oo, Mwaaliimu otu ari apha onuukhulwa weeyo.”<sup>29</sup> Wakathi Mariyamu asiiliyeevo mattakhuzi apale, khulankha nasaapiru na khulawa okuthanana Yinsa.<sup>30</sup> Yinsa nalelo aari ahinafiye oluwanu, ila aari ottuukhule Maarata eetteliyeyo onkutthanananawo.<sup>31</sup> Mayaahuuti aari nnyupa na Mariyamu, aateliyeyo onzuru, khusala oopuwela yoori ye aari weetta ovilalo yoori alile ottuukho. Na-yo khulankha khusala anlotta.<sup>32</sup> Wakathi Mariyamu afiyyevo aphale aariivo Yinsa,

noomoona khunkokhorela moolu awe khumuuba yoori: "Mbwana, eriwaka waari attaapha nlupwaaka khaari ofwa."

<sup>33</sup> Yinsa amooniyeevo eettaka olila na mayaahuuti apale aataniyeyo, ye khwiya wawantipweya nroho mwawe venkivene na wooshukulikha.

<sup>34</sup> Ye khuuzela yoori: "Mwanzikha vayi?" Yo khujipu yoori: "Mbwana, ote omoone."

<sup>35</sup> Yinsa khulila.

<sup>36</sup> Mayaahuuti khulupa yoori: "Mmoone nanna aari omphetaazo!"

<sup>37</sup> Akina khusala alupa yoori: "Otu aari owaavonisa apale ohooni, khaari owahi oretta etthu Laazaru khuhifwi?"

#### *Yinsa oninsisimula Laazaru*

<sup>38</sup> Yinsa nalelo ari woohuzunikhka khulawa ovilalo. Yaari likurakuza laattiyelelaniweeyo liwe liwululene va nlako vaya.

<sup>39</sup> Yinsa noofiya khulupa yoori: "Mwilazevo liwe nttho." Maarata khulupa araka: "Leelo ona siikhunne; aaza onukha."

<sup>40</sup> Yinsa khunjipu yoori: "Akaawuuziye yoori amana okhupali ontta woona siifwa ya Nluku?"

<sup>41</sup> Aphano yo khulazavo liwe ntthile. Yinsa khweekesa otulu khulupa yoori: "Paapa, miiyo kinuushukhurwela mwaasa wookisiila. <sup>42</sup> Miiyo kinjuwa yoori weeyo onikisila wakathi wooshi, ila mwaasa wa khuntti eti ya atthu apa ariivo ti eto, kinlupaaye toowo yoori yo apatthe okhupali yoori weeyo ti okiperekhiyeyo." <sup>43</sup> Paata ya olupa toono, khukhuwa venkivene araka: "Laazaru, osaruvele oje okhuno!" <sup>44</sup> Otule aafwiyeeyo khusaruwa, moolu awe na makhono awe ari oopachiwa na tarapu na wuuso awe na makhono awe khuzukulelisuwa. Aphano Yinsa khulupa yoori: "Mwintaphule tarapu eto mwinlikhe alawe."

#### *Shawuri yoori ooliwe Yinsa*

<sup>45</sup> Mayaahuuti enkeene alawiyeeyo onthotola Mariyamu, ooniyeeyo vitthu epile arettiyeeyo Yinsa, yo khunkhupali. <sup>46</sup> Ila akina khulankha olawa owooza mafwarizeewu monkoni wa epile Yinsa arettiyezo.

<sup>47</sup> Aphano mahaakhimu a tiini na mafwarizeewu khuwaakhuwela mashawuriya khusala awooga yoori: "Niri je? Okho owaakho mwinyi oto anrettaaye alama zawaatta za minjusa. <sup>48</sup> Amana ninlikha ethiipo, atthu ooshi antta onkhupali na antta ota arooma aninyakanye puuro yeetthu ttakathiiifu na nti etthu."

<sup>49</sup> Aphano mmote wa-yo, aari wiithiwaaye Kayifwa, aari haakhimu nwulu wa tiini wa mwaakha aya opule, ye khulupa yoori: "Mweeyo khamwinjuwa hatha etthu! <sup>50</sup> Khamwinjuwa yoori afwataali ofwa ntthu mmote awaafwelaka atthu ooshi zayita oligha khapila zooshi waashikha." <sup>51</sup> Wakathi aya opule Kayifwa khaari ojilupa mweenyewe. Ila mwaasa wa yoori ye aari haakhimu nwulu wa tiini mwaakha aya opule, etta ohupiri yoori Yinsa aari oteela ofwela khapila ya mayaahuuti, <sup>52</sup> khahiyo paasi khwa khapila ya mayaahuuti, ila theenya yoori awaakusanye khwa mwiili mmote aana a Nluku apale amwazeyiyeyo. <sup>53</sup> Waaza siikhunethiitile khusilana omuula.

<sup>54</sup> Khwa ethiito Yinsa khuhissala ajithoonyeza vakatthi wa mayaahuuti, khulawa nti waattameliyeeyo n'yaara waari wiithiwaaye Efwarayimu. Khwiikhala ottuukho na anakhiyoni awe.

55 Yaarettiye esaleelaka ofiya siikhu ya Paashikowa wa mayaahuuti, atthu enkeene a nti aya opule aalawiye Yeruzaleemu olawa ojitiwa-haresha ehinafiye siikhu ya Paashikowa.<sup>56</sup> Yo aari omweekesa Yinsa oozelanaka ari vaje wa Nnyupa Woosifwiwamo: “Nkahayani niri toovi? Talili onta vanjampo?”<sup>57</sup> Ila mahaakhimu a tiini na mafwarizeewu aarumiye yoori, amana ntthu amoona Yinsa vahali ariivo, awooze, yoori yo alawe ankhole.

## 12

*Yinsa onvaaziwa mafuttha oonukhela nti wa Betaaniya*

<sup>1</sup> Siikhu sitha ehinafiye siikhu ya Paashikowa Yinsa eettiye Betaaniya, ottuukho aari wiikhalaawo Laazaru, otule Yinsa ansisimuliyeeyo muufwa. <sup>2</sup> Ottuukho khwiipikheliwa etthu woojiwa ya osikhu; Maarata khusala arumeya, Laazaru eekhaliye vameeza vamote na Yinsa. <sup>3</sup> Aphano Mariyamu khuthuula suupha ya mafuttha oonukhela awaatta nzurukhu, khuttukunttela moolu a Yinsa khusala akukuttha na nyuuli zawe. Nnyupa wooshimo khwiitaalamo arufu ya mafuttha apale.

<sup>4</sup> Aphano mmote wa anakhiyon i awe, Yuuda Eshikariyoote othuto aari weettelaaye onzukuluwela khulupa yoori: <sup>5</sup> “Ahoozanyisiwe mafuttha aya apo nzurukhu aya enkhiwa asikhini? Nzurukhu aya yaari phakari ya nakhaazi khwa mwaakha mmote!” <sup>6</sup> Ye khaalupiye toowo mwaasa wa wiiyana huruma na asikhini ila mwaasa wa wiiya nantarawu; na tiye aari opwehaaye nfukho wa nzurukhu, amana otthiwamo eetta olazakamo. <sup>7</sup> Yinsa khunjipu araka: “Onlikhe khwa heeri! Yoori apwehe mafuttha apo mpakha siikhu ya ozikhiwa waka. <sup>8</sup> Asikhini ari vamote na mweeyo mpakha mileele, ila miiyo khanniiya vamote mpakha mileele.”

<sup>9</sup> Paata ajuwiyeovo yoori Yinsa aari attaaphale, khuntti khuluyeeene ya mayaahuuti khuta, woohiiyi mwaasa wa Yinsa paasi, ila theenya yoori amoone Laazaru, otule ansisimuliyeeyo muufwa. <sup>10</sup> Khwa ethiipo mahaakhimu a tiini khuwaza shawuri zoomuula Laazaru naye;<sup>11</sup> maana atthu enkeene mwaasa wa ye eetta ophakuwanana mayaahuuti na khusala ankhupali Yinsa.

*Ovira wa oshintta*

<sup>12</sup> Siikhu ya phiiri, khuntti khuluyeeene ya atthu yaatiyeewo onjampo khusiila yoori Yinsa ontta ota Yeruzaleemu. <sup>13</sup> Khuthuula virapi za mirita, khusala alawa onkutthanana ye, anyakulaka araka:

“Ozaana!

Woottitthimisiwa ti otule atiiyeeyo khwa nzina la Mbwana, Woottitthimisiwa ti Mfwalume wa Ezirayilu!”

<sup>14</sup> Yinsa ampatthiyeevo mwaana wa puuru khupakhira attaapho, nkhamma ethiipo yaatikhieezo yoori:

<sup>15</sup> “Atthu a Yeruzaleemu,  
mwihoove  
mfwalume enu onta  
aapakhiriye va mwaana wa puuru!”

<sup>16</sup> Omwanzo anakhiyoni awe khazaaweleyiye epo za; ila wakathi aaziyeovo osifwiwa Yinsa yo eetta wuupuwela yoori etthu yaya eto yaatikhiye monkoni wa ye, na khweele khurettikhana ethiipo.

<sup>17</sup> Atthu apale aariina wakathi opule anrumiyeyo Laazaru osaruwamo nkhapuri khusisimuwa muufwa, yo khuvira alawelaka oshaahiti vitthu epile zaarettikhaniyeoyo. <sup>18</sup> Mwaasa wa ethiito, khuwaakusanya atthu awaatta olawa okutthanana, maana eettiye osila elupiwaka yoori Yinsa aarettiye alama eto. <sup>19</sup> Aphano mafwarizeewu khusala oozana yoori: “Khanipattheenivo etthu. Nkoonani olumwenku wa atthu onnta onlottelela.”

*Yinsa onlupa ofwa wawe*

<sup>20</sup> Khwa atthu apale aalawiyeeyo omwaaputu Nluku onjampo la Paashikowa akina aari akereku. <sup>21</sup> Yo, khulawa ottakhulana Filiipe aari wa nti wa Betezayiita ya Kalileya, khunvekela araka: “Mwinyi, nintakha omoona Yinsa”. <sup>22</sup> Filiipe khulawa khumuuzza Antere; aphano yo oowiiri khumuuzza Yinsa.

<sup>23</sup> Yinsa khujipu yoori: “Wafiya wakathi woosifwiwa Mwaana wa Pinaatamu. <sup>24</sup> Miyo kiniwuuzani khweele yoori, amana phunje ya tiriku ehikweli vathi na ehifwi nalelo eniiya phunje paasi, ila amana efwa empuwisa mishumo zawaatta. <sup>25</sup> Otule amphetaaye ohaayi awe, onteela ompwetheya; ila otule antarawaaye ohaayi awe khwa voolumwenku apha, onthokorela ohaayi wa mileele. <sup>26</sup> Otule antakhaaye okirumeyela, akilotte; na puuro kiniyaavo na karumeya aka oniiya attaapho. Otu anikirumeyelaaye, Paapa onteela onttithimisa.

<sup>27</sup> Nasaapi eti rooho yaka ti yoohankayikha. Kiri niini? Kiri paapa, okuusuru wakathi opu wa ohoowa waka? Wala! Maana miyo kateela ethiito. <sup>28</sup> Paapa osifu nzina lawo!” Aphano khuta huula yoolankha pinkuuni yaari olupaaye yoori: “Koosifu na kinteela wuusifu opheya.” <sup>29</sup> Khuntti etile yaariivo noosiila aariye taari eto; akina khusala alupa yoori: “Nlayikha ti lattakhulaniyeoyo Yinsa.”

<sup>30</sup> Yinsa khulupa yoori: “Huula eto khiteeni mwaasa wa miiyo yata mwaasa wa mweeyo. <sup>31</sup> Wafiya wakathi woophukiwa olumwenku opu, nasaapi eti onttela wiikariwa mfwalume wa olumwenku opu. <sup>32</sup> Ila miiyo amana kilansiwa vathi apha kintta ojitiisela atthu ooshi.” <sup>33</sup> Ye aalupiye mattakhuzi apa yoori athoonyeze nanna aari weettelaazo ofwa.

<sup>34</sup> Khuntti etile khunjipu yoori: “Fweeyo ninsiilaka kano elupaka yoori: Al-Masiihu ona yawiyyavo khwa mileele, khi weeyo onlupa toovi yoori Mwaana wa Pinaatamu ona ya olansiwa? Mwaana wa Pinaatamu aya oto ti paani?”

<sup>35</sup> Aphano Yinsa khuwooza yoori: “Nuuru eri vamote na mweeyo khwa wakathi vattithiiru. Mweettette wakathi otthuupu mwiriinaavo nuuru, yoori yiiza ehuusikaneni, maana nthu aneettettaaye n'yiiza khanjuwa ohali aneettaawo. <sup>36</sup> Wakathi otthuupu mwiriinaavo nuuru mwikhupalele nuuru ethiito yoori mwiretteye wiiya aana a nnuuru.” Paata ya olupa toowo Yinsa khulaavo khujivitha khuhisala amoona.

*Ohikhupali wa mayaahuuti*

<sup>37</sup> Hatha nkhama Yinsa eettiye owaarettela alama epile zooshi za minjuza vakatthi vaya, khankhupaleliye, <sup>38</sup> yoori limariseleye ntakhuzi la napiyu Ezaaya, linraaye:

“Mbwana, paani akhupaleliyeeyo  
tafusiiri yeetthu?  
Na paani athoonyeziweeyo  
nkhono wa Mbwana?”

<sup>39</sup> Khwa ethiito yo khaari oteela okhupali, nkhama etthiipo aalupiy-eeyo Ezaaya theenya yoori:

<sup>40</sup> “Oola maasho aya  
na oomisa rooho zaya,  
yoori ahoone na maasho aya,  
eweeleya nroho mwaya  
aruti kiwaavonisa.”

<sup>41</sup> Ezaaya aalupiye mattakhuzi apa maana ooniye siifwa ya Yinsa na khulupa monkoni wa ye.

<sup>42</sup> Nakatalikha, attunkhulu awaatta a mayaahuuti khunkhupali Yinsa. Ilia mwaasa wa mafwarizeewu, khuhisala atukhuru amini yaya, na woova wiikariwa nsinakooka. <sup>43</sup> Maana yo waari owaatuvela venkivene osifwiwa pi attu zayita osifwiwa ti Nluku.

<sup>44</sup> Aphano Yinsa khulupa woosileyavo araka: “Otule anikaaminaaye miiyo, khanikaamini miiyo paasi, ila otule akiperekhiyeeyo. <sup>45</sup> Na otule anikoonaaye, amoona otule akiperekhiyeeyo. <sup>46</sup> Miiyo kata voolumwenku nkhama nuuru, yoori wakhula otule anikikhupalaaye miiyo, ahijileme n'yiiza.

<sup>47</sup> Amana ntthu asiila mattakhuzi aka na khuhishututeli, miiyo akin-inphuka. Maana miiyo akaateeliye ophuka olumwenku ila wuusuru olumwenku. <sup>48</sup> Owaapho namaphuka wa otule anikikatthalaaye na ahinkhupalelaaye mattakhuzi aka; ntthu laka ntthinttho kinlupiy-eeyo ti linttelaaaye omphuka siikhu ya mwiisho. <sup>49</sup> Akinjilupa miiyo, ila Paapa otu akiperekhiyeeyo ti akirumiyeeyo eththu yoolupa na olaleya. <sup>50</sup> Miiyo kinjuwa yoori oruma wawe ohaayi wa mileele. Nakatalikha etile akirumiyeeyo paapa kinlupa ethiito.”

## 13

*Yinsa onoosa moolu a anakhiyoni awe*

<sup>1</sup> Esaleelaka ofiya siikhu ya Paashikowa, Yinsa aajuwiyiye yoori wafiya wakathi wa ye olilha olumwenku opu eette wa Paapa, khuwaapheta apale awe aari voolumwenku, awaaphetiye mpakha mwiisho.

<sup>2</sup> Wakathi wa eththu-yoojiwa ya osikhu, sheethwani aarettiye ahatiye rooho ya Yuuda Eshikariyooete mwaana wa Simawu, yoori anzukuluwele, <sup>3</sup> Yinsa aajuwiyiye yoori Paapa vitthu zooshi attha mmakhono mwawe, na alankhiye wa Nluku na aari orutela wa Nluku, <sup>4</sup> khulankhavo vameeza aphale, khuvula ajapi yawe khuthuula epakuso khujifukelela n'yuunu. <sup>5</sup> Khuttha maati mpasiya khwaaza woosa moolu a anakhiyoni awe awaapakusaka na epakuso etile aafukeleliyeeyo n'yuunu mwawe.

<sup>6</sup> Khufiya zwaamu ya Simawu Pheeturu, othuuto aamuziyeeyo yoori: “Mbwana, ontakha woose moolu aka?”

<sup>7</sup> Yinsa khunjipu yoori: “Eti kinrettaaye apha nasaapi khiniweeleya; ila owulu-othana enteela oweeleya.”

<sup>8</sup> Pheeturu khulupa yoori: "Wala! Khinretteya weeyo woosa moolu aka."

Yinsa khunjipu araka: "Miiyo amana kihwoosi, weeyo khunteela wiiyana phantte na-miyo."

<sup>9</sup> Simawu Pheeturu khulupa yoori: "Mbwana, khayi moolu aka paasi na theenya na makhono aka na eeshwa yaka!"

<sup>10</sup> Yinsa khujipu: "Ntthu owiyeyo eninhithajiya woosa moolu paasi, maana mwili awe wooshi pi woottakattha. Mweeyo mwa oottakattha, ila khahi mooshi." <sup>11</sup> Maana ye aari onjuwa ntthu aari weettelaaye onzukuluwela; ti eto aalupiyeeyo yoori: "Khayi mooshi mwiiyiyeeyo oottakattha."

<sup>12</sup> Paata ya wiisha owoosa moolu, khuthuula ajapi yawe khuwala khurutela aphale eekhaliyeovo. Aphano khuwoozela yoori: "Eniweleyani vitthu epi khuuretteliyeenini?" <sup>13</sup> Mweeyo mwikiitthaka miiyo mwinri 'Mwaaliimu' na 'Mbwana,' mwina shariya, miiyo ki othuuto. <sup>14</sup> Aayo, pi ethiipo miiyo kiiyiye Mbwana na Mwaaliimu enu, kawoosani moolu, na-mweyo theenya mwina ya woosana moolu mmote na nza-awe. <sup>15</sup> Miiyo kawinkhani nthoonyezo yoori ethiipi kirettiyeozyo namweyo mwisala mwiretta ethiipi. <sup>16</sup> Miiyo kiniuuuzani khweele yoori, khaavo karumeya wonziti mbwana awe, nkhama ethiipo nanhupi khaninziti otule anrumiyeyo. <sup>17</sup> Nkhama mwinjuwa vitthu zaya epo, amana mwiretta, mwaparikhiiyiwa.

### *Yinsa onlupa yoori onlawa azayiniwe*

<sup>18</sup> Akinuulupani mooshi, kiniwaajuwu apale kiwaathawuliyeeyo. Ila epo enttela orettikhana yoori emariseleye epile zilupiyeeyo za-waatikhiwa ttakathiifu, yoori: "Othuuto kimeelaniyeeyo phaawu yaka akizukuluwela."

<sup>19</sup> Kinaaza nasaapi ethiiti owuuzani ehinarettikhane, yoori amana erettikhanaaka mweeyo mwikhupali yoori Miyo Ti Miiyo. <sup>20</sup> Miiyo kiniuuuzani khweele yoori: Otule animpokherelaaye otule kininrumaaye onikipokherela miiyo; na anikipokherelaaye, onimpokherela otule akirumiyeeyo."

<sup>21</sup> Paata ya olupa toowo, rooho yawe khwiyya yawaantipweya, khutukhuru alupaka yoori: "Miiyo kiniuuuzani khweele yoori, ntthu mmote wa mweeyo onlawa akizukuluwele."

<sup>22</sup> Anakhioni khusala eekesana mmote na nzaawe ahinjuwaka paani aninlupaaye. <sup>23</sup> Mpavu mwawe eekhaliyemu nakhiyonu mmote otule aari omphetachaaye. <sup>24</sup> Simawu Pheeturu khunttheela alama nakhiyonu othuutule; yoori amuuzele Yinsa anlupe oto ari weettelaaye onzukuluwela.

<sup>25</sup> Aphano nakhiyonu otule khwiinamela vamweyo wa Yinsa kumuuzela yoori: "Mbwana, paani oto aya?"

<sup>26</sup> Yinsa khunjipu yoori: "Ti otule kinttelaaye omwinkha pattaasu ya phaawu kinaanisiye n'yopo." Aphano khunaanisa pattaasu ya phaawu, khumwinkha Yuuda Eshikariyoote, mwaana wa Simawu. <sup>27</sup> Paata ya Yuuda orafuna phaawu etile, Epiliisi eetta omweetta. Yinsa kumuza yoori: "Etthu ontakhaaye oretta, orette nasaapi." <sup>28</sup> Ila apale aari vameeza khuiivo mmote yamweliyiyeeyo mwaasa niini Yinsa aamuzeliyeeyo toowo. <sup>29</sup> Maana Yuuda ti aari opwehaaye nfukho wa nzurukhu, akina aari waakanyera yoori Yinsa amuuza olawa wuuzanya

vitthu zooretteliwa njampo, ama yoori alaze etthu awinkhe asikhini.  
<sup>30</sup> Paata ya wiisha orafuna phaawu etile, Yuuda khulankha nasaapiru. Na waari osikhu.

### *Nrumo mpheyaa*

<sup>31</sup> Wakathi Yuuda aliyeovo, Yinsa khulupa yoori: "Nasaapi Mwaana wa Pinaatamu onsifwiwa, na Nluku onsifwiwa khwa ye. <sup>32</sup> Nkhama Nluku onsifwiwa khwa ye, na-ye Nluku onsifwiwa mwanawewe khwa ye mweenyewe, na onteela osifwiwa woohirupazivo.

<sup>33</sup> Aanaaka, nalelo khwa wakathi vattithiiru kiri vamote na-mweyo. Mweeyo mwinlawa mwakeekese, ila miiyo kiniwuuzani nkhama kiwooziyeezo mayaahuuti yoori: ohali kineettaawo mweeyo khamwin-lawa. Na-mweyo enasaapi eti kiniwuuzani ethiipo. <sup>34</sup> Kiniwinkhani oruma mpheyaa kiraka: mwiphetane mmote na nzeenu. Nkhama ethiipo kuuphetiyeenini, mwiphetane mmote na nzeenu. <sup>35</sup> Khwa ethiipo atthu ooshi antta ojuwa yoori mwa anakhiyonu aka, amana mwiphetanaka mmote na nzaawe."

### *Yinsa onlupa yoori Pheeturu onteela onkatthala*

<sup>36</sup> Simawu Pheeturu khumuuzela yoori: "Ontta vayi Mbwana?" Yinsa khunjipu: "Ohali kineettaawo, weeyo khunikilotta nasaapi eti, ila owulu-othana onteela okilotta."

<sup>37</sup> Aphano Simawu khuri: "Mbwana, mwaasa wa niini kihuulottaka nasaapi? Miiyo kinleva ohaayi aka mwaasa wa weeyo!"

<sup>38</sup> Aphano Yinsa khujipu araka: "Weeyo onleva ohaayi awo mwaasa wa miiyo? Miiyo kiniwuza khweele yoori, khapula likukhuwi lihineekhe, weeyo onteela okikhana swaafu ttatthu.

## 14

### *Yinsa oniwaalipisela maaswihaapa awe*

<sup>1</sup> Mwihihankayikhise rooho zenu. Mwinkhupali Nluku, na theenya mwikikhupali miiyo. <sup>2</sup> Owawe papaaka awaakho mapuro menkeene; eriwaka khayaari ethiito, akaari owuuuzani, yoori kinttela otthenkeza puuro yenu. <sup>3</sup> Na amana kilawa kitthenkeza puuro yaya eto, kinlawa karuti kuuthulen i mweeye vamote na-miiyo attaapho kinttelaaye wiyyavo. <sup>4</sup> Mweeyo mwinjuuwawo ohali kineettaawo na tarikhi yaya."

<sup>5</sup> Khujipu Tome yoori: "Mbwana, fweeyo khaninjuwa ohali oneetaawo! Khi ninjuwa toovi tarikhi yaya?"

<sup>6</sup> Yinsa khujipu yoori: "Miiyo ki tarikhi, haakhi na ohaayi. Khina anfiyaaye wa Paapa, ahiyienee khwa miiyo. <sup>7</sup> Eriwaka khweele mwaari okijuwa, nka mwinjuwaka Paapa. Apha enasaapi eti mwininjuwa na mwaaza omoola."

<sup>8</sup> Filiipe khulupa yoori: "Mbwana, onithoonyeze Paapa, ethiito ennitosheleza."

<sup>9</sup> Yinsa khunjipu yoori: "Filiipe, kiikhaliyeezo wakathi mwinkeene na-mweyo; nalelo khunikijuwa? Otule akooniye miiyo amoona Paapa. Khi onlupa toovi yoori: 'Onithoonyeze Paapa'? <sup>10</sup> Weeyo khunkhupali yoori miiyo kiri wa Paapa na Paapa ona miiyo? Mattakhuzi apa kiniwuuzanini khahiyo aka paasi. Ila, Paapa aniikhalaaye khwa miiyo, ontha okhola khaazi yawe. <sup>11</sup> Mwikikhupali miiyo amana kilupa yoori kiri khwa Paapa na Paapa ori khwa miiyo; ama nenkawu mwikikhupali mwaasa wa khaazi epi kinkholaazo. <sup>12</sup> Miiyo kiniwuuzani khweele

yoori, otule anikikhupalaaye miiyo onkhola khaazi epi kikholiyeezo hatha okhola zooziti epi, maana miiyo kineetta wa Paapa.<sup>13</sup> Na zooshi mwinttelaaye oveka khwa nzina laka, miiyo kinretta, yoori Paapa asifwiwe khwa mwanawewe.<sup>14</sup> Wakhula etile mwinvekaaye khwa nzina laka kintta oretta.

*Yinsa onaahiti operekha Rooho Ttakatthiifu*

<sup>15</sup> Nkhama mweeyo mwinikipheta, mwinteeela oshututela oruma waka.<sup>16</sup> Miiyo kinttela onvekela Paapa yoori awinkheni Namalipisela nkina, yoori eeye vamote na-mweeyo khwa mileele,<sup>17</sup> Rooho ya okhwhee, atthu a voolumwenku ahinttelaaye opokhera, maana, khanteela woona na wala khanjuwa. Ila mweeyo mwinjuwa, maana Yo eniikhala nkatthi mwenu na enttela wiiya na-mweeyo.

<sup>18</sup> Miiyo akinuulikhani mwiri anasisa, kinlawa kooruteleni.<sup>19</sup> Khwa wakathi vattithhiiru atthu a voolumwenku khanteela okoona theenya, ila mweeyo mwinlawwa mwakoone. Mwaasa wa miiyo wiiya haayi, na mweeyo mwinlawwa mweeyane ohaayi.<sup>20</sup> Siikhu ethiito enteela oweeneyani yoori kiri khwa Paapa, mweeyo mwiri khwa miiyo na-miyo kiri khwa mweeyo.<sup>21</sup> Otule ansilaaye oruma waka na khushututela oto ti anikiphetaaye; na otule anikiphetaaye oniiya woophetiwa ti Paapa, na-miyo theenya kininpheta na kinjithoonyeza khwa ye.”

<sup>22</sup> Yuuda (nkina woohiiyi Yuuda Eshikariyoote) khuri: “Mbwana, mwaasa aya niini weeyo ontakhaaye ojithoonyeza khwa fweeyo paasi khuhijithoonyezi olumwenku wooshi?”

<sup>23</sup> Yinsa khujipu yoori: “Nkhama ntthu onikipheta, onshututela mattakhuzi aka na Paapa ontta ompheta. Paapa na-miyo nintta wiikhala na-ye.<sup>24</sup> Otule ahinikiphetaaye khanshututela mattakhuzi aka. Na nt-takhuzi mwinsiilaaye khahiyo laka, ila tthi la Paapa otule akirumiyeeyo.

<sup>25</sup> Kaari olupaka zooshi epo nalelo niri vamote.”<sup>26</sup> Ila Namalipisela, Rooho Ttakatthiifu, eto Paapa anttelaaye omperekha khwa nzina laka, onteela wuusomisani mweeyo vitthu zooshi na wuukupuselani zooshi epile kiwuuziyeenini.<sup>27</sup> Kinuulikhelani heeri, heeri yaka kiniwinkhani, ila akiniwinkhani nkhamma oninkhaazo olumwenku. Mwihi-hankayikhise rooho zenu, wala mwihooeve.

<sup>28</sup> Mwasila eti kilupiyeeyo: ‘Miiyo kintta olawa, ila kinlawa kooruteleni mweeyo. Eriwaka mwaari okipheta, mweetta ofurahi mwaasa wa miiyo weetta wa Paapa, maana Paapa akiziti miiyo.<sup>29</sup> Kiniwuuzani nasaapi eti zihinarettikhane, yoori wakathi zinttelaavo orettikhana, mweeyo mwikhupalele.<sup>30</sup> Enasaapi eti akinlawa ottakhulana mweeyo, maana mfwalume wa voolumwenku ontta ota; ye khana hatha ruhusa khwa miiyo,<sup>31</sup> nakatalikha yoori atthu a voolumwenku ojuwe yoori miiyo kininpheta Paapa, enikihithajiya oretta etile akirumiyeeyo. Lankhani, nileevo apha.”

## 15

*Nrayi wa nviteera na virapi zaya*

<sup>1</sup> Yinsa khulupa yoori: “Miiyo ki nrayi wa wuuva weekhweele, Paapa namalima.<sup>2</sup> Wakhula erapi etile eriye khwa miiyo khuhisala yiima, ye ontta oshija; na wakhula etile eniimaaye ontta okasurela yoori etepe wiima.<sup>3</sup> Mweeyo mwattakatthisiwa ti ntakhuzi kiwuuziyeenini.

<sup>4</sup> Mwijilipisane miiyo, na-miyo kintta ojilipisana mweeyo. Nkhama

ethiipo erapi ehiniimaaye otto ehijilipisaneeni nrayi, na-mweyo pi ethiipo khamwiniima mishumo woohijilipisani miiyo.

<sup>5</sup> Miyo ki nrayi, mweeyo mwa virapi. Otule anjilipisanaaye miiyo, na-miyo khwa ye, oto aya oniima mishumo zawaatta; maana mweeyo woohiiyani miiyo, khina ethu mwintwahaaye oretta. <sup>6</sup> Amana ntthu ahilipani miiyo, ontta weeseleliwa oje, oome nkama erapi enlokoththiwaaye khweeseleliwa va moottho khulukuziwa. <sup>7</sup> Ila amana mwijilipisana miiyo na mattakhuzi aka khwiya na mweeyo, mwiveke wakhula etile mwintakhaaye mwintta winkhiwa. <sup>8</sup> Paapa onsfowiwa mwaasa wa mweeyo wiima mishumo zawaatta, ethiipo enthoonyeza yoori mweeyo mwa anakhiyon iaka. <sup>9</sup> Khwa nanna ethiipo Paapa akiphetiyeezo, na-miyo koophetani; mwijilipisane pheta yaka. <sup>10</sup> Amana mweeyo mwishututela oruma waka mwiniyi nkaththi wa pheta yaka, nkama ethiipo na miiyo kinshututelaaye oruma wa Paapa na kiriyeeyo nkaththi wa pheta yawe. <sup>11</sup> Kaawuziyeni vitthu epi yoori furaha yaka yiiye khwa mweeyo, na yoori furaha yenu ekamilikhe.

<sup>12</sup> Oruma waka pi opu: Mwiphetane mmote na nzaawe nkama ethiipi miiyo khinuuphetanini mweeyo. <sup>13</sup> Khina ariina pheta yooziti, woohiiyi otule aninkhaaye ohaayi awe khwa maswaahipu zawe. <sup>14</sup> Mweeyo mwa maswaahipu zaka, mwirettaru etile kinuurumanini. <sup>15</sup> Akiniwiitthani theenya akarumeya, maana karumeya khanjuwa niini anrettaaye Mbwana awe. Nakatalikha, miiyo kiniwiitthani yoori maswaahipu zaka, maana zooshi epile kinsiliyeeyo Paapa koojuwisani. <sup>16</sup> Khahiyo mweeyo mwikithawuliyeeyo miiyo, ila miiyo ti kuuthawuliyeenini mweeyo na khuutthomani yoori mwilawe mweeme mishumo, mishumo zoolipaneya, yoori Paapa awahi owinkhani wakhula etile mwintvekaaye khwa nzina laka. <sup>17</sup> Opo pi oruma waka: mwiphetane mmote na nzaawe.

### *Olumwenku oniiphiiriwa ti anakhiyon*

<sup>18</sup> Amana atthu a voolumwenku eephiriwaka ti mweeyo, mwifikhiri khapula yoori yo eephiriwe ti miiyo. <sup>19</sup> Eriwaka mweeyo mwaari atthu a voolumwenku, yo aari otuveliwa ti mweeyo mwaasa wa wiyya aya. Nakatalikha mweeyo khahi mwa atthu a olumwenku, ila miiyo koothawulani khulazani vakatthi wa atthu a olumwenku. Tiito atthu a olumwenku aniiphiriwaaye ti mweeyo. <sup>20</sup> Mwifikhiri mattakhuzi kiwuuiyeeenini yoori: ‘Khaavo karumeya anzitiyeeyo Mbwana awe.’ Nkama akilupatthiyeeyo miiyo, na anlawa oolupattheni mweeyo theenya. Nkama anshututela mattakhuzi aka, theenya anlawa ashututele apale mwinttelaaye olupa mweeyo. <sup>21</sup> Zooshi epo anlawa oorettele mweeyo, mwaasa wa nzina laka, maana khaninjuwa otule akirumiyeeyo. <sup>22</sup> Eriwaka akaatiyi kilupa, yo khaari wiiyana paathwili ya twampi. Ila apha khana hatha nanna ya ojaakisa monkoni wa twampi zaya. <sup>23</sup> Otule aniiphiriwaaye ti miiyo na theenya oniiphiiriwa ti Paapa. <sup>24</sup> Eriwaka akeettiye oretta vitthu vakatthi vaya ahinwahaaye oretta ntthu nkina, yo khaariwiiyana paathuli ya twampi. Ila yo oona epi kirettiyeeyo na khusala akhanyarela wiiphiiriwa ti miiyo na Paapa. <sup>25</sup> Ila epo zaya zarettikhana yoori lilikaniseliwe ntthile laatikhieeyo nkaththi wa kano zaya yoori: ‘Yo eephiriwa ti miiyo woohiivo hatha kiiswa.’

<sup>26</sup> Ila, amana ata Namalipisela, otule kinttelaaye wuuperekhezani woolankha phantte ya Paapa, Rooho ya okhwhee ya olankha wa Paapa, ye ontela olaza oshaahiti monkoni wa miiyo. <sup>27</sup> Na mweeyo mwinlawa mwalawele oshaahiti, maana mwina miiyo thanku omwanzo.

## 16

<sup>1</sup> Miiyo kawuzani mattakhuzi apa yoori mwihanswi amini yenu. <sup>2</sup> Mweeyo mwinteela wiikariwa nsinakooka; weekhweele, onlawa wafiyi wakathi onraaye ntthu amana awuulaani khoona nkhama ankholaaaye khaazi ya Nluku. <sup>3</sup> Yo anttela oretta toowo mwaasa woohinjuwi Paapa wala miiyo.

### *Khaazi ya Rooho Ttakatthiifu*

<sup>4</sup> Mattakhuzi apa kiniwuuzani yoori amana ofiya wakathi enttelaavo orettikhana muupuwele yoori miiyo kaawuziyeni <sup>5</sup> Ila enasaapi eti kineetta wa otule aakirumiyeeyo, khaavo mmote anikuuzelaaye yoori: ‘Oneetta vayi?’ <sup>6</sup> Ila mwaasa woolupa vitthu epo, rooho zenu zahuzunika. <sup>7</sup> Miiyo kiniwuuzani haakhi yoori ena fwayita khwa mweeyo miiyo olawa, maana amana kihilawi, Namalipisela khanteela ota, ila amana kilawa, kintta omperekha. <sup>8</sup> Ye amana ata onteela owaakhitiri atthu a olumwenku monkoni wa twampi, wa shariya na ophuka: <sup>9</sup> khwa twampi, mwaasa wa ohikikhupali miiyo; <sup>10</sup> khwa shariya, maana kineetta wa Paapa, khamwinteela okoona theenya; <sup>11</sup> khwa ophuka, maana mfwalume wa voolumwenku apha aphukiwa.

<sup>12</sup> Kinaaye nalelo vitthu zawaatta za owuuzani, ila nasaapi eti mweeyo khamwinteela ovilela. <sup>13</sup> Ila amana Rooho ya khweele eta, ye enttela wuusomisani khweele yooshi mweeyo. Ye kinteela ojilupa, ila enttela olupa zooshi esiiliyeeyo na owuuzani mweeyo vitthu zinttelaaye orettikhana. <sup>14</sup> Ye enteela okisifu, maana enteela opokherela etile yiyyiye yaka na owuuzani mweeyo. <sup>15</sup> Yooshi Paapa ariinaaye ti yaka, tiito kilupiyeeyo yoori Rooho Ttakatthiifu epokheraka etile yiyyiye yaka na owuuzani mweeyo.

<sup>16</sup> Khwa wakathi vattithiiru khamwinteela okoona, ila khwa wakathi vattithiiru theenya mwinteela okoona opheya.”

### *Huzuni na furaha ya anakhiyoni*

<sup>17</sup> Anakhiyoni awe khuhiweeleyi khusala oozelana yoori: “Khwa mattakhuzi apo anlupaaye araka: ‘Wakathi vattithiiru khamwinteela okoona; wakathi vattithiiru mwinteela okoona opheya.’ Theenya onri: ‘Maana kineetta wa Paapa.’ Onri niini?” <sup>18</sup> Aphano khuuelana theenya yoori: “Khwa wakathi vattithiiru enlupa niini? Khinneleya etthu ye anlupaaye.”

<sup>19</sup> Ajuwiyeevo Yinsa yoori aari otakha omuuzela, monkoni wa mattakhuzi apale, ye khuwooza yoori: “Mweeyo mwintta wuuzelana monkoni wa mattakhuzi apa kilupiyeeyo yoori: ‘Khwa wakathi vattithiiru khamwinteela okoona; khwa wakathi vattithiiru theenya mwinteela okoona opheya’? <sup>20</sup> Miiyo kiniwuuzani khweele yoori mwinteela olila na ojikhupanyisa, ila atthu a olumwenku afurahiye. Mweeyo mwiri oohuzunika, ila huzuni ya ethiito ezukuluwe yiye furaha. <sup>21</sup> Muukha amana atakhaka ompattha mwaana, onoona olwaaza channu mwaasa

wa ofiya wakathi awe woohoowa, ila amana ampattha oniiyana furaha, onsahawu olwaaza opule oniyeyo mwaasa wa ontana mwaana voolumwenku.<sup>22</sup> Zinrettikhana ethiipo khwa mweeyo: opu wakathi wa huzuni khwa mweeyo, ila miiyo kinteela owoonani swaafu kina theeny, na mwinteeela ofurahi, na furaha eto khaavo anttelaaaye wuulazani.<sup>23</sup> Siikhu yaya eto khamwinteeela okuuzela hatha ethu. Miiyo kiniwuuzani khweele yoori, amana mwinvekela ethu Paapa khwa nzina laka miiyo, ye ontaa owinkhani.<sup>24</sup> Mpakha nasaapi eti khamwinaveke hatha ethu khwa nzina laka. Mwiveke, mwintta winkhiwa, yoori furaha yenu ekamilikhe.”

*Yinsa ashintta olumwenku*

<sup>25</sup> “Miiyo kiniwuuzani vitthu epo khwa nlikaniso. Onteela ofiya wakathi kihinttelaaye orumeyela mattakhuzi nkhamma apo, ila kintee-laaye owuuzani saaneene monkoni wa Paapa.<sup>26</sup> Siikhu yaya eto, mweeyo mwinteeela oveka khwa nzina laka na khinlawi ohithajiya miiyo oveka zwaamu yenu mweeyo,<sup>27</sup> Paapa mweenyeweene onu-uphetani, maana mweeyo mwinikipheta na mwinkhupalela yoori miiyo kalankha wa Nluku.<sup>28</sup> Kalankha wa Paapa khuta voolumwenku; nakatalikha, kinlaavo voolumwenku kirutele wa Paapa.”

<sup>29</sup> Aphano anakhiyoni awe khulupa araka: “Onlupa woosileyavo, woohiiyi khwa milikaniso!<sup>30</sup> Nasaapi eti enneleya yoori onjuwa vitthu zooshi khinihithajiya opuwa ntthu owuuzela, khwa ethiipo nakhupali yoori weeyo walankha wa Nluku.”

<sup>31</sup> Yinsa khuwaajipu yoori: “Mwinkhupali nasaapi?<sup>32</sup> Wakathi waat-tama, weekhwhee wafiya, mweeyo mwinttelaaye omwazeya wakhula ntthu alawe owawe, mwikilikhe otthome. Ila akiri otthome, maana Paapa ona miiyo.

<sup>33</sup> Miiyo kawuuuzani vitthu epi yoori mwiiyane heeri khwa miiyo. Voolumwenku apha mwinteeela wiiyana tafwawuthi; ila mwivilele! Mi-ryo kashintta olumwenku.”

## 17

*Yinsa ontta ojilompela*

<sup>1</sup> Paata ya Yinsa wiisha olupa vitthu opo, khweekesa otulu na khu-lompa araka:

“Paapa, wafiya wakathi. Onsifu mwanawo, yoori naye mwanawo oosifu.<sup>2</sup> Maana wamwinkha ofwalume khwa anaatamu ooshi, yoori awenkhe ohaayi wa mileele ooshi apale omwinkhiyeeyo.<sup>3</sup> Na ohaayi opo wa mileele pi opu: Oojuwe weeyo, Nluku mmote paasi weekhwhee, na Yinsa Al-Masiihu otule omperekhiyeeyo.<sup>4</sup> Miiyo koosifu vathi, kimariselaka khaazi okinkhiyeeyo oretta.<sup>5</sup> Na, nasaapi eti, okisifu oo Paapa, vamote na-weyo khwa siifwa kaarinaaye na-weyo khapulathii olumwenku ohineeyeyevo.

*Yinsa oniwaalompela anakhiyoni awe*

<sup>6</sup> Kawaathoonyeza nzina lawo apale okinkhiyeeyo voolumwenku. Apo aya aari awo; weeyo khukinkha miiyo, na yo anshututela ntthakhuzi lawo.<sup>7</sup> Aphano yo anjuwa yoori vitthu zooshi onikinkhaaye zinlankha khwa weeyo.<sup>8</sup> Maana miiyo kawooza mattakhuzi

okinkhiyeyo yo khupokherela, ajuwa yoori khweele miiyo kalankha mmakhono mwawo na khukhupalela yoori weetta okiruma.<sup>9</sup> Miiyo kiniwaavekelela yo. Akiniwaavekelela atthu ooshi a voolumwenku, ila apale okinkhiyeyo maana pi awo.<sup>10</sup> Zooshi kiriinaazo pi zavo, na zooshi oriinaazo pi zaka. Miiyo kinsifwiwa mwaasa wa yo.<sup>11</sup> Nasaapi eti akinteela wiikhala voolumwenku ila yo ari voolumwenku, maana miiyo kineetta okho oriwo weeyo. Paapa woottakatthifu, oweenanele khwa nzina lawo, nzina okinkhiyeyo, yoori yo eeye vamote nkhamma niyyiyeezo fweeyo.<sup>12</sup> Wakathi kaari vamote na-yo voolumwenku, miiyo kaaweenaneliye na khuwaathokorela khwa owahi wa nzina lawo, nzina ntinttho okinkhiyeyo. Kaaweenaneliye na khuhiivo mmote aashikhiyeyo, woohiiyi otule atthomeliweeyo waashikha yoori epile zilupiyeego zawaatikiwa ttakatthiifu zirettikhane.

<sup>13</sup> Ila nasaapi eti kintta okho oriwo weeyo, kinlupa mattakhuzi apo nalelo kiri voolumwenku, yoori yo eeyane furaha yaka yookamilikha. <sup>14</sup> Miiyo kawinkha ntakhuzi lawo, atthu a voolumwenku khwiippiiriwa ti yo, maana yo khahiy a voolumwenku, nkhamma ethiipo miiyo kihiy-eeni. <sup>15</sup> Akinuuvekela yoori owaalazevo voolumwenku, ila oweenanele khwa ntakhali. <sup>16</sup> Yo khahi a voolumwenku nkhamma ethiipo miiyo kihiyeeeni. <sup>17</sup> Owaattakatthise na haakhi; ntakhuzi lawo haakhi. <sup>18</sup> Nkhamma ethiipo weeyo okirumiyeego miiyo voolumwenku, na miiyo kawaaruma voolumwenku. <sup>19</sup> Khwa zwaamu yaya kinjittakatthisa miiyo, yoori na-yo attakatthe khwa haakhi.

### *Yinsa oniwaalompela anamalottela awe ooshi*

<sup>20</sup> Akiniwaavekelela apa ottho paasi, ila na apale anteelaaye okikhupali miiyo khwa ntakhuzi laya yo,<sup>21</sup> yoori ooshi eeye amote, nkhamma ethiipo niriiizo miiyo na weeyo, na-yo ti eeye khwa fweeyo, yoori atthu a voolumwenku akhupali yoori weeyo weetta okiruma.<sup>22</sup> Miiyo kawinkha siifwa etile weeyo okinkhiyeyo, yoori yo eeye amote nkhamma fweeyo niyyiyeeyo amote.<sup>23</sup> Miiyo khwa yo na weeyo khwa miiyo. Khwa nanna ethiito osilana waya ontela wiiya khaamili, yoori atthu a voolumwenku ajuwe yoori weeyo ti okirumiyeego, na yoori oniwaapheta nkhamma ethiipo onikiphetaazo miiyo.

<sup>24</sup> Paapa, niiya yaka ti yoori attaapho kiriivo miiyo na-yo eeye attaapho ooshi apale okinkhiyeyo, yoori oone siifwa okinkhiyeyo, maana wakipheta khapulathi olumwenku ohinompiwe.

<sup>25</sup> Paapa wa shariya, atthu a olumwenku khanujuwa, ila miiyo kinuujuwa; na apa okinkhiyeyo anjuwa yoori weeyo weetta okiruma.

<sup>26</sup> Miiyo kawaajuwisa nzina lawo, na nalelo kinvira kiwaajuwisaka, yoori pheta etile okiphetaniyeego yiye vamote na-yo, na miiyo kiiye vamote na-yo.”

## 18

### *Ofukiwa wa Yinsa*

<sup>1</sup> Paata ya Yinsa wiisha olompa, khulankha na anakhiyonи awe khulokhela kaapu ya ntappo la Kedroni. Waariwo woorotha, ye khweetta ottuukho na anakhiyonи awe.

<sup>2</sup> Yuuda namazukuluwela aari ojuwa ohali okhule, maana Yinsa swaafu zinkizene aari okusanyeyaka ottuukho na anakhiyonи awe.

<sup>3</sup> Aphano Yuuda khuthuula khuntti ya anajanka khweetta ottuukho na mawaziri akina aya arumiweeyo pi mahaakhimu a tiini na mafwarizeewu, athuuliye vimwasikhelo, na zuuma za nviththa. <sup>4</sup> Yinsa, ajuwaka niini yaari weettelaaye orettikhana khwa ye, khuweettela khuwoozela yoori: “Mwinimweekesa paani?” <sup>5</sup> Yo khujipu: “Yinsa, wa Nazareeti!” Aphano ye khuwoza yoori: “Ti-miyo.” Yuuda namazukuluwela, ti aarina atthu apale. <sup>6</sup> Wakathi Yinsa alupiyeeyo yoori “ti-miyo,” yo etta osusa khukwela vathi. <sup>7</sup> Yinsa khuwoozela opheya yoori: “Mwinimweekesa paani?” Yo khujipu: “Yinsa wa Nazareti!” <sup>8</sup> Yinsa khuwoza yoori: “Miiyo kawuzani yoori ti-miyo. Nkhama mwinikeekesa miiyo, mwiwaalikhe apa alawe.”

<sup>9</sup> Yinsa aalupiye toowo yoori eretteye etile aalupiyeeyo rakuzeene yoori: “Paapa, ooshi apale okinkhiyeeyo khakaashikheeni hatha mmote.” <sup>10</sup> Aphano Simawu Pheeturu khusrula phanka, khunshija karumeya mmote wa haakhimu nwulu wa tiini, nshiilo lawe la nkono nlume. Nzina lawe karumeya aya otule laari Maliko. <sup>11</sup> Ila Yinsa khumuuz Pheeturu yoori: “Opwehe phanka yawo mmufukho mwawo! Niri akinteela onywela jiikira akinkhiyeeyo Paapa?”

### *Yinsa onttaniwa wa Anaasi*

<sup>12</sup> Elottelanaka khuntti etile ya anajanka, namalokozela aya na anamweekesela wa mayaahuuti khunkhola Yinsa na khunfuka. <sup>13</sup> Omwanzweene khumweettana wa Anaasi, nkhewewe Kayifwa, aari haakhimu nwulu wa tiini mwaakha aya opule. <sup>14</sup> Ti othuuto awooziyeyo mayaahuuti yoori yaari yooshapweya ntthu mmote owaafwela atthu ooshi.

### *Pheeturu oninkatthala Yinsa*

<sup>15</sup> Simawu Pheeturu na nakhiyoni nkina eetta onlottelela Yinsa. Mwaasa wa yoori nakhiyoni oto aari ojuwanana haakhimu nwulu wa tiini, ye awahiye ofiya vaje wa nyuupa ya haakhimu nwulu wa tiini, <sup>16</sup> ila Pheeturu aasaliye anwejaka othetekeli wa nlako. Nakhiyoni otule nkina, aari ojuwananaye haakhimu nwulu wa tiini, khusaruwa, khulawa khuttakhulana nakhinzi otule aari weekeselaaye nlako khunlikha Pheeturu ovira. <sup>17</sup> Aphano njaazi otule aari weekeselaaye milako, khumuuzela Pheeturu yoori: “Weeyo khahi ommote wa anakhiyoni wa mwinyi otu?” Ye khujipu araka: “Akiyo!” <sup>18</sup> Mwaasa wa ozizima, akarumeya na anamweekesela khusikhanyela moottho khusala oottha. Pheeturu khweemela attaapho na ye, khusala oottha.

### *Haakhimu nwulu wa tiini onimuuzela Yinsa*

<sup>19</sup> Aphano, haakhimu nwulu wa tiini khumuuzela Yinsa monkoni wa anakhiyoni awe na masomi awe. <sup>20</sup> Yinsa khujipu araka: “Miyo kawooza atthu a voolumwenku woosileyavo saaneene, na kaari osomisa nsinakooka mpakha Nnyupa Woosifwiwamo, ntumpho aari othukumanaamu mayaahuuti. Khina ethtu kilupiyeeyo sirini. <sup>21</sup> Khi oniikuzelelani? Owoozele apale akisiiliyeeyo, anjuwa saaneene vitthu kilupiyeeyo.” <sup>22</sup> Wakathi Yinsa alupiyeeyo toowo, namweekesela mmote amwaattamiyeeyo khumpiya omaasho, araka: “Haakhimu nwulu wa tiini onjipwiwa ethhiipo?” <sup>23</sup> Yinsa khunjipu yoori: “Nkhama kajipu etthu yootakhala, oluwe yootakhala, ila nkhamma kattakhula

haakhi, kхи mwakipiyelani?”<sup>24</sup> Aphano, Anaasi khumperekha Yinsa wa Kayifwa haakhimu nwulu wa tiini ari woofukiwa.

*Pheeturu oninkhana Yinsa swaafu ya phiiri*

<sup>25</sup> Pheeturu nalelo aari oretta eettaka woottha moottho. Aphano khuuzeliwa yoori: “Weeyo khahi mmote wa anakhiyon a mwinyi otu?” Ye khukhana araka: “Miiyo akiyiiyo.”<sup>26</sup> Elottelanaka, karumeya wa haakhimu nwulu wa tiini, jaama mmote wa otule Pheeturu anshijiy-eeyo nshilo, khumuuzu yoori: “Miiyo kaawooniye nwoorotha orina othuuto!”<sup>27</sup> Pheeturu khurutela theenya okhana. Wakathi otthuupo likukhuwi khwiikha.

*Yinsa ari wa Pilaatu*

<sup>28</sup> Nawiisha khuthuuliwawo Yinsa wa Kayifwa khulawaniwa nyuupa khuulu ya nsatoro. Yaari supuyeene. Anamalokozela a mayaahuuti khuhivirimo nnyupa mphule, aari ontakha yoori ehiwaalawe twahara, yoori awahi onja Paashikowa.<sup>29</sup> Aphano Pilaatu khusaruwa olawa ottakhulana yo na owoozela yoori: “Niini mwininlupezaye ntthu otu?”

<sup>30</sup> Yo khujipu yoori: “Eriwaka khaari oretta vitthu zootakhala khanaari wuutisela weeyo.”

<sup>31</sup> Pilaatu khuwaajipu yoori: “Mwinthuule mwilawe mwamphuke khwa nanna enlupaazo kano zenu.” Aphano mayaahuuti khujipu yoori: “Enikhattaziwa fweeyo omuula ntthu.”<sup>32</sup> Epo zaarettikhaniye toowo yoori emariseli mattakhuzi apale Yinsa aalupiyeeyo, wakathi aari ottakhulaavo monkoni wa nanna aari weettelaazo ofwa.

<sup>33</sup> Pilaatu khurutela nnyupa khuulu ya nsatoro, khunkhuwela Yinsa khumuuzela yoori: “Weeyo o mfwalume wa mayaahuuti?”

<sup>34</sup> Yinsa khujipu yoori: “Mattakhuzi aya apo onikuuzelaaye pi awo, ama atthu akina ti awuuziyeeyo monkoni wa miiyo?”<sup>35</sup> Pilaatu khunjipu yoori: “Miiyo ki yaahuuti? Atthu awo na mahaakhimu a tiini ti akitiseeliyeeyo weeyo. Niini orettiyeeyo?”

<sup>36</sup> Yinsa khujipu yoori: “Ofwalume aka khayi wa voolumwenku apha! Eriwaka ofwalume aka waari wa voolumwenku apha, akarumeya aka eetta wuumanana mayaahuuti awaakhattazaka okikhola, ila wa ekhwewe ofwalume aka khahiyo wa voolumwenku attaapha.”

<sup>37</sup> Aphano Pilaatu khulupa yoori: “Khupe weeyo o mfwalume.”

Yinsa khunjipu yoori: “Weeyo ti onlupaaye yoori ki mfwalume. Miiyo kavokoleliwa ethiito na ti ethiito ekitaniyeeyo voolumwenku, yoori kite kilawele oshaahiti wa haakhi. Wakhula otule eeyiye wa haakhi onsiila huula yaka.”

<sup>38</sup> Pilaatu khumuuzela yoori: “Haakhi niini?” Noolupa toowo khulankha opheya khulawa aphale aariivo mayaahuuti khuwooza yoori: “Miiyo akinimoonana hatha nlattu.”<sup>39</sup> Ila khwa zowera yenu mweeyo, miiyo kintta ontaphula napherezu mmote mwaasa wa ofiya wakathi wa Paashikowa. Mwintakha yoori miiyo kintaphule mfwalume wa mayaahuuti?”

<sup>40</sup> Yo khunyakula ajipwaka yoori: “Wala, ye wala! Ninintakha Baraba.” Ila Baraba aari namahusuti.

<sup>1</sup> Aphano Pilaatu khuruma ojaphiwa Yinsa. <sup>2</sup> Anajanka khuvaasha khaara ya miiwa khunwalisa mmwishwa. Na khunwalisa ajapi yookhuttuwa. <sup>3</sup> Ansuselaka amuuzaka yoori: “Mfwalume wa mayaahuuti, otulu!” Na khusala ampiya omaasho wawe.

<sup>4</sup> Swaafu kiina Pilaatu khulankha khuwooza mayaahuuti yoori: “Moone! Miyo kinuutiselani mweeyo yoori mwijuwe yoori miiyo aki-moonaneeni hatha nlattu.” <sup>5</sup> Wakathi atiisiweeyo vaje awaliye khaara ya miiwa, na ajapi yookhuttuwa, Pilaatu khuwooza yoori: “Mmoone mwinyi otule, otu ari apha!”

<sup>6</sup> Wakathi amooniyeevo Yinsa mahaakhimu a tiini na anamweekesela, khusala anyakula alupaka yoori: “Akhomeliwe! Akhomeliwe!” Ila Pilaatu khujipu yoori: “Mwinthuule mweeyo-ena mwankhomele, miiyo akinimoonana hatha nlattu.”

<sup>7</sup> Yo khujipu yoori: “Fweeyo ninaaye kano, kano ethhiipo enlupa yoori ooliwe maana onjilupeza yoori Mwaana wa Nluku.”

<sup>8</sup> Paata ya osiila toowo, Pilaatu khutepa woova. <sup>9</sup> Khurutela nyupu khuulu ya nsatoro, khumuuzela Yinsa yoori: “Weeyo owa vayi?” Ila Yinsa khuhinjipu. <sup>10</sup> Aphano, Pilaatu khumuuzza yoori: “Khunikijipu? Khunjuwa yoori miiyo kinaaye owahi wa wuutaphula ama wuukhomela?”

<sup>11</sup> Yinsa khunjipu yoori: “Weeyo khawaari wiiyana hatha owahi khwa miiyo, eriwaka khawenkhiwe otulu. Ti eto otule ootiseliyeeyo Miyo ona paathuli ya twampi yooziti.”

<sup>12</sup> Waaza wakathi otthuupule Pilaatu khusala atakha ontaphula Yinsa, ila mayaahuuti khusala anyakula araka: “Amana onlikha Mwinyi oto ojitatha, khuniiya swaahipu wa Seezari. Wakhula otule anjilupanaaye ofwalume oniyya muumani wa Seezari!”

<sup>13</sup> Pilaatu noosiila toowo, khunsarulela Yinsa vaje, khwiikhala vakhukulu ya namaphuka puuro yaari wiitthiwaaye ‘Eshotthelo ya mawe’, khwa luuka ya meepereewu enriwa ‘Kabata’. <sup>14</sup> Yaari payina ya saasiitha, yaari Siikhu ya Ojilokothela, maana yaari sumana ya njampo la Paashikowa.

Aphano Pilaatu khuwooza mayaahuuti araka: “Mwimoone, otu ari apha Mfwalume enu!”

<sup>15</sup> Ila yo khusala anyakula araka: “Onsarulele oje! Onsarulele oje! Akhomeliwe!”

Pilaatu khuwoozela yoori: “Kinkhomele mfwalume enu?”

Mahaakhimu a tiini khujipu araka: “Khanina mfwalume fweeyo woohiiyi Seezari!”

<sup>16</sup> Aphano Pilaatu khunthuula Yinsa khuwenkha anajanka yoori ankhomele, yo khunthuula.

### *Okhomeliwa*

<sup>17</sup> Yinsa khusaruwa attikhiwe nsalapa awe, khusala alawaniwa puuro yaari wiitthiwaaye Kalavaariyu, khwa luuka ya meepereewu yaari wiitthiwa Kolokoota, <sup>18</sup> attaapho akhomeliweeyo ye na athtu awiri, wakhula mmote mpavu mwawee, ye khwiyya vakathhi.

<sup>19</sup> Pilaatu khwaatikha lipawu khuthomeya pontha wa nsalapa; aatikhiyevo yoori: “YINSA WA NAZAREETI, MFWALUME WA MAYAAHUTI! <sup>20</sup> Mayaahuuti enkeene aasomiye lipawu nthile, maana puuro etile Yinsa akhomeliweeyo yaari kharipu na va sitati, lipawu nthile laatikhiwe luuka ya meepereewu, ya elatiinu na ekereeku.

<sup>21</sup> Mahaakhimu a tiini aari omuuza Pilaatu yoori: "Ohaatikhe yoori: 'Mfwalume wa Mayaahuuti', waatikhe etile aalupiyeeyo yoori: 'Miiyo ki Mfwalume wa mayaahuuti."

<sup>22</sup> Pilaatu khujipu yoori: "Etile kaatikhieeyo kaatikha."

<sup>23</sup> Anajanka paata ya onkhomela, khuthuula kuwo zawe, khwaawanya phantte nne yoori wakhula najanka apatthe phantte moote; na khuthuula ajapi yawe theenya. Ila ajapi yaari yoohisoniwi waaza vathi mpakha vatulu.

<sup>24</sup> Yo khulupa yoori: "Nihivarule, ila neekese nasipu nimoone anttelaaaye opattha." Epo zaarettikhaniye yoori emarisele zawaatikhiwa ttakatthiifu enlupaaye yoori:

"Aawanya kuwo zaka, na khweekesa nasipu khwa ajapi yaka.  
Na pi ethiipo anajanka aarettiyeozo."

<sup>25</sup> Kharipu ya vansalapa wa Yinsa aarivo mamaawe, na ttwiye mamaawe, na Mariyamu muukha wa Kolopa, na Mariyamu Mataleena.

<sup>26</sup> Yinsa noomoona mamaawe ari vamote na nakhiyoni otule wompheta wawe, khumuuba mamaawe yoori: "Muukha mwanawo oto," <sup>27</sup> na khumuuba nakhiyoni awe yoori: "Omoone, mamaawo oto." Waaza wakathi otthuupule, nakhiyoni otule khuretteya wiiya jaama.

### *Ofwa wa Yinsa*

<sup>28</sup> Paata ya Yinsa woona yoori zooshi zintta omariseleya, khushankela yoori zirettikhane epi zaari olupaazo zawaatikhiwa ttakatthiifu yoori: "Lakikhola nnyotthal!" <sup>29</sup> Yaarivo suupha aarimo viinyu yoonyunya khuthuuliwa khunywisiwa ethiiwe va shiponja yoofukeleliwa va ttekethe ya hisoopo na khuweziwa mpakha omilomo wa Yinsa. <sup>30</sup> Yinsa wakathi anywiyyevo maati apale oonyuunya khulupa yoori: "Zooshi zamariseliwa", khwiinamisa eeshwa yawe khwinkhelela rooho yawe.

<sup>31</sup> Yaari Siikhu ya Ojilokothela na Saapatu eti yaari siikhu yootepa wiiya ttakatthiifu. Wiiya khaari otakha yoori mwiili wa Yinsa wliye vansalapa mpakha Saapatu, mayaahuuti khunvekela Pilaatu yoori arume okakkattiwa moolu otule akhomeliweeyo na olaziwavo vansalapa. <sup>32</sup> Khuta anajanka khukakatta moolu a ntthu otule wa waaza aakhomeliweeyo vamote na Yinsa elottelanaka khukakattiwa a otule nkina. <sup>33</sup> Ila noofiyeliwa Yinsa, khooniwa yoori ye aari woofwa, khuhikakattiwi moolu awe. <sup>34</sup> Ila najanka mmote khukuphula pavu ya Yinsa na nkokhi, nasaapiru khusala esaruwa taamu na maati. <sup>35</sup> Otule oniyeeyo vitthu zaya epo alawela oshaahiti, na oshaahiti awe pi wookhwhee. Ye onjuwa yoori onlupa haakhi, na onlaza oshaahiti yoori na-mweyo mwikhupali. <sup>36</sup> Vitthu epo zarettikhana yoori emariseleye epile enlupaazo zawaatikhiwa ttakatthiifu yoori: "Hatha likhonkolo lawe limote khalinteela opwecheya," <sup>37</sup> na nkhamma theenya enlupaazo zawaatikhiwa phantte kiina yoori: "Yo anttela omoona othuuto an-shomiyeeyo."\*

### *Ozikhiwa wa Yinsa*

<sup>38</sup> Paata ya toole Yuusufu wa sitati ya Arimateeya, khunvekela Pi-laatu mwiili wa Yinsa. Yuusufu aari nakhiyoni wa Yinsa, ila wa

sirini, maana aari owoova mayaahuuti. Pilaatu khwinkha ruhusa, na Yuusufu khulawa na khulazavo mwiili opule wa Yinsa.<sup>39</sup> Ye aaperekhiwe ti Nikoteemu, otule alawiyeyo ottakhulana Yinsa osikhu. Nikoteemu aathuliye mafuttha oonukhela oophakanyaniwa ela yaari ofiyaaye ethu ya miphimo talaathiini na thaanu.<sup>40</sup> Khuthuula mwiili wa Yinsa, khuputaputela va joora yoottukunttelawa ofu woonukhela, nkhamma anrettaazo mayaahuuti va ozikha.<sup>41</sup> Vahali akhomeliwevo Yinsa waariwo woorotha, waariina khapuri pheeya, yoohizikhiwivo hatha ntthu.<sup>42</sup> Maana yaari osaleela ofiya Siikhu ya Ojilokothela wa mayaahuuti, na khapuri yaari kharipu, khuzikhiwa attaapho.

## 20

### *Osisimuwa*

<sup>1</sup> Siikhu ya mwanzo ya sumana Jumwaa-phiili supuyeene, Mariyamu Mataleena khulawa ovilalo, khoona liwe ntthile laattiyelaniweeyo khapuri lilaziwevo. <sup>2</sup> Aphano khutthira khulawa mpakha vahali aariivo Simawu Pheeturu na nakhiyon ni kina, otule Yinsa aari omphetaaye, khwooza yoori: “Mbwana alaziwamo nkhapuri, khanijuweeni vahali atthiweeve!”

<sup>3</sup> Pheeturu khulankha na nakhiyon ni kina khulawa mpakha okhapuri. <sup>4</sup> Oowiiri khulankha eettaka otthira, ila otu nkina khutthira channu khunziti Pheeturu, khwiya mwanzo woofiya ovilalo. <sup>5</sup> Khwiinama khutturumelamo, khoona joora, ila khuhivirimo nkhapuri mphule. <sup>6</sup> Aphano, Simawu Pheeturu otule aari onlottaaye, khufiya khuvira nkhapuri mphule na ye khoona joora etile,<sup>7</sup> na joora etile yaari veeshwa wa Yinsa, eri yooputaputeliwa eri phantte kiina. <sup>8</sup> Aphano naye nakhiyon ni otule aari mwanzo woofiya khuvira nkhapuri ntumphule, khoona na khukhupali. <sup>9</sup> Yo nalelo zaari ehinaaweeleye zawaatikhiwa ttakatthiifu, zaari olupaaye yoori yaari ohithajya Yinsa osisimuwa muufwa.

### *Yinsa onimpuwelela Mariyamu Mataleena*

<sup>10</sup> Anakhiyon apale khurutela onti theenya. <sup>11</sup> Ila Mariyamu, khusala nalelo ari vanlako wa khapuri, eettaka olila, khwiinama khuthrumela nkatthi. <sup>12</sup> Khoona malayikha mawiri awaliye kuwo zoolakala, eekhaliye aphale waariivo mwiili wa Yinsa, mmote ovishwa nkina omoolu.

<sup>13</sup> Aphano malayikha apale khumuuzela yoori: “Weeyo muukha, onlila-ni?”

Ye khujipu araka: “Yo anthuula Mbwana aka khulawana safwari zaya na akinjuwa vahali antthiyyeovo.” <sup>14</sup> Paata ya olupa toowo, khuzukuluwa khumoona Yinsa eemeliye, ila khuhinjuwi yoori ti Yinsa.

<sup>15</sup> Aphano Yinsa khumuuzela yoori: “Weeyo, muukha onlila-ni? Onimweekesa paani?”

Ye khusala oopuwela yoori aari namalimela woorotha, khunjipu yoori: “Mwinyi, nkhamma mweetta onlazamu, nkakuuzeni vahali mwint-thiyyeovo, miiyo kilawe kanthuule.”

<sup>16</sup> Yinsa khuri: “Mariyamu!”

Ye khuzukuluwa, khulupa khwa luuka ya meepereewu yoori: “Raboni!” (Eriina maana la Mwaaliimu). <sup>17</sup> Yinsa khulupa yoori: “Ohikikholele, maana nalelo akinarutele wa Paapa. Olawe vakatthi wa

attwiizaku wawooze yoori: ‘Miiyo kintta orutela wa Paapa na Papeenu mweeyo, wa Nluku aka na Nluku wenu mweeyo.’

<sup>18</sup> Aphano Mariyamu Mataleena khulawa khuwooza anakhiyoni a Yinsa yoori: “Kamoona Mbwana!” Na khuwooza zooshi epile oziweeyo ti Yinsa.

### *Yinsa oniwaapuwelela anakhiyoni awe*

<sup>19</sup> Njuwa-looveva siikhu ethiitile, siikhu ya mwanzo ya sumana, jumwaa-phiili, anakhiyoni akhusanyeyiye milako ziri zoofukiwa, mwaasa wa owoova mayaahuuti, Yinsa khuvira khweemela vakatthi vaya khuri: “Heeri yiiye vamote na-mweyo!” <sup>20</sup> Alupiyeevo vitthu epile khuwaathonyeza makhono awe na pavu yawe. Anakhiyoni apale khwiya ofurahi paata ya omoona Mbwana.

<sup>21</sup> Yinsa khulupa theenya yoori: “Heeri yiiye vamote na-mweyo! Nkhama etthiipo Paapa akirumiyeeyo, na-miyo kinuurumani mweeyo.”

<sup>22</sup> Paata ya olupa toowo khuwaavitelela khuri: “Mwipokhere Rooho Ttakatthiifu. <sup>23</sup> Amana mwiswaamihi twampi za ntthu, twampi zaya epo eniiya zooswamihwa, ila amana mwihiwaamihia khazinswamihwa.”

### *Yinsa onimpwuwelela Tome*

<sup>24</sup> Tome, aniiithiwaaye Maphapo, mmote wa anakhiyoni apale khumi na awiri, kaari vamote na anakhiyoni wakathi Yinsa awaapuweleliyevo. <sup>25</sup> Anakhiyoni apale akina khumuuzza yoori: “Namoona Mbwana!” Ila ye khuri: “Miiyo noohooni mmakhono alama za misumari epile, kitthaamo yaala yaka mphule aakhomeliweemo, na kittha nkhono pavu yawe, hatha vattitthiiru akinkhupali!”

<sup>26</sup> Paata ya ovira siikhu naane anakhiyoni awe khurutela okusanyeya nttumphule theenya na Tome aarivo. Milako ziri zoofukiwa, Yinsa khuta khweemela vakatthi vaya khuri: “Heeri yiiye vamote na-mweyo!”

<sup>27</sup> Aphano Yinsa khumuuzza Tome yoori: “Otthe yaala yawo apha, na woone makhono aka, na wookole nkhono awo ottheele pavu yaka. Ohiiye nanhikhupali, ila wiiye namakhupali.”

<sup>28</sup> Tome khujipu araka: “Mbwana aka na Nluku aka!”

<sup>29</sup> Yinsa khumuuzza yoori: “Mwaasa wa okoona, wakhupali? Ooparikhiiyiwa pi apale ahooneeni ila khukhupali.”

<sup>30</sup> Yinsa khuretta alama za minjuza kiina zinkizene vakatthi wa anakhiyoni zihaatiikhweenimo nkithaapu mphu, <sup>31</sup> ila epi zaatikhiwa yoori mweeyo mwikhupali yoori Yinsa ti Al-Masiihu, Mwaana wa Nluku na yoori amana mwinkhupali mwiiyane ohaayi khwa nzina lawe.

## 21

### *Yinsa na ojija wootikinisa*

<sup>1</sup> Paata ya toowo Yinsa khuwaapuwelela anakhiyoni awe opheya nshini wa ntthatta liniitthiwaaye Tiperiyaati\*. Ti nanna ye aa jitho-nyeziyeeyo: <sup>2</sup> aari vamote Simawu Pheeturu, Tome aniiithiwaaye Maphapo, Natanayeele wa nti wa Kanaani ya Kalileya, na aana a Zepeteewu na anakhiyoni akina awiri. <sup>3</sup> Simawu Pheeturu khuwooza ashirikha awe yoori: “Kinttela ojija.” Akinoko aya khulupa yoori: “Fweeyo nintta wuulotta!” Yo khulawa na khweetta mmwaatiya, ila osikhu aya opule khuhipatthi hatha etthu.

\* **21:1** Tiperiyaati theenya eniittheliwa nzina la ntthatta la Kalileya.

<sup>4</sup> Ekhunkumu ya lifwajiri Yinsa aarettiye ari vapatari, ila anakhiyon i awe khuhinjuwi.

<sup>5</sup> Ye khuwoozela yoori: “Aanaaka, mwapattha swi?”

Yo khujipu yoori: “Wala!”

<sup>6</sup> Ye khulupa yoori: “Mweeselele ntthavi phantte ya nkhono nlume ya mwaatiya, mwintta opattha.” Yo khweesa, khuhisala awahi ofuttha ntthavi mwaasa wa swi waatta.

<sup>7</sup> Nakhiyon i wa Yinsa woophetacha khumuuz Pheeturu yoori: “Oto aya ti Mbwana!” Wakathi Simawu Pheeturu asiiliyeevo elupiwaka yoori aari Mbwana, khuwala juupa, maana eettiye ovula na khujeeselela mmaati. <sup>8</sup> Anakhiyon i akina khuta na mwaatiya, eettaka ofuttha ntthavi liitaaliye swi, aari kiyasi ya phiima miiya asaleela ofiya vapatari. <sup>9</sup> Wakathi afiyyevo vapatari, khoona vahali waariivo moottho, na swi vatulu a makhala; na erivo phaawu.

<sup>10</sup> Aphano Yinsa khuwoza yoori: “Mwitiise swi vattithiiru etthiipo mwijiyeyo nasaapi.”

<sup>11</sup> Aphano Simawu Pheeturu khuwela mmwaatiya khupurulela ntthavi vathi. Liri lawiitaala swi miiya na hamusiini na ttatthu khuluzeene, ila ntthavi khuhivaruw. <sup>12</sup> Aphano Yinsa khuwoza yoori: “Mwite mwije!” Khuhivo hatha nakhiyon i awe mmote aminyaliyeyo khumuuzela yoori: “Weeyo aya o paani?” Maana anjuwiye yoori otu ti Mbwana. <sup>13</sup> Yinsa khuwaattama khuthuula phaawu, khuwenkha na khuretta etthiipo khwa swi. <sup>14</sup> Eto yaari swaafu ya ttaatthu Yinsa ajithoonyezaka vakatthi wa anakhiyon i awe, paata ya osisimuwa nkhpuri.

### *Yinsa oninkaphula Pheeturu*

<sup>15</sup> Paata ya wiisha oja Yinsa khumuuzela Simawu yoori: “Simawu, mwaana wa Yaahaya, onikipheta zayita apa?”

Ye khuri: “Aa Mbwana, hatha na-weyo onjuwa yoori miiyo kinuuphetu.”

Yinsa khumuuz yoori: “Ojise pwittipwitthi zaka.”

<sup>16</sup> Khumuuzela theenya swaafu ya phiiri yoori: “Simawu, mwaana wa Yaahaya, weeyo onikipheta?”

Ye khujipu yoori: “Aa Mbwana, hatha na-weyo onjuwa yoori miiyo kinuuphetu.”

Yinsa khumuuz yoori: “Oshuke pwittipwitthi zaka.”

<sup>17</sup> Khumuuzela theenya swaafu yattaatthu, yoori: “Simawu, mwaana wa Yaahaya, weeyo onikipheta?”

Pheeturu khunyoonyeya mwaasa wa Yinsa omuuzela swaafu ya ttaatthu, yoori: “Weeyo onikipheta?” Ye khuri: “Mbwana, weeyo onjuwa vitthu zooshi na onjuwa yoori miiyo kinuuphetu.”

Yinsa khumuuz yoori: “Ojise pwittipwitthi zaka.” <sup>18</sup> Miiyo kiniwuza khweele yoori, wakathi opule waari shaapu, weetta ojivalisa, khweetta wakhula aphale ontakhaavo, ila amana wuuluvala onteela owookolela makhono, azaawo oothuule aweettane ohali ohintakhaawo weettawo.” <sup>19</sup> Yinsa aalupiye toowo yoori athoonyeze nanna ya ofwa Pheeturu aari weettelaaye onsifwana Nluku. Nawiisha, khumuuz yoori: “Okilotte!”

<sup>20</sup> Pheeturu azukuluwiyevo khumoonia yoori nakhiyon i otule Yinsa aari omphetachaaye eta owaalotta. Oto ti aari mpavu wa Yinsa wakathi wa ethhu-yoojiwa ya osikhu, na ti othuuto eenameliyeyo vamweyo wa

Yinsa khumuuzela yoori: "Mbwana paani anttelaaye wuuzukuluwela?"  
<sup>21</sup> Wakathi Pheeturu amooniyeevo khuri: "Mbwana, khi otu?"

<sup>22</sup> Khunjipu Yinsa yoori: "Hatha nkhamma miiyo katakha yoori ye eeye haayi mpakha miiyo oruti, weeyo enuujali niini? Ila weeyo okilotte miiyo." <sup>23</sup> Khwa ethhiipo khumwazeyela vakanthi wa attwi yoori nakhiyoni otule khaari oteela ofwa. Ila Yinsa khaalupiye yoori khaari oteela ofwa; aalupiye yoori: "Nkhamma miiyo katakha yoori eeye haayi mpakha miiyo oruti, weeyo enuujali niini?"

<sup>24</sup> Otu ti nakhiyoni anlazaaye oshaahiti wa vitthu zaya epo na aatikhiyeeyo. Ninjuwa yoori oshaahiti awe pi wookhweele.

<sup>25</sup> Yinsa aretta vitthu kiina theenya zawaatta. Eriwaka wakhula moote yeettiye waatikhiwa, kinoona yoori hatha voolumwenku wooshi khayaari wiyyavo puuro zootthiiwavo kithaapu zaari weettelaaye waatikhiwa.

## Khaazi za Maswihaapa

### *Oweziwa wa Yinsa*

<sup>1</sup> Warakha yaka yamwanzo khaatikhiye kiwuuzaka weeyo Tiyoofilu, monkoni wa zooshi epile Yinsa arettiyeego na anozeliyeego, <sup>2</sup> mpakha siikhu aweziweeveo pinkuuni, paata ya owaanozela khwa owahi wa Rooho Ttakathiifu atthu apale awaathawuliyeeyo yoori eeye maaswihaapa. <sup>3</sup> Yinsa n'oosisimuwa awaapuweleliye ajithoonyezaka nanna nannazene yoori ti ye entta osisimuwa. Khwiya vamote na yo mpakha siikhu arupayiini enttaka omoona, opiyana mwaasa na ojama vamote, na attakhulaka vitthu monkoni wa ofwalume wa Nnyizinku. <sup>4</sup> Wakathi aari ojaavo na maaswihaapa awe Yinsa khuwaaza yoori: "Mwihileewo Yeruzaleemu, mwiwejele etile kiwuuziyeenini aahitiyeeyo Paapa. <sup>5</sup> Yaahaya awoosani na maati, ila nkathhi wa siikhu vattithiiru, mweeyo mwinteeela woosiwa na Rooho Ttakathiifu."

<sup>6</sup> Yo khumuuza: "Mbwama, wakathi aya pi othhuupo ontelaaye owninkha ofwalume wa Nnyizinku atthu a Ezirayeele?"

<sup>7</sup> Yinsa khuwaajipu yoori: "Kahi pantte yenu ojuwa wakathi ama siikhu Paapa attattikhyeego ofwalume awe. <sup>8</sup> Ila mweeyo mwinteeela winkywa owahi wa Rooho Ttakathiifu ewishukelani, mwinteeela wiya mashahiti aka, waaza Yeruzaleemu na Yudeya yooshi, Samariya mpakha ohali wiisheliyeewo olumwenku."

<sup>9</sup> Paata ya wiisha olupa mattakhuzi apa, khuweziwa pinkuuni, eettaka omweekesesela olawaka khupuwa liwiku khunkutela khuhisala amoona. <sup>10</sup> Yo khusala nalelo ari wookhontola maasho aya enkesaka otulu ye eettaka olawa, khupuwa aluke awiri awaliye kuwo zoolakala, <sup>11</sup> khuwooza yoori: "Mweyo akalileya, otulu mwineekesa-niwo? Yinsa alaziweeyo vakatthi venu khuweziwa pinkuuni onteela oruti khwa nanna ethhiipile mwimooniyeezo alawaka."

### *Matiiyasi oninrentteri Yuuda*

<sup>12</sup> Aphano maaswihaapa khulankha vamwaako oniithiwaaye Oluveera oriyyeeyo kharipu na sitati ya Yeruzaleemu. <sup>13</sup> N'oofiya khuwela nyuupa ya vatulu nhali amakiyemoo, maaswihaapa aya apo aari Pheeturu, Yaahaya, Yaakhumpa na Antere; Filiipe, Tome, Paturumeewu na Mateewuzhu; Yaakhumpa mwaana wa Alufayo, Simawu Zelooti na Yuuda mwaana wa Yaakhumpa. <sup>14</sup> Apo khaazi yaya yaari okhusanyeya na olompa wakhula siikhu, na aakha akinaaya vamote na Mariyamu mamaawe Yinsa na atthwiize.

<sup>15</sup> Aphano siikhu moote mamuumini miiya na eeshiriini aakusanyeyiye vhali vamote. Pheeturu khulankha khweemela khulupa awoozaka mamuumini ooshi yoori: <sup>16</sup> "Atthwiizaku, zaarina yooretikhana zooshi epile Rooho Ttakathiifu alupeyeezo nkathhi ya ntakhuze la Nnyizinku khwa Daawuuda monkoni ya Yuuda, othuuto awaalokoziyeeyo atthu olawa onkhola Yinsa. <sup>17</sup> Yuuda aya oto aari wa khunti yetthu, aari oretta phantte ya khaazi ethiiti.

<sup>18</sup> Ila mwaasa wa nzurukhu enkhiweeyo khumuuzanyisa Yinsa, nzurukhu aya khuuzanyela nshapa. Aakhweliye mmashapa mwawe ntumpho khufwa. Erukulu yawe khuphwetuwa marupo awe ooshi

khumwazeyela vathi. <sup>19</sup> Atthu ooshi a Yeruzaleemu khujuwa. Apho nshapa ntthile khutthajiwa nzina khwa luuka yaya yo la Akelataama: liriina maana a 'nshapa la taamu'.

<sup>20</sup> Nliivuru la Zaburi yaatikhiwamo yoori:

'Nhali mwawe ethamiwe ahiikhalemo hatha ntthu.'

Khwaatikhiwa theenya yoori

'khaazi yawe asalane ntthu nkina.'

<sup>21</sup> Apho ninthawula ntthu nkina nintthe nkhuntti mweththu eeya shaahitiwa osisimuwa wa Mbwana Yinsa. Ila ona ya wiiya ntthu aari onilot-takaaye mphule naari ovirakamo Yinsa ari haayi, <sup>22</sup> waaza wakathi opule Yaahaya aari woosavo mpakha siikhu Yinsa alaziweeveo vakatthi vetthu aweziwaka pinkuuni.'

<sup>23</sup> Aphano, khuthoonyiwa atthu awiri: Yuusufu aarina nzina likina la Barisapa, woojuwanika wiiya ntthu wa waaminey, na nlume nkina aari wiithiwaaye Matiiyasi. <sup>24</sup> Nawiisha atthu khulompa araka: "Mbwana, weeyo ti onjuweeyo rooho za atthu ooshi. Khwa atthu apa awiri nintakha onithoonyeze onthawuliyeeyo" <sup>25</sup> yoori akhole khaazi ya omaaswihaapa vamote na-fweyo, eti Yuuda ahitakheeni khweetta puuru yaari onsuhaaye." <sup>26</sup> Paata ya toole khweekesiwa nasipu khusala enthoonya Matiiyasi. Khwa ethiipo ye khuphakanyeya na apale khumi na mmote aasaliyyeeyo khwiya khumi na awiri.

## 2

### *Ota wa Rooho Ttakatthiifu Siikhu ya Takhiriima*

<sup>1</sup> Efiyeevo siikhu ya takhiriima amamlottela a Yinsa ooshi aakhusanyeyiye vamote. <sup>2</sup> Nasaapiru khuta huula yoolankha pinkuuni wupuka nkama pheevo yaari ovumaaye saaneene, khwiitaala nnyupa wooshimo mphule aakusanyeyiyeemo. <sup>3</sup> Khuwaapuwela eththu yaari wuupuwaaye nkhamma nlimi la moottho laari waawanyeyaaye khusala linkwela vakhula ntthu veeshwa vawe. <sup>4</sup> Ooshi khwiya awiitaala Rooho Ttakatthiifu, khwaaza ottakhula luuka pheevo khwa nanna wakhula ntthu Rooho Ttakatthiifu yaari onthoonyezaazo ottakhula.

<sup>5</sup> Yeruzaleemu aarivo ayudeya awaatta aari omwaaputwaaye Nyizinku aalankhiyeeyo khapila zooshi za olumwenku. <sup>6</sup> Ooshi n'oosila huula etile khwiya ooshanka. Khukusanyeya vahali vamote maana ooshi aasiliye ovuma wa huula ya etile, na wakhula ntthu aari osila khwa luuka yawe. <sup>7</sup> Aari oshankawene ethiipo milomo khuma khusala olupa yoori: "Atthu apa ntthakhulaaye apha ooshi khahi akalileya apa?" <sup>8</sup> Khi ensulukhwana toovi fweeyo niwaasiilaka khwa luuka zetthu? <sup>9</sup> Fweeyo nalankha Parithiya, akina alankha Mediyya, akina Elaami, akina Mesopotamiya, akina Yudeya, akina Kapatosiya, akina Pontu na Aasiya, <sup>10</sup> akina alankha Firijiya, akina Pamfiliya, akina Misuri na pantthe za Liibiya kharipu na Sireeni, na anamathotola alankhiyeeyo Rooma. <sup>11</sup> Waaza mayaaahuti mpakha apale eettiyeeyo ntini ya maya huuti, akereeti na aarapu. Ila nawaasiila khwa luuka zetthu yo alupaka vitthu zootikinisa na khuluzeene za Nyizinku. <sup>12</sup> Ooshi aari

oshankisiwa khuhisala ajuwa hatha etthu yoolupa, khusala oozelana araka: "Maana a vitthu zaya epi niini?"

<sup>13</sup> Atthu akina khusala awaatheya maaswihaapa apale owoozaka yoori eetta ohapaliwa.

### *Otafusiri wa Pheeturu*

<sup>14</sup> Aphano Pheeturu na ashirikhaawe apale khumi na mmote khulankha khusala owooza atthu yoori: "Maswahipu zaka mayaahuti mpakha mooshi mweeyo mwiniikhalaaye nti wa Yeruseleemu, mwisiileze etthu kintakhaaye olupa: <sup>15</sup> mweeyo mwinoona nkhamma atthu apa eettiye ohapaliwa, ila wala khahapaliweeni nkhamma mwinaakanyerazo mpakha apha saawuuni ya supu. <sup>16</sup> Vitthu zaya epi zirettikhaniyeeyozo zaalupiwe rakuzeene ti napiya Yowele araka:

<sup>17</sup> Nnyizinku alupa yoori: "Siikhu za mwiisho  
kinteela oweeshushela atthu ooshi Rooho Ttakatthiifu.

Aana enu aalume na apa aakha anteela alupa

vitthu zinteeelaaye orettikhana khwa nzina laka,  
mashaapu anteela ooothoonyeziwa vitthu zootikinisa.

Ana khuuluvale anteela wiiyana jozi.

<sup>18</sup> Khwa akarumeya aka aalume na aakha,  
yo kiniweekha Rooho yaka siikhu zaya ethiipo  
yo anteela olaleya hapari zaka.

<sup>19</sup> Kinteela othoonyeza vitthu zootikinisa,  
kinteelaazo ottha otulu pinkuuni  
kinteela opuwisa vitthu zootikinisa vathi voolumwenku,  
zinteeela orettikhana minjuza,

enteela wiiyavo taamu na moottho mawiku na loosi.

<sup>20</sup> Njuwa lithatuwe liiye looripa,  
mweezi na-ye othatuwe wiiye taamu,  
epoza enteela orettikhana khapula  
ehinafiye siikhu khuulu ya siifwa za Nnyizinku.

<sup>21</sup> Ila atthu ooshi apale anttelaaaye onkhuwela Nnyizinku  
yoori awaawuuni antta wiusurukha!"'

<sup>22</sup> Mweeyo mwa atthu a Ezirayeele mwisiileze mattakhuzi apa: Yinsa wa Nazareeti tu wookhupaliwa ti Nnyizinku. Ye Nnyizinku oretta minjuza za waatta vakatthi venu mweeyo na alama kiina zaya khwa ye. <sup>23</sup> Othuuto Nnyizinku awinkhiyeenini mweeyo arina shawurina, ila mweeyo khkusanyeya na atthu ootakhala rooho khunkhomela vansalapa khumuula. <sup>24</sup> Nnyizinku othuuto ansisimula muufwa na khunsinttisa owahi woofwa maana yaari etthu yooronyiwa ye oshintti ti oofwa. <sup>25</sup> Daawuuda anlopeziye yoori:

'Wakhula wakathi kaari omoona Mbwana ari omaasho waka  
maana ye ori nkhone-nlume aka, yoori kihiveveluwe.

<sup>26</sup> T'iito rooho yaka yoofurahi na nlimi laka linintithimisa;  
miili aka onteela onvumula orina nroromelo,

<sup>27</sup> maana khunteela olikha nafusi yaka nkhapuri  
khunteela okanswi,

khukhupaleli na khunteela okhupalela yoori

Nttakatthiifu awo oone vitthu zootakhala nkhapuri.

<sup>28</sup> Wakinozela tarikhi ya ohaayi,  
onteela okiitaaza furaha amana kiiya vamote na-weyo.'

<sup>29</sup> Pheeturu khuri: "Attwizaka, mwikiwejele kiwuuzeni saana saana monkoni wa papeethu Daawuuda yoori ye afwa khuzikhwa khapuri yawe eri mmuti mwetthu nttmphu mpakha leelo eti. <sup>30</sup> Ye aari napiyu na aari ojuwa yoori Nnyizinku ahitiye yoori vakatthi wa peewu yawe aari onteela opuwavo mfwalume ari oteelaaye osalana puuro yawe ya ofwalume. <sup>31</sup> Daawuuda aari ojuwa ethu Nnyizinku aari weettelaaye oretta t'iito aari aalupiyeeyo monkoni wa osisimuwa wa Al-Masiihu othuuto Nnyizinku ahanlikhiyeyo nkhapuri, wala mwili awe ophomowa. <sup>32</sup> Nnyizinku ansisimula Yinsa, fweeyo naamashaahiti a vitthu zaya epo. <sup>33</sup> Khuweziwa olawa wiikhala nkhone-nlume wa Nnyizinku, ye enkhiwa Rooho Ttakatthiifu ti Papaawe nkhamma ethiipile aamwahitiyeeyo apha eetta oniitthelela t'iithiiti mwinoonaaye na mwinsiilaaye enasaapi eti. <sup>34</sup> Daawuuda khaweziveeni pinkuuni, ila atukhunu alupaka yoori:

'Mbwana amuuza Mbwanaaka yoori:

"Wiikhale pantteya nkhone weelume aka,  
<sup>35</sup> mpakha miiyo kiwaattha maatuwi awo awaaluwatthele."

<sup>36</sup> Aphano, atthu ooshi a Ezirayeele ana yoojuwa yoori: Yinsa, othuuto mweeyo mwankhameliyeeyo, Nnyizinku omwinkha wiiya Mbwana na wiiya Al-Masiihu.

<sup>37</sup> Paata yoosiila mattakhuzi apale, khuwaapattha kupari nroho mwaya, khumuuzela Pheeturu na maaswihaapa apale akinaaya yoori nkahayani: "Attwiizetthu, aphi niri je?"

<sup>38</sup> Pheeturu khawaajipu araka: "Mwithupwiye na wakhula mmote wa mweeyo oosiwe khwa nzina la Yinsa Al-Masiihu yoori mwipatthe nswammaha wa twampi zenu. Mwintta opokhera tthuvo ya Rooho Ttakatthiifu. <sup>39</sup> Ahiti yaya eto ti yenu, mweeyo mpakha aaneenu na atthu akina awoolepawo: khwa apale ooshi Mbwaneethu Nnyizinku awaakhuweliyeeyo."

<sup>40</sup> Khwa mattakhuzi menkeene Pheeturu khusala awaalipisela atthu na awaatumenela araka;" Mwijuusuru vakatthi ya khapila ya atthu apa otakhala rooho." <sup>41</sup> Atthu awaatta khukhupalela tafusiiri ya Pheeturu, khujilakelela olawa woosiwa. Siikhu yaya etile atthu eekezeleyiye khwiiya alufu ttatthu.

*Nanna aari wiikhalaayo atthu apale aakhupaliyeeyo*

<sup>42</sup> Yo aari ooshututela masomi apale oosomisiwa ti maaswihaapa aari oosilana, na okusanyeya oja vamote na olompa vamote. <sup>43</sup> Ooshi aarina woova nwulweene, maana Nnyizinku eetta ovira aretttaka vitthu zootikinisa na minjuza zawaatta khwa khaazi ya maaswihaapa apale. <sup>44</sup> Atthu ooshi apale ankhupaliyeeyo Yinsa aarina oosilana wookhomaala saaneene, wakhula etile yaari opattikhanaaye eetta omeelana. <sup>45</sup> Akina aari wuuzanyisa mashapa aya na vitthu zaya: onzurukhu aya n'ootiisa oteela owaamela azaaya, wakhula ntthu aari winkhiwa khwa khhiiwa ya othowiwa wawe. <sup>46</sup> Yo aazowereliye okusanyeya wakhula siikhu vaje wa Nyuupa ya Nnyizinku na mmawayna na omeyelana phaawu ajaka na furaha khuluyene na rooho yeemaani,

<sup>47</sup> ansifwaka Nnyizinku. Atthu ooshi aari wiiya ootuveliwa phi menttezi aya. Apho Nnyizinku wakhula siikhu aari ovira oweekezelaka atthu ootakha wuusurukha.

### 3

#### *Ovonosiwa wa Ntthu Woorakala*

<sup>1</sup> Siikhu moote Pheeturu na Yaahaya eetta owelela nnyupa woosifwi-wamo Nnyizinku wakathi woolompa wakathi mittatthu wa makaaripi. <sup>2</sup> Aarettiye athuuliwe ntthu aavokoliweeyo ari woorakala eettaniwaka vanlako wa nyuupa yoosifwiwamo Nnyizinku, onittheliwaaye Nlako Wooshapweya, yoori asala awaavekela zimoola atthu apale aari ovi-ramo. <sup>3</sup> Amooniyeevo Pheeturu na Yaahaya aviraka nnyupa mphule, khusala awaavekela zimola. <sup>4</sup> Pheeturu na Yaahaya khusala amweekesa saana khulupa yoori; “Oneekese fweeyo!” <sup>5</sup> Mwinyi otule khusala aweekesa woophalevo awejelaka opwekhherele etthu ya wenkhiwa pi yo.

<sup>6</sup> Pheeturu khulupa yoori: “Akina feeta na tahapu, etthu kiriina ethiito kintta owinkha. Khwa nzina la Yinsa Al-Masiihu Nnazareeti, etteta!”

<sup>7</sup> Khunkhalela nkhono-nlume awe khusala anshashulela yoori alankhe, nasaapiru moolu na khoza zawe khwiiya za wookowa. <sup>8</sup> Mwinyi otule khwiirukha khweemela khwaaza weettetta. Khuvira nnyupa woosifwi-wamo Nnyizinku vamote na Pheeturu na Yaahaya, eettataka na wi-irukha ansifwaraka Nnyizinku. <sup>9</sup> Wakathi atthu ooshi amooniyeevo eettaka weettetta na ansifwaka Nnyizinku, <sup>10</sup> khunjuwa yoori mwinyi othuutule aari okitirakaaye wiikhala vaNlako Wooshapweya wa nyuupa yoosifwiwamo Nnyizinku khusala alola zimola. Ooshi aya khwiiya ootikinisiwa na oshanka channu wa vitthu zanrettikaneliyeyo.

#### *Otfafusiri wa Pheeturu Nnyupa wa Nnyizinku*

<sup>11</sup> Wakathi mwinyi otule aavoniseweyo ti Pheeturu na Yaahaya aari owaaperekhaavo. Atthu ooshi khwiiya ootikinisiwa, khusala atthirela attaaphale aarivo Pheeturu na Yaahaya, puuro yaari wiithi-waaye nlako wa Seleyimaana. <sup>12</sup> Ooniyeovo vitthu epile, Pheeturu khuwaaza yoori: “Meezirayeele mwaasa aya niini mwisutisiwaka pi vitthu epo? Mwaasa aya niiri mwueeyo mwineekesaka fweeyo nkhamma etthu emweettessiyeyo mwinyi otu owahi wetthu ama tthakaraka yetthu? <sup>13</sup> Nnyizinku wa Eburahiima wa Esiyaakha na wa Yaakhumpa, Nnyizinku wa mamarehemu etthu ansifu karumeya awe Yinsa, othuutule mweeyo mwaawenkhieeyo atthu yoori amuule na khunkatthalaa vamote na Ponsiyu Pilatu, ye afilakeleliye onfukula. <sup>14</sup> Mweeyo mwankhana vamwantiiwa Nttakatthiifu wa shariya, khuveka yoori afukuliwe namahusuti. <sup>15</sup> Mweeyo khumuula mwennyewe ohaayi, ila Nnyizinku khunsisimula muufwa na fweeyo namashahiti wa vitthu zaya epo. <sup>16</sup> Mwaasa wa waamini nzina la Yinsa, nzina ntiittho lan-vonisa mwinyi otu mwinimaanaaye na mwininjuwaaye. Amini entaaye khwa nzina la Yinsa yamwinkha ekumi y'eekhweele, nkhamma ethiipo mwinoonaaye mooshi.

<sup>17</sup> Aphano attwizaku, miiyo kajuwa yoori mwaarettiye mwihijuwaka ata na anamalokozela enu. <sup>18</sup> Ti nanna yaya Nnyizinku eettessiyeyo etile aalupiyeeyo awoozaka yoori Al-Masiihu awe aari oteela ohoowa. <sup>19</sup> P'aapho mwithapwiye mwirutule wa Nnyizinku yoori twampi zenu ziiye zooswammihawa. <sup>20</sup> Neekeselaka wakathi woovumula ontaaye wa

Mbwana na Al-Masiihu aperekhiweeyo tokhiya asulani anitthiwaaye Yinsa. <sup>21</sup> T'iito Yinsa ona ya wiiya pinkuuni mpakha ofiya wakathi Nnyizinku anttelaaye arutisa vitthu zooshi ethhiipile Nnyizinku aari olu-paazo waaza raku vakatthi wa manapiyu. <sup>22</sup> Munsa khulupa yoori: 'Mb-wana Nnyizinku onlawa anlanse vakatthi wa attwiize napiyu mmote nkhamma miiyo; mwinsiileze zooshi anttelaaye owuzani. <sup>23</sup> Otule ahininsilezaaye napiyu aya ota antta olaziwavo vakatthi wa atthu awe.'

<sup>24</sup> W'ookhweele manapiyu ooshi, waaza Samuweele na apale akinoko aya, alaleya vitthu zinrettikanaazo siikhu epi. <sup>25</sup> Mweeyo mwaana-marithi wa manapiyu na olapha Nnyizinku alaphaniyeeyo mamare-hemu aya, ye aamuuziye Eburahiima yoori: 'Mwaasa wa peewu yawo atthu ooshi a voolumwenku anttela wiiya aaparikhiiyiwa. <sup>26</sup> Nnyizinku nansisimula karumeya awe, amperekha omwanzo eene vakatthi venu mweeyo yoori ooparikhiiyeni na oolikisakani zootakhala epile mwaari orettaazo wakhula ntthu.'

## 4

### *Okholiwa wa Pheeturu na Yaahaya phi Atthunkhulu a Mayaahuuti*

<sup>1</sup> Wakathi Pheeturu na Yaahaya aari ottakhulaavo owoozaka atthu, khutavo mahaakhimu na attunkhulu a anamweekesela a nyuupa ya Nnyizinku na masatukhi. <sup>2</sup> Yo aari ookafilikha venkivene mwaasa wa yoori maaswihaapa entta owaasomisa atthu, na owooza yoori owaapho osisimuwa wa ananfwa nkhamma etthiipile Yinsa asisimuweiyeezo. <sup>3</sup> Aphano yo khunkhola Pheeturu na Yaahaya, khuwaattha nkalapooso yaari makaaripi khuwaalikha mpakha ocha. <sup>4</sup> Ila atthu asiiliyeeyo hapari epile aari olupaaye enkeene eyiye omwamini Yinsa. Khwa etthiipo mamuuni khusala avira eekezeleyaka khufiya etthu ya alufu thaanu.

<sup>5</sup> Siikhu yaphiiri khuthukumana afwalume, mashawuriya na anamwaatikha nti wa Yeruseleemu. <sup>6</sup> Atthu aarivo pi apa: Anaasi, nttunkhulu wa mahaakhimu a tiini, Khayiifwa, Yaahaya, Alishantere na atthu ooshi apale aari oojama wa nttunkhulu wa mahaakhimu a tiini. <sup>7</sup> Yo khuruma okhuwelwa maaswihaapa apale awiri Pheeturu na Yaahaya. Khusala owoozela araka: "Mwirettaniyeeyo vitthu epi owahi-ni wala nzina-ni?"

<sup>8</sup> Pheeturu aari wa wiitaazaniwa Rooho Ttakathhiifu, khusala alupa awoozaka: "Afwalume na mashawuriya, <sup>9</sup> yoori mweeyo mwanikhuwela leelo yoori mwinuuzele vitthu zooshaphe ninretteliyeozy ntthu otule woorakala na nanna ovonisiweezo. <sup>10</sup> Ila apho mwijuwe saana mweeyo mooshi mpakha na atthu a nti wa Ezirayeele yooshi yoori khwa nzina la Yinsa Al-Masiihu wa Nazareeti, othuutule mweeyo ena mwankhomeliyeeyo na othuuto Nnyizinku ansisimuliyeeyo muufwa, nzina lawe tthi linvoniyeeyo namarakala otu mwinimoonaaye apha. <sup>11</sup> Yinsa othuuto

'Iiwe lookatthaliwa ti mweeyo  
anamajeka manyupa,  
ila khurettiwa wiiya  
ti liwe linkhomaazaaye nyupa.'

<sup>12</sup> Khaavo ntthu nkina ariina owahi wa owoosuru atthu: vathi apha wooshivo khahiivo nzina la ntthu nkina linuusurwaaye.”

<sup>13</sup> Attunkhulu apale ooshi khwiya onshankela Pheeturu na Yaahaya mwaasa wa ominala aarinaaye, yo khuhaakiki yoori khweele apa Yinsa ori vamote na-yo. <sup>14</sup> Mwaasa yoori aari oretta omoonaka ntthu otule woorakala aavonisiweeyo, yo khuhisala oona hatha paatuli khwa Yaahaya na Pheeturu. <sup>15</sup> Khuwooza yoori asaruliwemo nnyupa mphule aathukumaneliweemo. Aphano atthunkhulu apale khwaaza onyakulisana atthaaporu, <sup>16</sup> oozelanaka yoori: “Nkahayani niwaarettele niini? Atthu ooshi Yeruzaleemu eti ajuwa yoori yo aretta minjuza zawooneya zihinikheeteyaazo. <sup>17</sup> Apho yoori vitthu epo zihitepe omwajeyela mmuti wooshimo, nlaweni na atthu ooshi asiila, nlaweni niwoopopisa niwoozaka yoori ahirutele owooja atthu vitthu monkoni wa nzina la Yinsa.”

<sup>18</sup> Aphano khukhuweliwa Pheeturu na Yaahaya khurutela nnyupa ntumpule aasaruliyeemo, khuriwa yoori ahittakhule hatha ethu na ahisomise monkoni wa Yinsa. <sup>19</sup> Pheeturu na Yaahaya khuwaajipu araka: “Mwinoona yoori ethu ya eto ti yoohaakhi mmakhono wa Nnyizinku wuushututelani mweeyo khunlikha Nnyizinku. <sup>20</sup> Fweeyo khaninwahi olikha olupa epile nooniyeezo na nisiliyeezo.”

<sup>21</sup> Khuwaatutushu khuwoojela khuwaalikha, maana khaari woona ethu woowaahukhumwela na atthu ooshi aari onsifwu Nnyizinku mwaasa wa minjuza epile zarettikhiiyeeyo. <sup>22</sup> Mwinyi otule aavonisiweeyo wa minjuzavo aarina hirimu yooziti nyaakha arupaiini.

### *Lompa ya anamalothela a Yinsa a mwanzo*

<sup>23</sup> Wakathi Pheeturu na Yaahaya aleviweeveo, n'oofiya vahali aarivo ashirikhaaya, khusala awaathatelela zooshi epile aari wuuiziwaaye phi attunkhulu a mahaakhimu na anamalokozela a tiini. <sup>24</sup> Paata ya ashirikhaaya apale osiila mattakhuzi apale, ooshi aya khusala alompa araka: “Mbwna, ti weyo wumpiyeyo pinku na vathi, pahari na vitthu zooshi ziriye voolumwenku. <sup>25</sup> Weeyo wattakhula khwa Rooho Ttakathiiifu vakatti wa papeethu Daawuuda nrumeaya awo oraka:

‘Makaafiri ankatipukhaka-ni  
wala atthu anaakanyerelaka-ni vitthu zoohiiyi ethiipo?

<sup>26</sup> Attunkhulu a vathi ajilokottela  
na afwalume akhusanyeya yoori  
anlupatthe Mbwna na alupatthe Al-Masiihu  
otule Ye anthawuliyeyo.’

<sup>27</sup> Ekhweele-khweele, Herooti na Pontiyu Pilaatu akusanyeya na makaafiri na atthu akina a Ezirayeele, ooshi ari sitati ethiiti na niiya yonlupattha Yinsa nrumeaya awo othuutu onthawaziyeeyo. <sup>28</sup> Na theenya amarisela maana aretta zooshi epile weeyo walakeliyeeyo oretta khwa owahi orinaaye. <sup>29</sup> Apho weeyo Mbwna, woone shawuri ariinazo zootakhala khwa fweeyo na onikhomaze yoori nilaleye ntakkuzi lawo woohoovi hatha ethu. <sup>30</sup> Wookole nkhono awo waaze ovonisa na oretta minjuza na vitthu zooshankisa khwa nzina la nrumeaya awo Yinsa.”

<sup>31</sup> Paata ya maaswihaapa apale wiisha olompa puuro etile aari akhusanyeyiyeevo, khusala esakhinyeya ooshi khuweelaala Rooho Ttakatthifu, khusala alaleya ntakhuzi la Nnyizinku woohoovi hatha ethtu.

*Anakhiyoni vitthu zaya eeta omelana*

<sup>32</sup> Ooshi rooho zaya zaari moote, akhili zaya zaari sawa-sawa. Khaarivo hatha mmote aari yoonaaye ethtu yawe wiiya yaawe. Apale aari opatthaaye ama apattha etta waawanya na azaaya zooshi aari wiyyanaazo. <sup>33</sup> Maaswihaapa aari ovira alawelaka oshaahiti osisimuwa wa Bwana Yinsa na owahi nwulweene, na yaaweeshukheliye rehema khulyeene. <sup>34</sup> Vakatthi vaya khaarivo hatha ntthu mmote woorthowiwa, apale aarina mapuwa ama manyupa eetta wuuzanyisa, nzurukhu aya n'ootiisa, <sup>35</sup> n'oowenkha maaswihaapa yoori awaawanyeze atthu ooshi wakhula ntthu khwa kхиima yoothowiwa wawe.

<sup>36</sup> Yuusufu, anthajiweeyo nzina la Baranabe, aari haakhimu, owawe waari Shiipere, nzina lawe lirina maana oori 'maatumerela', <sup>37</sup> khuzzanyisa nshapa lawe, nzurukhu aya khutiisa khuwenkhe maaswihaapa.

## 5

*Ananiyya na Safira*

<sup>1</sup> Aarivo mwinyi mmote ari wiithiwaaye Ananiyya, muukhaawe aari wiithiwa Safira, na-yo khuzanyisa nshapa laya. <sup>2</sup> Ye khusilana na muukhaawe yoori nzurukhu opule ahilawane wooshi olawa Owenkha maaswihaapa wooshi, khuthuula nkina khupweha opule nkina muukhaaya khulawana wa maaswihaapa.

<sup>3</sup> Aphano, Pheeturu khumuuzela Ananiyya yoori: "Weyo, wanlikhelela toovi sheetwani oozokaka nrooho mwawo mpakha weeyo ofiyelela ohata Rooho Ttakatthifu na khujivithela nzurukhu wuuzanyisiyeeyo nshapa lawo? <sup>4</sup> Niri talili khalaari nshapa lawo? Wala paata ya wuuzanyisa nzurukhu aya khawarina weeyo enu omwennyewe? Khi eti ewuupuwelisiye oretta vitthu nkhamma epo niini? Weeyo apho ohooni yoori wawaahata anaatamu, ila wanhatu Nnyizinku."

<sup>5</sup> Paata ya Pheeturu wiisha olupa mattakhuzi apale, Ananiyya eetta ofwa attaphale. Atthu ooshi apale aari omoonaaye na aari osilaaye mattakhuzi aya apale khwiya awoova. <sup>6</sup> Khuta atthu khunkafwani khusala alawa onzikha.

<sup>7</sup> Eviriyeovo woora mittatthu muukhaawe khuteela weekesa ojuwa ethtu emuuliyeeyo mannawe. <sup>8</sup> Pheeturu khumuuzela yoori: "Nkahaya nkakuuze nzurukhu muuzanyisiyeeyo nshapa lenu pi otthuupo?"

Muukha otule khujipu yoori: "Pi otthuupo."

<sup>9</sup> Pheeturu khumuza yoori: "Epo za niini mweeyo osiilana yoori mootoote Rooho ya Mbwana? Atthu apo oniwoonaaye vamilako apho pi atthaapo anzikhiiyeeyo mannawo, alawa oozikhe na-weyo."

<sup>10</sup> Kharipuzeena attaphale, na-ye etta ofwa. Khuthuuliwa khulawa khuzikhiwa mpawa wa mannawe. <sup>11</sup> Atthu ooshi a khuntti etile yaari onlottaaye Nnyizinku khwiya awoova na apale ooshi aasiiliyeeyo vitthu epo zaarettikhaniyeelo.

*Maaswihaapa aniwaavonisa alwele enkeene*

<sup>12</sup> Minjuza za waatta zaari orettikhanaazo vakanthi wa atthu zaari orettiwaazo pi maaswihaapa. Atthu ooshi apale onkhupaliyeeyo Yinsa aari okusanyeya nlipantta laajekiyeeyo ti Soleyimaana. <sup>13</sup> Atthu akina etta woova okusanyeyana yo, ila atthu enkeene aari owaattottopela maaswihaapa apale. <sup>14</sup> Atthu omwamini Yinsa khusala atepa weekezelya waaya alumbe mpakha aakha, <sup>15</sup> khufiyelela atthu akina awaathula alwele n'ooowaapweha ntarikhi awaatthiiye vanrepa ama voolili yoori nenkawu Pheeturu amana avirikha, yo owaapatthe mwiifuli awe. <sup>16</sup> Aari ota atthu enkeene theenya oolankha miti mikina za waattamela Yeruzaleemu awaatisika alwele aya na apale aari ohoochiwaaye pi majini: ooshi khusala eeya oovonisiwa.

### *Olupatthiwa wa Maaswihaapa*

<sup>17</sup> Aphano, ntunkhulu a mahaakhimu na ashirikhaaya ooshi mpakha na atthu ooshi a khuntti ya masatukhi khuwaata nrime. <sup>18</sup> Khuruma yoori okholiwa maaswihaapa khuwaafukela nkalapooso. <sup>19</sup> Aphano osikhu wa siikhu ethiitile, nlayikha la Nnyizinku khufukula milako za kalapooso khuwaasarulela vaje, <sup>20</sup> khuwooza yoori: "Mwilawe nnyupa wa Nnyizinku, mwilawe mwawaasomise atthu monkoni wa ohaayi opu mpheya."

<sup>21</sup> Maaswihaapa khushututela mattakhuzi apale ooziweeyo ti nlayikha ntthile, n'oocha khulawa mpakha vaje wa nyuupa ya Nnyizinku, khwaaza owaasomisa atthu. Aphano ntunkhulu a mahaakhimu a tiini na ashirikhaaya khuwaakusanya atthu na anamalokozela a tiini ooshi a Ezirayeele, khuruma olawa olaziwamo maaswihaapa apale nkalapooso. <sup>22</sup> Anamweekesela apale a kalapooso, n'oofiya nkalapooso khuhwaasikanimo, khuruti n'oota khusala alupa yoori: <sup>23</sup> "Khaniwaasikaneenimo na nasikana kalapooso ya eri ethiipile naafukiyeego na vaje aarivo anamweekesela akina, ila vakanthi nifukuliyeeyo milako khuhiimo hatha ntthu." <sup>24</sup> Paata ya atthunkhulu apale, anamweekesela a nyuupa ya Nnyizinku na atthunkhula a mahaakhimu osiila mattakhuzi apale, yo khwiyya ooshanka mwaasa woohijuwi nanna eettettiyeego maaswihaapa apale.

<sup>25</sup> Wakathi otthuupule khutavo ntthu aari olupaaye owoozaka yoori: "Atthu apale mweeyo mwawaatthiyeeyo nkalapooso, miiyo kawaasikana vaje wa nyuupa wa Nnyizinku eettaka owaasomisa atthu." <sup>26</sup> Khulankha anamweekesela na ntunkhulu aya khuweettela khusala awaatiisa, woohiwaalazili hatha kuvu, maana aari woova ovonyiwa pi atthu apale aari owaasomisaaye.

<sup>27</sup> Khuwaalawana nnyupa aari othukumanaamo atthunkhulu yoori oozeliwe ti ntunkhulu wa mahaakhimu. <sup>28</sup> Khuwooza yoori: "Fweeyo khanaawuuziyeni yoori mwihirutele owaasomisa atthu mattakhuzi monkoni wa nzina nttho. Ila mweeyo khusala mwivira mwisomisaka Yeruzaleemu yooshi na olikha toowo mwintakha onilokoveza fweeyo ofwa wa ntthu aya oto."

<sup>29</sup> Pheeturu na ashirikhaawe khujipu araka: "Ti yooshapweya yamwanzo onshututela Nnyizinku zayita anaatamu!" <sup>30</sup> Nnyizinku wa apapa zethu ansisimula Yinsa nkhopuri, othuuto mweeyo mwankhomeliyeeyo vansalapa khumuula. <sup>31</sup> Ila Nnyizinku antta phantte ya nkono-nlume awe khumwinkha ofwalume na khunretta

wiiya namusuru yoori atthu a Ezirayeele apatthe othupwiya na opokherele nswammaha wa twampi zaya.<sup>32</sup> Fweeyo n'aamashahiti a vitthu zaya epo, vamote na Rooho Ttakathiifu, etile Nnyizinku owenkhiyeeyo apale aninshututelaaye."

<sup>33</sup> Paata ya maaswihaapa olupa matthakhuzi apale, yo khwiya okafilikha khusala atakha owoola. <sup>34</sup> Aarivo mfwarizeewu mmote aari wiitthiwaaye Kamaliyeele, aari namanozela wa kano na aari ntthu wooshitahiwa pi atthu a waatta. Ye khulankha khweemela vakatthi wa afwalume apale, khulupa yoori maaswihaapa asuruleliwe vaje khapula vattithiiru. <sup>35</sup> Khuwoza attunkhulu azaawe apa yoori: "Mweeyo atthu a nti ya Ezirayeele, mwiiyane ophoole na vitthu mwintakhaazo owaaret-tela apo. <sup>36</sup> Khwa siikhu ziviriyeozy nyumani aapuweleliye ntthu aari wiitthiwaaye Thewuda aari ojilupezaaye wiiya mfwalume, aarina atthu aari onlottaaye oofiya miiya nne. Aphano ye khuuliwa, atthu awe apale aari onlottaaye khuhiiheli hatha vahali ooshi khumwazeya. <sup>37</sup> N'oofwa ye aapuweleliye nkina wa Kalileya aari wiitthiwaaya Yuuda, wakathi atthu aari waatikhwaayo yoori alawe anthawule mfwalume, oto atthu enkeene aakhupaleliye onlotta, ila na-ye khuuliwa anamalottela awe ooshi khumwazeya. <sup>38</sup> Apho, kiniwuuzani yoori atthu apa awiri mwi-waarettetele hatha etthu, mwiwaalikhe alawe maana nkhamma shawuri za ntthu na khaazi ya ntthu khinrupaza ehiisheeni. <sup>39</sup> Ila nkhamma ti ya Nnyizinku, mweeyo khanintela wiishisa, amana mwitakha oretta toowo mwinshittanana Nnyizinku."

<sup>40</sup> Attunkhulu apale khukhupalela mattakhuzi apale alupiyeeyo Kamaliyeele, khuruma okhuweliwa maaswihaapa apale yoori avire nnyupa, khujaphiwa khuuri yoori ahirutela olaleya hapari za Yinsa, nawiisha khulikhiwa.

<sup>41</sup> Maaswihaapa apale khusaruwa ari woofurahi mwaasa woohukhumweliwa olaleya nzina la Yinsa. <sup>42</sup> Yo khuhilikhki khusala avira alaleya wakhula siikhu nnyupa wa Nnyizinku na nyuupa khwa nyuupa, woohilikhki olupa Yinsa ti Al-Masiihu.

## 6

### *Othawuliwa wa atthu sapa*

<sup>1</sup> Siikhu ethhiipile eettaka ovira aattaka atthu aari anlattaaye Yinsa, mayaahuuti aari ettakhulaaye ekereku atthaaporu aari owaattakhula mayaahuuti apale aari attakhulaaye eheberayiku, mwaasa yoori manankhwele aya eetta osahawiwaka amana yaawanyiwaka etthu-yooja ya wakhula siikhu. <sup>2</sup> T'iito maaswihaapa apale khumi na awiri aawaakhusanyiyeyo anakhiyoni ooshi, khusala awooza yoori: "Ajama zetthu, khaninwahi alikha alaleya ntthakhuzi la Nnyizinku khusala nawanya etthu-yoojiwa. <sup>3</sup> Attwiizethu, mwiwaathawule vakatthi venu atthu sapa ooshitahiwa, awiitaala Rooho Ttakathiifu na oofuwa yoori niwenkhe khaazi eto, <sup>4</sup> na-fweyo nisala nilompa na olaleya ntthakhuzi la Nnyizinku.

<sup>5</sup> Mattakhuzi apale khuwaatuvela ooshi aya, khunthawula Shiteefanu, nlume wa wiitaala amini na Rooho Ttakathiifu, anlikha Filipi, Porokoro, Nikanore, Timomu, Parimenashi na Nikolawu, otule aari owaalattelelaaye mayaahuuti wa nti wa Antiyookiya.

<sup>6</sup> Khuwaathoonyeza atthu apale vakatthi wa maaswihaapa, atthaapo khuwaalampela awaatheliye a makhono.

<sup>7</sup> Etthiipile ntakhuzi la Nnyizinku khusala limwazeya. Khusala avira awulaka anakhiyooni wa waakhuvavo Yeruzaleemu. Theenya khuntti khuluyeene ya mahaakhimu a tiini khusala ashutulele amini.

### *Kalapooso ya Shiteefanu*

<sup>8</sup> Stefano ntthu wa wiitaala mahala na owahi wa Nnyizinku aari oretta vitthu zootikinisa na alama vakatthi wa atthu. <sup>9</sup> Attaaphale khupuwa atthu a nnyupa enthukumaniaamo apale ‘Ooleviwa’, mayaahuuti a Sireene na Alishanteriya na apale a nti ya Silisiya na Aasiya. Atthu aya apo khwaaza onyakulisanana Shiteefanu, <sup>10</sup> ila khuhisala awahi oshintta opuwa na Rooho etile aari ottakhulanaaye.

<sup>11</sup> Aphano khupankiwa atthu akinoko alupe yoori: “Nansiila Shiteefanu attakhulaka mattakhuzi onkufurwela napiyu Munsa na Nnyizinku.”

<sup>12</sup> Mwaasa wa mattakhuzi atthaapo, khuwaatapanya atthu, anamalokozela a tiini na anamanozela kano khunkhola Shiteefanu khunthuula khulawana onyuupa woophuteyiwaho milattu. <sup>13</sup> N’oofiya khusala anlokoveza mattakhuzi oovanyeya aari oraaye: “Mwinyi otu okhitiri ottakhulawo pure opuuro okhuno woottakatthifuwo na nkathhi wa kano. <sup>14</sup> Nasiila eriwaka Yinsa Nnazareeti apwechela puuro eti na khuzukuliza thwapiya aalikhiiyezo napiyu Munsa.”

<sup>15</sup> Wakathi amweekesiyevo, ooshi apale eekhaliye onyuupa woophukaniwaho khoona omaasho wawe ompuwaka nkhamma nlayikha.

## 7

### *Ojakisa wa Shiteefanu*

<sup>1</sup> Aphano, ntunkhulu wa mahaakhimu a tiini khumuuzela Shitefaanu yoori: “Shariya mattakhuzi apa onlokoveziwaaye?”

<sup>2</sup> Shiteefanu khujipu araka: “Atwiizaku na apapazaku mwisiileze! Nnyizinku wa Nuuru ampuweleliye Eburahiima, papeethu, wakathi ari nti wa Mesopotamiya ahinalawe wiikhala Harani, <sup>3</sup> khumuuzza yoori: ‘Oleemo mmuti mwawo vakatthi wa ajamaazo, olawe nti kinttelaaaye wuuthoonyeza.’ <sup>4</sup> Eburahiima khulankha nti wa Akaliteeni, khulawa khwiikhala Harani. Paata yoofwa papaaawe, Nnyizinku khuntisa nti opu mwiniikhalaaye. <sup>5</sup> Nnyizinku khawinkheene hatha eritho moote, wala puuro ya luwattho yawe, ila amwaahitiye yoori: ‘Paata ya weeyo, peewu yawe enlawa yapatthe olumwenku.’ Hatha nkhamma wakathi aya opule eettiye hiina pure mwaana. <sup>6</sup> Nnyizinku anttakhulaniye khwa nanna ethiipo yoori: ‘Peewu yawe enttela osafirela nti wa malaponi, anlawa arettiwe oviiithwaana na ohukhumwiwa nyaakha miyya nne. <sup>7</sup> Miyo kinhukhumu nti ontalaaye owaarettia oviiithwaana, attaapho aleewo okhulewa ate akaaputu puuro ethiti.’ <sup>8</sup> Nnyizinku khumwinkha Eburahiima osiilana wa okiriya. Tiito, Eburahiima khunvokola Esiyaakha khunkhiriyisa siikhu yanaane yovokoliwa wawe. Elottelanaka Esiyaakha khunvokola Yaakhumpa, khwa apaapa atthaapa khupuwa khumi na awiri.

<sup>9</sup> Apapa zethu aya atthaapo khusala anlazela nrima Yuusufu. Khumuuzanisa a mwiitthwaana khulawaniwa Misuri, ila Nnyizinku aari vamote na ye. <sup>10</sup> Khunkholelela muhoowa wawe wooshimo na

khumwinkha akhili khumpatthisa oshapweyiwa mmakhono wa lipili Firawuuna, mfwalume wa Misuri. Mfwalume otu aamwinkhiye Yuusufu onsatoro wa Misuri na khumwinkha ottunkhulu wa atthu ooshi a vaje vawe.

<sup>11</sup> Paata ya toole, khupuwa jala Misuri yooshi na Kanaani na ohoowa mwinkeene, amarehemu etthu khuhisala awahi opattha etthu-yoojiwa. <sup>12</sup> Yaakhumpa n'osiila yoori eewaakho tiriku Misuri, khuwaaperekha amarehemu etthu swaafu yamwanzo. <sup>13</sup> Swaafu yaphiiri yoorutelawo amarehemu etthu, Yuusufu khujijuwisa vakatthi wa attwiize, Firawuna khuwahi owaajuwa ajaama a Yuusufu. <sup>14</sup> N'oojjuwisa Yuusufu khuwaaruma atthu omweetala papaaaze na ajamaaze ooshi, aari sapiini na athaanu atthu eene. <sup>15</sup> Aphano Yaakhumpa khusala alawa Misuri, ottuukho afwiyeewo ye na amarehemu etthu akina. <sup>16</sup> Mwiili aya khuthuuliwa khurutiseliwa Shekemu khuzikhiwa nlikulukupo ntthile oozanyiyeyo Eburahiima na aana Hamori wa nzurukhu khata. <sup>17</sup> Ofiyaka wakathi Nnyizinku aari weettelaaye oretta etile aamwaahitiyeyo Eburahiima, khuweekezela atthu etthu khwiyya a waatta nti wa Misuri. <sup>18</sup> Khwinkhiwa ofwalume ntthu nkina, ahaari ojuwaawe hatha etthu monkoni wa Yuusufu, khwiyya mfwalume wa Misuri. <sup>19</sup> Mfwalume otule khusukuliwela ajama etthu na khuwaahukhumu amarehemu etthu, awaakhanyerelaka owaalikha aana aya yoori ahiwahi owula.

<sup>20</sup> Wakathi otthuupule khuvokoliwa Munsa, oto aari mwaana wooshapweya oomaasho wa Nnyizinku. Khwa nyeezi mittatthu eettaka oleliwa vaje wa apapaze. <sup>21</sup> N'oolikha oleliwa pi apapaze, mwaana wa Firawuuna khunthuula khusala anlela nkhamma mwanaawe wonvokola. <sup>22</sup> Munsa khuleliwa na ojuwa wooshi wa Amisuri, khwiyya ntthu woowahi khwa a mattakhuzi awe na khaazi zawe. <sup>23</sup> Apatthiyeovo hirimu ya nyaakha arupayiini, Munsa khulekela olawa owaathotola attwiize Meezirayeele. <sup>24</sup> Amooniyeevo Mmisuri anhukhumwaka Mwiizirayeele, khumpattha katapu mwaasa woohukhumwiwa, khumuula Mmisuri otule. <sup>25</sup> Ye aari woona yoori attwiize enlawa yaweeleye yoori Nnyizinku onta onrumeyela yoori awoosuru, ila yo khayaari oweeleya hatha etthu. <sup>26</sup> Siikhu yaphiiri, Munsa khulawa vahali aari oshezaavo Meezirayeele awiri, khusala awooza yoori: ‘Alume, mweeyo mwa ntthu na ttwiye; khi mwaasa aya niini mwilwaazanaka?’

<sup>27</sup> Ila nlume otule aari onlwaaazaaye nzaawe, khunsukhuma Munsa khumuza yoori: ‘Paani oothawuliyeeyo yoori wiiye namalokozela etthu na namphuka milattu zetthu fweeyo? <sup>28</sup> Ontakha okuula nkhamma omuuliyeozo Mmisuri taana?’ <sup>29</sup> N'osiila mattakhuzi apale, Munsa khutthirela nti wa Midiyana, khusala eekhala ottuukho nkhamma nletto, khuwaapattha aana awe awiri.

<sup>30</sup> Avirisiyeevo nyaakha arupayiini ottuukhule, khumpuwelela nlayikha vamweeke wa mootho wa haari ozimaaye n'yaara, kharipu ya mwaako Sinaayi. <sup>31</sup> Munsa vakatthi wa mootho opule khwiyya wootikinisiwa. Khususela attaaphale yoori oonachache, khusila huula ya Mbwana Nnyizinku: <sup>32</sup> ‘Miyo ki Nnyizinku wa amarehemu apapazenu, Nnyizinku wa Eburahiima, Nnyizinku wa Esiyaakha, Nnyizinku wa Yaakhumpa.’ Munsa eettaka othukumela mwaasa wa woova, khuhisala awahi ofunula maasho awe. <sup>33</sup> Aphano Mbwana

Nnyizinku khumuza yoori: ‘Ovule jampali epo ziri mmoolu mwawo, mwaasa wa puuro li weeyo oriyo nti ttakatthiifu.’<sup>34</sup> W'eekhweele keetta owoona atthu aka ahukhumwiwaka nti wa Misuri. Kasiila olila waya khwiishuka yoori kiwoosuru apho. Ote nasaapi, miiyo kurutisele nti wa Misuri.<sup>35</sup> Otu ti napiyu Munsa, othuuto mwankatthaliyeeyo na mattakhizi apa yoori: ‘Ti paani oothawuliyeeyo yoori wiiye namalokozela ethu na namaphuka ethu?’ Ye aaperekhiwe ti Mwennyewe Nnyizinku yoori eeye namalokozela na namwawuni aya vakatthi wa nlayikha lampuweleliyeeyo vamweeke wa moottho wa haari ozimaaye.<sup>36</sup> Munsa othuuto awaalaziyeewo amarehemu ethu Meezirayeele nti wa Misuri, arettaka vitthu zootikinisa na minjuza za waatta nti wa Misuri, pahari yookhuttuwa na nyaara aavirisiyeemo nyaakha arupaiini.

<sup>37</sup> Otu ti Munsa othuuto awooziyeeyo Meezirayeele yoori: ‘Nnyizinku onlawa ampuwise vakatthi wa attwiizenu napiya mmote nkama miyo.’<sup>38</sup> Ye aari woothukumana, n'yaara na nlayikha laari ontakhlanaaye vamwaako Sinaayi na amarehemu ethu, khupwekherela mat-takhuze haayi yoori anuuze na fweyo.

<sup>39</sup> Ila amarehemu ethu khukatthala oshututela, na theenya khunkhijilela na nroho mwaya khurutela Misuri.<sup>40</sup> Khumuza Arawu yoori: ‘Onaattalele nluku yoori anilokoze maana Munsa aya otule anilaziyeeyo Misuri khanijuweeni ethu empatthiyeeyo.’<sup>41</sup> Wakathi otthuupule khwaattala sanamu yoolattanana mompe. Khutiisela twaha na khuretta njampo khwa osifu etile aarettiyeeyo na makhono aya.<sup>42</sup> Ila Nnyizinku khuwaasusu na khuwenkha waaputu matthottowa nkama ethiipo yaatikhieeyo a kithaapu ya manapiyu yoori:

‘Kaari miiyo  
otule mweeyo mwanliseliyeeyo  
twaha na zaakha  
nyaakhu epile arupaiini mweekhaliyeeko n'yaara,  
mweeyo omathi wa Ezirayeele?’

<sup>43</sup> Olikha toowo, mwajeka  
puuro ttakatthiifu ya Moloke  
na matthottowa a nluku enu Reefwa  
sanamu mweeyo mwaattaliyeeyo yoori  
mwisale mwaaputu wa attaapho,  
miiyo kintta wuuperekhani  
ohali okinoko olıkha Babiloniya.’

<sup>44</sup> N'yaara amarehemu ethu aarina huma yoosilana, nttumpho Nnyizinku aari ottakhulananaamo Munsa heema yaya eto yaattaliwe nkama ethiipo Nluku anrumiyeezo Musa yoori aattale, alikanisanaka etile anthoonyeziweeyo.<sup>45</sup> N'oopwekherela heema etile yoosilana, amarehemu ethu khuthuula khumwinkha olokozela Yoshuwa, wakathi athuuliyeovo nti wa omathi opule Nnyizinku eekariyeeyo. Heema yaya eto khwiiya nti otthuupo mpakha wakathi wa Daawuuda.<sup>46</sup> Otu khupwekherala mahala mmakhono wa Nnyizinku, khuveka yoori anjekeliye nyuupa Nnyizinku wa Yaakhumpa.<sup>47</sup> Ila ti Seleyimaana anjekeliye nyuupa yaya.

<sup>48</sup> T'iito Nnyizinku khaniikhala nnyuupa yoojekwa ti pinaatamu, nkhama etthiipo alupiyeezo napiyu yoori:

<sup>49</sup> 'Pingu khukulu yaka,  
vathi tarikhi ya moolu aka.  
Nanna-ni ya nyuupa  
mweeyo mwintelaaye okijekela?  
alupaka Mbwana,  
ama, onteela wiiya vayi  
puuro yaka yoovumula?  
<sup>50</sup> Khihiye miyo kaattaliyeeyo  
vitthu zaya epo zooshi?'

<sup>51</sup> Atthu ookifilina ootakhala rooho zaya epo zooshi! Mweeyo mwinlikanana na amarehemu enu aari okatthalaaye Rooho Ttakatthiifu! <sup>52</sup> Napiyu-ni amarehemu enu ahinlupattheeni? Yo amuula otule aari ohaayi wa anashariya, othuuto mwinrettiyeeyo onamalupattha na ohusuti. <sup>53</sup> Mweeyo mwipwekhereliyeeyo kano khwa khaazi za malayikha wala khuhi shutuleli."

### *Ofwa wa Shiteefanu*

<sup>54</sup> Asiiliyeovo mattakhuzi apale khuwaapattha katapu nroho mwaya, khusala anlumele meeno. <sup>55</sup> Ila Shiteefanu wawiitaala wene Rooho Ttakatthiifu khweekesa otulu khoona siifwa za Nnyizinku na Yinsa ari nkhono-nlume wa Nnyizinku. <sup>56</sup> Khulupa yoori: "Kinoona pinku eri yoofkuwa na Mwaana wa Pinaatamu eemeliye nkhono-nlume wa Nnyizinku."

<sup>57</sup> Ye khwaaza okhuwa woonyakulavo, yo khuttiyela mashiilo aya na khunrikanyela. <sup>58</sup> Khunsusisela othetekete wa sitati khusala anoonya na mawe, oshahiti aya khunlikhavo shapu aari wiitthiwaaye Saawulu yoori asalane kuwo zawe epile aawaliyeozo. <sup>59</sup> Eettaka onvonya etthiipile, Shiteefanu khusala alompa araka: "Mbwanaka Yinsa, pwekherela nafusi yaka." <sup>60</sup> Attaaphale khukokhora khusala akuwa channu araka: "Mbwanaka, ohiwalokoveze twampi eti!" Nawiisha olupa mattakhuzi apale, khufwa.

## 8

<sup>1</sup> Saawulu na-ye aari khuntti ya atthu atthaapale akhupaleliyeeyo wuuliwa Shiteefanu.

### *Saawulu oniwaalupattha anamalottela a Yinsa*

Siihku zaya epile yaapuwiye lupattha khuluweene ya anamalottela a Yinsa Yeruzaleemu. Ila maaswihaapa khayaawaasikanaye maana yo aarettiye amwazeyiye ari Yudeya mpakha Samariya. <sup>2</sup> Atthu akina ooshapweya rooho khunthuula Shiteefanu otule khulawa khunzikha eettaka onlilela. <sup>3</sup> Aphano Saawulu aari ojilipisa yoori eeshise khuntthi ya atthu apale aari onlottaaye Yinsa. Ye aari ovira nyuupa khwa nyuupa khusala awaakho alume na aakha apale aari onlottaaye Yinsa n'oowaattha nkalapooso.

### *Otafusiri wa Filiipe nti wa Samariya*

<sup>4</sup> Atthu apale omwaziyeeyo aari ovira alaleyaka hapari wakhula vhali aari ofiyaavo. <sup>5</sup> Filiipe eettiye sitati ya Samariya, n'oofiya khusala

owooza atthu monkoni wa Yinsa.<sup>6</sup> Wakathi atthu asiiliyeevo saneene hapari epile aari olupaazo Filiipe na knoona minjuza aari arettaaazo, yo aashineheliye mattakhuzi apale ye aari olupaaye.<sup>7</sup> Atthu akina aariina majini aari owaasaruwa eettaka onyakhula, alupa oorakala enkeene opiya ti sapiyeene na apale oorakala.<sup>8</sup> Sitati yaya etile waapuwyeyo furaha khuluyene.

### *Simawu Namajintta*

<sup>9</sup> Aarivo mwinyi mmote aari wiithiwaaye Simawu, aari wiikhalaaye sitati ethiitile, aari nshawi, atthu ooshi asamariya aari onshankela vitthu za majintta aari orettaazo. Ye aari ojoona wiiya munumunu,<sup>10</sup> atthu ooshi, waaza ntunkhulu mpakha nsimaana na onttottopela araka: “Otu onaaye aariinaaye walankha pinkuuni, onjuwiwaaye yoori owahi nwulweene.”<sup>11</sup> Aphano, yo khusala alipana othuuuto mwaasa yoori aaziye raku oretta vitthu za majintta za owaatikinisa.<sup>12</sup> Ila paata ya Filiipe owaatafusirela monkoni wa hapari zooshapweya ya ofwalume wa Nnyizinku khwa nzina la Yinsa Al-Masiihu, yo khukhupali na khulawa khoosiwa, alume enkeene mpakha aakha.<sup>13</sup> Simawu othuuto aari orettaaye majintta, na-ye khunkhupali Yinsa khoosiwa, khusala onlottelela Filiipe wakhula phantte aari weettaaye, oonaka vitthu zootikinisa na minjuza miwuluzene zaari orettikhanaazo.

<sup>14</sup> Wakathi maaswihaapa asiiliyeevo ari Yeruzaleemu, oriwa atthu a Samariya opokherela ntakhuzi la Nnyizinku, khumperekhawo Pheeturu na Yaahaya.<sup>15</sup> Yo n'ooifya khwaalompela atthu aya apale yoori apokherela Rooho Ttakatthiifu.<sup>16</sup> Maana khaarivo hatha mmote wa yo ompokhereliyeyo Rooho Ttakatthiifu, ila eettiye woosiwa paasi khwa nzina la Bwana Yinsa.<sup>17</sup> Pheeturu na Yaahaya khuwaattela makhono atthu apale khupokherela Rooho Ttakatthiifu.<sup>18</sup> Simawu nawoona yoori ntthu aari opokherela Rooho Ttakatthiifu paata ya ottheeliwa makhono ti maaswihaapa, ye khulaza nzurukhu,<sup>19</sup> khuwooga maaswihaapa yoori: “Kintakha na-miyo mwikinkhe owahi nkhamma otthuupo mwiriina, kisala kiwaattheela makhono atthu n'oopokherela Rooho Ttakatthiifu.”

<sup>20</sup> Pheeturu khunjipu yoori: “Nzurukhu awo otthuupo onta wuuthowelelisa! Weeyo onoona yoori tthuovo ya Nnyizinku enuuzanyiwa na nzurukhu?<sup>21</sup> Weeyo nkathhi wa khaazi yethu eti Nnyizinku khaniwinkha hatha phantte maana rooho yawo khahi rooho saana.<sup>22</sup> Othupwiye vitthu zootakhala na olompe khwa nzina la Nnyizinku. Talili othuuto oswammihhi khwa ofikhiri opo woovonyeya wa nroho mwawo,<sup>23</sup> kinoona yoori nroho mwawo ziwaamo pure vitthu zoovonyeya na washawashawiwa ti twampi.”

<sup>24</sup> Simawu khujipu yoori: “Mwikilopele, yoori zooshi epo mwilupiy-eego khwa miyo zihikirettikhanele.”

<sup>25</sup> Paata ya Pheeturu na Yaahaya olawela oshahipi na otafusiri ntakhuzi la Nnyizinku khulankha khusala arutela Yeruzaleemu, olawaka aari ovira atafusiraka miti mikina za Samariya ethiitile.

### *Filiipe na Mwiitiyoopiya*

<sup>26</sup> Nlayikha la Mbwana khumuuzza Filiipe yoori: “Weette ntarikhi elikhya raku oviriwa eriye phantte ya kusini elankhiyeeyo Yeruzaleemu eniishukhelaaye sitati ya Kaaza.” <sup>27</sup> Filiipe nauuuziwa khusala alawa. Ntarikhi khunsikana mwinyi mmote wa Etiyooopiya woohimemi, alankhaka Yeruzaleemu eettaka owawe. Oto aya aari nakhazi nwulu enkhiweeyo othokorela mizurukhu za Rayisi nwulu wa Etiyoopiya aari wiitthiwaaya Khantase. Eettiye Yeruzaleemu omwaaputu Nnyizinku. <sup>28</sup> Arutaka, apakhiriye varikisho khusala asoma kithaapu ya napiyu Ezaaya. <sup>29</sup> Aphano, Rooho Ttakatthiifu khumuuzza Filiipe yoori: “Otthirele rikisho etile osala olottelela.”

<sup>30</sup> Filiipe khutthirela rikisho etile khusikana khusala ansila mwiitiyooopiya otule asomaka kithaapu ya napiyu Ezaaya, ye khumuuzela yoori: “Mattakhuzi apo mwinsomaaye aniweleyani?” <sup>31</sup> Ye khujipu araka: “Anikeeleza toovi kihina ntthu wookeeleza?” Khumuuzza Filiipe yoori owele varikisho attaaphale aarivo ye. <sup>32</sup> Mattakhuzi aari osomaaye mwiitiyooopiya otu a nkithaapu mpule ari olupa toono:

“Ye aathuuliwe nkhamma pwittipwithi eneettelaaye wuuliwa,  
nkha pwittipwithi yoohittakhuli

    eri vakatthi wa apale ankasaaye ovuziwa pwittipwithi,  
Ye khaattakhuliye hatha etthu.

<sup>33</sup> Ye aari woojipushuwisa ila khukattaliwa  
    khuretteliwa vitthu zoohiyi ya shariya.  
Khi paani ariina ruhusa ya owaattakhula  
    apale aninlottaaye?

Ye ohaayi awe khahiyi wa vathi apha.”

<sup>34</sup> Aphano, mwiitiyooopiya khumuuzela Filiipe yoori: “Mattakhuzi apa a nkithaapu eti ya Ezaaya aninlupa paani? Ye mwennyewe ama ntthu nkina?” <sup>35</sup> Paata ya toole, Filiipe khwaaza omuuza hapari zooshapweya mwiitiyooopiya otule, khwa mattakhuzi atthaapale ari osomaaye a nkithaapu ya Ezaaya.

<sup>36</sup> Ari ntarikhi enttaka olawa ooshi, khufiya vahali aarivo maati. Mwiitiyooopiya otu khumuuzza Filiipe yoori: “Apha awaapho maati. Niini ekhattazaaye woosiwa miiyo?” <sup>37</sup> Filiipe khunjipu yoori: “Khayiivo hatha etthu moote enkhattazaaye paata ya weeyo okhupali na rooho yawo yooshi.” Ye khujipu yoori: “Miiyo kinkhupali yoori Yinsa Mwaana wa Nnyizinku.” <sup>38</sup> Aphano, khweemesa rikisho etile, khwiishukha owiri, Filiipe khulawa khumoosa mwiitiyooopiya otule. <sup>39</sup> Wakathi ovuwiyeemo mmati, Rooho Ttakatthiifu khunthuula Filiipe, mwiitiyooopiya otule khuhimooni theenya, na-ye khurutela safari yawe etile aari weettaaye ari woofurahi saaneene. <sup>40</sup> Filiipe khulawaniwa sitati ya Azotu, khulikhiwa ottuukho ti Rooho Ttakatthiifu, khusala avira alawaka mpakha Sezareeya alaleyaka hapari zooshapweya wakhula vahali aari ofiyaavo.

<sup>1</sup> Zinrettikhanaru vitthu zaya epo, Saawulu aarettiye ahilikhele-laka owaatuturucha na owaala maaswihaapa a Mbwana. Khulankha khulawa wa ntunkhulu a mahaakhimu a tiini,<sup>2</sup> khumvekela warakha yoori alawe mmamanyupa anthukumaniwaamo sitati ya Damashiku yoori amana awaasikanamo anamalottela a Yinsa, waaza alumbe mpakha aakha awaathuule awaalawane Yeruzaleemu awaatthe nkalapooso. <sup>3</sup> Khulankha khusala alotta tarikh, asaleelaka ofiya Damashiku, khumpuwela nuuru yaalankha pinkuuni khusala yaara aphale aarivo, <sup>4</sup> Aphano ye khukwela vathi, khusiila huula yaari omuuzaaye yoori: “Saawulu, Saawulu mwaasa aya niini onkilupatthe-laaye?”

<sup>5</sup> Saawulu khuuzela yoori: “O paani weeyo, Mbwana?”

Ye khujipu araka: “Miiyo ki Yinsa, otule weeyo oninlupatthaaye.

<sup>6</sup> Olankhe olawe nsitati ena anttelaaye owuuza weeyo ethtu yooretta.”

<sup>7</sup> Atthu aari olawanaaye vamote Saawulu khweemela ari oosuthuwa, khusiila huula khuhisala amoona hatha ntthu. <sup>8</sup> Saawulu khulankha vathi aphale akweliyeevo, afumulaka maasho khuhisala awahi woonahatha ethtu, atthu khunkholela khunlawana mpakha Damashiku. <sup>9</sup> Khiikkala siikhu ttatthu ari woohooni, woohiji ethtu na woohinywi ethtu.

<sup>10</sup> Damashiku aarivo namalottela aari wiithiwaaye Ananiyya. Mbwana khunkhuvuwa muulottha yoori: “Ananiyya!”

Khujipu yoori: “Lape, Mbwana.”

<sup>11</sup> Mbwana khumuuzu yoori: “Olawe owawe Yuuda, tarikh, enithi-waaye Yookowa, omuzelele ntthu mmote wa Tarusu aniiithiwaaye Saawulu. Otu aya entta olompa; <sup>12</sup> muulottha khumooma mwinyi aari wiithiwaaye Ananiyya atiye anttheeliye makhono yoori arutele woonah.”

<sup>13</sup> Ananiyya khujipu yoori: “Mbwanaka, kaaza raku osiila vitthu anrettazo mwinyi oto na vitthu zooshi zootakhala aniwaarettelazo mattakatthiifu awo Yeruzaleemu. <sup>14</sup> Ye ata okhuno khwa ruhusa ya attunkhulu a tiini yoori ate awaakhole ooshi apale ansifwaaye nzina lawo.”

<sup>15</sup> Ila Mbwana khumuuzu Ananiyya yoori: “Olawe! Mwinyi oto tu waaka, yaana yaka ethawuliweeyo yoori ethuule nzina laka ewaalawanelaka makafiri na afwalume awe na vakatthi wa atthu a Ezirayeele. <sup>16</sup> Kinlawa koothoonyezeni nanna atthu anttelaazo ohoowa mwaasa wa nzina laka.” <sup>17</sup> Aphano, Ananiyya khulankha khulawa. N’oofiya khuvira nnyupa khunttheela makhono khumuuzu yoori: “Twiyyaku Saawulu, Mbwana Yinsa, otule oopuweleliyeevo ntarikh ataaka ohali waari olankhaawo, akiperekha miiyo yoori orutele woonanwiye wa wiitaala Rooho Ttakatthiifu.” <sup>18</sup> Nasaapiru vitthu nkhamama mavalako khusaruwa mmaasho, khwaaza woonah opheya. N’oolankha khulawa khoosiwa. <sup>19</sup> Wakathi ajiyyevo ethtu-yoojiwa, khurutelamo kuvu zawe.

### *Saawulu onlaleya hapari zooshapweya*

Saawulu aavirisasiye siikhu vattitthiiru aari na anamalottela sitati wa Damashiku. <sup>20</sup> Wakathi otthuupule khwaaza olaleya mmamanyupa a Nnyizinku yoori Yinsa mwaana wa Nnyizinku. <sup>21</sup> Ooshi apale aari onsiliaaye khwiya ootkinisiwa channu, khusala alupa yoori: “Khahiyoo otthuutu nlume otule aari weekesakaaye owoola apale ooshi aari osifwaaye

nzina la Yinsa? Khaatiye okhuno oteela owaathuula atthu nkhamma anamafukiwa yoori awaalawane Yeruzaleemu wa attunkhulu a ana-malokozela a tiini?”<sup>22</sup> Saawulu khusala avira ajilipisaka wakhula si-khu, mayaahuuti khusala amwaakanyerela yoori onikhala Damashiku athoonyezaka yoori Yinsa ti Almasiihu.

<sup>23</sup> Ziviriyeovo siikhu za waatta, mayaahuuti khusilana ooshi aya wahati woomuula,<sup>24</sup> ila Saawulu khwiiya woojuwa shawuri zaya epile. Nthana na osikhu aari wiiya oothotolela milako za sitati etile yoori apatthe omuula.<sup>25</sup> Anakhiyoni awe khunthuula n'osikhu khunwelisa khumwishushela onyuma khwa vahali wa pwejiweeve wa muuri.

<sup>26</sup> Wakathi afiyyeovo Yeruzaleemu khutakha owaakusanya anakhiyoni a Yinsa, ila ooshi khusala amoova mwaasa woohinkhupali yoori khweele nakhiyoni.<sup>27</sup> Aphano Baranabe khuwaathuula maswihaapa khusala awooza yoori ntarikhi, Saawulu amoona Mbwana amuuziyeyo nanna awahiyezo olaleya hapari zooshapweya woominyalavo khwa nzina la Yinsa Damashiku.<sup>28</sup> Attaaphale, Saawulu khwiiya vamote na yo, khusala eettetta woohoovi Yeruzaleemu, alaleyaka woominyalavo khwa nzina la Mbwana.<sup>29</sup> Khusala attakhula na weelezana na mayaahuuti aari ottakhulaaye luuka ya ekereku, ila apo aya aari otakha omuula.<sup>30</sup> Attwiize n'oojuwa mattakhuzi apale, khunthuula khunlawana nti wa Sezareeya khumpakhirisa yoori alawe nti wa Tarusu.

<sup>31</sup> Siikhu zaya epo kereja yaari ya heeri nti wooshi wa Yudeya, Kalileya na wa Samariya. Atthu a waamini aari otepa okhomaala na Rooho Ttakatthiifu na waatta, khwa meekhazi oomoova Mbwana.

### *Aneya na Dooroka*

<sup>32</sup> Pheeturu khusala eettetta wakhula phantte, khulawa owaathotola attakatthiifu apale aari wiikhalaaye Liida.<sup>33</sup> Otthuukhule khunsikana ntthu woarakala aari wiithiwaaye Aneya eettiye orapalela nyaakha minaane.<sup>34</sup> Pheeturu khumuuba yoori: “Aneya, Yinsa Al-Masiihu onta wuvonisa! Olankhe okhuje olili awo.” Ye khulanka nasaapiru.<sup>35</sup> Atthu ooshi apale aari wiikhalaaye Liisa na Sarona, n'oosiila khunkhupali Mbwana.

<sup>36</sup> Yoopa aariwo nakhiyoni wankha aari wiithiwaaye Tabita, khwa luuka ya ekereku lina maana a Dooroka. Ye aari oreтикаaye vitthu zooshapweya na winkha zimola.<sup>37</sup> Khumpattha olwele khufwa, mwi-ili awe khoosiwa khupwehiwa nnyupa ya korofwa yootulu.<sup>38</sup> Liida waattamaniye nti wa Yoopa. Wakathi asiiliyeovo anakhiyoni yooriwa Pheeturu ari nti wa Liida, khuwaaruma atthu awiri olawa omuuza yoori: “Ohirupaze ota okhuno niriiwo.”

<sup>39</sup> Pheeturu khulawa vamote na yo, n'oofiya khuthuuliwa khu-lawaniwa nnyupa ya korofwa y'ootulu. Anakhwele ooshi khunzukulela khusala alila na anthoonyezaka ajapi na kuwo kiina Dooroka aattaliye-ezo ari vamote na yo.

<sup>40</sup> Pheeturu khuwoza ooshi osaruwa okatthi okhule, attaaphale khukokhora khusala alompa. Khulankha khulawa aphale aarivo muukha otule woofwa, khumuuba yoori: “Tabita, olankhe!” Ye khufunula maasho awe, khumoona Pheeturu khwiikhala.<sup>41</sup> Khunkholela khusala anlansa yoori eemele, aphano khuwaakhuwela anakhiyoni a anakhwele apale khuwenkha eettaka woona.<sup>42</sup> Vitthu epile khwiiya

zoofuwiwa sitati yooshi ya Yoopa, atthu a waatta khunkhupali Mbwana.  
<sup>43</sup> Pheeturu eekhaliye nti wa Yoopa siikhu za waatta, owawe mwinyi mmote aari wiitthiwaaye Simawu aari waattalaaye shapala za nyama.

## Warakha ya mwanzo ya Paawulu amwaatikhelaka Timootiyu

*Salamu*

<sup>1</sup> Miyo Paawulu, aswihaapa wa Yinsa Al-Masiihu khwa oruma wa Nnyizinku namuuusuru etthu na wa Yinsa Al-Masiihu nroromelo etthu, <sup>2</sup> kiniwaatikhela weeyo Timootiyu, mwanaka w'eekhweele nkathhi wa tiini yoori rehema, huruma na heeri ya Nnyizinku papeethu na ya Yinsa Al-Masiihu Mbwaneetthu, yiye vamote na-weyo.

*Phoole na anamanozela a mwentto woovonyeya*

<sup>3</sup> Nkhama ethhiipo kaawuuziyeezo wakathi opule kaari weettaavo nti wa Masedoniya, yoori amana osala nti wa Efeeziyu owaahirimize atthu akina yoori ahikhanyarele osomisa mwentto woovonyeya. <sup>4</sup> Owoozaka theenyia yoori alikhe olottela hantisi na waalaka mazina a marehemu. Epo zaya zintiisa onyakulisana na enlikhiswa mwentto wa Nnyizinku onlottaniwaaye amini. <sup>5</sup> Maana a masomi aya apa ophetana wa rooho y'ookemaani, na ojuwa othawula yooshapweya vakathhi wa yootakhala, na amini yoohiiyi yoonaafikhi. <sup>6</sup> Akinoko ajilaziyeemo, arutelaka olottela vitthu zootakhala zoohiina fwayita. <sup>7</sup> Yo antakha ojiretta wiyya anamanozela a kano za Nnyizinku, ila khiniweeleya, wala epile anlupaazo na haakhi yaya khanjuwa.

<sup>8</sup> Apha ninjuwacha yoori kano pi zooshapweya zirumeeyeliwaru khwa nanna zinlupaazo. <sup>9</sup> Nijuwaka ethhiipo yoori kano khazaawaateeliye atthu apale aneettettelaaye shariya, ila zaawaateeliye apale ooohiiyi a shariya na anamakhijili, zaawaateeliye makaafiri na anatwampi, zaawaateeliye anamatakhala-rooho na anamakufuru, zaawaateeliye apale aniwoolaaye apapazaya na amamazaya, zaawaateeliye apale aniwoolaaye azaaya, <sup>10</sup> zaawaateeliye anamajansili na apale aniwaalanaaye alumbe azaaya, zaawaateeliye apale aniwaakholaaye atthu na owoozanyisa na anamahata, zaawaateeliye apale an-laphaaye eettaka ohata, na ooshi apale mwentto woozuri ahintakhaaye. <sup>11</sup> Mwentto opo ori nhapari zooshapweya zinlankhaaye nkathhi wa nuuru ya Nnyizinku wa parakha, kinkhiweeyo miyo olaleya.

<sup>12</sup> Yinsa Al-Masiihu Mbwaneetthu akinkhiyeeyo kuvu, Ye akoona wiyya ntthu wa waamineya, khukinkha onrumeeyela, kininshukhurwela. <sup>13</sup> Miyo-ena omwanzo kaari namakufuru, namalupattha, namahusuti, wakathi aya opule miyo akaarina amini, etthu kaari orettaaye akaari ojuwa, apha kooneliwa huruma. <sup>14</sup> Rehema yooziti ya Mbwaneetthu khukiishukhela, khukipatthisa ompheta na omwaamini Ye. <sup>15</sup> Mattakhuzi apa pi ookhweele na ansuhi okhupaleliwa: Yinsa Al-Masiihu ti ye aatiyyeeyo voolumwenku oteela owoosuru anatwampi, wootepacha waya ti miyo. <sup>16</sup> Ti eto kooneliweeyo huruma, yoori khwa miyo, wootepacha waya, Yinsa Al-Masiihu akivilela yoori awaathoonyeze ooshi apale anttelaaaye omwaamini apatthe ohaayi wa mileele. <sup>17</sup> Apho, Mfwalume wa mileele attottopeliwe na asifwiwe siikhu

zooshi, Ye ahinifwaaye wala ahinooneyaaaye, Nnyizinku mmote othuuto. Amiina!

<sup>18</sup> Masomi atthaapo kinuutumerela weeyo mwanaka Timootiyu, nkhamma khwa weyo yuulupeziyeego Rooho Ttakatthiifu, wuupuwelaka mattakhuzi apa wuuziweeyo, onttela owahi wuumana viitha ya nnafusi, <sup>19</sup> ojilipisanaka amini na ojuwa othawula yooshapweya vakatthi wa yootakhala. Mwaasa woohitakhi othawula yooshapweya, atthu akina amini yaya apwetecha. <sup>20</sup> Akina aya ti Hemeeni na Alishantere. Yo kawaalikhela Epiliisi yoori awaahoowise, ajuwe ohikufuru.

## 2

### *Nina yoowaalompela atthu ooshi*

<sup>1</sup> Apho, ehinarettiwe hatha etthu, kinuuhirimizani olompa; lompa yookhola moolu, yoovekeleliwa anaatamu ooshi na lompa yooshukhwewala. <sup>2</sup> Mwiwaalompele afwalume na attunkhulu ooshi apale ariinaaye yenzi yoori fweeyo niiyane meekhazi a wiithaalaa, a heeri, eemaani na hishma khuluyeene. <sup>3</sup> Epo pi ziiyiye zooshapweya na zontuvela Nnyizinku Namuusuru etthu. <sup>4</sup> Ye ontakha yoori eeye a wuusurukha atthu ooshi na ajuwe haakhi.

<sup>5</sup> Nnyizinku ori mmote paasi,  
na namasiilanisa wa atthu na Nnyizinku  
na-ye ori mmote paasi,  
Yinsa Al-Masiihu pinaatamu,

<sup>6</sup> otu aleviyeeyo ohaayi awe  
khuripha hisapu za twampi za atthu ooshi,  
oshaahiti opu Nnyizinku enkha wakathi khwaamili.

<sup>7</sup> Akintta ohata kinlupa khweele, keetta othawuliwa yoori kiiye namaleya, kiiye aswihaapa na kiiye namanozela wa mattakhuzi apa a amini na a haakhi, khwa khapila zooshi.

<sup>8</sup> Apho, alume ooshi kintakha yoori wakhula vahali ankusanyeyaavo alompe alansaka makhono na rooho y'eemaani woohikatipukhi na woohinyakulisani.

### *Aakha apale eeyiye anamalottela a Yinsa*

<sup>9</sup> Aakha na-yo kintakha yoori awale kuwo wa hishimavo, ajishapweyise woohijitayiti khwa nanna eneezelaa, oshapweya waya ohiyye woofuka mattunttu oohifwayi wala owala thahapu wala osaka ama kuwo za waatta nzurukhu, <sup>10</sup> oshapweya waya wiyye wa khaazi zooshapweya nkhamma aakha animwaaputraaye Nnyizinku.

<sup>11</sup> Aakha, amana anozeliwaka ana yoojiithaaza na ojinyamaza.

<sup>12</sup> Akiniwaatakhisaa aakha onozela wala ojinkha yenzi vakatthi wa alume, ana yawiyya oonyamala. <sup>13</sup> Maana tthakuzi wa wumpiwa ti Adamu, aphano khumpiwa Haawa. <sup>14</sup> Aattettekhiweeyo khahiyo Adamu, muukha ti ye aattettekhiweeyo pi ohata wa Epiliisi, khusutukhwana akwelaka ntwampi. <sup>15</sup> Apho, aakha hatha nkhamma awaapattha aana, anuusurukha eeyaru nkathhi wa epaata na pheta, na ottakatthifu na hishma.

**3***Namalokozela wa ojama wa Nnyizinku*

<sup>1</sup> Mattakhuzi apa pi ookhweele: amana ntthu atakha wiiya namalokozela wa Ojama wa Nnyizinku, onhithajya khaazi yooshapweya. <sup>2</sup> Namalokozela wa Ojama wa Nnyizinku eeye ntthu woohaakanyere-liwi ethu, eeye nlume wa wiiyana muukha mmote, woojiinanel, woojiitthaaza, wooshitahiwa, woomakeleya na ankhitiraaye osomisa. <sup>3</sup> Ahiiye ntthu woohapaliwa ama woohusuti, eeye ntthu woovilela na wa heeri. Ahiiye ntthu wontuvela nzurukhu. <sup>4</sup> Eeye ntthu wa weettet-tisa vaje vawe saana, wooshututeliwa pi aanaawe na wooshitahanana. <sup>5</sup> Nkhama ntthu khaneettettisa saana vaje vawe, onlokozela toovi ojama wa Nnyizinku? <sup>6</sup> Namalokozela wa Ojama wa Nnyizinku ahiiye nt-thu anttaaye onjuwaru Yinsa, maana enwaheya ompattha ojikhupali, khukwelana ophukiwa otthuupo aphukiweeyo Sheethwani. <sup>7</sup> Apho, namalokozela wa Ojama wa Nnyizinku eeye ntthu wooshitahiwa pi atthu apale ooiiyi a Ojama wa Nnyizinku, yoori ahikwele mmiraakho za Sheethwani eeya wootaraweya.

*Anamarumeyela a ojama wa Nnyizinku*

<sup>8</sup> Khwa nanna ethiipo anamarumeyela na-yo eeye atthu ooshitahiwa, ahiiye amwanomwaano, ahiiye oohapaliwa wala oowaatuvela opattha fwayita yoohiiyi ya haakhi. <sup>9</sup> Eeye atthu oohikheetiwi pi rooho zaya na oojilipisana mwentto wa amini athoonyeziweeyo ti Nnyizinku. <sup>10</sup> Na-yo ahinenkhiwe orumeyela ana yawooniwa khapula mwentto aya, amana ahoonaniwi mwentto wootakhala phi aninkhiwaavo orumeyela. <sup>11</sup> Khwa nanna ethiipo na-yo aakha anrumeyelaaye eeye ooshitahiwa, eeye atthu oohittakhuli pure, oosuluheya na awaamineya khwa zooshi. <sup>12</sup> Anamarumeyela eeye alume awiyyana muukha mmote, oowaalela aanaaya saana na aweettettisa vaje vaya. <sup>13</sup> Amana arumeyela saana ampattha shitaha khuluyeene na okhomaala nkaththi wa amini ari-naaye na Yinsa Al-Masihu.

<sup>14</sup> Kiniwaatikhela weeyo Timootiyu warakha eti, keekeselaka oteela wuuthotola nasaapi, <sup>15</sup> ila amana kirupaza, warakha eto entta owu-za nanna yoojeettettisa vakathi wa Ojama wa Nnyizinku. Opu wi-iyieeyo kerezha ya Nluku Woohaayi, nripu na nchina l'ookhweele. <sup>16</sup> Khaavo hatha ntthu mmote antakhaaye okheeti yoori etile Nnyizinku athoonyeziyeeyo monkoni wa Yinsa Al-Masihu ti yootikinisa:

Ye aajithoonyeziye nkhamma pinaatamu  
khuhakikhiwa ti Rooho Ttakatthiifu,  
khooniwa pi malayikha,  
khulaleyiwa tuniya zooshi,  
khukhupaliwa voolumwenku,  
khuweziwa pinkuuni nkaththi wa nuuru.

**4***Ohirimiziwa wa Timootiyu*

<sup>1</sup> Rooho Ttakatthiifu enlupa saaneene yoori omwiisho anlawa atthu akina alikhe amini, asiilezaka nafusi zoottettekha na masomi a masheethwani. <sup>2</sup> Masomi aya apo anlankha mmakhono wa manaafikhi

na anamahata, ariina rooho zoolukula ahinjuwaaye ethu yootakhala wala yooshapweya. <sup>3</sup> Yo aniwooza atthu yoori oralana mwiikho na vitthu-zoojiwa kinoko zaya haraamu. Vitthu-zoojiwa epile Nnyizinku aphattucha yoori apale animwaaminaaye na anjuwaaye haakhi, aje anshukhurwelaka. <sup>4</sup> W'eekhweele, epile Nnyizinku aphattuchiyeeyo pi zooshapweya zooshi, ehiyeye hatha moote enthanyiwaaye amana yiya yoopokhereliwa wonshukhurwelavo Nnyizinku. <sup>5</sup> Vitthu-zoojiwa zaya epo zinhalaalishiwa ti ntakhuzi la Nnyizinku na lompa.

### *Karumeya woororomeleya wa Yinsa*

<sup>6</sup> Amana weeyo owaanozela attwiizo mattakhuzi apa, oniiya karumeya wa Yinsa Al-Masiihu wookemaani, ojilipisanaka mattakhuzi a amini na masomi ookhweele apa olottiyeeyo. <sup>7</sup> Masomi oovonyeya na hantisi zoololo ojiwerawerisane. Ojikhomaaze na emaani. <sup>8</sup> Okhomaaza makhonkolo fwayita yaya vattithiiru, ila emaani ti ye eriina fwayita khwa zooshi, maana entana nroromelo w'oohaayi otthuupo na aahera. <sup>9</sup> Mattakhuzi apa pi awaamineya na ansuhi okhupaleliwa. <sup>10</sup> Ti eto ninjuumanisaaye na okhola khaazi mwaasa yoori nroromelo etthu nattha wa Nnyizinku Woohaayi. Ye Namusuru wa anaatamu ooshi, haaswa-haaswa khwa apale animwaaminaaye.

<sup>11</sup> Mattakhuzi apa ohirimize na osomise. <sup>12</sup> Hatha ntthu mmote ahitarawu oshaapu awo, ila khwa ottakhula wawo, menttezi awo, pheta, amini na wookemaanivo wiiye nthoonyezo wa anamwaamini. <sup>13</sup> Vakathi wa anamalottela, mpakha miiyo ota, olipane osoma, ota-fusiri na osomisa Nttakhuzi la Nnyizinku. <sup>14</sup> Wakathi waattheeliweeve makhono pi attunkhulu veeshwa vawo olompelaka, Nnyizinku nkaththi wa Rooho Ttakatthiifu awinkha tthuvo. Ohisahawu orumeyela.

<sup>15</sup> Vitthu epi weettettise saana na ojilipisane ethiipi yoori okhomaala wawo nkaththi wa amini wiiye wa wooniwa pi atthu ooshi. <sup>16</sup> Ojiinanele weeyo na wiyanne phoole na mwentto opu onsomisaaye, vitthu epo ojilipise oretta. Amana okhanyarela oretta ethiipo, ontta ojuusuru weeyo na apale anuusilaaye.

## 5

### *Nanna yoowaatthantta anamafweliwa pi amanna zaya*

<sup>1</sup> Nlume wa wuuziti owula ohisala ommaruwela, ila onlipisele saana nkhamma papaawo, mashaapu nkhamma attwiizo, <sup>2</sup> aakha a wuuziti owula nkhamma amamazo, na aamwari nkhamma alupuwo wookemaanivo.

<sup>3</sup> Owaatthantte aakha oofweliwa pi amanna zaya, apale khweele ahina ntthu woowaatthantta. <sup>4</sup> Ila nkhamma owaapho namafweliwa ti mannawe ariina aana ama atuulu, atthaapo mwanzo asome mwentto wa tiini antthanttaka jamaayaya. Ethiipo apapazaya phi aniwaa-riphaavo. Eto etthu enintuvelaaye Nnyizinku. <sup>5</sup> Muukha woofweliwa ti mannawe, woohiina ntthu wontthantta, nroromelo awe onttha wa Nnyizinku, akhanyarelaka olompa avekaka waawunikha nthana na osikhu. <sup>6</sup> Ila otule anjitupweezaaye nkaththi wa tuvela z'oolumwenku, hatha nkhamma ori haayi oniiya woofwa. <sup>7</sup> Owaarume oretta ethiipo theenya, yoori vakathi vaya ehooniwevo paathuli. <sup>8</sup> Ntthu amana ajamaaze haaswa-haaswa mamaawe na pipiyaawe ahiwaatthantti, akathala epaata yawe na oninziti kaafiri.

<sup>9</sup> Ahaatikhiwe nwarakha yawiinaneliwa namafweliwa ti mannawe muukha woohiina nyaakha siithiini na eeye muukha araliweeyo nlume moote paasi. <sup>10</sup> Amana eeya muukha woojuwanwiwa oretta vitthu zooshapweya, woowaalela saana aanaawe, woomakeleya, amana eeya muukha aari woosakaaye moolu a atthu oottakatthiifu a Nnyizinku, aari owaawunakaaye anamathowiwa na aari okholakaaye khaazi zooshi zooshapweya, othuuto ti aatikhiwe nwarakha ya anamafweliwa pi amanna zaya.

<sup>11</sup> Aakha awiiya anakhinzi nwarakha ya anamafweliwa pi amanna zaya ohiwaatikhemo, maana amana tuvela zaya zizitiojinkha mmakhono wa Yinsa Al-Masiihu, antakha oraliwa. <sup>12</sup> Khwa nanna ethiito, antta ojipaththisa paathuli mwaasa wookattha wahati aya opule wamwanzo aarettaniyeeyo Nnyizinku. <sup>13</sup> Theenya antta ojinozela oviliwa, weettetta nyuupa khwa nyuupa, khahiyoviliwaru paasi, ohankawaani, waapa na ottakhula vitthu zoohifwayi. <sup>14</sup> Apho, kintumerela yoori anamafweliwa pi amanna zaya apale eeyiye anakhinzi araliwe, eeyane aana alokozele vaje vaya, ahimwinkhe kiphenyo atuwi etthu yoowaalupeza vitthu zootakhala. <sup>15</sup> Akinoko aya apathuli anlotta Epiliisi.

<sup>16</sup> Muumini amana eeyana jamaaye woofweliwa ti mannawe, ona yontthantha, ahinlikhele Ojama wa Nnyizinku. Alikhe yoori owahi owaatthantta apale akina oofweliwa pi amanna zaya ahina ntthu woowaatthantta.

### *Monkoni wa attunkhulu oojama wa Nnyizinku*

<sup>17</sup> Attunkhulu apale ankholaaye khaazi saana, Ojama wa Nnyizinku ona yoowaashitahi swaafu piiri, haaswa-haaswa apale antafusiraaye na apale ansomisaaye. <sup>18</sup> Nttakhuzi la Nnyizinku linlupa yoori: "Milomo za mompe ettukuttaka tiriku mwihiifuke." Khulupa theenya liraka: "Nakhaazi onsuhi wiyyana phakari yawe." <sup>19</sup> Otule eeyiye ntthunkhulu wa Ojama wa Nnyizinku ohikhupalele ollokoveziwa, aheetteeni opuwa atthu awiri ama attatthu awiiya mashaahiti. <sup>20</sup> Wakhula otule anrettaaye twampi onshowere vakatthi wa Ojama wa Nnyizinku yoori theenya apale akina aya oove.

<sup>21</sup> Miiyo kiniwuza kuulipiselaka channu mmakhono wa Nnyizinku na Yinsa Al-Masiihu na malayikha apale oothawaziwa, kuutumerelaka yoori mattakhuzi apa oshututele, ohiinanelaka wala ohinthawulaka hatha ntthu.

<sup>22</sup> Ohaakuve onthawaza ntthu nkathi wa khaazi ya Nnyizinku yoori oheettemo ntwampi za atthu akina; ojiwerawerise wookemaanivo.

<sup>23</sup> Mwaasa wa ejohojoho yawo na marati apale oniiyanakaaye, ohisala onywa maatiru paasi, osala onywa nenkawu viinyu vattithiiru.

<sup>24</sup> Awaapho atthu akinoko zinooneyaaye twampi zaya ahineeyane paathuli, ila twampi za atthu akinoko wooneya waya ziniiya zoorupaza.

<sup>25</sup> Khwa nanna ethiito na-ye khaazi zooshapweya zinooneya, hatha epile zoohooneyi khazinwahi ojivitha.

## 6

<sup>1</sup> Ooshi apale eeyiye amwiiththaana ambwana zaya ana yoowaashitahi, yoori nzina la Nnyizinku na masomi etthu ahitarawiwe.

<sup>2</sup> Apale ariina mbwana wa wiiya namalottela wa Yinsa, ahilikhe

onshitahi maana ttwiyyaya. Okinoko waya ana yoowaakholela khaazi yooshapweyacha, maana apale ampathelaaye fwayita khaazi etile ankholaaaye yo mamuumini na pi oophetiwa.

### *Pheta ya Nzurukhu*

Mattakhuzi apa osomise na ohirimize. <sup>3</sup> Nkhama ntthu onsomisa mwentto woofwarikhana ohinkholananaaye na mattakhuzi oolikana a Mbwaneetthu Yinsa na mwentto wa emaani, <sup>4</sup> ntthu aya oto tu woojikhupali na woohijuwi hatha etthu. Onaaye olwele wontuvela onyakulisana na okheetisana nkatthi wa mattakhuzi antisaaye nrima, wuumani, mattukhano, waakanyerelana vitthu zootakhala, <sup>5</sup> na oshintana woohilikheleli. Nkhama ethhiipile azowereliyeezo atthu awiiyana akhili za wuntuwanyiwa, eeyeliweeyo haakhi yaya, apo aya anoona yoori tiini etthu enreelisaaye. <sup>6</sup> W'ekhweele, tiini enreelisa channu khwa atthu apale amfurahelaaye epile ariinaazo. <sup>7</sup> Voolumwenku apha khanaataniyevo hatha etthu na khaninthuulavo hatha etthu. <sup>8</sup> Amana niyyana kuwo na etthu-yoojiwa nifurahele ethhiipo. <sup>9</sup> Ila apale aneeke-saaye oreela ankwela muuzayiniwa na mmiraakho za Sheethwani, alottelelaka tuvela zoololo zimpwetechaaye. Etthiipo eniwaatupweeza muuthowelela na nwantipweya. <sup>10</sup> W'ekhweele pheta ya nzurukhu nchina la vitthu zooshi zootakhala. Mwaasa w'oomaashokopho na nzrukhu, atthu akina alikhha epaata yaya khusala ajihoowisa venkivene.

### *Meekhazi omwaamini Nnyizinku*

<sup>11</sup> Ila weeyo, ntthu wa Nnyizinku, vitthu zaya epo owerawere. Weekese weettettisa shariya, emaani, epaata, pheta, ovilela na ojithuza. <sup>12</sup> Wuumane viittha yooshapweya y'epaata, okholelele ohaayi wa mileele. Okhuweleliweeyo n'oolaza oshaahiti wooshapweya wa tukhuru yawo omaasho wa atthu a waatta. <sup>13</sup> Aphano, mmakhono wa Nnyizinku otule aninkhaaye ohaayi zumpe zooshi, na mmakhono wa Yinsa Al-Masiihu, otule alaziyeyo oshaahiti wooshapweya wa tukhuru omaasho wa Pontiyu Pilaatu, miiyo kinuuruma weeyo, <sup>14</sup> yoori otthe nroho nrumo swaafi na woohilokoveziwi hatha etthu, mpakha epuwelelo ya Mbwaneetthu Yinsa Al-Masiihu. <sup>15</sup> Etthu yaya eto Nnyizinku onlawa arettikhanise, amana ofiya wakathi wa khweele.

Nnyizinku othuuto eeyiyeyo wooshapweya na ariina owahi vatulu wa zooshi,

Mfwalume wa afwalume na mbwana wa ambwana.

<sup>16</sup> Ye otthwe khamfwa  
na oniikhala nnuuru ehinaattameyaaye,  
khina anamoone,  
wala anwahaaye omoona.

Ottithimisiwa wiiye Waawe na owahi khwa mileele. Amiina.

<sup>17</sup> Monkoni wa mathaajiri voolumwenku apha, owaahirimize yoori ahisala ajinkhelela, wala thwaama zaya ahithe nkatthi wa maali epile zoohilipaneyi; ila thwaama zaya atthe wa Nnyizinku, Ye oninkha wa waattavo vitthu zooshi yoori nisala nijirela. <sup>18</sup> Owaahirimize oretta saana na eeye mathaajiri a khaazi zooshapweya, awiiyana rooho yoleva na wiiya atthu anwahaaye omeela epile aniiyanaazo. <sup>19</sup> Khwa

nanna ethiito antta wiiyana okhu ninttaawo akhipa yookhomaala, yoori apatthe ohaayi wa khweele.

<sup>20</sup> Weyo Timootiyu! Etile olkheliweeyo otthe nroho. Owerawere mattakhuzi oololo aninveyisaaye Nnyizinku na akhili zoovonyeya zinooniwaaye nkhamma ojuwa ila zihiyeeni. <sup>21</sup> Akinoko aari olottelaaye akhili zaya epo, alaamo mwipaata.

Rehema ya Nnyizinku yiye vamote na mweeyo.